



Умидимиз юлдузларига

# Тоҳир МАЛИК

## Саодат саройининг калити

“Одамийлик мулки”га  
доир сұхбаттар

*Биринчи китоб*



ТОШКЕНТ  
2016

**УҮК: 821.512.133-3**

**КБК: 84 (5Ү)6**

**Т-22**

**Малик, Тоҳир**

Саодат саройининг калити (Одамийлик мулкига доир сұхбатлар). Биринчи китоб / Тоҳир Малик. – Тошкент: Янги аср авлоди, 2016. – 420 б.

ISBN 978-9943-27-251-4

Ёзувчи Тоҳир Маликнинг ахлоқ-одобга доир рисолалари китобхонларга яхши таниш. Унинг уч фаслдан иборат “Одамийлик мулки” ахлоқ китоби күпчилик дикқатини тортди. Бу рисола асосида тартиб берилган “Келинлар дафтариға”, “Қуёв бола, сизга айттар сұзим бор” китоблари ҳам нашр этилган. Адаб китобхонлар, хусусан, ота-оналар, мактаб, лицей, колледж устозларининг таклифларини инобатта олиб, “Одамийлик мулки” асарини қисқартыриб, таҳрир қилиб, ўсмирларнинг талаби ва дидига, қизиқишига мослаган ҳолда қўшимчалар киритиб, “Умидимиз юлдузларига” тарзида нашрга тайёрлади. Китоб гарчи ўсмир-ёшларга мўлжалланган бўлса-да, ардоқли ота ва оналар, қадрли устозларнинг ҳам танишиб чиқишилари мақсадга мувофиқдир. Агар суюкли фарзандлари ва шогирдлари билан бирга мутолаа қылсалар, фикрлашсалар нур аланнурдир.

**УҮК: 821.512.133-3**

**КБК: 84 (5Ү)6**

ISBN 978-9943-27-251-4

© Тоҳир Малик, “Саодат саройининг калити”. Биринчи китоб. “Янги аср авлоди”, 2016 йил.

## **БИРИНЧИ БҮЛİM ИШҚ-МУХАББАТ**

**«Бандаларимнинг ибодатлари  
ичида менга суюмлироғи – менинг  
йўлимда яхши амалларга тарғиб  
ҳамда холис насиҳат қилишидир.  
(Ҳадиси құдсийдан)**

**«Ё Аллоҳ, мени гўзал ахлоққа  
ҳидоят қил. Сендан ўзга мени чи-  
ройли ҳулққа ҳидоят қилолмас. Ё  
Аллоҳ, ёмон ҳулқни мендан узоқ-  
лаштири. Сендан ўзга буни қилол-  
мас».**

**(Пайгамбаримиз алайҳиссалом-  
нинг намозни бошлиашларидан  
олдинги дуолари)**

**«Шундай банда бор, чиройли ҳу-  
лқи билан жаннатнинг баланд да-  
ражаларига етади, гарчи обид  
бўлмаса ҳам. Шундай банда бор,  
ёмон ҳулқи сабабли дўзахнинг энг  
қўйи қаватларидан жой олади,  
гарчи обид бўлса ҳам».**

**Анас ибн Молик**

**Бисмиллаҳир Роҳманир Роҳийм.**

Бизларни яратган, бу кунларга етказган, фарзанду набиралар берган раббимиз Аллоҳга беҳисоб-беҳисоб равища ҳамдларимиз бўлсин. Аллоҳ Таолони поклаб ёд этганимиз ҳолда бермиш энг улуғ неъматлари – фарзанду набираларимизни нопок назарлардан, қора ниятиларнинг қора ниятларидан, ёмонларнинг зулмидан ҳамиша асраромини, яхшиларга яқин қилиб, соғлик ва омонлик, иймон ва диёнат билан вояга етмоқликларини насиб этмоғини сўраб дуолар қиласиз.

## **Кўнгил садоматлиги**

Фарзандлар ҳақига дуо қилиб сўз бошлашимиз бе-жиз эмас. Мазкур рисолани қўлга олган сиз – азизлар-нинг бирингиз ўн тўрт – ўн беш ёки ўн олти – ўн сак-киз, балки ундан кам ёки кўп ёшдадирсиз. Қутлуғ хо-надоннинг суюкли ўғил-қизи ё набираси ёки эвараси-дирсиз. Ардоқди отангиз ва онангиз ёки табаррук бобо ёки бувингиз сиз туғилган кунингиз атрофидагиларга суюнчилар улашганлар. Худога шукр қилиб, сизларга баҳт тилаганлар ва ҳануз ҳар онда сизга саодат тилай-диларки, биз бу дуоларга «омийн!» деб қўшиламиз. Кичиклигингизда сизни «тойчоғим», «асалтойим» деб эркалаганлар. Бугун эса «Умидим юлдузи», «Орзуим чечаги», дадаларингиз ҳатто «Белимнинг қуввати» деб алқайдилар. Набираларим ёшида бўлганингиз учун, уларга қўшилиб, мен ҳам сизларга «умидимиз юлдуз-лари», деб мурожаат қилишни маъқул топдим. Чунки сиз фақат биргина оиланинг фарзанди эмассиз. Сиз – Ватаннинг, миллатнинг умид юлдузларисиз.

Хонадонда фарзанднинг туғилиши – улуғ неъматга эга бўлиш бекиёс баҳт ҳисобланади. Сиз туғилган онда отангиз билан онангизнинг, бобонгиз билан бувингизнинг ва бошқа қариндошларингизнинг қалбларида ширин бир умид ҳам туғилган. Сиз аста-аста улфай-дингиз, атак-чечак қилдингиз. Энди қаддингизни да-дил тутиб юрувчи полвон йигитчаларга, гўзал қизчаларга айландингиз. Хонадонингиз эса сиз билан бирга туғилган, келажакда ушалажак умид билан яшаяпти. Бу умид дуоларда дилдан тилга кўчади: «Фарзанди-миз фалон-фалон мартабаларга эришсин...» каби ни-ялтлар айтилади. Сиз улғая борганингиз сайин қалба-ги умид қанотларини кенг ёяверади.

Ана шунда... Худо кўрсатмасину, аммо кимларнинг-дир қалбларидағи умид қанотлари бехос синади. Ку-тилажак баҳт қора тунга, шодлик эса қайфуга айланади.

Ана шунда... «Бу фожиага ким сабабчи?» «Фожиа қачон бошланган эди?» каби саволларга жавоб излаш бошланади.

Қалбда ширин умиднинг туғилгани яхши. Хайрли дуолар янада яхши. Бироқ, сиз – суюкли фарзандларимиз, умидимиз юлдузларининг баҳтиёрги учун бу кифоя эмас.

Ҳеч ким боласи туғилганида «Болам ўғриликни касб этсин» ёки «Гиёҳвандларга қўшилсин», деб умидвор бўлмайди. Дуо ҳам қилмайди. Афсуски, айрим ҳолларда яхши умиди ушалмай, кутмагани бир фожиага йўлиқиб, доғда қолади.

Умидимиз юлдузларининг ҳозирги ҳолатларини илмий тида «ўтиш даври» дейишади. Мен эса болаликдан ўсмирилик оламига ўтишлини – кишининг қайта туғилиши, дейман. Чунки энди фақат атрофни кўрадиган одамча эмас, бу борлиқда ўзини ҳам кўра оладиган, фикрлайдиган шахс туғилади. Биринчи туғилишда гўдак чинқириб гўё дейдики: «Мана, мен ёруғ дунёга келдим. Қувонинг ва бундан бўёғига мен учун ташвишлар чекинг. Мен ҳозирча сизнинг ёрдамнингизга муҳтожман. Бир дақиқа бўлсин, мени унуманг. Мени авайланг, ҳар бир нафасимни кузатиб, бешигим ёнидан жилманг. Сизларнинг меҳринингизга, шафқатингизга эҳтиёжим бор! Сал ўтмай мени атак-чечак қилиб юргизинг, йиқилсан – турғизинг, бошимни силанг...» Одам иккинчи бор туғилишида бутунлай ўзгача оҳангда дейдики: «Энди мен қанотларингиз остидаги полопон эмасман, ҳадеб қўлимдан ушлаб етаклайверманг, ҳадеб изимдан юраверманг. Босган қадамларимга ишончсизлик билан қараманг. Йўргакда тутишга интилманг, бешикдаги ҳолимни унүтинг. Мен мустақил одамман. Қўлимдан етаклашга уринманг. Мен рўпарамда баланд тоғни кўриб турибман. Унинг юксак чўққилари бор. Бу тоғдан ўзим мустақил равищада ошибб ўтмоқчиман. Бу – менинг ҳаётдаги мақсадим. Мен чўққига кўтарилишни бошлайпман. Ҳар бир қада-

мим билан мен юқорига күтариляпман. Рұпарамдаги уғқ әннен тобора көнгайяпты. Янада күпроқ одамларни күрятпман. Уларни тушунишга ҳаракат қылаңыз. Мәхр үрнига адолатсизлик, илм үрнига жоқиллік, шафқат үрнига зулмни күрганимда құрқиб кетяпман. Мен бу борлықта таянчға мұхтожлигимни ҳам сезяпман. Мен ақдли, доно, адолатли одамга зорман. Мен ёнимдаги күчли ва донишманд одамга сұянсанғина чүққига чиқа оламан. Аммо мен буни ҳеч кимга айта олмайман. Мұхтожлигимни тан олишим – мен учун исход. Ҳамма мени «мустақил қадам ташловчи одам бўлиб етилибди, чүққини ўзи забт эта олади», деб ҳисоблашини хоҳлайман».

**Умидимиз юлдуздары**, ўсмирик оламига ўтганингизда, эҳтимол, сизнинг онгингизда ҳам шундай фикрлар уйғонгандир. Лекин диддагини тилга күчиришга уялгандирсиз. Турли учрашувларда катта ёшдағилар ўсмиirlар ва ёшларни танқид қилиб улардан нолийдилар. Мен эсам ажабланаман: биз нима учун сизларни ёмонлашимиз керак? Агар сиз ёмон бўлсангиз, демак, аввал бошда биз ёмон эканмиз. Чунки сиз бизнинг фарзандларимизсиз. Сизларни биз тарбия қилдик.

Тўғри, ўсмирик оламига қадам қўйганингизда хатти-ҳаракатингизда жиддий ўзгаришлар кузатилади. Инжиқроқ, қайсарроқ бўлиб қоласиз. Дарс тайёрлагингиз ҳам келмай қолади. Зерикарли ишларни бажаришга тоқатингиз етмайди. Ҳатто асабийроқ бўлиб қоласиз. Баъзан уйда бақириб ҳам юборишингиз мумкин. Ота-онангизнинг бу ҳолатингизга тўғри тушунишларини истардим. Бу ҳолатингиз ёмон тарбиянинг бошланиши эмас, балки табиий жараёндир. Ўсмирикдаги иллат бўлиб кўринган ҳолатлар аста ўнгланади. Ота-онангиз бир масалани мұхокама қилаётганларидан ўз фикрингизни билдирангиз «Сен ҳали ёш боласан, бунақага ақдинг етмайди, аралашма», деб қайириб ташлайдиларми? Агар бир ишни нотўғри бажар-

сангиз «Кап-катта бўлиб қолдинг-ку, шуни эпламайсанми?!» деб танбеҳ берганларида «Қайси бири тўғри: ёш боламанми ё кап-кattаманми?», деб ажабланишингиз ўринли. Лекин ота-онангиздан қаттиқ ранжиманг, уларга ўчакишишманг. Улар сизни ёмон йўлга кириб қолишингиздан чўчиғанлари учун ҳам доимо назорат қиладилар, танбеҳ бераверадилар.

Одамнинг умр йўли узун. Бир одамнинг йўли иккинчисига ўхшамайди. Ҳатто ака-укалар, опа-сингилларникида ўхшашлик йўқ. Умр йўли, хоҳ узун, хоҳ қисқа бўлсин, силлиқ, атрофи гулзор чиройли эмас. Тошли йўллар, тиконли йўллардан баъзан яланг оёқ юришга тўғри келади. Бу азобга кўпинча одамнинг ўзи сабабчи бўлади. Умр йўлида битта бурилиш нуқтаси мавжуддир. Қайси йўлга бурилишга ҳатто бир қувончли ёки нохуш воқеа туртки бўлиши мумкин. Билишингиз жоизки, ҳеч бир ота-она фарзандининг ёмон йўлларда санқишини истамайди. Диққат қилайлик-чи, ҳаёт йўлининг қайси нуқтасида нохуш бурилиш содир бўлди? Бу бурилишни ким биринчи бўлиб пайқаши, ким биринчи бўлиб чора кўрмоги жоиз эди? Ота-онами, мактабми, милициями ё қўни-қўшниларми?

Тиббий жиҳатдан, аниқроғи ирсият қонунлари доирасида кузатадиган бўлсак, ота-оналарда мавжуд хафақонлик, сил, қанд каби хасталиклар орадан йиллар ўтиб фарзандда бош кўтаради. Ота-онанинг ташки кўринишлари, овози, ҳатто юриш йўсини ҳам фарзандга кўчади. Шундай экан, феъл-атвори ҳам ўтиши маълум. Айни шу ўринда баҳсли мулоҳаза уйғониши мумкин: демак, ўрининг боласи ўғри, тўрининг боласи тўғри бўларкан-да? Фарзанд ота-онасининг ёмон иллатларидан кутула олмас экан-да? Мен бу даъвони инкор этувчилар қаторидаман. Ҳиндларнинг «Дайди» деган бир фильмни бўларди. Раж Калтурни илк марта танитган бу фильмни ўтган асрнинг эллигинчи йилларида одамлар йифлаб-йифлаб томоша қилишарди. Фильмда муҳим ижтимоий масалалар кун тартибига

қўйилган эди. Жага исмли ўғри судъянинг «Ўғрининг боласи ўғри бўлади» деган шиорини йўқقا чиқариш учун унинг ўғлини ўғирлаб кетиб, оқибатда ўзи каби ўғри қилиб тарбиялади.

Шоирлар ҳаётни гулшанга қиёслашади. Чиндан ҳам ёмонлардан холи ҳаёт бекиёс даражада гўзалдир. Аммо афсус шуки, бу гулшан орасида тиканаклар ҳам мавжуд. Диёнат олами билан ёнма-ён шайтанат олами ҳам яшайди. Улар орасида мустаҳкам девор йўқ. Адашган банда, айниқса, ёш чоғида шайтонлар етоворидаги оламга ўтиб қолиши мумкин. Бу оламнинг фақат битта йўлаги бор. Бу йўлак ҳар қандай одамни хорлик даштидаги ўлим чангалига олиб боради. Гапимнинг исботи учун диққатингизни нохуш бир манзара баёнига қаратаман:

...Қуёш қаердадир тоғ ортидан, қаердадир чўл адоридан, қаердадир асрий музлар орасидан бош кўтарили. Қаердадир дарахт **кокилларини** ўйнаб, биллурий булоқ сувларига тўйиб олгач, хонадонларга мўралайди. Қаердадир қуриб-қақшаб ётган тиконларни, чанқоқ қум барҳанларни ялаб ўтиб, одамлар яшайдиган ерларга ошиқади. Қаердадир асрий музликлар орасида паноҳ тополмай, одамзотга дуч келишдан умидини узиб, тезроқ кўз юмишга ошиқади.

Баҳор ҳам шундай. У илиқ шабада нафасида, қалдирғоч қанотида, турналар солган аргимчоқда кириб келиб, ташна кўнгилларга тириклик сувини беради. Бироқ...

Қуёшнинг тонгдаги, айниқса, баҳор тонгидаги кўркини кўриш барчага ҳам насиб этавермайди.

«Қуёш барчага баравар нур сочади», дейдилар. Ҳақ гап. Бироқ...

Унинг нуридан ҳамма ҳам бир хилда баҳраманд бўлавермайди.

Тиканли сим, темир панжаралар, баланд деворлар ортидан мўралаган тонгги қуёш кўнгилга озод ҳаётдаги каби илиқликини бера олармикан? Тиканли сим-

лар билан ўралган қамоқхона ҳовлисига ҳам баҳор киради, бу ердаги дараҳтлар куртаги ҳам күз очади, сурхчалар барг чиқаради. Аммо, баҳор гашти тиканли симларни ошиб бу ерга ўта олармикан?

Озодлик сўзини бу ерда нондай азиз кўришади. Бу ерда ойлар саналади, кунлар, соатлар саналади.

Ҳар бир лаҳза, соат, кун... уларни озодликка яқинлаштиради.

Ҳар бир лаҳза, соат, кун... уларни исканжага олади, улар ўйламай босилган қадамларини лаънатлаб яшашади.

Бу ер — болалар ахлоқ тузатиш меҳнат колонияси (халқ тилида оддийгина қилиб: «болалар қамоқхонаси» дейилади). Ўн тўрт ёшдан ўн саккиз ёшгача бўлган жиноятчилар жазо муддатларини шу ерда ўтайдилар. Бу ерга автомат тарзда очилиб-ёпиладиган темир эшиклардан кирилади. Бир хил кийим кийган, кўзларда мунг, баъзан алам яширган болалар бу жойга бегона одамни дарров илгашади.

Мен бу колонияга бир неча маротаба борганман. Бу ердагиларнинг барчаси ҳам сухбатдош бўлавермайди. Айримлари гаплашади, баъзилари эса нигоҳини бир нуқтага тикиб тураверади. Табиатан шундайми улар ё терговчиларнинг сўроқларидан кейин кўрқиб, шунаقا бўлиб қолишганми? Балки терговда очилмай қолган сирларини бой бериб қўймаслик учун тиллари тиши ҳатламас? Билмадим. Билолмадим. Ҳар ҳолда улар менга жумбоқ бўлиб қолишган. Уларнинг айримларини сиртдан танийман. Крандан сув ичиб, алантлаб қўйган бола қўшни кампирни «тўполон қилма, чекма» деб тергагани учун ўроқ билан чопиб ташлаган. Ҳозир нимадан чўчиб аланглади: кўзига ўша кампир кўриндими ё? Кичкина бола эканида ўша аёл уни кўтариб суйган, эркалаган, боғидаги мевалар билан сийлаган. Оқибатда эса... бир гапи учун қонга беланган. Ҳозир бу бола ўроқ кўтариб кампирга ташланганини эсладими ё биринчи марта наша чекканиними?

Анави дарахтга суюниб турған бола катта ўғриларга құшилған. Катта ўғриликтер бұлаёттан дамда балқи у шу ҳолда — дарахтга суюниб пойлоқчилик қилғандыр? Балқи ҳозир унинг күз олдига орқа кураги остига пичноқ санчилған қоровул келгандыр? Ахир қоровулни у гапга солиб, чалғитиб турған эди, унинг күз олдіда санчишди пичноқни! Бу даҳшат исканжасидан у узоқ йиллар қутула олмаса керак.

Навбатдаги учрашувда бир ўсмир адабиёт ҳақида менга күп савол берди. Мен дедимки: «Саволларингга қараганда ақдли болага ўжшайсан, бу ерга қандай тушиб қолдинг?» У бир оз сукут сақлаб, кейин паст овозда «Үртогимни билмасдан ўлдириб күйдим», деди. Бу ерда деярлы ҳамма шундай жавоб беради. Уларнинг «бilmасдан» дейиши тұлалигича ёлғон эмас. «Тұлалигича» дейишимнинг сабаби: улар шундай жиноятнинг оқибатини билишади-ю, зарур нұқтада ўзларини тұхтатиб қола олишмайды.

Адашған болалар билан ҳар учрашганимда ўйлайман: бугун тұтқунликда ўтирганлар бундан ўн йилнинг нари берисида мактабнинг биринчи синфида ҳам отоналарнинг, ҳам устозларнинг күзларини құвнатыб ўтиришарди. Уларнинг яқин келажаклари нурсиз, қора бўлишини ким ҳам ўйлаган ўша дамда. Бугун мактаб остонасини илк бор босиб ўтган ширин-ширин болаларнинг ҳаммалари баҳт күчаларидан юриб кетадиларми? Бу саволга ҳеч ким аниқ жавоб бера олмайды. Лекин бир нарса аниқ: у ёки бу болани адаш ўлдан сақлаб қолиш мумкин.

Машхұр ёзувчи Мирзакалон Исмоилий олтмишинчи йилларда «Бизнинг роман» деган қисса ёзған эдилар. Үнда ота-онаси эркалатиб юборған, тарбияси бузила бошлаган боланинг ҳаёти акс эттирилған эди. Орадан йигирма йил ўтиб, қариган чоғларыда шу асарни давом эттириш истаги туғидди. «Шұх Тұлавойни шумликка ўтиши даврида қолдирған эдим. Шұхлик шумликка айланса нима бўлишини ўсмирларга кўрса-

тиб қўйишим керак», дедилар. «Шумлик ўсмирни жи-  
ноятга бошлайди, жиноят оқибатида эса қамоққа ту-  
шади. Сиз маҳкумлар билан кўришсангиз яхши бўлар-  
ди», дедим. Бу таклиф маъқул келиб, якшанба куни  
ахлоқ тузатиш колониясига учрашувга бордилар. Кеч-  
ки пайт қайтганларида таассуротларини сўрадим.  
Бирдан кўзлари ёшланди: «Сен айтгин, ўша болалар  
қамоқда ўтиришлари керакми? Ота-онаси бағрида  
яйраб-яшнаб, мактабларда илм олиб, баҳтли ҳаёт ке-  
чириш ўрнига нега бу жойга тушиб қолиши? Нега?  
Нега?!» деб йифладилар. Қаранг, «халқ душмани» деган  
туҳмат билан қамоқда ўтирган, тўрт йил урушда бўлиб,  
турли даҳшатларни гувоҳ бўлган ёзувчининг юраги  
колонияда ўтирган болаларни кўриб эзилиб кетди.  
Ўша кундан бошлаб янги асарни ёзишга киришдилар,  
номи – «Ўзингдан кўр». Менга берган саволларига шу  
китобда ўзлари жавоб қайтардилар. Вафотларидан сал  
один асарни ниҳоясига етказдилар. Бу асар ёшларга  
васиятнома бўлиб қолди, десам ҳам бўлади.

Кириш сўзларидан сўнг мақсадга ўтсам: юқорида  
ўсмирлик ва ёшликка хос айрим иллат ва камчилик-  
ни тилга олдим. Шулардан яна бири – кўпчилигингиз  
насиҳатни ёқтирамайсиз. Балки ҳар кимдан, ҳар то-  
мондан бетўхтов насиҳатлар эшитаверганингиз учун  
безиб қоларсиз? Албатта, ҳаддан ошмоқлик акс таъ-  
сир беради. Одам ҳар куни палов емоққа мажбуrlан-  
са, бу таом қанчалик ёқимли бўлмасин, икки-уч кун-  
да меъдага тегади. Лекин насиҳатлар оқимининг сира  
тўхтамаслигига кўнишиб яшашингиз керак. Ёшингиз  
саксонга етганда, илоҳим ота-онангиз умрига барака  
берсин, улар сизни тергашни, танбеҳ беришни, наси-  
ҳат қилишни тўхтатишмайди. Чунки сиз минг ойнинг  
юзини кўрган бўлсангиз-да, ота-онангиз учун бола  
бўлиб қолаверасиз. Ўз ўрнида олтмиш ёшли ўғлингиз-  
га сиз ҳам насиҳат қилишдан тўхтамайсиз... Бир ла-  
тифа бор: кўчада соқоли кўксига тушган қария йи-  
лаб бораётган эмиш. «Сизни ким ранжитди?» деб сўра-

шибди. «Дадам», дебдилар қария. «Ия, неча ёшдализ, дадангиз неча ёшдалар?» деб ажабланишибди. «Саксондан ошдим, дадам бир юз беш ёшдалар», деб жавоб беридилар. Бир юз беш ёшли отага бориб «Ўғлингизни нега ранжитдингиз?», деб сўрашган экан, у табаррук отахон дебдиларки: «Кавушларини бесўроқ кийиб олгани учун мен дадамдан дакки едим, шунинг аламини олдим». «Дадангиз неча ёшдалар?» «Дадам бу йил қовун пиширида бир юз ўттиз бешга кирдилар»...

Ўгитларга бўлган муносабатларингизни инобатга олиб, азиз умидимиз юлдузлари, мен сизларга панднасиҳат ёзмоқчи эмасман. Шарафли ҳадисда айтиладики, «Болангиз беш ёшга тўлгунча у подшоҳ, сиз эса қул мақомидасиз, барча инжиқларига чидайсиз. Ўн беш ёшга тўлгунча эса сиз подшоҳ, у эса қул кабидир, барча талабларингизни бажаришга мажбурдир. Болангиз ўн беш ёшга тўлганда у билан дўст мақомида муомала қилинг». Шунга асосланиб, мен сиз билан дўстона сухбат қурмоқчиман. Сизнинг билимингизни, зеҳнингизни эҳтиром қилганим ҳолда айтаманки, ҳаётда ҳали яхши тушунмайдиган жумбоқларингиз бор. Масалан, бир либос сизга ёқади, шуни кийгингиз келади. Лекин ота-онангиз йўл бермайди. Сочингизни хўрознинг тожиси каби турмаклашни истайсиз, бунга ҳам ижозат йўқ. Билагингизга аждар суратини татуировка қилиш ҳақидаги истагингизни ҳатто эшитишни исташмайди. Сиз эса ҳайронсиз: «Фалончи-фalonчи шундай юрибди-ку, нега менга мумкин эмас?!» деб гашланасиз. Ота-онангиздан, устозларингиздан норози бўласиз, ҳатто нафратланасиз. Сизга дастлабки маслаҳатим шуки, то умрингизнинг охиригача унутманг: сизга ёққан, маъқул келган келган нарса (масалан, кийим) уйингиздагиларга ва жамият аъзоларига ёқмаслиги мумкин. Агар уларни инкор этмоқчи бўлсангиз, кўп қийналасиз, шу боис жамият талабларига қулоқ солиб яшаган афзалроқ. Ҳар ҳолда жамият талаблари бирданига бир кишининг хоҳиши би-

лан пайдо бўлмаган. Халқимизнинг минг йиллик урфодатларида келиб чиққан. Шу боис ҳам жамият та-лаблари қадрлидир, зътиборлидир. Суҳбатимиз жара-ённида шу масалаларга дикқатингизни қаратиб, бир-галашиб ечишга уриниб кўраман. Агар ҳаёт жумбоқ-лари тўғри ечилса, келажагингиз нурли бўлади. Барча жумбоқларни ечиб беришга ваъда бермайман. До-нишмандликка ҳам даъво қилмайман. Чунки қай би-рингизнинг отангиз, онангиз, бобонгиз, бувингиз, ама-кингиз ёки тоғангиз менда кўра билимлироқ, мендан донороқ эканини ҳис қилиб турибман. Бу китобда ўқиганингиз улардан эшитганларингизга бир илова бўлар, деган умиддаман.

Сиз бугун мактабнинг юқори синфларида ёки ли-цей-коллежларда билим оляпсиз. Дарслекларингизда, айниқса, она тили ва адабиёт дарслигида тарбияга доир мисоллар кўп. Қадим донишмандларнинг асарлари билан оз бўлса-да танишгансиз. Нима учун қадим-қадимдан тарбияга жиддий аҳамият берилган, нодир асарлар битилган?

Аслида ҳар бир одам биринчи галда ўз-ўзини тар-бия қилиши керак, деб ўйлайман. Ҳар биримиз ўз-ўзи-мизни, хусусан, кўнглимизни идора қила билмоғимиз шарт. Ҳазрат Алишер Навоий таъбирлари билан айт-тилса, кўнгил – бадан мулкининг подшоҳидир. Кўнгил-нинг саломатлиги – баданнинг ҳам саломатлиги, унинг нотоблиги – бунинг ҳам нотоблигидир.

Донолар демишларким: «Сен ўзингни кўрмоқ ис-тайсанми? У ҳолда кўзгудаги ташқи қиёфангга эмас, ичингдаги кўзгуга бок». Биз эса... кунда неча бор кўзгу-га қараймиз. Қалбимизга-чи? Одам ёшидан қатъи назар, ҳамиша тарбияга, бошқаларнинг маслаҳатига муҳтожлик сезиб яшайди. Шунда унга донишманд-ларнинг асарлари йўлдош бўлади. Биз ҳам шундай улфайганмиз.

«Аниқки, Биз жин ва инсдан кўпларини жаҳаннам учун яратганмиз, – дейилади Қуръони Каримда. –

Уларнинг диллари бору англай олмайдилар, кўзлари бору кўра олмайдилар, қулоқлари бору эшитмайдилар. Улар чорва кабидурлар, йўқ, улар беақл ва бефаҳмликда чорвалардан ҳам баттардирлар. Ана ўшалар гафлатда қолган кимсалардир». Одамзотни яратган ва тарбия этаётган Зотнинг бу сўзлари бизларни энг муҳим ишдан огоҳ этади. Яъниким, ҳар бир одам қалбига эътибор бермоғи, қалбини кузатмоғи, қалбини ўнгламоғи ва турли руҳий-маънавий касалликлардан сақлашга эътиборсиз экан, унинг билган-бilmagan дардлари янада кўпаяди. Зеро, солиҳ амалларнинг ажри ҳам қалбга боғлиқдир.

Ҳазрат Абу Ҳомид Фаззолий «Мукошафат ул-қуслуб» (Қалблар кашфиёти) китобларида дейдиларки: «Билки, Аллоҳ бир баңдасига хайр ато этмоқчи бўлса, унга ўз нафсининг қусур ва айбларини кўра оладиган басират беради. Кимнингки басирати ўткир бўлса, қусур ва айблари ўзига, албатта, кўринажак. Киши ўз айбларини билганда эса уларни даволаш имконига эга бўлади. Лекин, афсуским, инсонларнинг кўпчилиги ўз қусур ва айбларини кўрмайди. Аҳвол шундайки, баъзан киши бир мўмин қардошининг кўзидағи тариқдай кирни кўради-ю, аммо ўз кўзидағи ёнғоқдай доғни кўрмайди. Кимки ўз нафсининг айбларини кўрмоқчи бўлса, бениҳоя тўғри, басиратли киши билан дўст тутинмоғи жоиз. Токи бу дўст унинг аҳволини, ҳаракат ва атворларини кўз остида тутсин. Зоҳирий ёки ботиний хунук бир феълини кўрса, унга танбех берсин».

Улуғ алломанинг фикрларига қўшимча қилиб де-ишишимиз мумкинки, «басиратли дўст» атамасини китобларга нисбатан ҳам қўлласак бўлади. Бу ўринда китобларнинг энг улуғи, баңдаларга берилган улуғ неъмати – Қуръони Каримни, Ҳадиси қудсийни ва Расууллоҳнинг (с.а.в.) саҳиҳ ҳадислари жамланган китобни ҳамда буларга асосланиб ёзилган ўтмиш доно-

ларининг битикларини назарда тутяпман. Буларни ҳамиша ўқиб юрувчи, тушуниб, тўғри англовчи ва ўқиганларига амал қилувчи киши ҳеч қачон адашмайди.

Қадим-қадимдан одамийликнинг комиллик марта-басига етганлар шундай йўлни тутганлар, дўстларининг насиҳатларига қулоқ солганлар. Фаззолий ҳазратлари таъкид этмишларки: «Одам қанчалик ақлли ва даражага жиҳатидан қанча юксак бўлса, кибр ва ҳаво жиҳатидан шу даражага кичик бўлади. Нафсини энг катта шубҳа остида тутадиган инсон ҳам шудир».

«Лекин, очигини айтганда, бундай хислатларнинг баҳоси ошиб кетди. Жуда оз кишилар бундай феълатворларга эгадирлар. Дўсту улфат, ошна-огайнилар орасида бир-бирига лаганбардорлик қилмайдиганлар, бирининг айб ва қусурларини наридан бери ёймайдиганлар, ҳасад қилмайдиганлар жуда озайиб кетди. Дўст-улфат, ошна-огайнилар ичида, ҳеч шакшубҳасиз, ҳасадгўйлар, гаразгўйлик билан иш юритиб, айб ва қусур бўлмаган бир ҳаракатингни айб ва қусур деб гап тарқатувчилар ёхуд табиий лаганбардорлиги туфайли қусур ва айбларингни юзингга айтмайдиганлар бор. Мана шундай сабабларга кўра Довуд Тоий инсонлардан ажрашиб кетган эди. Ўзидан: «Нега инсонлар билан ош-қатиқ бўлмайсан?», деб сўралганида у шундай жавоб берганди:

– Менга айб ва қусурларимни айтмайдиган инсонлар билан яқин юриб нима қиласман? Эътиқодли кишилар учун энг севимли нарса – бошқаларнинг танбеҳи билан ўз қусур ва айбларидан воқиф бўлмоқдир.

Мана, буюкларимизнинг жавоби!.. Афсуски, бизнинг замонамизда иш терсига қараб кетди. Аҳвол шу даражага етдики, энди бизларга насиҳат қиласдиган, айб ва қусурларимизни айтадиган кишиларни энг ёмон инсонлар ўрнида кўрадиган бўлиб қолдик. Бу – иймонимиз заифлашганининг аломати.

Чунки ёмон феъл-атворлар – чақонгич илонлар ва ча-ёнлардир. Агар либосимиз этагига бир чаён ёпишиб, чақай деб турганда бизга бирор бундан хабар берса, албатта, унга миннатдор сўзларимизни айтамиз, севинамиз ва чаённи чертиб ташлаб, ўлдиришга чоғланамиз. Ҳолбуки, бу чаённинг зарари бадангадир, берадиган азоби эса бир кун, ярим кун давом этади. Ёмон ахлоқнинг қалб соғлигига берадиган зарари эса қўрқинчлироқдир, ўлимдан кейин эса абадий ва ё мингларча йил давом этадиган қўрқуликдир. Шуни биламиزم? Билсак, нечун бирор бизга қусур ва айбларимизни айтса, бундан севинмаймиз, бу қусур ва айбларни йўқотиш билан машгул бўлмаймиз. Аксинча, биз ҳам у кимсага насиҳат қилишига киришамиз ва шундай деймиз:

– Ўзинг ҳам шундай-шундай қиласан. Ўзингнинг ҳам шундай қусурларинг бор!

Унинг насиҳатини шу тариқа қабул этамиш ва тескарисини қилиб, орада душманчилик тугилишига сабабчи бўламиз. Бу ҳол – гуноҳлар кўплиги сабаб бўлган қалб қашшоқлигидан. Буларнинг асли эса иймоннинг заифлигидандир...

Мазкур сатрларни ўқиб «Тўғри гаплар...» дегандирсиз? Ҳа, баракалла! Лекин нима учун қўштироқ орасида баён қилинганига аҳамият бердингизми? Сабаб шуки, бу ақлли гапларни мен тўқимадим, балки Абу Ҳомид Фаззолийнинг китобларидан кўчирдим. Қаранг, бундан салкам минг йил муқаддам айтилган фикрлар буғунги кунга мос келиб турса? Бу нима, асрлар давомида инсонлар яхшилик сари силжимадиларми? Ахлоқ заифлиги то ҳануз сақданиб қоляптими? Йўқ, бундай хуносага бормаслик керак. Бадбинликка берилоқ ҳам ўринисиздир. Ҳар даврнинг ўзига яраша фазилатлари ва ўзига хос қусурлари мавжуд. Бу фоний дунё – имтиҳон дунёси экан, ҳар бир авлод бу имтиҳондан ўзига хос тарзда ўтади. Ҳар бир авлоднинг афзалликлари ва гуноҳлари ҳам бўлади. Шайтон алай-

ҳилаъна то Қиёматга қадар одамзотга душманлик қиласар экан, то Қиёматга қадар унга қарши жанг – руҳий жанг давом этажақдир. Агар бир биродаримизни безори ураётганини кўрсак, унга ёрдам беришга шошиламиз. Аммо не учун шайтон васвасасига тушиб қолган қариндошимизни, синфдошимизни, қўшнимиз ёки дўстимизни қутқаришга шошилмаймиз?

Ҳеч биримизга сир эмаски, адашган бандалар орасида ўзимиз учун энг ардоқли бўлмиш инсонлар ҳам учраб қолиши мумкин. Масалан, бир дўстингиз дарслардан қочиб юргандир ёки наша чекишга ўрганиб бораётгандир. Эҳтимол, у тўғри йўлдан адашганини билар, эҳтимолки, билмас. Лекин унинг адашаётгани сизга аниқ кўриниб турибди. Билмаганларга билдириб қўйиш вазифамиз эмасми? Эҳтимол, улар ёмонлик жаридан қутулмоқчилару, аммо тўғри йўлга чиқишига кучлари етмаётгандир. Уларга ёрдам қўлини узатиб, ёмонликдан қутулишга кўмаклашиш бурчимиз эмасми? Ёмон қилиқларини ота-онасига бориб айтсангиз, дўстга хиёнат қилган бўласизми? Асло! У аввалига шундай ўйлаб, сиздан ранжиши мумкин, лекин ёмон қилиқдардан қутулиб яхшилик йўлига ўтгач, сиздан бир умр рози бўлиб яшайди.

Нима учун баъзи одамлар орасидан меҳр-оқибат, меҳр-муруват, меҳр-ҳурмат кўтарилади? Нима учун баъзи ерларда зулм тўфони авжига чиқади? Нима учун кўплар бузуклик ботқоfiga ботади? Сабаб: чўкаётган одам хасга тирмашиб умид қилганидай, заиф тарбияга ишонадилар. Айрим ота-оналарнинг, устозларнинг тарбия усуслари, насиҳатлари ҳидоят ва шифо булоғидан маҳрум бўлгани учун ҳам ширин мева бермайди.

Биз тилимизда «ахлоқ» деган сўзни тез-тез ишлатамиз. Аммо унга сифат бермаймиз. Одам зотига қандай ахлоқ зарур? Албатта, илоҳий ахлоқ, яъни Аллоҳ томонидан буюрилган ахлоқ. Буни «Расулуллоҳнинг ахлоқлари» деб атасак ҳам бўлади.

Донишмандлар ҳикоя қиладилар:  
«Бир одам чўлда кетаётиб бадбашарани кўради ва ундан «Сен кимсан?», деб сўрайди. Бадбашара «Мен сенинг ёмон амалларингман», дейди. У одам: «Сендан қутулишнинг иложи борми?», деб сўраганида, у: «Бор, бунинг учун пайғамбаримиз Мұҳаммад (с.а.в.)нинг гўзал ахлоқига эга бўлишинг ва унга салоту салом йўллашинг керак!», деб жавоб берган экан.

Ана шундай гўзал илоҳий ахлоққа етишмоқдик барчамизга насиб этсин! Бу баҳтга одамийлик мулкига эга бўлмоқдик или эришиш мумкинлигини унутмасак бас. Юсуф Ҳожиб ҳазратлари айтадиларки: «Қиз эрмас бу ялнчуқ, кишилик қиз ўл» («ялнчуқ» – одам демакдир, «кишилик» – одамийлик, «қиз» – «қадрли» деган маънони англатади. Ҳикматнинг мазмуни: «Одамнинг ўзи қадрли эмас, одамийлиги қадрлидир».) Ана шу қадрга етишмоқдик йўлларини излаб кўрайли.

### **Икки йўлнинг бири**

Кўчада нотаниш бир йигит мени бехос саволга тутиб қолди:

– Ҳамонки, инсон тақдиди ҳали туғилмасидан илгариёқ белгилаб қўйилган экан, ёмоннинг яхши бўлишига ҳаракат қилмоғи беҳуда экан-да?

Масалани тушунтириб беришга зарур илм каминада етарли бўлмаса-да, савол берилган, жавоб кутилмоқда эди. Ақдим етганича дедимки:

– Ҳа, кишининг тақдиди ҳали туғилмасидан илгариёқ белгилаб қўйилади. Аммо кишининг рўпарасида икки йўлни ҳам берган: бири – ҳидоят, иккинчиси – залолат, бошқачароқ айтсак: яхшилик ва ёмонлик. Бу йўллардан қай бирини танлаш учун эса Яратган зот унга ақд, зеҳн ва фаросат ҳам берилган. Айни чоғда бу ақлни қувватлантирувчи каломини ҳам туширган ҳамда ҳидоят билан залолатни фарқлашларида тўғри

йўлни кўрсатсин, деб бандалари орасидан ўзининг элчисини ҳам белгилаб қўйган. Кимки ақли ва қалби билан Каломуллоҳни англабди, Расуулulloҳга (с.а.в.) эргашибди – у ҳидоятга етибди. Кимки англамабди, англашга интилмабди ёки интилишни истамабди – шайтоннинг этагини тутибди ва залолат йўлини ўзига маъқул кўрибди. Демак, Аллоҳ бандага ихтиёр бериб қўйибди.

Болалик ва ёшлиги атеистларча тарбия («атеист» сўзининг маъноси «худосиз»дир) билан ўтгани сўзларидан сезилиб турган нотаниш суҳбатдош билан шу тарзда фикр алмашдик. Мен қисқа суҳбатда унинг фикрини ўзгартира олишга қодир эмас эдим. Ана шу учрашувдан кейин тарбия мезони ва асослари хусусида ўйлаб қолдим ва сиз азиз умидимиз юлдузлари билан ният қилганим суҳбатнинг дастлабки бобини шу мавзуга бағишилашни ихтиёр этдим.

Абдулла Авлоний ҳазратлари ёзган эканлар: «Боланинг саломати ва саодати учун яхши тарбия қилмак – танини пок тутмак, ёш вақтидан маслакини тузатмак, яхши хулқларни ўргатмак, ёмон хулқлардан сақлаб ўсдурмақдир. Тарбия қилувчилар табиб кабидурки, табиб хастанинг баданидаги касалига даво қилгани каби тарбияни боланинг вужудидаги жаҳл маразига «яхши хулқ» деган давони ичидан, «поклик» деган давони устидан беруб, катта қилмак лозимдур. Зероки, «Ҳассину ахлоқакум» амри шарифи узра хулқимизни тузатмакка амр ўлинганимиз. Лекин хулқимизнинг яхши бўлишининг асосий панжаси тарбиядур... Ҳукамолардан бири: «Ҳар бир миллатнинг саодати, давлатларнинг тинч ва роҳати ёшларнинг яхши тарбиясига боғлиқдур», демиш. Шариати исломияда ўз болаларини яхшилаб тарбия қилмак – оталарга фарзи айн, ўз миллатининг етим қолган болаларини тарбия қилмак фарзи кифоядир...» (Фарзи айн – бажарилиши шарт бўлган вазифа; фарзи кифоя – бир кишида етим болаларни тарбия қилиш имкони бўлмаса, унга айб эмас,

бу вазифани унинг ўрнига бошқа бир одам бажариши ҳам мумкин).

Мазкур фикрларни яхшилаб англаш учун тарихга мурожаат қиласлийк: ўтмишда диёримизда бир неча марта кучли-кучли давлатлар қад ростлаган ва кўп ўтмай нураб, яксон бўлган. Минг афсуски, давлатларнинг йўқ бўлишига ташки душманларнинг зарбаси эмас, кўпроқ ички низолар сабаб эди. Хусусан, амир Темур салтанатининг тарихини эслайлик. Бу ҳолатни тарихчилар қандай шарҳлашса шарҳлашсин, лекин биз деймизки, дунёни лол қолдирган салтанатнинг емирилишига шаҳзодаларнинг яхши тарбия кўрмаганлари сабабдир.

Энди бизларни бир масала кўп ўйлантиради: тарбиячи ким? Ота-онами, мактаб муаллимларими?

**Умидимиз юлдузлари**, айбситмайсиз, сал четга чиқсан-да, бу саволга жавоб излашда ота-оналарнинг бурчларига кўпроқ тўхталамиз. Бу масалани ўрганиш ҳозир сизга шарт эмасдай кўринса ҳам, яқин йилларда улғайиб, оила қурганингизда, фарзандлар кўрганингизда асқотади, деган фикрга келиб шу баёнга йўл беряпман. Яна бир изоҳки, ота-оналарнинг тарбия соҳасидаги айрим камчиликлари баён қилинганда уларга сиз маломат қила кўрманг. Аксинча, тарбиядаги камчилик нимадан иборат эканига эътибор берриб, келгусида ўзингиз қайтармаслигингиз учун ҳозирдан ўрганинг. Мазкур баённи ота-онангиз билан бирга ўқиб, таҳлил этсангиз янада яхши.

Юқоридаги саволга жавоб беришда фақат бир нарсани таъкидлаймиз: бола «Сен тарбиялашинг керак», деб гоҳ у ёқقا, гоҳ бу ёқقا оширадиган копток эмас. Фарзанд тарбиясига ота-она масъул, мактаб эса бу соҳада кўмакчи. Ҳа, айнан шундай. Чунки фарзанднинг оилада олган тарбиясига қараб ота-онасига роҳат ёки жазо келтиришини ҳамма билади. Отанинг ишамали фарзандига сингса, унинг хулқида жилвагар бўлади. Болани тергаб-назорат қилиш ота-она юзининг

ёруғлигини таъминлайди. Тарбиядан ташқаридаги бола бебош ва ярамаслик сари оғади. Эрка бўлиб ўсган ўғил-қизлар хатти-ҳаракати ота-онага мунг ва алам келтиради. Шу боис ҳам Абдулла Авлоний таъкид этганиларидек: «Тарбия бизлар учун ё ҳаёт – ё мамот, ё нахжот – ё ҳалокат, ё саодат – ё фалокат масаласидур» дейилмиш фикрни барчамиз бирдек шиор сифатида қабул қилмоғимиз лозим бўлади.

Афсусларки, айримларимизнинг кўнгилларимиз кўчага боғланган. Ишга, улфатга муҳаббат оиласа бўлган муҳаббатдан ортиқ. Чойхоналарда, ресторонларда, турли зиёфатларда яйрашга умримизнинг ҳисобсиз соатларини беҳуда сарфлаймиз. Бола тарбиясига эса вақтни қизғанамиз. Сариқ чақага арзимас матоҳларимиз фарзандларимизга нисбатан қимматлироқ. Пиёлани синдириб қўйса аямай урамиз, гулдонни синдирса дўппослаймиз. Агар aka укасини урса яна жазолаймиз. Ҳолбуки, каттанинг кичик, кучлининг кучсиз устидан ҳоким эканини ўзимизнинг айнан шу ҳаракатимиз билан ўргатяпмиз: гапга кирмаган кичикни ёки кучсизни уриш мумкин! Бола шўхлик қылса, онажонлар «ҳали қараб тур, дадангга айтаман», деб кўрқитадилар. Ота келганда ўз фарзандини ёмонлаб «чақадилар-у», айни шу ҳолатда ота-бала орасига душманлик уруғи сочиғанини фаҳм этмайдилар. Отани жазоловчи инсон сифатида кўрсатмай, ота келганда уни иззат-хурмат билан кутиб олишни ўргатиш афзалроқ эмасмикин?

«Одамнинг камоли фақат соғлиқ ва кучдан иборат бўлмай, балки жисмонан, ақдан ва ахлоқан юксалишдан иборат. Одамнинг жисми, ақди ва ахлоқи турли касаллик ва нуқсонлардан узоқ бўлиши лозим. Одам ҳам ўз манфаатини ўйлаб, ҳам яқинларини баҳтиёр қилишга қодир бўлиб ўсиши лозим. Зотан, бу мантиқий олишувларга нима ҳожат бор?»

Устоз Абдурауф Фитрат бу фикрларни салкам юз йил муқаддам баён этганилар. Бугун бола тарбияси де-

ганды ота ва она уни яхши кийинтиришни тушунади, катта пул сарфлаб ўқишига киришишни англайди... Агар автомашинаси бузилиб қолса, устахонада бир күн ёки бир ҳафта ўтириши мумкин, аммо фарзанди билан бир соат ёнма-ён ўтириб, дарс тайёrlашга тоқати етмайдиган оталар ва оналар ҳам борлиги афсусли ҳолдидир.

Танишларимиздан бири мақтанди: «Синфдошларимиз билан дўстлигимизни ҳеч бузмаймиз. Ҳар куни ишдан кейин фалончи ўртоғимизнида учрашамиз, чой-пой ичиб, шахмат-нарди ўйнаб, телевизор томоша қилиб, кечқурун баъзан ўн бир – ўн иккигача ўтирамиз...» Албатта, дўстликни узмаслик яхши, бироқ оила бағрига барвақт бориш ундан аълороқ. Ҳар куни уйига кеч борса, болалари бу вақтда ухлаб қолган бўлади. Тарбия билан қачон шуғулланади? Назаримда бу биродарларимиз дўстликни мустаҳкамлаш ҳақида нотўғри тушунчага эгалар, оила, фарзанд тарбияси, деган тушунчадан эса бутунлай маҳрумлар.

Ҳаёт – имтиҳон эканлиги кўп айтилади. Имтиҳон бор жойда бурч, жавобгарлик, масъулият бўлади. Инсон ана шу масъулият билан дунёга келади. Барчамиз зиммасига омонат юклатилган, имтиҳонда турган инсонлармиз. Бу дунё нашъали, аммо асл жойимиз эмас. Биз фарзандларимиз тақдири учун ҳужайраларнинг энг олис нуқтасигача, вужуднинг ҳар бир заррасига қадар жавобгар бўлган кишилармиз. Ўзимиз жаннатга кирсагу азоб фаришталари фарзандларимизни жаҳаннам ўтига отсалар, юрагимиз бардош берармикин? Агар бирон киши фарзандимизнинг қўлига чўғ босаман, деса хотиржам қараб турамизми? Ўйлаб ҳам ўтирасдан ҳимояга ташланамиз! Хўш, нима учун жигарбандларимизни ёмон хулқи учун келажакда кутиладиган дўзах ўтларидан ҳимоя қилишни ўйламаймиз? Бу бир масала. Иккинчи масала – дўзахий фарзандларни «тарбиялаган» ота-онага жаннат насиб этармикин? Бу ўринда жумла тузишда хатога йўл қўйдик:

эҳтимол, «дўзахий болаларни «тарбиялаш» эмас, «болаларни дўзахбоп қилиб тарбиялаш» десак тўғрироқ бўлар? Йўқ, энг тўғриси – «болаларни умуман тарбия қилмаган»...

Ўзларича дўстлик ришталарини мустаҳкамлаётган ўша ошна-оғайнилар ўйлаб кўрсинашади: Қиёматда «нега ўртоқларингнида чой ичмадинг, нега тун ярмигача ўтирамдинг?» деб сўралмайди. «Сен ўзингни қандай тарбия қилдинг ва фарзандларингга нега тарбия бермадинг?» деб сўралади. Қиёматдаги жазога анча вақт бор. Бу дунёдаги жазо кўп куттирмайди. Агар фарзанди гиёҳвандларга қўшилиб кетса, бузуқликни касб этса дардини кимга айтади? Кимни айблайди? Кимдан нажот сўрайди?

Гўзал хулқ ва тарбияли онанинг хислатлари, яхши феъл-автори фарзандларида ҳам намоён бўлади. Улар ҳам оналарининг гўзал хислатларига эга бўладилар. «Онасини кўриб, қизини ол», деган мақол бежиз айтилмаган.

Ота ўз фарзандларига мерос этиб молу дунё эмас, одоб-ахлоқ қолдириши керак. Мол-дунё мероси кундан-кун камайиб, одоб-ахлоқ мероси эса ошиб боради. Куйидаги ривоят фикримизнинг далили.

**Ривоят.** Миср ҳукмдори билан Рум ҳукмдори ўзаро келишиб, дўстлик аҳдини туздилар ва орадаги адватга барҳам бердилар. Ҳатто Миср ҳукмдори Рум ҳукмдорининг қизини ўғлига никоҳлаб, қизини эса Рум шаҳзодасига узатди. Уларнинг дўстлик ва қариндошлик алоқалари узоқ давом этди. Бир куни Рум ҳукмдори қудасига бу мазмундаги мактубни йўллади:

– Кўзларимизнинг нурлари бўлмиш азиз фарзандларимизнинг бизлардан кейин ҳам фароғатда яшамоқликлари учун ҳозирдан чора-тадбир кўришимиз керак. Мен ўғлим учун жуда кўп олтин жамладим. Чиройли боғ ва сарой барпо эттиридим. Сиз ҳам шундай қилгандирсиз?

Миср ҳукмдори мактубни ўқиб табассум қилди ва бу жавобни йўллади:

– Азизим, мен сиздан кўра сал бошқачароқ йўл тутдим. Вафосиз мол-дунё ва матоҳларига илтифот этмаганим туфайли ўғлимга олтину жавҳарлар эмас, илм, ҳунар, одоб, ахлоқни мерос этиб қолдиришни истадим. Уни илмли, ҳунарли, хушахлоқди қилиб тарбияладим. Уни яхши адаб либоси билан безадим. Молдунёга қачондир завол етади, аммо мен қолдираётган меросга ҳеч замон завол етмайди. Бу мерос фарзандимни ҳар қандай бало-офатлардан омон сақлагай...

Бирга ўйлайлик: тарбиясиз одам жонсиз жасад каби эмасми?

Даврага қўшилгувчи ҳар бир одам аввал ўзининг ташқи кўриниши, қиёфасига қараб қабул қилинади, сўнг эса тарбияси ва фазилатига қараб тақдир этилади. Кишидаги фазилат гўё фарзанд кабидир, уни авайлаб сақдаш ва янада баркамол этиш лозим. Ҳар бир одам, аввалроқ айтиб ўтганимдай, ўзини ўзи тарбия қилишга ўрганиши керак. Инсоннинг улуғлиги ўзини идора ва тарбия қилиш кучига эга бўлиши билан билинади. Киши ўзини ўзи тарбия қилишга ўрганиши лозим, деган фикрни қувватлаш учун Абу Ҳурайра (р.а.) ривоят қилган бир ҳадиси шарифнинг маъно таржимасини ўқиймиз.

**Ҳадис.** Расулуллоҳ (с.а.в.) марҳамат қиладиларки: «Ҳар бир мўмин банда ўз биродарининг кўзгусидир. У биродарида бир айбни кўрса, ўзida кўрган шундай айбни тузатишга ҳаракат қилиши керак».

Яъниким, биз дўстимизда ҳасад ёки чақимчилик иллатини кўриб турибмиз. Уни тарбия қилишимиздан аввал биз ўзимиздаги ўша иллатни тузатишга киришмогимиз керак экан.

Ўзини ўзи тарбия қилмоқ қандай бўлади?

Оғзаки насиҳатларни эшитамиз, китобларда ўқиймиз, масалан, қуйидаги ҳикмат каби.

**Хикмат.** Луқмони Ҳаким ўз ўғилларига дебдилар: «Қариндош уруғлардан алоқангни узма, ўйлаб иш тут. Одамларни ғийбат қилма, одамлар ёмон ишга бош қўшса, сен уларга қўшилма. Шошилиб иш тутма, бойлик деб ўзингни ғам-қайғуга ташлама. Ўз қадрини билмаган одамдан яхшилик умид қилма. Ўтиришлардан ўз жойингни бил, одамларнинг сўзларига кулоқ сол, одамлар сўраса, гапир, ўзингдан улуғлар олдига тушиб юрма, одамлар ичида бошингни қўйи солиб ўтирма, ўнгу чапга қарайверма, меҳмонлар олдида бирорвга ўшқирма, меҳмонга эса иш буюрма. Маст ва девона одамлар билан ҳамсуҳбат бўлма. Бекорчи одамлар билан қўчада ўтирма. Ўз фойдангни ўйлаб обрўйингни тўкма. Ўзига бино қўювчи такаббурлардан бўлма. Хусуматдан узоқ бўл, сенга иш буюрсалар бажар, вавда қилсанг, албатта, уддасидан чик. Ҳеч кимни ранжитма...»

**Яна бир ҳикмат.** Ҳиндистонлик донишманд эса ўғлига бундай насиҳат қилибди: «Азиз ўғлим, қўлингга кирмаган ёки қўлингдан кетган нарса учун қайгурма. Ҳар ерда куракда турмайдиган беҳуда сўзлар сўзлаб юришдан йироқ бўл. Нокас, қурумсоқ кишидан қарздор бўлма. У билан асло муомала қилма, кейин пушаймон қиласан. Шарм-ҳаёсиз ва баҳил киши билан суҳбатдош бўлма, шундай ярамас одамлар билан қўшни бўлмасликка ҳаракат қил. Ўз кучинг орқасида нон топиб егил, текинхўрликка ўрганма, олижаноб мард одамлар билан суҳбатдош бўлсанг, яхшилик билан ном чиқарасан. Мақтандош ва эзма одамлардан ҳазар қил...»

**Кейинги ҳикмат.** Бошқа бир донишманднинг насиҳати будир: «Фалокатга дучор бўлишни истамасанг – мағур ва мутакаббир бўлма. Роҳатда яшашни истасанг – дилингни ҳирсадан пок қил. Хору зорликни истамасанг – таъмагир бўлма, ўзингга яхшилик қилиншини истасанг – яхшилик қил, ҳеч кимга озор берма, яхшиликни улуф иш деб бил. Қадр-қимматинг ошиши-

ни истасанг – баланд ҳимматли бўл. Ишинг пушаймонлик билан натижаланишини истамасанг – аввал яхшироқ ўйлаб, доно, тажрибакорлар билан кенгашиб, сўнгра ишга кириш. Ўзингни ҳаммага севдиришини истасанг – феъл-авторингни тузат, адабли, тарбияли бўл. Обрўта, иззат ва ҳурматга эга бўлишни хоҳласанг – ҳалол меҳнат қил. Ҳамманинг қошида ишончли, марғуб ва мақбул одам бўлишни истасанг – ёлғончиликдан сақдан, чақимчи, ифвогар бўлма, маънисиз, тутуруқсиз сўзларни айтиб юришдан ҳазар қил. Мабодо ўнгайсиз ҳолда қолсанг, ишингда муваффақиятсизликка учраб, қайгу-ҳасрат ичидаги қолсанг – дод-фарёд қилиб юрма, сабр қил. Ўнгайсиз ҳолдан қутулиш чорасига кириш...»

Бу каби насиҳатлар доноларнинг бизларга берган йўл-йўриқларидир. Таъбир жоиз бўлса, кишининг ўзини ўзи тарбиялашидаги бир режадир. Энди режани қандай тарзда амалга оширади – унинг ақлига боғлиқ.

**Умиднимиз юлдузлари**, яширмай айтинг-чи: ои-лангиз даврасида шу каби ҳикматлар айтиладими? Билишимча, кўп оиласарда айтилмайди. Сизницида ҳам шундай бўлса, бу китобга жамланган ҳикматларни фурсат топиб ўқиб беринг. Ота-онангизнинг фурсатлари бўлмаса, ака-укаларингиз, опа-сингилларингизга ўқиб беринг. Шунчаки ўқиб қўя қолманг. Биргалашиб таҳдил қилинглар, хуносалар чиқаринглар ва амалда бажаришга интилинглар.

Юзаки қаралса, бу насиҳатларга амал қилиш унча оғир эмас. Айтайлик, одамлар орасида бошни куйи солмаслик, меҳмонга иш буюрмаслик... Агар бу фазилат ўзимизда бўлмаса, тез кунда ўрганиб кетишими мумкин. Лекин айрим фазилатлар – ахлоқи ҳамидалар борким, унга эришиш кунлар, ойларни талаб этади. Яъниким, киши ҳар дақиқа, ҳар соат, ҳар кун бу соҳада ўзини ўзи тарбия қилиб бормоги талаб этилади. Дейлик, бир кун тарбия этмадими, яхши фазилат-

ни бир кун унутдими – издан чиқиб кетиши ҳеч гап-  
мас. Фазилатнинг ўрни узоқ вақт бўш турмайди, у  
бизни тарк этдими, дарҳол ўрнини иллат, ёмон хулқ  
эгаллади. Баъзан киши яхши хулқقا эришишини ис-  
тайди, аммо бунинг уддасидан чиқиш ёлғиз ўзига боғ-  
лиқ эмас. Ёмонлар билан ҳамсуҳбатлик масаласи бу  
фикрга мисол бўла олади. Бир кишининг зулмкорли-  
гини ёки разиллигини биласиз, лекин ундан нари ту-  
ришнинг иложи бўлмай қолади.

Ўзгага тарбия беришдан кўра ўзни тарбия этмоқ юз  
чандон оғирроқдир. Ўзгага тарбия бериш учун билимга  
ёки ҳаёт тажрибасига таяниб, тоқатингиз етганича  
насиҳат қиласиз. Тарбияланувчи насиҳатларингизни  
қулоқقا олмаса, қўл силтаб қўя қоласиз. Киши ўзини  
тарбия қилиши учун эса жуда мустаҳкам иродага эга  
бўлиши керак. Чунки ўзни тарбия этмоқлик вужудин-  
гизга ҳукмронликни даъво этаётган нафс ва шайтон  
билан олишиб, енгмоқълиkdir.

Ақдингиз дейдики:

– Барвақт туриб, жисмоний бадантарбия билан шу-  
гуллан, чиникқин.

Шайтон дейдики:

– Тўйиб овқат егин-у, ётиб, мазза қилиб ухлаб ол.

Терлаб-пишиб югуришдан сенга фойда борми?

Ақдингиз дейдики:

– Чақимчилик қилма, гуноҳга ботасан.

Шайтон дейдики:

– Ўртоғингнинг шу ишини директорга ёки отасига  
кириб айтсанг, жазолашади. Унинг жазоланганини  
кўрсанг, дилинг яйрайди.

Ақдингиз яна дейдики:

– Хизматчи подшоҳга бошқа хизматчини ёмонла-  
ди. Шунда подшоҳ: «Гапларингни текшираман, агар  
тўғри сўзлаган бўлсанг, чақимчилигинг учун сендан на-  
фратланаман, сени душманим деб биламан. Ёлғон  
сўзлаган бўлсанг тухматчилигинг учун жазолайман»  
деган экан, сен ўша хизматчи ҳолига тушиб қолмагин.

Шайтон яна дейдики:

- Бу сафсаталарга қулоқ солма, ҳозир унақа подшоҳдар йўқ...

Шу ўринда баҳсни **ирода** ҳал қилиб беради. Агар ирода чинакам ақл билан қувватланган бўлса – енгади. Ўзини ўзи тарбия қилишда яна бир муҳим қийинчилик борки, уни «муҳит» деб атаемиз. Кишининг атрофида қандай муҳит бор? Яхшилар кўп бўлса бу тарбия жараёни енгилроқ кечади. Ёмонлар бўлса... оғир, жуда оғир... Шу боис киши атрофини ақл кўзи билан кузатиб, ёмон давраларни тарк этишга жазм этмоғи шарт. Ботқоқда туриб ювениб, покланишга уринишдан наф йўқ.

Энди тарбиянинг асослари нималардан иборатлиги хусусида фикрлашиб олсак.

Фазилатни қўриқладиган гўзал ахлоқни ва ярамас йўлдан, ёмон аҳволга тушишдан сақладиган ҳушёрликни донолар муҳим асослардан ҳисоблаганлар. Яна: ваъдага – вафо, насибага – ризо, ҳар бир бахтсизликка қарши чидами бўлиш, ҳақиқат ва тўғриликка риоя қилиш...

Инсонни инсон бўлишига боис тарбиядир ва уч нарсага эҳтиёж сезади: **истеъдодга, илмга ва машқча**.

Ҳазрат Навоий дебдиларки: «Қобилияти одамни тарбия қилмаслик – зулмкорликдир. Ноқобил одамга эса тарбия хайфdir. Тарбиянгни аяб, унисини нобуд этма, бунисига тарбиянгни зое қилма.

*Қобилга тарбият эрур ул нағъким, гүҳар,  
Түнса нажосат ичра югай кимса они пок.  
Гар им узумига киши май бирла берса сув,  
Бу тарбият била қила олгайму они ток».*

Маъноси: қобилияти кишига берилган тарбия гав-ҳар каби қимматлидур. Гавҳар нажосатга тушса ҳам ювилса- тозаланади, қимматини йўқотмайди. Итузум май билан сугорилса ҳам итузумлигича қолади, ҳеч замон токка айланмайди.

**УМИДИМИЗ ЮЛДУЗЛАРИ**, сиз бу ёшга етгунингизча билим олдингиз, атрофни кузатиб, ҳаёт ҳақиқатларини тушунига ҳаракат қиддингиз. Кўп ишларингизга қараб, сўзларингизга эътибор бериб, сиз азизларни «аклли» деб мақташга асосим бор. Лекин бир нарсани унутмангки, бош ақд ва илмга тўлиб тошса ҳам, ахлоқни сира унумаслик керак: инсон ўзидағи маънавий жиҳатларни, виждан ва нафсни тарбиялаши, эҳтиросини бошқара олиши, хунук одатларни тарк этиши, илмий ютуқдарини инсоният фойдасига йўналтириши керак. Йўқса, у тўғри йўлдан озиши мумкин. Яъни Ватан ва ҳалқини мудофаа қилишга масъул ҳарбий одамнинг тарбияси дуруст бўлмаса, Ватанига хиёнат этишдан ҳам қайтмас. Беморларни ҳалол ва холис равишда даволашга қасам ичган шифокор қасамини бузар. Ҳатто порахўр ва судхўр мол-дунё эвазига юртини бошқалар қўлига мустамлака қилиб беришдан ҳам тап тортмас.

Тарбиялаш шахсий намуна, оғзаки ёки ёзма насиҳат йўли билан амалга оширилади. Ана шу насиҳатларни олмайдиган одам баҳтли бўладими? Суҳбатимиз аввалида бу хусусда қисман сўз юритиб эдим, энди батафсилоқ гаплашиб олайлик. Ўзингизга маълум, баъзи тенгдошларингизга насиҳат қилсангиз малол олади, ҳатто ғазабланади. Нодонларга насиҳат бир ривоятни ёдга солади.

**Ривоят.** Куёш ботиб, дунё юзини зулмат пардаси қоплаганда жиловсиз изгирин ҳар томонга югуриб, маймунлар тўдасига ҳужум қила бошлади. Бечора маймунлар совуқдан титрар ва исиниш учун чора ахтарар эдилар. Улар ногоҳ ялтироқ куртни кўриб қолдилар. Уни чўғ деб ўйлаб, талай ўтин ўифиб, атрофига қаладилар ва ҳадеб пуфлайвердилар. Дарахт тепасидаги қуш уларнинг бу нодонликларидан кулиб: «Бу олов эмас, кечалари ялтираб кўринадиган қурт», деса ҳам эътибор бермадилар. Шу аснода ўткинччи бир одам аҳволни кўрди ва қушга қараб: «Ўзингни кўп койит-

ма, улар сенинг сўзингга қулоқ соладиган, фойдасиз ишдан воз кечадиганлардан эмас. Уларга насиҳат қилиш – қилични тошга уриш ва шакарни сув остига беркитиш билан баробардир», деди. Қушнинг нодонлиги маймунларнидан қолишимас эди, у одамнинг насиҳатига қулоқ солмай, маймунларнинг хатосини тушунтириш учун дараҳтдан тушиб, улар ёнига келди. Маймунлар эса... уни ўраб олиб, бошини узиб ташладилар...

Ҳазрат Навоий бежиз айтмаганлар: «Телба қулогига панд – қуюн оёғига банд» – яъниким нодонга насиҳат қилганинг – бўроннинг оёғини кишанлаб олишга уриниш кабидир...

Айримларнинг насиҳатга муносабатлари сал бошқачароқ. Улар насиҳатни кескин рад этмайдилар, аммо тўғри йўлдан юришни галга солаверадилар.

– Ўқишидан қочманг, дарсни ўз вақтида тайёрланг,  
– дейсиз.

– Хўп, қочмайман, ўқийман... – дейди. Қўлига китоб олади-ю, сал сал узоқлашсангиз, боши ёстиқ сари оғади.

– Бу ёшингизда чекиши ғоят заарали, ўрганманг...  
– Хўп, тутатганимни чекиб олай, бошқа оғзимга олмайман...

– Ўртоқдарингизга вафоли бўлинг, уларга ёрдам беринг....

– Хўп... хўп...  
Ўнлаб, ҳатто юзлаб «хўп», «хўп»... аммо аҳдида турмайди. Насиҳатни давом эттирангиз «иродам бўшлик қиляпти», каби баҳоналарни тахлаб ташлайди. Эҳтимол чинданам иродаси бўшдир. Насиҳатга кўнса-да, галга ташлаётган, амалга оширишни орқага сураётган бу йигит ёки қиз ҳали яхши йўлга ўтишга улгураман, деб ўйлайди. Эртага бўлмаса индинга, албатта, тузалишига умид қиласиди. Аммо бу умид инсонни маҳв этувчи туйғу эканини англаб етолмайди. Ахир киши савобли ишни бир кун эмас, ҳатто бир дақиқа ҳам ортга суриши мум-

кин эмас-ку! Ҳар бир одам, ёшми-қарими – фарқи йўқ, «ҳозир ёки бир оздан сўнг ўлиб қолишим мумкин. Дар-ҳол тавба қилиб, яхши одам бўлай, ёмон ишларимни ташлай», дейиши зарур эмасми? Лоқайдлик, меҳнатдан қочиб фароғатни афзал билиш, келажаги ғамини емаслик ёш кўнгилни тез ўлдиради, бора-бора инсонни маҳв этади. Ҳазрат Навоий таъкид этганлариdek: «Шафқатли насиҳатгўй гапини тингламаганнинг жазоси – афсусланмоқ ва ўзини койимоқдир». Ҳазрат Ҳофиз Шерозий дейдиларким: «Доно қарияларнинг насиҳатига **бахтли ёшларгина** қулоқ соладилар». Абдураҳмон Жомий эса бундай дейдилар:

*«Қулоқдан дилингга гар кирмаса нур  
Сичқон кавагидан не фарқи бўлур?»*

Донолардан бири деган экан: «Эй дўстим, агар сенда фазл дарёсининг дур-гавҳари бор бўлса, уларни насиҳатларингни қабул қилиб, шу насиҳатларга амал қилиувчи яхшиларнинг оёқлари остига тўқ. Насиҳатларинг зое кетмайди».

Халқимизда «Гапни гапир уққанга – жонни жонга суққанга» деган ибратли мақол бор. Маълумингизки, ҳазрати Сўфи Оллоҳёр «Саботул ожизийн» асарларини аввал форс тилида ёзиб, сўнг туркий тилда ҳам баён қилганлар:

*Ўзимдек хасталар бўлгайму деб шод,  
Насойиҳдин ҳам андак айладим ёд.*

Демоқчиларки: «Бу китобни туркий билан ёзганимнинг яна бир сабаби шуки, ўзим каби хаста кўнгиллар уни ўқиб қувонсинлар. Бунинг учун бир оз насиҳат сўзлар ҳам айтдимки, ўқиганлар ўтилансинлар. Зероки, эси бор киши оз насиҳатдан кўп ибрат олар. Аммо бир аҳмоқ учун ваъздан катта китоб ўқиб берсанг ҳам зарра фойда олмайди».

*Насиҳат тингламас дили саҳт маҳжуб,  
Кўкармас, тошга йагмур ёгса ҳам кўп.*

Демоқчиларки: «Тош устига қанчалик кўп ёмғир ёғиб сув тушса-да, ўт чиқиб кўкармагани каби кўнгли қотган кишиларга қанчалик ўйтитлар қиссанг ҳам қулоқларига олмаслар. Ўзлари учун бирор фойда ола билмаслар».

Бу фикр «Бақара» сурасидаги: «Сўнгра шундай мўъжизаларни кўргандан кейин ҳам дилларингиз қотди. Бас, у диллар тош кабидир», ояти каримаси билан қувватланади. Ёки «Ҳашр» сурасидаги «Дўзах эгалари билан жаннат эгалари баробар бўлмас», ояти каримасини «Хайрли насиҳатларни қулоққа олиб, итоат этувчилар, ўзларини ҳидоят йўлида тарбия қилувчилар – жаннат эгаларидир, залолатни танлаган, насиҳатларга терс қараганлар эса ўзларига ўзлари дўзахни танлагандирлар» деган маънода талқин қилса ҳам бўлар, валлоҳи аълам!

Муҳтарам ва ардоқли ота-оналар, азиз фарзандларингиз оғзаки насиҳатларни кунда кўп мартараб эшиладилар. Диққат қилингки, аввало, насиҳатнинг таъсири насиҳаттўйнинг ақдига, билимига боғлиқ. Шунингдек, қандай вазиятда насиҳат қилиш ҳам муҳим. Маст одамга «ичма» деб насиҳат қилиш – шамолга қарши қичқириш кабидир. Фазабга миниб бирорни сўкаётган одамнинг қулоғига ҳам сўкишнинг гуноҳ экани ҳақидаги насиҳатлар кирмайди. Насиҳаттўй тарбиясидаги одамнинг ёши, ақл даражасини, айни дамдаги руҳий ҳолатини ҳам ҳисобга олиши шарт. Айнан бир мавзу, масалан, сўкиш ҳақида ўн ёшли ва йигирма ёшли болага бир хилда, бир хил услубда гапирилмайди. Тарбия жараённада доноларнинг «ёшлик – бепарволик, йигитлик – бир мусобақа, қарилик эса таассуфдир», деган таъкидларини унутмасак дуруст бўлади. Насиҳат деганда биз каттанинг ёшга ўгитини тушунадиган бўлиб қолганмиз. Кексароқ одамга на-

сиҳат қилиш бизга ғалати туюлади. Ҳолбуки, тарбия кексалар учун ҳам зарур. Тарбия маълум ёшга етгач тўхтамайди. Барчамиз яхши биладиган «Бешикдан лаҳадга қадар илм эгалла», дейилгувчи шарафли ҳадис бизларни шунга даъват этади. Алҳол, илм олиш ҳам тарбиянинг муҳим асосидир.

Насиҳатнинг яна муҳим шартларидан бири – насиҳатгўй насиҳат қилиш учун маънавий ҳуқуққа эга бўлиши керак. Яъни у бирон фазилатни эгаллаш ҳақида насиҳат қиляптими, демак, бу фазилат унинг ўзида бўлиши керак. «Бироннинг ҳақига хиёнат қилма», деб ақд ўргатса-ю ўзи бозорда тарозидан уриб турса, унинг гапи бетаъсирдир! Ўзи ўқишида қолоқ йигитчанинг аълочи қизга илм эгаллашнинг фазилати ҳақида ваъз ўқиши ҳам кулгилидир.

Илм ўргатадиган даргоҳлар кўп: ўрта мактаблар, лицейлар, коллежлар, институтлар, университетлар, магистратуралар, докторантуралар... Ўрганиш, ўргатиш илм олиш бор, аммо яхши тарбия таълимими қаерда ўрганамиз? Яъни севгини, марҳаматни, ўз манфаатимиздан кечиб, бошқа бир инсонни қувонтиришни, холис, муҳлис бўлишни қаерда ўрганишимиз керак? Бир-биримизни севишни, бир-биримизга ҳурмат кўрсатишни қандай ўрганамиз? Бунга ҳам устоз лозим...

Мактабларда одоб дарслари бор. Ҳафтасига бир соат... Саҳрова ҳафтасига бир томчи сув билан суғориб дарахт кўкартириш мумкинми? Яна... мактабда «сўкма» деб ўргатадилар, баъзи бирларингиз уйга борганингизда отангиз ёки акангиз оғзидан сўкишдан бошқа нарсани эшитмайсиз, онангиз ҳам қарғишдан тийилмайдилар...

**Умидимиз юдузлари**, эллик-олтмиш йил муқаддам болалар ва ўсмирлар ўзлари яшайдиган қишлоқ ёки маҳалладан наридаги янгиликларни билмас эди. Ҳозир сизнинг ихтиёргизда интернет бор, камига телевидение бор. Дунёning нариги чекасида содир

бўлган воқеадан бир неча дақиқада хабардор бўласиз. Дунёни диққат билан кузатасиз. Айниқса, машхур одамларнинг қилиқдари сизларни ўзига ром этади. Уларга тақлид қила бошлайсиз. Бу қилиқларингиз ота-онангиз ва устозларингизга ёқмайди, тўғрими?

Энди гап бошқалардан ўрганиш ҳақида. Тўғри, Америкаданми, Японияданми ёки Европаданми ўрганадиган жиҳатларимиз ҳам бор. Айтайлик, китобга бўлган қизиқиш каби. Аммо инкор этадиган томонларимиз кўпроқ. Уларнинг ўзларига хос одоб-ахлоқларини камситмаган ҳолда агар холис равишда таққосласак, кўп жиҳатдан ўзимизники афзал эканини кўрамиз. Масалан: уларнинг олижанобликлари бизнинг олижаноблигимиз каби эмас. Уларнинг меҳр-оқибатлари бизларнинг меҳр-оқибатларимиз сингари эмас.

Ўтган йигирманчи асрда жадидлар тарбия ҳақида фикр юритганларида Европадан кўп нарса олишга унданганлар. Миллатнинг равнақини шу билан боғланлар. Европанинг илм-фанда, маданиятда илфор эканига маҳлиё бўлганлар. Уларнинг фикрига бутун тўғридан-тўғри эргаша олмаймиз. Чунки тарбия соҳасида Америка ҳам, Европа ҳам кейинги юз йил ичida таназзулга юз тутган. Буни ўзлари ҳам баъзан тан оладилар ва ижтимоий соҳаларда турли тадқиқотлар ўтказадилар. Франциялик адаб Албер Камюнинг «Бегона» деган асарига Нобель мукофоти берилган. Асар қаҳрамони ҳатто ўзининг онаси ўлимига ҳам бефарқ, севги ҳам унинг қалбини юмшата олмайди, хуллас, у ҳар қандай меҳр-муруватдан бегона, руҳсиз бир тана. Асар қаҳрамони оддий бир йигит эмас, балки бугунги Европанинг рамзий тимсоли. Буни ўзлари ҳам тан олганликлари учун юқори мукофотга лойиқ кўришди.

Баъзи ёшлиар маҳлиё бўлаётган Farb бутун жиноятчиликка қарши чора тополмаяпти. Кўз кўриб, қулоқ эшитмаган ваҳшийликлар ўша томонларда туғиляпти ва жаҳонга тарқаяпти. Кўз кўриб, қулоқ эшитмаган

аҳмоқликлар ҳам ўша ерларда туғилиб, юқумли қасаллик каби тарқаяпти. Бунга биргина мисол: етти-саккиз ёшли қызчаларни, ўғил болаларни ўғирлаб, зўрлаб (педофиљ), сўнг ўлдириб юборишни қандай изоҳлаймиз? Ахир бу ваҳшийликлар оммавий тус оляпти-ку?! Яхши, биз бу ҳаром ишларга ислом дини нуқтаи назаридан баҳо бермайлик, Рим папасининг ўзи ҳам булардан ташвишда-ку? У барча мамлакатлар бошлиқларига мактуб йўллаб, эркакнинг эркак билан, аёлнинг аёл билан никоҳданишини ман этувчи давлат қонунлари қабул қилинишини тавсия этди. Аммо бу тавсия инобатга олинмади. Масалан, Германия бундестаги бу масалани муҳокама этиб, бундай қонуннинг қабул қилиниши инсон ҳуқуқларига зиддир, деган қарорга келибди. Ана аҳмоқлик! Гап қандай ҳуқуқ ҳақида кетяпти? Бузуқлик қилиш учун уларга ким ҳуқуқ берган? Улар Лут алайҳиссалом қавмига Аллоҳ томонидан юборилган қаттиқ жазога нима сабаб бўлганини билмасмикинлар?

Сизни маҳдиё этаётган кимсаларнинг афти ангорида одамийлик нурини кўрмаймиз. Худо одамни гўзал тарзда яратган, у кимсалар эса ҳайвонга ўхшашни ёқтирадилар. Қизлар сочларини қирдириб ташлайди. Таналарини татуировка билан чаплашади. Баданга турли суратлар чиздириш жиноят оламининг одати эди. Чизилган суратга қараб бу одамнинг жиноят оламидаги мавқеи билинарди. Бу касаллик аввал спортчиларга юқди. Уларни тушуниш мумкин, жисмоний кучга кўпроқ эътибор берив, маънавий қашшоқлигига парво қилишмайди. Лекин санъат аҳли-чи? Улар халқقا юксак маданият намуналарини кўрсатишлари керак-ку?! Яқинда бир воқеа мени ғоят афсуслантириди: ўзбек санъати тарихида Зокировлар суоласининг юқори мартабаси бор. Карим Зокиров, Ботир Зокиров, Жамшид Зокиров, Фаррух Зокиров. Шу оиласининг қизи Луиза Зокирова кўп йиллар муқаддам АҚ-Шга кўчиб кетган эди. Унинг қизи Наргиз Зокирова

саксонинчи йилларда Ўзбекистонга келиб бир-икки қўшиқ айтди. Кейин АҚШга қайтиб, унда бир италийлик йигит билан турмуш қурди. Мен уларнинг шахсий ҳаётларини таҳлил қилиб, муносабатимни билдирмайман. Лекин бир нарсани қўп қатори мен ҳам талаб қиласман: хориж юртларга бориб, «ўзбекман», деб яшаяпсанми, миллат шаънига доғ туширишдан ўзингни эҳтиёт қилас. Аксинча, хориждагилар «шу одам ўзбек!» деб сенга қойил қолсинлар. Ўз ишинг, ҳаракатинг билан она ватанингга шараф келтирмас экансан, миллингни тилга олмай қўя қол. Хуллас, Н.Зокировани яқинда Россия телевидениеси кўрсатди: сочлари қирилган, бадани татуировка билан тўлган... Яна ўзбек қизи эмиш! Ўзининг эътирофига кўра, ўзбек тилини унугланган эмиш. Бу гапи ёлғондир, туғилганидан бери ўзбек тилини билмагани эса ростдир.

Майли, мени айбситманг, шахсий кечинмаларни бас қилиб, яна мавзуга қайтай.

Хўш, энди айтайлик, бутунда Фарбдан нима олишимиз мумкин? Биз олмаймиз, деб рад этсак-да, бу ҳайвоний ахлоқларни тарғиб қилувчи омиллар турли китоблар, интернет тармоқлари, телевидение орқали айрим tengdooshlariningizning қалбларига кириб келяпти-ку? Уларни қандай даф қиласми? Бу ҳақда ҳеч ўйлаб кўрганмисиз? Айтайлик, хорижда «эротик тарбия» деган аҳмоқона йўналиш тарафдорлари бор. Улар ўсмиirlarining шаҳвоний ҳирсини уйғотувчи суратлар, фильмларни кўрсатиш билан болаларни тарбия қилишмоқчи. Қип-қизил аҳмоқлик-ку бу! Уларга қарши қандай чора-тадбир қўллашимиз мумкин? Бир одам уйидаги телевизорни беркитиб ташлабди. Шу билан мақсадга етамизми? Кўчалардаги интернет-клублар, видеобарлар, дискотекалар-чи?.. Уйидан анча узокқа жойлашган лицей ёки коллежга «ўқишига кетдим», деган tengdooshingizning бу жойларга кирмай келишига ота ва онасининг ишончлари комилми? Катталарда ҳам бу борада айб бор: қўни-қўшни, қарин-

дош-уруғ билан ош-овқатни баҳам күрамиз. Зиёфатларда тинмаймиз, бир-биrimизга гап бермаймиз. Ана шу сұхбатларга диққат қылайлик: тарбия ва унинг усуллари ҳақида ҳеч сүз юритамизми? Йүқ! Нари борса бироримиз фарзандимизнинг қайсар бўлиб бораётганини айтиб шикоят қилиб қўямиз. Мұхтарам ота ва оналар, энди эсимизни йигиб олайлик! Агар сел келса, якка-ёлғиз ҳолда жон сақлаш маҳол. Бир-биrimизнинг ёрдамизга муҳтож бўламиз. Қарайлик: ёмон тарбия сели ёпириляпти, ўзимизнинг руҳиятимизни, ёшлиримизни, яқинларимизни бу бало селидан қутқариш учун қўлни қўлга бериш вақти етмадимикин? Қўлни қўлга бериш – шунчаки қуруқ гап эмас. Полшаликлар буни амалда исбот этишган. Бир кун, бир соат бутун мамлакат аҳолиси кўчага чиқиб, қўлни қўлга бериб, жонли занжир ҳосил қилишди ва гиёҳвандликка қарши курашиш йўлида яқдил эканликларини ифода этишди. Шубҳасиз, бу сафда сизнинг тенгдошларингиз ҳам бор эди.

Кейинги йилларда илм даргоҳларида ислоҳотлар бўляпти. Қандайдир инглизча соҳаларни ўргатадиган муассасалар, жамиятшунослик, руҳиятшунослик, иқтисодиёт ва шу каби даргоҳлар мавжуд. Яна Гарбдаги турли фонdlарнинг бўлимлари катта-катта пуллар сарф қилиб, нималар биландир шуғулланишади. Булар яхшидир, булар жамият учун зарурдир, балки.

Лекин, такрор сўраймиз, инсонга қаерда ахлоқ ўргатилади? Инсон қаерда ахлоқ илми билан таъминланади? Гап ўргатиш, илм бериш ҳақида бораётгани йўқ. Ўргатмоқ – қайсиdir соҳага оид маълумот бериш деганидир. Ўқув даргоҳларида илмли, маълумотли бўлади, аммо одам бўлиш... Халқимиз бекорга «Олим бўлиш осон, одам бўлиш қийин», демаган. Шунинг учун тарбиянинг зарурлигини яна қайта-қайта таъкидлаймиз. Адабни, тарбияни олганидан сўнг киши ҳақиқий комил инсон даражасига этиши мумкин. Ўзимиздаги ёки четдаги университетда фақат илм олиш билан чеклан-

ган замонавий бир инсон комил одам бўла олармикин? Чинакам гўзаллик нима эканини ҳис эта олармикин?

Инсонда гўзаллик туйғуси, гўзал ахлоқ бўлиши шарт. Гўзалликка мафтуналик – ҳар бир ишни гўзал тарзда, яъни гўзал ахлоқ билан бажариш талаб этилади. Абу Райҳон Беруний ҳазратлари гўзалликни «ташқи ва ички» деб бўлиб, шундай фикр билдирган эканлар:

Ташқи гўзаллик, қиёфадаги жамол – булар иккови ҳам ёқимли бўлиши керак, одамлар ўзаро учрашгандаридан ушбу гўзал жамолни кўришга рағбат қиласидар. Лекин шакл чиройи она қорнида ато қилинади, уни ўзгартиришга ҳеч бир зот қодир эмас. Аммо хулқатворга келсак, уни Аллоҳнинг амрларига мувофиқ даволаб, тарбиялаб, гўзал – покиза тутиб, ёмон ҳолларга туширмаслик мумкин.

Умми Дардо (розийаллоҳу анҳо) айтибдиларки: «Кечаларнинг бирида Абу Дардо намоз ўқиш учун ўринларидан турдилар-да, тонг отгунича: «Эй Аллоҳ! Мени чиройли қилиб яратганингдек, ахлоқимни чиройли қил!», деб йиглаб чиқдилар. Шунда мен у зотдан: «Эй Абу Дардо! Нима учун тун бўйи қилган дуойингиз фақат ахлоқингизни чиройли ва яхши қилиш ҳақида бўлди?», деб сўрадим. Абу Дардо: «Бир мусулмон банда ўз ахлоқини яхшилашга ҳаракат қиласерса, охири шу яхши ахлоқи уни жаннатга киритади. Агар у ахлоқини ёмон қиласерса, шу ёмон ахлоқи уни дўзахга киритади», дедилар».

Бутун дунёда гўзал ахлоққа эҳтиёж бор. Турли динлар, гуруҳлар, жамоалар ҳар хил йўллар орқали бу гўзалликка эришиш учун ҳаракат қиласидилар, йўллар ахтарадилар. Уларнинг аксари адаш йўлларда сарсари бўлиб ўтадилар бу дунёдан, айримлари эса ҳалоқат жарига ҳам кулайдилар.

Тарбия йўлида сўздан – маънога, шаклдан руҳга, зоҳирдан ботинга кириб бориш афзал деб билинади. Чунки шакллар алалоқибат амалда гўзал маънавият-

ни юзага келтиради. Масалан, салом берилиб-берилиб ўзаро муҳаббат пайдо бўлади. Шу зайдада муҳаббатга, ўзаро дўстликка ташвиқ қиласди. Муҳаббатнинг эса буюк савоби бордир. Бир-бирлари билан хафалашгандарнинг одатлари маълум: салом-алик қилмайдилар ва шу ҳаракатлари билан муҳаббатни бўғадилар. Оқибат эса бу муҳаббатни бутунлай ўлдириб қўйишлари ҳам мумкин. Ҳолбуки, бир инсон бошқа бир инсоннинг тўғри йўлга киришига васила бўлиши, уни ёмон йўллардан қайтариб, яхшилик йўлига бошлиши дунёдаги барча нарсага эга чиқишдан кўра хайрлироқдир.

Энди тарбияда шахс намунасининг ўрни ҳакида фикрлашсак. Сизга насиҳат қилинганда «Фалончига ўхшасанг бўлмайдими?» ёки «Фалончидан ўрнак олсанг-чи!», деган дашномни эшитиб қоласиз. Чиндан ҳам одамда бошқа бир одамнинг яхши фазилатларига интилиш мавжуд. Баъзан бунинг акси ҳам бўлиши мумкин, яъни ёмонликларини эгаллашга интилиш эҳтимоллари ҳам бор. Ҳар биримизнинг бошқаларга ва бошқаларнинг ҳар биримизга бўлаётган ва бўладиган таъсирини ҳам сира унутмаслигимиз керак. Шунга доир бир ривоят.

**Ривоят.** Абдураҳим исмли бир йигитнинг гўзал отига Маҳмуд исмли йигит ишқибоз эди, «сотгин», деб кўп ялинарди, аммо Абдураҳим унинг илтимосларини рад этарди. Охири Маҳмуд отга макр-ҳийла билан эга чиқиши ихтиёр қиласди ва кекса, хаста одам қиёфасига кириб Абдураҳимнинг йўлини пойлади. Сўнг гўзал отга миниб ўтаётган йигит қаршисига чиқиб ялинди:

– Эй марҳаматли ўғлим, мен манзилимга етолмай қолдим, қарагин, эҳтимол яна озгина юрсам жон таслим қиласман, менга раҳм қилиб, отингга мингаштириб ол. Ҳақингга дуолар қиласди.

Абдураҳим унинг макрини англамай, отига миндирди. Маҳмуд эса уни йиқитиб, отни чоптириб қочди. Сал нари боргач, тўхтаб, манманлик билан деди:

– Эй нодон, сен мени танимадинг, мен – Маҳмудман! Отингни сот, деб қанча ялиндим, сотмадинг. Ана энди отингдан умидингни уз!

Абдураҳим унинг гапини эшитиб, дебди:

– Майли, отни сенга бердим, лекин бу қилган ишингни бирорга айта кўрма. Чунки бу алдамчилигинги, ҳийла-найрангинг ҳалқ орасида тарқалса, кўп кишилар сенинг ярамас йўлингга кириб кетишлари мумкин. У вақтда бирор-бирорвинг ҳолига раҳм этмайди. Ҳалқимиз орасида шафқат, марҳамат, муруват каби гўзал хислатлар йўқолади. Алдамчилик, муғомбирилик ва инсоғизлилар каби ярамас иллатлар авж олади. Ўтинаман, қилган ишингни ҳеч кимга айтма, мен ҳам яширин тутаман.

Бу хитоб Маҳмудга таъсир қилиб, изига қайтибди, узр айтибди. Абдураҳим эса отни унга сотишга рози бўлиб, ораларида дўстлик қарор топибди.

Қиссадан ҳисса: ҳар биримиз ёшмизми ё қаримизми, қандай ишни қилмайлик, кимгадир ўрнак бўлишимиз эҳтимоли борлигини унутмаслигимиз керак. Агар бир одам ёмонлик сари қадам ташладими, билсинким, фақат ўзи гуноҳлар олами сари кетмаяпти, қайси бир оми ҳам унга эргашяптики, унинг гуноҳи ҳам зиммасидадир. Сиз «Ёшман, бирорга таъсирим йўқ», деган нотўри фикрда юрманг. Сиздаги яхши ёки ёмон одат биринчи галда тенгдошларингизга «юқади», кейин укаларингизга, сингилларингизга... Яхши одобингиздан ҳатто катталар ҳам таъсиrlанишлари, сизда мавжуд одобнинг ўзларидан йўқлигини англаб, бу фазилатни тарбия қилишга киришишлари ҳам мумкин.

Ахлоқ тарбияси – ўзимизни ярамас майл-ҳаваслардан сақлаш, таъбимиздаги олий фикрларни тараққий эттириб, ҳаракатимизни тўғри бир нуқтага йўналтириш демакдир. Ахлоқ тарбиясининг ғояси – инсонларнинг комил ва гўзал бўлишларини таъмин этишdir. Хулоса қилиб айтсак: тарбия – инсон табиатининг бу-

тун қобиляйтларини мунтазам, мутаносиб ва келишган бир сувратда орттиради, инсонни хайрли мақсадларга етказади. Тарбия – ҳақиқий ҳаёт мактабида талабаларга илм беришдир. Тарбия – инсонларни фазилатли, жамиятга фойдали қилиб етиштириш учун энг қисқа йўлдир. Тарбиянинг мақсади – инсонларнинг авлоддан авлодга тараққий эттириб, инсониятнинг умумий юксалишига хизмат қилдиришdir.

### **«Ҳаёт тожи эрур оёғин гарди»**

Одам зотининг энг гўзал ва ҳаёт учун энг зарур фазилатларидан бири – муҳаббатdir. Шу боис «Муҳаббатсиз қалб тош қалбdir», дейдилар.

**Умидимиз юлдузлари**, эҳтимол ўқиганингиз бордир, ишқ-муҳаббат хусусида кўп ва хўб ёзилган. Донолардан бири: «Муҳаббат ўзи эски нарса, аммо ҳар бир қалб уни қайтадан кашф этади», деган экан. Кишининг мижози ҳар хил бўлганидек, унинг ишқ-муҳаббатга доир ҳис ва туйгулари ҳам турличадир. Шунингдек, тоқатларининг даражаларида ҳам тенглик йўқ. Демоқчиманки, киши ишқ ва муҳаббатни бир хилда англамайди ва қалби бир хилда ёна қолмайди. Бир куни Искандар Зулқарнайнга хабар берибдиларки:

- Фалончи қизингизни севиб қолибди!
- Севиб қолган бўлса, нима қилишим керак? – деб сўрабди подшоҳ.
- Уни ўлдириш керак, фармон беринг, – дейишибди.
- Бирор севгани учун, бошқа бирор эса ёмон кўргани учун ўлдирилаверилса, дунёда одамзотдан номнишон қолмайди-ку? – деган экан подшоҳ.

Ажабким, ишқ-муҳаббат дейилганда кўпроқ йигит ва қиз орасидаги туйфуни тушунамиз. Шуаронинг, айниқса, бутунги шоирларнинг сатрларидаги ишқ ва муҳаббат шундан ўзга нарса эмас. Ҳолбуки, ишқ ва муҳаббатнинг қамрови анча кенгдир. Авваллари «ишқ» дейилганда кўпроқ банданинг Яратганга муҳаббати

түшунилган ва қадим адабиётда бу ўз аксини гўзал ҳолларда топган. Яна ота-онага муҳаббат, одамларнинг ўзаро муҳаббатлари (буни «хурмат» ҳам деб атаймиз), она заминга, она Ватанга муҳаббат, касб-корига муҳаббат, дўстларига, қариндошларига, ўз фарзандларига муҳаббат...

Ҳазрат Алишер Навоий ишқнинг баёнини бундай тасвиirlайдилар:

*«Ишқ порлоқ юлдуздир, башарият кўзининг нуру зиёси шундан. Ишқ товланиб турувчи гавҳардир, инсоният тожининг зийнати ва баҳоси шундан. Ишқ толе қуёшидир, қайгули диллар тиканзори ундан гулишан. Ишқ балқиб турган тўлин ойдир, қоронги кўнгиллар кечаси ундан равшан. Ишқ кенг денгиздир, ҳар тўлқини юз ақлу хуш кемасини гарқ қиласди. У баланд тогдир, ҳар чўққиссининг ўткир қирраси минг зуҳд-тақво эгасининг бошини учиради. Ишқ куйдирувчи шуъладир, кўпгина жон ва кўнгилларни хашакдек ёқади. Ишқ алангали чақмоқдир, кўпгина жону дилларни ёлқини билан кул қиласди. Ишқ аждаҳодир, оламни дамига тортмоқ унинг тилаги. Ишқ қаҳрли подишоҳдир, олам аҳлини ёппасига қирмоқ унинг мақсади, у ҳар қанча қон тўйккани билан зерикмайди, у ҳар қанча одамни қон қиласа ҳам қониқмайди. Ишқ яшиндир, ақлу дин хирмонини куйдиради, у бўрондир, кўйғанларнинг кулини кўкка совуради. Ишқ шунчалар қайсарки, унинг олдида подишоҳ ҳам, гадо ҳам менг, у шундай зулмкорки, унинг қошида ифлосфосиқ ҳам, покдил ошиқ ҳам бир... Дунё бозорининг гавгоси ва дунёда бор ҳамма нарсаларнинг савдохонасидаги шовқин-сурони ишқ түфайлидир...»*

Улуг шоирнинг бу баёнидаги маъно кенг қамровидир. Қадим адабиётдаги сўфий шоирлар «ишқ» атамасини, асосан, Аллоҳга бўлган муҳаббат маъносидан ишлатишгани бежиз эмас. Ҳақиқат нуқтаи назаридан қарасак, муҳаббатнинг энг аввали Яратган Раббимизгadir. Аллоҳни севмаган одам унинг буйруқларини

бажармайди, яъни яхшилик йўлида юрмайди, демак, бошқа ҳеч кимни севмайди ва ҳеч кимга яхшилик қилимайди. Бу мавзу фоят кенг ва чуқурлиги сабабли, диний олимларимиз китобларидан ўқиб, суҳбатларидан баҳраманд бўлиб ўрганасиз, деган умид билан отонага муҳаббат мавзуига ўтамиш.

Ота ва онани (бува ва бувини) ҳурмат қилиш барча учун, сиз учун ҳам тушунарли бўлган вазифадир. Математиклар тили билан айтилса – аксиома, яъни исбот талаб этилмайдиган ҳақиқатдир. Бу мавзуда кўп насиҳатлар эшитган бўлсангиз ҳам, кўп ҳикматлар билсангиз ҳам, тарбиянинг бу томонини четлаб ўтишни лозим топмадик.

Ота-онасини ҳурмат қилмаган фарзанд ўз фарзандларидан ҳурмат талаб қилиши ножоиздир, дейдилар. Сиз бу фикрга қўшиласизми? Унда «қайтар дунё» деган иборага қандай қарайсиз? «Оталарингизга меҳрибон бўлинглар, шунда сизлар ҳам фарзандларингиздан меҳр-мурувват кўрасиз», деган шарафли ҳадисни тушуниш қийин эмасдир?

Эндиғи ривоятни кўп эшитган бўлсангиз ҳам, такрорлайлик.

**Ривоят.** Бир одам узоқ умр кўриб, ўғлиниң жонига тегибди. Ўғил отадан қутулиш мақсадида уни тоғу тошга ташлаб келиш учун қопга солибди-ю, орқалаб йўлга тушибди. Чарчаб, бир дараҳт остида тўхтаганда қопдаги отаси кулаверибди. Ўғил бундан ажабланниб, кулиш сабабини сўраганида ота дебди: «Мен ҳам отамни қопга солиб тоғу тошга ташлаб келиш мақсадида орқалаган эдим. Тасодифни қарагинки, худди шу ерга келганимда мен ҳам дам олиш учун тўхтаган эдим...»

**Яна бир ривоят.** Ўғил кўзлари хираллашиб қолган, овқат еяётганида қўллари қалтирайдиган қари отасининг иззат ва ҳурматини бажо келтирмас эди. Бир куни чол бечоранинг қўллари қалтираб, ош сузиб берилган чинни косани тушириб, синдириб қўйди. Буни

кўрган келини нордон гап айтиб, унинг кўнглини вайрон қилди. Ўғил эса отасини ҳовли этагидаги зах хонага кўчирди. Келин энди қайнотасига эски ёғоч косада таом берадиган бўлди. Бундан кўнгли озор топган қария вафот этиб кетган кампирини эслаб, зор-зор йигларди. Унинг ёлғиз юпанчи ва суюнчиғи беш ёшли набираси эди. Бола бобосининг ёнига келиб ўтиради, маъсумона сўзлари, ёқимли қилиқлари билан бобосининг кўнглини овлаб, унинг ғам ва аламларини бироз бўлса-да, енгиллатарди.

Ўша беш ёшли бола қўлига пичоқ олиб бир ёғочни йўниб ўтирганида отаси: «Ўғлим, нима қиласпсан?», деб сўрабди. Бола юмушидан бош кўтартмаган ҳолда жавоб берибди:

– Дадажон, ойим эски ёғоч косада бувамга овқат берадилар. Мен ҳам ёғоч коса ясаяпман, катта бўлганимда ойим билан сизга шу косада овқат бераман.

Гўдакнинг бу ибратли гапи отага таъсир қилди. У дарҳол зах хонада ётган отаси ҳузурига кирди, тиз чўқди, кўзёши тўкиб, узр сўради...

Бу барчага мактаб бўлгувчи воқеа баёни. Баённинг хотимасини бу каби ижобий тарзда якунламай, «гўдакнинг гаплари отасига таъсир этмади, чол ўша зах хонада хорлик билан ўлим топди», десак ҳам бўлади. Чунки қалби тош фарзандлар ҳам бор ва уларни бир гап билан инсофга келишларига ишониш қийин. Начора, инсофга келмасалар ўzlари эккан бемехрлик дараҳтининг аччиқ мевасини ўzlари ейдилар. Бу жазо узоқ куттирмайди. Бугун атрофларида эмаклаб юрган ширин фарзандларининг ёғоч косада таом тутиш онлари ғоят тез келганини ўzlари ҳам билмай қоладилар.

Бунга ўҳшаш ибратли воқеаларни кўп эшигтанмиз. Энди бўлиб ўтган ҳақиқий воқеалардан айтай.

**Воқеа.** Москва телевидениесида бир кўрсатув на мойиш этилди. Саксон уч ёшдаги соғлом онани эллик етти ёшдаги ўғил жиннихонага жўнатибди. Мақсад – уйга эга чиқиши. Шу кўрсатувда бир журналист аёл Че-

ченистон урушида кўрганларини сўзлаб берди. Грозданий шаҳри вайрон этилгач, кўчаларда бошпанасиз қолган ҳимоясиз қариялар нажот умидида тентираб юришаркан. Улар, асосан, рус миллатига мансуб қариялар экан. Улар йўлда учраган журналистларга мурожаат этишиб, Россиянинг бошқа шаҳарларида яшаётган фарзандлари, қариндошлари манзилини беришиб, уларга хабар йўллашларини ўтиниб сўрашаркан. Журналист аёлнинг ўзи ўнлаб шаҳарларга қўнгироқ қилибди, хатлар ёзибди, аммо ҳеч ким келмабди, отаси ёки онасини ёки қариндошини олиб кетмабди. Саксон ёшдан ошган кўзи ожиз бир кампирни журналист аёлнинг ўзи ҳарбийлар ёрдамида Москвага келтирибди. Шунда ҳам у муштипарни ўғли оиласи бағрига олмабди...

Шу воқеаларни баён қилиб бўлгач, журналист аёл чеченларнинг қарияларини мисолга келтирди. Улар бирон қарияни эътиборсиз қолдиришмабди. Ўз жонларини хатарга қўйиб, қариларни опичиб бўлса ҳам хатарли ерлардан олиб чиқишаркан. Сўнгги тишлам нонни ёки сўнгги қултум сувни қарияларга беришаркан...

Қарияларни опичиб юришларини эшитиб, шарафли ҳадисларнинг бири ёдимга тушди.

**Ҳадис.** Бир одам зиёратда онасини кўтариб юриб тавооф қилдираётган экан. Пайғамбаримиз (с.а.в.)дан «Онамнинг ҳақини адо қилдимми?», деб сўрабди. Шунда Расулуллоҳ (с.а.в.): «Йўқ, бир оҳ тортишининг ҳақини ҳам адо қилганинг йўқ», деган эканлар.

Мазкурнинг яна бир гўзал давоми ҳам мавжуд: Абу Бурда ибн Аби Мусо Ашъарийнинг айтишларича, Абдуллоҳ Ибн Умар бир яманлик одамнинг ўз онасини опичлаб, хонаи Каъбани тавооф қилдириб юрганини кўрдилар. У одам бир байтни оҳанг билан ўқиркан:

*«Онаи зорим учун бўйнимни эгкан теваман (туяман),  
Тевага мингандонам ҳорсалар-да, мен чарчамам.*

У шуни ўқиб туриб, Абдуллоҳга қаради-да: «Эй Абдуллоҳ ибн Умар! Мана шу хизматим билан мен онамнинг хизматини қила олдимми?» – деб сўради. «Йўқ, бу хизматинг сени туғиш вақтида онангни қийнаб тутган тўлғокларининг биттасига ҳам баробар эмас», – дедилар».

Бир киши Муҳаммад алайҳиссаломдан:

– Мен онамни кўтариб Маккани зиёрат қилдирдим, ҳақини адо қилдимми? – деб сўради.

Расулуллоҳ (с.а.в.) унга жавоб қилдилар:

– Йўқ, у сени кучогида олиб юрганда фарзандим униб-ўссин, катта бўлсин, – деб ўйлаганди. Сен эса кўтариб юрган пайтингда онангнинг ўлими ҳақида ўйлардинг...

Сиз, эҳтимол, Чеченистондаги воқеани ўзга дин ва ўзга миллатга боғлаб хulosа чиқарарсиз? Асти ундан қилманг. Чунки оқибатсиз, ноқобил фарзандларни барча миллатларда учратамиз. Ота-онасига бемеҳр, ноқобил фарзандларнинг дини ҳам, миллати ҳам йўқ, десак адашмаймиз. Фикримизнинг далили учун ўзимиз гувоҳ бўлган бир воқеани баён қилиш ниятимиз бор. Аммо ундан аввал яна шарафли ҳадисларга муружаат этайлик:

Бир йигит Расулуллоҳ (с.а.в.)га шикоят қилиб дедики:

– Отам қариб, жуда бебош бўлиб кетганлар. Ақдан озганларми, деб қўрқаман. Уйимга келиб, қўлларига нима илинса, шуни олиб чиқиб кетаверадилар.

Сарвари коинот (с.а.в.) отани чақиртирдилар. Хузурларига келган қари, бечораҳол, уст-бошлари ҳароб одамдан: «Ўғлингнинг гаплари тўғрими?» – деб сўрадилар.

– Ҳа, тўғри, – деди чол. – Мен ўғлимни ўзим тарбия этганман. Онаси барваqt вафот этган эди. Ўзим емай – ўғлимга едирдим, ўзим киймай – ўғлимга кийидирдим. Қариганимда боқар, деб умид қилдим. Аммо у бераҳм чиқди. Мендан хабар олмайди. Ўзим уйига

келиб, қўлимга илингандар санни олиб чиқиб сотаманда пулига овқат олиб ейман. Ё Расулаллоҳ! Шу ишим дурустми ё дуруст эмасми?

Отанинг бу гапларини эшитиб Расулуллоҳ (с.а.в.) ўғилнинг елкасидан маҳкам ушладилар-да, дедилар: «Топган нарсаларинг, ҳатто сенинг ўзинг ҳам отангнинг мулкидир. Агар топган мулкинг етмаса, отанг ўзингни сотиб пулини емоқликка ҳақи бор. Сен ўйлаганинги, топган мулкларимга ўзим моликман-у отангнинг унга алоқаси йўқ, деб. Ҳаммасига отанг эгадир!»

**Яна шу мавзуда бир ҳадис.** Бир қиз онасидан шикоят қилди:

– Онамнинг ақллари ўzlаридаги эмас. Уйимга келиб тўпалон қиладилар, тинчлик бермайдилар.

Расулуллоҳ (с.а.в.) онани чақиртирдилар. Фоят қари, бечораҳол она дедики: «Ё Расулуллоҳ! Сабр қилайин десам, қизим хабар олмайди. Ҳатто болаларини юбормайди. Ёлғиз ўзим пашшаларга ем бўлиб ётаман. На ўлиб қутуламан, на роҳат кўраман. Қизимнинг бепарвогиши шунчалик.

Расулуллоҳ (с.а.в.) дедилар:

– Тўққиз ой, тўққиз кун, тўққиз соат сени қорнида тарбия этган ким? Ўлим жари ёқасига келиб, сени тукқан ким? Сени икки йил эмизган ким? Сени балофатга етказиб узатган ким? Шу онанг! Агар шу онангни рози қилмассанг, жаннат сенга ҳаром! Тавба қилсанг – қилдинг, йўқса ярим мулкингни олиб бераман.

Қиз тавба қилди...

Бугун радиода эшиттириб туриладиган ашуналар орасида «Эй ўғил, ҳаддингда тур, отанг сени сотганда ҳам», деган қўшиқ шу ҳадислардан илҳомланиб яратилган бўлса ажаб эмас.

Оқ бўлиш – ота-онага озор бериш, ранжитиш ва буйруқларини бажармасликдан иборатdir. Ота ёки она-нинг ноқобил фарзандига қараб «сени оқ қилдим», деб эълон қилиши шарт эмас экан. Диллари оғришининг ўзиёқ фарзанднинг оқ бўлиши, дейдилар. «Оқ бўлиш»-

нинг луғавий маъноси – ажралишдир. Яъни фарзанд ота-онасидан тириклийин ажраляпти, демак. Отаси ёки онасига яхши хизмат қилмаётгандар унутмасинларким, улар айни чоғда дўзахдан ўзларига ўтли жой тайёрлаяптилар. Зотан, дўзахнинг «ҳасрат қудуғи» деб номланган энг ёмон жойи ота-онасини хорлагандар учун эканлиги мӯътабар китобларда алоҳида зикр этилган. Дунёвий нуқтаи назардан қарасак, Ўзбекистоннинг Асосий қонунида ота ва онага меҳрибонлик қилиш бурчи алоҳида таъкид этилган. Бу бурчни бајармаслик эса жиноят ҳисобланади.

**Воқеа.** Муборак умра сафари чоғида кўнгилларни хира қилувчи воқеа юз берди: фаргоналик бир одам онасини қутлуғ зиёратга олиб борибди. Албатта, бу таҳсинга лойиқ иш. Кўпчилик ота-онасини шундай улуғ зиёратларга олиб бормоқдикни ният қилади. Айримлар эса бу каби зиёрат ота-оналарига насиб этмай, вафот этиб кетгандаридан армонда юрадилар. Фаргоналик йигитнинг онасига бўлган қўпол, қўрс муомаласи барчани ранжитди. Она бечора умрида биринчи марта қишлоғидан четга бориши бўлса керак, самолётга ёки автобусга қандай чиқиши, ўтиришни билмай тараддулданади, баъзан шошиб қолади, баъзан нимагадир улгурмайди. Ўғил эса унга ёрдам бериш ўрнига дўқ уради: «Мени шарманда қиляпсиз!» – дейди. Билмайдики, унинг шармандалиги онасининг ҳаракатида эмас, балки ўзининг феълида, қўпол муомаласида. Кўпчилик «Онангни бу ерга олиб келиб заҳарли муомала қилганингдан кўра, ўз уйингда ширин муомала билан кўнглини олсанг савоблироқ бўлармиди! Онани кўпчилик ҳузурида беҳурмат қилишинг – Каъбани вайрон қилиш гуноҳи билан баробар эмасми?», деб тўғри танбеҳ бердилар. Эҳтимол, ўғилнинг асосий нияти онасини зиёратга олиб келиш бўлмагандир. Бундай деишишмга сабаб: уларнинг бу масканда қариндошлири кўп экан. Йигит улар берган совға-саломлар билан овора бўлиб қолди. Балки онани олиб келишни ўша

қариндошлар талаб қилишгандир. Шу талаб бўлмаса, йигит онани олиб келишни хаёлига ҳам келтирмас...

**Яна бир воқеа.** Пойтахтнинг Шайхонтоҳур тумани судида бунда-да аянчлироқ воқеага шоҳид бўлган эдим: ота қизини судга мурожаат этиб, оғир жазо беришни талаб қиляпти. Ажабланяпсизми? Мен ҳам дастлаб ажабланган эдим, сўнг ғазабландим. Гувоҳликка келгандардан бири: «Агар одилман десангиз, бу қизни энг олий жазо – отишга ҳукм қилинг, ҳукмни ҳалқ олдида ижро этинг. Ноқобил фарзандлар бундан ўрнак олсин!», деди. Ўлим жазосига лойик кўрилаётган қиз отанинг ёлғиз фарзанди экан. Онадан ёш етим қолибди. Қизининг баҳтини ўйлаб, ота бошқа уйланмабди. Қизини орзу-ҳавас билан куёвга узатибди. Хасталаниб, шифохонага ётганида нафсиға банди қизи ота номидан қалбаки ҳужжатлар тайёрлаб, уйни сотиб юборибди. Ота шифохонадан қайтсанки, уй йўқ... Қолгани сизга маълум. Албатта, суд бу фарзандни ўлимга ҳукм қилмайди. Товламачилиги учун бир неча йилга қамар ёки аёллигини эътиборга олиб, озодликдан шартли равишда маҳрум қилас. Лекин Аллоҳнинг жазоси қаттиқ бўлади. У фарзандни суд ўлимга ҳукм қилмаса ҳам у аллақачон ўлган, тирик ўликка айланган. Ундан энди ер ҳам ҳазар қиласди. Эсини йиғиб тавба қиласа қилас, бўлмаса охирати тамоман куяди. У-ку, тавба қилас, аммо ота рози бўлармикин ундан?

Энди аввалги воқеага қайтсанк: ривоят қиласиларким, бир киши Ҳажга бормоқчи бўлди. Аммо кекса онасини ёлғиз ташлаб кетишга кўзи қиймади. «Устозга бораман, нима десалар шу», деб ҳазрати шайх Абу Ҳозими Маданий хузурларига келди. Шайх ҳазратлари ухлаётган эдилар. Уйғониб дедиларки: «Ушбу дам тушимда Пайғамбаримиз (алайҳиссалом)ни кўрдим. Дедиларки: «Ҳажга кетмоқдан кўра, она ҳақини сақламоқ сенга яхшироқдир». Сен онангнинг ризосини истаки, Аллоҳнинг ризоси шундадир».

«Жаннат оналар оёfi остидадир», мазмунли ҳадиси шарифни эшитмаган одам йўқдир. Аммо унинг маъносини ҳамма ҳам билавермаса керак. Онасини ёлғиз ташлаб, мушриклар билан урушга отланган йигитни Расууллоҳ (с.а.в.) қайтариб, шундай деганлар. Яъни, жаннатга тушиш учун жиҳодда жон бериб, шаҳидлик мартабасига етиш шарт эмас. Онангнинг хизматини қилиб, розилигини олсанг бас, шу топган савобинг сенга жаннат йўлини очади, дейилмоқчи. Онасини бир эмас, юз марта Ҳажга олиб бориб, бошқа пайт кўнглини ранжитувчилар шу ҳикматлар магзини чақиб кўрсалар ёмон бўлмас.

Инсонга баҳш этилган илк неъмат – ота-она муҳаббати бўлади. Шу сабабли ҳам барчадан ота-онага муҳаббатли бўлишни талаб этади. Киши миллати ёки динидан қатъи назар, одамийлик фазилатларидан баҳраманд бўлса, ўз ота-онасини хорлаб қўймайди.

Отанинг фарзандга меҳри-муҳаббати чексиздир, чунки у фарзандини ўз суратидан кўчирилган нусха, деб англайди. Зотан, отанинг тасаввuri тўғридир. Фарзанд отанинг бир жузви; суратда, хулқ-атворда унга ўхшайди. Шунинг учун ота фарзанди тарбиясига дикқат қиласди. Ўзи истаган фазлу камолни фарзандига беришга, уни ўзидан кўра ҳам мукаммал қилиб етиширишга ғайрат қиласди. Шу мақсад йўлида ҳар қандай машаққатга бардош беради. Фарзанди ҳақида халқдан: «Тарбия қилган отасига раҳмат!», деган олқишини эшитса, севинади.

Фарзанднинг ҳаётига сабаб бўладиган биринчи қувват она жисмидаги қондир. Чақалоқ шу қондан озиқланиб, ҳаётини сақлайди. («Сут билан кирган жон билан чиқади» деган мақолни «Қон билан кирган жон билан чиқади» деганимиз тўғрироқ бўлади.) Бола биринчи сўзни онадан эшитади ва ундан ўрганади. Шунинг учун ҳам биз «ота тили» демай «она тили» деб сифатлаймиз. Болани ўстиришда, тарбия қилишда отага қараганда она кўпроқ ҳисса қўшади. Шунинг учун

бўлса керак, ёш болалар отадан кўра онага кўпроқ майл этадилар. Улфайганларидан кейин ҳам сирларини, аввало, онага айтиб, маслаҳат сўрайдилар. Она фарзанди учун ўзини фидо қилишга тайёр туради. Шоирларнинг илҳомига ҳам айнан шу ҳолатлар қувват берса керак. Қадимдан то шу кунгача она мадҳида ёзилган шеърларнинг адоги йўқ. Шулардан битта байт эслаш вакти етди: Рудакий ҳазратлари ёзадилар:

*Онангдан бош товлама, ошмасин дарди,  
Ҳаёт тожи эрур оёгин гарди...*

Агар она қад-қоматини бир дарахтга ўхшатсак, фарзанд шу дархтнинг ширин бир меваси. Бир йигит она қадрига етмас эди. Она қўзёшлари унга таъсир этмас эди. Бир куни она бешикни олиб, ўғли қарши сига қўйиб деди:

– Эй ёшлиқ, чақалоқлик пайтини унугтан ноинсоф! Мана бу бешикни кўряпсанми? Чақалоқ, чоғингда шу бешикка михланиб, тунги уйқуларни мен ўзимга ҳаром этдим. Бешикда ётганингда юзингга битта пашша ёки чивин қўнса, уни қувишга имконинг бўлмай йиглар эдинг. Мен сени хира пащалардан асраб, бешигингни тебратар эдим. Йифидан тўхтамасанг, сени ечиб олиб, бағримга босардим. Сени деб барча машақ-қатларга чидадим. Куч-қувватимни сенинг камолинг учун сарф этдим. Мана энди катта бўлиб, куч-қувватга тўлдинг. Чақалоқлик, болалик, ёшлиқ пайтларингни унутиб қўйдинг. Энди эса мени ранжитяпсан. Лекин, бир куни келиб, албатта, бу дунёдан ўтасан. Қабрнинг тубига, қоронгулик қаърига кирасан. Ўшанда Аллоҳдан раҳмат нури ололмайсан...

Биз бешикларни кўп кўрамиз. Аммо қачондир шу каби бешикда ётганимизни, онамиз тунлари бедор алла айтиб чиққанларини ўйлаб кўрамизми? Агар ўйламасак, эсламасак, унда ноинсоф фарзанд эканмиз. У ҳолда уйимиз тўрига бешик суратини чизди-

риб, остига «Унутма!» деган хитобни ёзиб қўйганимиз лозимдир?

Баён қилинмиш ривоятда шарқнинг буюқ мутафаккири Саъдий оналик ҳақининг нозик жиҳатлари-га эътиборни тортганлар. Оналарга хизмат қилиш инсонийлик йўлидаги энг яхши амаллардандир. Шубҳасизки, она ҳақини тўлалигича, беками кўст адо қилмоқ бу дунёда мумкин эмас. Онанинг бешикдаги гўдагини минг тури ниёзлар билан ўстириши фарзанди устидаги энг катта ҳақидир.

**Умидимиз юлдузлари!** Сизлардан ўтинчимиз шуки, оналарингиз ҳузурларида турганингизда Саъдийнинг бешик ҳақидаги ривояtlарини доимо ёдда туting.

«Биз инсонни ота-онасига яхшилик қилишга буюрдик» («Аҳқоф» сурасидан).

Сизда бир савол туғилиши мумкин: «Нега Қуръонда бот-бот ота-онага меҳр-мурувват кўрсатиш вожиб эканлиги уқтирилади-ю, фарзандларга меҳрибонлик қилишга буюрилган оятлар деярли учрамайди?» Аллоҳ Таоло мўмин-мусулмонларни комил инсон қилиб тарбиялаш учун қайси фармонини неча марта такрорлашни лозим деб билган бўлса, шунча марта нозил қилган. Негаки, Яратган ўз бандаларининг жисмоний жиҳатларидан ҳам, руҳоний ҳусусиятларидан ҳам жуда яхши огоҳдир. Масалан, у Зот ота-онага, ҳусусан, онага ўз фарзандларига нисбатан шундай меҳр ато этганки, она учун энг оғир, ҳатто таҳликали давр бўлган ҳомиладорлик ва кўз ёриш даври ҳамда чақалоқни эмизиб, тарбиялаш йиллари ота-она ҳаётидаги энг баҳти дамлардир. Бинобарин, ота-онани (албатта, улар агар инсоний мъянавиятдан ажраб, ваҳшийлик даражасига тушиб кетмаган бўлсалар) фарзандига яхшилик қилишга буюраверишнинг ўзи ортиқча ишдир. Аммо фарзандлар эса ёшликларига бориб ёки ўзларининг олдиларидағи ўғил-қизлари билан овора бўлишиб, ортларидаги ота-оналарига бепарво бўлиб

қолишилари мумкин. Шунинг учун Қуръон фарзандларни тез-тез ота-она олдидағи бурчларини адо этишга дағыват қиласы.

Ота-онанинг фарзандга меҳри фитратида – яралишида бор. Бундай меҳрни биз ҳатто жониворларда ҳам күрамиз. Далада кузатған әдим: она совлиқ болланған. Құзичоқ ўйнаб юрибди. Бир маҳал ўзидан каттароқ күзи билан сузишмоқчи бўлди. Бундан совлиқ безовта бўлиб маърайверди. Арқондан қутулишга уринди. Қўзиси биқинидан бир-икки зарба еб йиқилгач, совлиқ қаттиқ силтанди-да, арқонни узди. Бу ҳолатни «она меҳри арқонни узди», деб сифатласак ҳам бўлар. Сиз ювош кўринган мушукнинг боласини олишга уриниб кўринг-чи, таламасмикин?

Оналарга хос бўлган меҳр фақат ўз фарзандларига аталмаган. Улар бегоналарга, ҳатто дин ва миллатини фарқламай меҳр кўрсатадилар. Дейлик, бир мусофир сизницида қўноқ эканида хасталаниб қолди. Албатта, сиз унинг ҳолидан хабар оласиз. Аммо онангиз ёки бувингиз сиздан кўра кўпроқ ачинадилар. Даволаш учун зарур ҳамма чораларни бажарадилар. Мусофир миннатдорлик белгиси сифатида ҳадя берса олмайдилар, шундай эмасми? Бу ҳам она қалбидаги меҳрдан.

Ўтган асрнинг олтмишинчи йилларида бир шеър анча машҳур эди. Шарқ афсонаси асосида ёзилган бу шеър ҳатто тўйларда ҳам ўқиларди. Афсуски, кейинкейин унутилди. Шеърнинг мазмунин билан қисқа тарзда бўлса-да, танишсак:

*Кўп наслдан наслга ўтган бир афсона бор,  
Ёлғиз она ва ўғил яшар эди баҳтиёр.*

Балоғат ёшига етган йигит кунлардан бир кун гўзалга ошиқ бўлиб ўзини йўқотади. Қиз йигитнинг севги изҳорини эшитиб:

Қиз дедики йигитга:  
Севгинг бўлса ҳақиқат,  
шуни албат қилиб кел:  
онангнинг юрагини менга олиб кел!  
...йигит бўлди сарсари, тўрт томонга югурди,  
чўлдан топиб бир ҳайвон юрагини сугурди!  
Шошиб, бўлиб умидвор, йўлларда оқизиб қон,  
яна қиз қарисида бўлган эди намоён.

Қиз анойилардан эмас экан, йигитнинг найранги-  
ни фаҳмлабди:

қиз ўшқирда ва деди:  
келтирмабсан менга керагини,  
кет, кўринма кўзимга,  
келтирмасанг менга онангнинг юрагини!

Йигит яна сарсари кезади. Охири онага бўлган му-  
ҳабатидан қизга бўлган севгиси устун чиқади-да, она  
кўксига ханжар уради. Юракни суғуриб олади.

...йўлда кетаркан, оёқлари чалишиди  
ва меҳрибон онанинг юраги ерга тушибди.  
Шунда шўрлик онанинг юраги кирди тилга  
ва деди қарисидаги ўглига:  
«Жоним болам, ёмон йиқилмадингми?  
Қарагин, согми танинг, эт-бетинг?..»  
...Шунда йигит тахта бўлиб қотиб қолди,  
Қанча югурса ҳам қизга етолмай ётиб қолди...

Ота ва онанинг болага бўлган меҳри илоҳий тарзда  
қалбга сингдирилгандир.

**Ҳадис.** Анас ибн Молик (р.а.) айтадилар: «Ҳазрати  
Ойишага (р.а.) бир бечора хотин тиланиб келди. Ойи-  
ша унга учта журмо берган эдилар, у ёнидаги икки бо-  
ласига биттадан журмо берди-да, биттасини ўзи учун  
олиб қолди. Болалар журмоларини еб бўлишиб, яна она-

ларига умид билан қараши. Она құлида ушлаб турған хурмони иккиге бўлди-да, болаларига узатди. Расууллоҳ (с.а.в.) келгандаридан Ойиша бу воқеани ул жанобга айтиб берган эдилар, Сарвари коинот (с.а.в.) дедилар: «Сен бунга нима учун ажабланасан? Икки боласига марҳамат, меҳр-шрафат қилгани учун Аллоҳ Таоло ҳам унга марҳамат қиласи».

Мазкур ҳадиснинг мағзини чақсак, Аллоҳ Таолонинг марҳамати дейилгандан Унинг ажри, яъни, ота-онанинг қариганида фарзандлари туфайли кўрадиган роҳатифарофати назарда тутилган, деган маъно чиқади.

«Абаса» сурасида таъкид этилганки, айrim инсонлар Қиёматда ота-онасидан қочар экан. «Уларга муносиб хизмат қилимадим, энди ҳақларини талаб қиладилар», деб кўрқиб, изтиробга тушар экан. Ана шу изтиробнинг олдини олиш учун киши ҳаётлик даврида ҳаракатини қилиб қолиши керак. Уламоларимиз бу мавзуда сұхбат юритганларида «Исрө» сурасидаги ояти каримани тилга оладилар. Биз ҳам бу анъанадан четда қолмайлик:

«Роббинг фақат Унинг ўзигагина ибодат қилишингни ва ота-онага яхшилик қилишни амр этди. Агар ҳузурингда уларнинг бирлари ёки икковлари ҳам кексаликка етсалар, бас, уларга «уфф» дема, уларга озор берма ва уларга яхши сўз айт. Икковларига меҳрибонлик или хокисорлик қанотингни пастлат ва «Роббим, алар мени кичикликда тарбия қилганларидек, уларга раҳм қилгин», деб айт».

Бу амр Аллоҳнинг қатъий ва ўзгармас буйруғи. Бу буйруқни бажариш ихтиёрий эмас, балки ҳар бир банданинг бурчи. «Уфф» сўзига боғлиқ икки маъно бор:

Биринчидан, ота-онага ёмон сўз айтиб, беҳурмат қиласлик. Мисол учун: ота-она иш буюргандан «уфф, тинч қўймас экансиз-да», ёки «уфф, шу гапларингиз ҳам жонимга тегди» ёки «уфф, сизга ҳеч тушунтириб бўлмас экан-да» каби норизоликни ифода этишни Тангри Таоло бизга ман этяпти.

Иккинчидан, ўқишдан ёки ишдан чарчаб қайтдингиз, ёки кўнглингиз бир нимадан ғаш. Ўзингизча «уфф» деб қўйдингиз. Билмайсизки, шу «уфф»ингиз билан ота-онангиз қалбини тилиб юбордингиз. Уларнинг «Орзуим чечаги – суюкли фарзандим касалга чалинибди» ёки «Болам оғир синовга тушибди», деб озорланганларини англамадингиз. Энди улар кунлаб, балки ойлаб кўзларингизга термилиб, паришонлик булатининг кўтарилишини кутадилар. Сиз ўзингизга учраган пашшадай ташвишни биргина «уфф» билан фил ҳолатида катталаشتариб, ота-онангизга узатдингиз. Демак, биз ота-онамизни ташвишимизга шерик қиласлигимиз керак экан. Фарзанд ота-онанинг ҳузурида ўзини қанчалик хокисор тутса, шунча яхши.

Раббимиз буюрадики, «...ниманини хайр-эҳсон қилсангизлар ота-она, қариндошлар, етимлар, мискинлар ва мусофиirlарга қилингизлар». Эҳсонга лойиқлар орасида ота-она бекорга биринчи зикр қилинаётгани йўқ. Кишининг ўзидан кейинги ҳақдори ота-онаси бўлади. Ота-онасини муҳтоҷ қўйиб, улардан бошқаларга эҳсон қилишдан нима фойда бор? Қишлоқлардан бирида бу воқеага гувоҳ бўлган эдик.

**Воқеа.** Қадрдонимизникида меҳмонда эдик. Қўшниси эҳсонга таклиф этди. Чиқдик. Жуда кўп меҳмон айтилган экан. Биз ҳовлида, тут дарахти соясидаги сўридан жой олдик. Рӯпарамизда ошхона, унинг ёнида бир пастак ҳужра бор эди. Агар ўша ҳужрадан хаста овоз чиқмаса унда одам яшашига ишонмас эдим. Ўша ҳужрага кўп тикилаётганимни сезган дўстим «У ерда соҳиби эҳсоннинг волидалари яшайди, бир оз хасталар», деб изоҳ берди. Мен «Меҳмонларга жой ҳозирлаш учун каттароқ уйдан бу ҳужрага вақтинчалик олиб чиқилгандир», деган ўйда эдим. Аммо эҳсон якунига етгунича ҳам бирор у ҳужрадан хабар олмади. Бир пиёла иссиқ чой ёки бир бурда иссиқ нон олиб кирмади. Шундан сўнг дўстимдан «Доим шу уйда яшайдиларми?» деб сўрашга мажбур

бўлдим. Дўстим қўшнисининг сирини очаётганидан хижолат бўлими, аста «ҳа», деб қўя қолди, бошқа изоҳ бермади. Бошқачароқ изоҳга ҳожат ҳам йўқ эди. Бу тез-тез учрайдиган воқеа эмас. Мен ҳам ваҳима қилмоқчи эмасман. Лекин бу даҳшатдан (ҳа, айнан даҳшат, айнан ёвузлик дейман!) кўз юма олмайман. Ақлни лол қолдирдиган даражада эҳсон дастурхонларига меҳмонларни чорлаганлари ҳолда оталари ёки оналарига ўзларининг эски кийимларини кийинтириб қўядиганлар озми ё кўпми?

**Яна бир воқеа.** Бир танишим кўзида ёш билан айтиб эди: отаси хаста экан. Катта акаси ақиқа маросимиға тайёрланаётган экан. Бизда бунақа одат кўп учрайди. «Отам (ёки онам) кўриб қолсинлар», деб тўй ёки бошқа маросимни тезлатамиз. Бу, албатта, яхши ният. Аммо бу ният ортида «отам (ёки онам) ўлса, тўйим қолиб кетади (ёки тўйга атаганларим азага ишлатилиб кетадими) деган ҳадик ҳам бўлади, буни яширмайлик. Хуллас, танишимнинг акаси ақиқа дастурхонига олинажак неъматларни рўйхат қилиб ўтирганида хаста ота «Куюлтирилган ширин сут ҳам олиб келгин», деб илтимос қилибди. Шунда нодон ўғил ўйламай-нетмай, «Бунақа сут ҳозир отлиқقا йўқ, қаердан топаман», дебди. Хаста ота индамабди. Ўша пайтда бу нарсанинг топилиши чиндан ҳам қийин эди. Аммо ўғил отанинг кўнгли учун «Албатта топамиз», деса кифоя эди. «Худонинг марҳаматини қарангки, – дейди танишим, акамнинг бу гапларидан ранжиб турганимда бир дўстим дадамни йўқлаб, иккита нон билан ўша сўралган ширин сутдан олиб келди. «Мана, дада, сўраганингиз, очиб берайми?», деб сўрадим. Дадам банкани қўлларига олиб, худди гўдак бошини силагандай силардилар-да, «Кейин очасан», дедилар. Ақиқадан сўнг дадам хушларини йўқотдилар ва кўп ўтмай бу фоний дунёни тарк этдилар. Аёллар дадам истаган куюлтирилган ширин сутни очиб, ширинликлар пишириб, маърака дастурхонига қўйдилар...»

Шунга ўшаган воқеалар оз бўлса ҳам учраб турадики, ундан кўз юммоқдик одам боласига хос эмас. Ота-оналарини иззат қўлиувчиларни ҳаётда кўп учратамиз ва бундан кўнгилларимиз шодланади. «Менинг фарзандларим ҳам шундай солиҳ бўлсин», деб ният қиласиз. Ният қилишимиз яхши, аммо шунинг ўзи кифоя эмас. Фарзанднинг олижаноб, фазилатли бўлиши фақат унинг насл-насабига ҳам тааллуқди бўлиб қолмайди. Ҳазрат Навоий таъбирлари билан айтилса, «Хурмати волидайн – фарз айн». Ота-онани ҳурматлаш – бажарилиши ўта зарур амалдир.

**Ривоят.** Қадимда ўғриларнинг қўллари кесилганини эшитганмиз. Шундай ўғрилардан бири ушланиб, жазога ҳукм қилинганда бир қизча подшо ҳузурига келиб, тиз чўкиб, йиғлаганича ўтиниб сўрабди:

– Отамни жиноятлари учун қўлларини кесишга буюргансиз. Биламан, ҳукмингиз адолатли. Лекин отамнинг мендан кичик яна тўрт фарзандлари бор. Она миз касалмандлар, бизларни боқа олмайдилар. Агар отамизнинг қўлларини кестирсангиз, ҳаммамиз очдан ўламиз. Бизларга раҳм қилинг, отамизнинг қўлларини кестирманг. Агар қўл кесмасликнинг бошқа иложи бўлмаса, у ҳолда отамнинг қўллари ўрнига менинг қўлимни кеса қолинг.

Подшо бу гапни эшитиб, кичкинагина қизнинг ота-онасига муҳаббати бу қадар улуғлигидан ҳайратда қолди. Қизни синамоқ мақсадида унга:

– Майли, отанг қўли ўрнига сенинг қўлингни кестираман. Қўлингни бутун эмас, эртага кесишади. Эртагача яхшилаб ўйлагин, кейин яна пушаймон еб юрмагин, – деди.

Эртаси куни жазо майдонида яна одам тўпланди. Қизнинг отасини келтирдилар. Қиз ҳам ҳозир бўлиб, отасига деди:

– Отажон, сира қўрқманг, мен подшога «Отамнинг қўллари ўрнига менинг қўлимни кестиринг», деб ялин-

дим. Илтимосим қабул бўлди. Ҳозир менинг қўлимни кесиб, сизни озод қилишади.

Қиз шундай деб, кундага қўлини қўйди. Бу ҳолатдан подшо ҳам, тўпланганлар ҳам қўзёши тўқдилар. Қизнинг отаси озод этилди. Ота-болага илтифотлар кўрсатилди. Подшонинг амри билан жазо майдонидаги кунда олиб ташланиб, унинг ўрнига бир мармар тош тикланди-да, бу сўзлар ўйиб ёзилди:

«Бир ёшгина қиз отасининг қўли ўрнига ўз қўлини фидо этишни истади. Шу қиздек фарзандга эга бўлган ота-она қандай бахтиёрdir...»

Бу мармар тош фарзанд меҳрига қўйилган ўзига ҳос рамзий ҳайкалдир. Ҳаётда ҳеч ерда бундай ҳайкал йўқ. Аммо ота-она фарзандидан озгинагина меҳр кўрса ҳам унга ўз қалби тўридан битта ҳайкал тиклади. Бу ҳайкалнинг номи – шукроналик.

**Яна бир ривоят.** Марвон ибн Ҳакам Мадинадан бир жойга сафарга кетганиларида ўз ўрниларига Абу Ҳурайрани қолдириб кетардилар. Абу Ҳурайра Зул-Ҳулайфада туриб, ўзлари бир хонада, оналари эса бошқа хонада яшардилар. Абу Ҳурайра қачон ўз хоналаридан ташқарига чиқадиган бўлсалар, оналарининг эшиги олдига келиб салом берардилар-да: «Мени ёшлигимдан тарбият қилганингиз учун сизга Аллоҳ Таолонинг раҳмати бўлсин», дер эдилар. Оналари ҳам у кишининг саломларига жавоб қайтариб: «Катта бўлганингда менга яхшилик қилаётганинг, розилигимни олаётганинг учун сенга ҳам Аллоҳ Таолонинг раҳмати бўлсин», дер эдилар. Абу Ҳурайра ташқаридан қайтиб келганларида ҳам она-бola ўртасида шу муомала такрорланарди.

**Эй умидимиз юлдузлари!** Бу гўзал муомала сизларда ҳам борми? Бор бўлса, умрингиз армонсиз ўтажак. Йўқ бўлса-чи? Аввал айтинг: нима учун йўқ? Ўнтагина сўзни айтишга тилингиз нима учун айланмайди? Сизга нима тўсқинлик қиласи? Онангизни қаймоқ билан боқишга пулингиз йўқдир. Қаймоқ

сүзингиз-чи? Асал сотиб олишга пулингиз етмас, аммо асал каби тотли тилакларингиз учун нимангиз етишмайды?

Не шодки, бизнинг юртимиизда ота-онасини ҳурмат қилювчилар кўп. Камина истиқомат қилювчи «Илфор» маҳалласида Япония мамлакатидан келган бир ёш олим ижтимоий тадқиқот олиб борди. У маҳалладаги барча маросимларда иштирок этишга ҳаракат қилди. Унинг зийрак фаҳми фарзандларнинг ота-оналарини бекиёс тарзда ҳурмат қилишларини англабди. Бир куни у билан сұхбат чөғида дунёга машхур япон адиларининг асарларидан гап очдим.

– Ҳа, Япония ууруг ёзувчиларга бой мамлакат. Менинг юртим илм-фанда ҳам илгарилаб кетган, – деди у. – Аммо ҳар бир халқ илм-фанда ёки адабиётда худди шундай, балки бундан ҳам аълороқ ютуққа эртами-кечми эришиши мумкин. Лекин сизнинг халқингиз эришган бойликка ҳамма ҳам эриша олмайды. Айниқса, ҳозирги кунларда, ҳамма нарса илм-фан тараққиёти мезони билан ўлчаниб, маънавий оламдан узоқлашилаётган асрда қийин, ғоят қийин. Мен фарзандларнинг ота-оналарига меҳрибонлигини назарда туялпман. Бу мен учун янги оламдай туюляпти. Чунки мен бу оламни йўқотганман. Ҳозир ота-онам хаста. Акам қўшни оролда яшайди. Лекин бир неча ойлаб келиб кўролмайди. Келса, ишдан қолади. Ишдан қолса, вазифасидан ҳайдалади...

Япониялик межмон шундай деб хўрсиниб, кўзига ёш олган эди...

Ота-онангиз билан сизнинг орангизда баъзан келишмовчиликлар ҳам бўлиб туради. Масалан, ота-онангиз бир вазифа буюришса, сиз бу ишни тўғри ҳисобламай бирон баҳона билан бажармаслигингиз ёки очиқчасига рад этишингиз мумкин. Бунда ҳам ота-онангизнинг кўнгли ранжийдики, бу ҳолдан эҳтиёт бўлмоғингиз шарт. Чунки ўтмишда шайхлар дебдиларки: «Волидука – роббука», яъни отанг – парварди-

горингдир. Бу маънодан ширк кўрилмаслиги, аксинча, «тарбиячи Тангрига итоат этганинг каби ота-онага ҳам итоатда тургин», дейилмиш маънони уқмоқ жоиз. Тангрининг инсон тарбиясига оид амрини болага, энг аввало, ота-она етказади. Бу ўринда «роббука» – тарбиячи эканига ишора ҳамда масъулият юки ҳам англашилса дуруст бўлар. Халқда «Ҳаким ота» номи билан машҳур зотлардан Ҳаким Сулаймон «ота – қодири қаййум, она – розиқи марсум», деган эканлар. Яъни ота Аллоҳнинг абадий кудрат эгаси сифатига, она эса Аллоҳнинг барча жонзотга ризқ берувчи сифатига ўхшатиляпти.

*Атодин хато келса кўрма хато,  
Савоб бил хато қиласа доги ато.  
Атонинг хатосини билгил савоб,  
Сени юз балодин қутқаргай Худо.*

Туркигўй шоирлардан Адиб Аҳмаднинг бу насиҳатини ёдлаб олсангиз-да, отангиз ёки онангизга бетгачопарлик билан гап қайтаришга чоғлаганингизда эсласангиз, балки уларнинг кўнглини оғритиб қўйишдан сақланарсиз.

Иброҳим Халиуллоҳнинг оталари бут йўнувчи уста Озар эди. Иброҳим алайҳиссалом оталарини бутпарастликдан қайтариш учун насиҳат қилган вақтларида нидо келдиким, таъзим ва мулоҳимлик билан насиҳат қилғил. Ва Юсуф алайҳиссалом оталари Яъқубга (алайҳиссалом) хатолик билан одобсизлик қилганлари учун бошқа пайғамбарлардан етмиш йилдан кейин жаннатга киришга ҳукм этилдилар. Юсуф алайҳиссалом қандай одобсизлик қилибдилар экан? Оталари билан кўришаётганларида отдан тушмай сўрашган эканлар! Нуҳнинг (алайҳиссалом) ўғиллари Хом ҳам одобсизлиги туфайли отанинг дуойибадига учради: ранги қора бўлиб, унинг наслидан пайғамбарлик узилди. Хом қандай одобсизлик қилиб эди? Нуҳ алайҳис-

салом кемада ухлаб ётганларида шамол күтарилиб, уят жойлари очилиб қолганини кўриб кулган эди!

Пайғамбарларки ота-она ҳузурида итоат этар эканлар, сизу бизнинг итоатимиз хусусида ортиқча сўз бўлиши мумкин эмас. Ҳадиси шарифда таъкид этилганидек, агар улар биз – фарзандларга «дунёдан кеч», дейишса ҳам ҳурматлари учун буйруқларини ижро қилишга мажбурмиз. Одамийлик йўли шудир. Афсуски, орамизда бу йўлни кўрмайдиганлар ёки менсимайдиганлар ҳам топилади. Уларга деймизки, ота-она розилигини ололмасангиз шу дунёнинг ўзидаёқ жабр кўрасиз. Аввало, ота-онасини хорлаган одамни жамият иззат қилмайди. Бу одам жамият назаридан қолади ва бундан ортиқ хорлик бўлмас. Қолаверса, яна такрор айтамиз, ўзининг фарзандлари ҳам уни хорлайди. Хорланиб, азобланиб тезроқ ўлишни истайди. Лекин Аллоҳ унга ўлим бермайди. Ана шундай хорланган одамлар бизларга ўрнак бўлишлари керак.

Бу мавзуда айтаман десам, ҳикмат кўп. Бироқ, Алишер Навоий ҳазратларидан бир неча байт ўқимаса, кўнглим ўрнига тушмайдиган кўринади:

*Бири эрур макрумати волидайн,  
Билки мунунг қилмогидур фарзи айн.  
Бу икининг хидматини бир бил,  
Ҳар неча ифром эса тақсир бил.*

Дейилмоқчики: Тарбиянинг яна бири ота-онани ҳурмат қилиш; буни бажариш унинг учун мажбуриятдир (шартдир). Бу иккисига хизматни бирдек қил, хизматинг қанча ортиқ бўлса ҳам, кам деб бил.

*Бошни фидо айла, ато қошига,  
Жисмни қил садқа ано бошига.  
Икки жаҳонингга тиларсен фазо –  
Ҳосил эти ушбу икисидин ризо.*

**Дейилмоқчики:** Отанг олдида бошингни фидо қилиб, онанг боши учун бутун жисмингни садақа қилсанг арзийди! Икки дунёнг обод бўлишини истасанг, шу икки одамнинг розилигини ол!

*Тун-кунунгга айлагали нур фош,  
Бирини ой англа, бирисин қуёш.  
Сўзларидин чекма қалам ташқари,  
Хатларидин қўйма қадам ташқари.  
Бўлсун адаб бирла бори хидматинг,  
Хам қил адаб «дол»и киби қоматинг.*

**Дейилмоқчики:** Туну кунингга нур бериб турган бирларини ой деб бил, иккинчиларини эса қуёш. Уларнинг сўзларидан ташқари бир нарса ёзма, улар чизган чизикдан ташқарига бир қадам ҳам босма. Ҳамма хизматни сен адаб билан бажар, «адаб» сўзидаги «дол» ҳарфи каби қоматингни улар ҳузурида эг.

Минг йиллар мобайнида яратилган китобларда отонани иззатлашга доир насиҳатлар қилинган. Бу насиҳатларнинг муаллифлари кўп бўлгани билан маъноларида фарқ кам. Шу боис мазкур мавзудаги сұжбатимизни ўн биринчи асрда яшаган Амир Унсурулмамолий Кайковуснинг Муҳаммад Ризо Оғаҳий томонидан таржима қилинган насиҳатлари билан якунлашни маъқул топдим:

– Эй фарзанд, билгилким, ақл юзасидан фарзандга ота-онани ҳурмат қилиш вожибдур, нединким унинг асли ота ва онадур. Отa ва онани нима учун ҳурмат қилурман деб кўнглингга келтурмагил, билгилки улар сенинг учун ўлимга ҳам тайёр турадурлар.

Ҳар фарзандки, оқил ва доно бўлса, ҳеч вакт ота ва онанинг меҳр ҳақини адo қилмоқдин холи бўлмагусидир. Отa-она фармонбардордур. Бу фармонбардорликда ҳам иш бўлгай ва ҳам фармон бўлгай. Ота-онанинг иши сени парвариши қилмоқдур ва фармони

сенга яхшилик ўргатмоқдур. Эй фарзанд, шул важдин ота-онанги сал ҳам ранжитмагил.

Ота-онанинг ҳақига дин нуқтаси назаридан риоя қильмасанг ҳам, ақл юзидан, муруевват юзидан риоя қил ва кўргил: ота-она аслида сени жон ва дил била парвариш қильмислар. Агар улар ҳақида камчиликлар қиласанг, тақсир кўргузсанг, сен ҳеч яхшиликка сазовор эмасдурсан, нединким ҳар киши аслнинг яхшилигин билмаса, ўзганинг ҳам яхшилигин билмасидир. Ўз фарзандинг сенинг ҳақингда қандай бўлишин тиласанг, сен ҳам ота-онанг ҳақида шундай бўлгил, нединким сен ота-онанга нима иш қиласанг, фарзандинг ҳам сенинг ҳақингда шундоқ иш қилур, чунки одам мевага, ота-она дараҳтга ўхшайдур. Да-раҳтни ҳар қанча яхши тарбият қиласанг, меваси шунча яхшироқ ва ширинроқ бўлур. Ота-онага иззат ва ҳурматни қанча кўп қиласанг, уларнинг дуолари шунча тезроқ мустажоб бўлур.

Зинҳор мерос олмоқ ҳирси била ота-онанг ўлимими тиласмагилки, уларнинг ризқи била сенинг ризқинг етишур. Ота-онанинг ўлимими тиласмагил, чунки ота-она ўлмай юрсалар ҳам ризқинг етишаверади, нединким, ризқ тақсимлангандур ва у ҳар йўл била восил бўлур. Рўзий насиба учун ўзингни кўп ранж-машақатга қўймагил, бул насиба ранж ва азоб-уқубат била зиёда бўлмагусидир.

### **Бемеҳр қариндошдан меҳр билган ёт яхши**

«Бир қоринга сиққан болаларим битта уйга сифмаса-я!»

**Умидимиз юлдуздари**, оналарнинг бундай фарёдлари биз, катталар учун янгилик эмас. Балки сиз ҳам, ёш бўлишингизга қарамай, қариндошлар ёки қўни-кўшнилар хонадонида эшитганингиз бордир бундай нолаларни. Оиладаги ота ёки она ёки бошқа ёши улуғ-

лар вафоти олдидан «Мендан кейин юз кило гуруч дамлаб, ош тарқатинглар», дейишмайди. Мен бундай ваясиятни эшиитмаганман. Бироқ, «Мендан кейин аҳил иноқ яшанглар», дейишлари аниқ. Айниқса, оиласинг тўнгич фарзандига «Сен каттасан, укаларингнинг бошларини қовуштириб тур», деб сўнгги ўтинч билан тикилишларини кўз олдимизга келтирайлик. Сўнг эса... «йигирма оши» ёки «йил оши» дейилмиш дабдабадан сўнг ака-укалар, қариндошлар орасида нифоқ чиқиши, меҳр ришталари узилиши ҳолларига каттаю кичик гувоҳ бўлади. Катталар афсусланадилар, сиз каби ўсмир-ёшлар эса жанжалкаш жигарларнинг бу қиликларига тушунмай лол қоладилар.

Меросхўр жанжалкашлар унутмасинларки, марҳум оталари ёки оналари дошқозонларда дамланаётган бу ошларга муҳтож эмаслар. Уларнинг руҳлари бу зиёфатлардан шодланмаслар, балки, меҳрнинг узилишидан озорлар чекарлар.

**Воқеа.** Бир қоринга сиққан ака-ука бир ҳовли-жойга сифмай қолишиди. Амакивачча саналмиш болаларнинг ўзаро жанжаллари учун уларни айблаш ноўрин. Чунки улар ёш, кўп нарсаларга ақллари етмайди. Зиддиятларининг асосида айрим ҳолларда гараз ёки шумлийк ётмайди, бу жанжаллар болаларча шўхликнинг оқибатида юзага келади. Аммо, афсуски, айрим ҳолларда нафрат ҳам учрайди. Болаларга бу нафратни ота-оналари ўзлари билмаган ҳолда сингдирадилар. Қандай қилиб? Айтайлик, кечки овқат пайтида кундузги воқеалардан гап очилади. Хотин овсинининг ёмонлигидан сўзлайди. Нодон эр акасининг бирон қилиғидан нолийди. Шундай гаплари билан амакиваччалар орасига ўнгланмас нифоқ солаётганларини билмайдилар. Отаси ва онасининг гапларини диққат билан эшитиб ўтирган бола учун битта нарса равшан бўлади: амакиси ёмон! Унинг оиласи – хуллас, ҳаммаси ёмон! Ёмон... ёмон... улардан нафратланиш керак. Шундай фийбат шароби ичилаётганда айрим болалар

отаси ва онасини қўллаш мақсадида амакиваччаси-  
нинг бирон ёмонлигидан гапириб, оловга мой қуяди.  
Қалблардаги меҳр ўрнини эгаллаган яра шу тарзда  
мадда боғлади. Бақт ўтган сайин у қалбларни азобга  
солади ва мудҳиш кунларнинг бирида ёрилади.

Ака-уканинг гап талashiши сўкишга, ҳақоратлаш  
эса бирининг кетмон кўтариб ҳамма қилишига айлан-  
ди. Фазабга минган ака-укани ажратишга ҳаракат  
қилаётган ўн олти ёшли ўғил отасининг қонга беланга-  
нини кўриб, ўзини йўқотади, қўлига чалғи олади. Узоқ  
давом этган нифоқ ака-уканинг фожиали ўлеми ва  
ўсмирнинг қамоқча тушиши билан якунланади. Қонга  
беланиб ётган ака-уканинг кўзлари «Бу қанақаси  
бўлди?», дегандай очиқ қолди. Бу дунёга тўёлмаган  
кўзларни ёпа олишмади. Катта ҳовли-жойга сифмаган  
ака ва уканинг ҳар бирига икки қулочли икки лаҳад  
кифоя қилди. Бир ҳовлида ёнма-ён яшашини исташ-  
маган эди, қабристонда ёнма-ён гўрлардан жой олиш-  
ди. У дунёдаги аҳволлари бизга номаълум. Ота-онала-  
ри билан Қиёматда қай ҳолда кўришишлари ҳам но-  
маълум. Фарзандларининг бу фожиаси туфайли ота-  
онанинг руҳи то Қиёматга қадар нечогли азоб чекмо-  
ғи ҳам бандага аён эмас.

Бизнинг ажабланишдан ўзга иложимиз йўқ. Гап  
шундаки, ака-уканинг ўлеми икки оила ўртасидаги  
нифоқни ўнгламади. Овсинларнинг гафлат уйқусида-  
ги кўзлари очилмади, қариндошлар эса ибрат олиш-  
мади. Ака-ука экиб кетган нифоқ уруғи униб чиқиб  
бемеҳрлик меваларини бераверди.

**Умидимиз юлдузлари**, ака-ука ёки опа-сингил  
орасидаги низолар ҳақида сизга сўзлашимизнинг жид-  
дий сабаби бор. Сиртдан қарасак, бу низоларнинг сиз-  
ларга алоқаси йўқдек. Аслида эса отангиз ёки онангиз  
амакингиз ё холангиз билан юзқўрмас бўлиб кетиши-  
са, сизнинг ҳам юрагингиз азоб чекади. Катталарнинг  
бу қилмишидан қалбингизга тиғ санчилгандек бўла-  
ди. Уларни яраштириш қўлингиздан келмаганлиги

учун ҳам руҳан қийналасиз. Ота-онангизнинг бу иши учун маҳалла-кўйдан уяласиз. Лекин сиз амакиваччангиз ёки холаваччангиз билан муносабатингизни бузмасангиз, сиз шарафга лойиқсиз. Албатта, ота-онангиз улар билан муомала қилишингизга норози бўладилар, ҳатто қаттиқ уришадилар. Бу ҳолда улар билан жиддий зиддиятга бормай, қариндошлар билан яхши муомала қилиш йўлини излаш керак. Бу борада сизга аниқ йўл-йўриқ кўрсата олмайман. Чунки ҳар бир оиласинг ўз тартиби, ўз сирлари бор.

Бу ўриндаги сизга мурожаатимдан асосий мақсад бошқа: бугун юзкўрмас бўлиб кетган жигарлар ўн йилми ё йигирма йилми аввал сизнинг ёшингизда бўлишган. Ота-она бағрида баҳтли ҳаёт кечиришган. Аҳвол нима учун бу қадар ёмонликка ўзгарди? Шу саволга ўзингиз жавоб топишга ҳаракат қилинг. Бугун сизнинг оиласингизда ҳаловат бор. Йигирма йилдан кейин бузилиб кетмайдими бу ҳаловат? Бузилиш олдини қандай олиш керак? Бу саволга ҳам жавоб изланг. Балки суҳбатимиз жараёнида тилга олаётган ҳикматлар сизга тўғри йўл кўрсатишга хизмат қилар.

«Агар иймондан юз ўтирганизлар, сизлар ер юзида бузгунчилик қилурсизлар. Ва қариндош-уруғларингиз билан ҳам алоқаларингизни, қариндошлиқ ришталарини узарсизлар. Ундай кимсаларни эса Аллоҳ Таоло **лаънатлагандир**. Бас, уларнинг қулоқларини панд-насиҳат эшитишдан кар, кўзларини тўғри йўлни кўролмайдиган кўр қилиб қўйгандир». «Муҳаммад» сурасидаги икки оятнинг маъно таржимаси билан танишгач, бу маънони ақлнимизга сингдиришга уринайлик-да, сўнг яна аввалги воқеага қайтайлик: демак, ким бузгунчилик қиларкан, ким қариндошларидан узилиб кетаркан? Иймондан юз ўтирганлар. Агар бирбирини ўлдирган aka ва укада иймон бўлса аҳил-иноқ яшамасмиди? Фарзандларини ҳам силаи раҳм руҳида тарбия этмасмиди? Албатта, марҳумлар ҳакида ёмон гапириш одобдан эмас. Уларни иймонсизликда

айблаш эса шафқатсизлик бўлиб кўринар. Аммо, ноилож, бошқаларга ибрат бўлсин учун ҳақиқатни айтишга мажбурман. Бундай кимсаларга Аллоҳнинг лаънати тушгани – шу фожианинг юз берганида кўринмайдими? Лаънат фақатгина ўлим эмас, балки улар уй-жой талашишни бошлаганларидаёқ Аллоҳнинг газабига учраганлар, бироқ иймондан холи онглари буни фаҳмлай олмаган. Ҳамонки бундай кимсалар лаънатга лойиқ эканлар, уларнинг охиратларини тахминан тасавур қилиш мумкин. Бу икки оиланинг лаънатланиши ҳали тугагани йўқ. Кўр ва кар қилиши ҳам жисмоний эмас, маънавий томондан бўлади. Кўзи ҳамма нарсани соғ-саломат кўриб туради, лекин кўрган нарсаларидан ибрат олмайди. Қулоги ҳам соғ бўлади, лекин ўзи эшитган гапларидан ибрат олмайди. Чунки уларнинг қалб кўзлари кўр, қалблари қулфланган. Қалб қулф экан, унга ҳеч нарса, жумладан Куръон нури ҳам кирмайди. Бошқачароқ айтсак, бундай қалблар Куръон нури билан нурланишга рағбат кўрсатмаганлари утун ҳам оқибатда қулфланиб қоладилар. Ака-уканинг фожиасидан ибрат олмаган овсинларнинг, амакиваччаларнинг тақдирлари шундай эмасми?

Бу баҳти қаро оиласда ўзаро адолат бормиди? Адолат йўқ жойда бир-бирига чиройли амаллар (эҳсон) мавжуд бўлиши мумкинми? Уларга яхшилик қилиш буюрилган эди, улар-чи? Бузуқлик, ёмонлик, зўравонликдан қайтарилган эдилар, улар қайтдиларми? Кўпчилик бузуқлик (фаҳш) деганда, асосан, эр-хотин орасидаги номусга оид муомалани тушунади. Аслида бу сўзнинг лугавий маъноси «ҳаддан ошишлик»ни англатади. Демак, мазкур ҳолатда бу икки оиланинг бир-биrlарига душманлик бобида ҳаддан ошганларини тушуниш мумкин. Яна афсуски, улар энг муҳим нарсани – Аллоҳнинг панд-насиҳатларини қулоққа илмадилар. Оқибати эса ўзингизга маълум.

**Умидимиз юддузлари**, шу ноxуш воқеалардан воқиф бўлгач, яна биргалашиб ўйлаб кўрайлик: хонадон-

лар аҳдининг қалб кўзи ожиз, виждан қуввати заифлиги оқибати эмасми бу фожиа? Қалб кўзлари очик, вижданлари эса тўлиқ қувватга эга бўлганида ёмонлик сари илк қадам қўйғанларидаёқ уларни тўхтатмас эдими? Уйғоқ виждан мана бундай хитоб қилмасмиди:

– Эй Одам боласи! Faфлатдан уйгон! Сен юз ўгириб кетмоқчи бўлаётган кимсанинг кимлигини унумта! У аканг ёки укангдир, у опанг ёки синглингдир. У энг яқин қариндошингдир. Уларга нисбатан қалбингда нафрат уйгонса, улардан юз ўгириб кетишни ихтиёр қилганинг дамда бир дақиқа шошма. Ҳа, сени дўзах оловидан асраб қолиш учун шу бир дақиқа кифоя қиласди. Шу бир дақиқа ичиди Аллоҳнинг буюрганларини ақл кўзгусида кўриб олсанг бас. Шу бир дақиқа ичиди жоҳиллик уйқусидан уйгонишига ўзингда куч топсанг бас. Эй инсон, агар сен шайтоннинг йўлига адашиб кириб қолган бўлсанг – қариндошлиарингдан узоқлашган бўлсанг, эсингни ўигиб олгину Раҳмон йўлига қайтишига шошил. Қариндошлиаринг билан сен талашаётган нарса аслида сеники эмас. Сен талашаётган нарса сенга ҳам, қариндошлиарингга ҳам вафо қиласмайди. Сен талашаётган нарсангга эга чиқишинг ҳам мумкин, аммо кўп ўтмай уни барибир ташлаб, боқий дунёга кетасан. Агар қариндошлиарингга силай раҳм қилисанг, сен охиратга уларнинг дуолари билан боражаксан. Охират эшигини ўзингга ҳамиша ҳамроҳ иймон нури билан очажаксан. Ҳисоб куни келганда қариндошлиарингга муносабатингдан ҳисоб бергайсан. Ёмонликка қадам қўйшишдан аввал, бир дақиқагина шуларни ўйла. Шу бир дақиқа сенинг бошингга шраф тожини кийдирур.

**Ҳадис.** Анас ибн Моликдан ривоят қилишларича, уч тоифа одам Қиёмат куни Аршнинг соясида бўларкан. Шулардан дастлабкиси силай раҳм қилувчи экан. Бундан маъно: унинг умри ва ризқи силай раҳм би-

лан зиёда бўлган деганидир. (Аршнинг соясидаги иккинчи тоифа – эри ўлиб, етим фарзандларини яхши тарбиялаган хотин, учинчи тоифа – таом тайёрлаб, етим мискинларга едирган одам.)

Одам боласини Аршнинг соясига етказадиган силаи раҳм деганда биз нималарни тушунамиз? Қисқача таъриф берилса: қариндошлар билан яхши муомала қилиш тушунилади. Аслида унинг маъноси фоят кенг.

Улугларимизнинг айтишларича, силаи раҳмда ўнта мақталган хислат бор экан:

- Силаи раҳмда Аллоҳнинг ризоси бор, чунки Аллоҳ Таоло шунга буюради.

- Қариндошларга хурсандчилик етказмоқдик бор. Чунки улар силаи раҳм билан қувонадилар.

- Силаи раҳмда малоикаларнинг ҳам хурсандчилиги бор. Чунки улар ҳам силаи раҳмга гувоҳ бўлган онларида қувонадилар.

- Силаи раҳмда одам болалари шаънига яхши мақтov бордир.

- Силаи раҳмда иблисга ғам етказмоқлик бордир.

- Умрнинг зиёда бўлишида силаи раҳмнинг ҳиссаси бор.

- Ризқнинг баракали бўлишини силаи раҳмсиз тасвур этмоқ қийин. Бунга мисол тариқасида бир ривоятнинг қисқа баёнини берамиз.

**Ривоят.** Ота-онаси вафот этган ака-укага бир қопгина бугдой мерос қолади. Ака-ука мерос ҳақига хиёнат қилмай, уни теппа-тенг бўлиб оладилар. Шу куни аканинг кўнгли оғрийди: «Укам ҳали уйланмаган, ҳам ўзини боқиши керак, ҳам тўйга йиғиши керак. Болаларимнинг ризқини Аллоҳнинг ўзи берар», деган ўйда омборхонага кириб, ўзига ажратиб олган улушдан укасининг қопига тўқади. Шу куни уканинг ҳам кўнгли оғрийди: «Мен битта қорнимни эплаб тўйдириб юардим. Акамнинг оиласи қийналиб қолиши мумкин», деган ўйда у ҳам омборхонага кириб ўзининг улуши-

дан акасининг қопига тўқади. Бу ҳол ҳар куни такрорланаверади. Аммо иккала қопдаги буғдойдан бир мисқол ҳам камаймайди. Шунда ака-укалар ажабланишиб, бир донога маслаҳатга борганларида у бор гапни яширмай айтишларини талаб қиласди. Воқеадан хабар топгач эса «Бир-бирларингизга меҳр-оқибатли бўлганингиз учун Аллоҳ сизларнинг ризқингизга шундай барака берибди. Ораларингиздаги силаи раҳм барқарор экан, ризқингиз шундай мўл бўлаверади», дебди. Бу хусусда Расулуллоҳ (с.а.в.) марҳамат қилганларким: «Ким ризқи мўл бўлишини, ажали орқага сурилишини истаса, қариндошлиқ алоқаларини узмасин».

• Силаи раҳм туфайли вафот этиб кетганларга ҳам хурсандчилик етади. Фоний дунёни тарк этган аждодлар руҳи авлодларининг силаи раҳм билан боғланганларидан қувонади.

• Силаи раҳмда дўстликнинг зиёда бўлиши бор. Бир сабаб ўртага тушиб, хурсандчилик ва ғамдан тўплашишган дўстлар бир-бирларига ёрдам берадилар ва бу улардаги дўстликнинг зиёда бўлишига ёрдам беради (Бу хусусда навбатдаги сұхбатимизда батафсил фикрлашиш ниятимиз бор).

• Силаи раҳмда кишининг вафотидан кейин ҳам ажрнинг зиёда бўлиши бор. Чунки қариндошлар уни ўлганидан кейин ҳам дуо қиласидилар, яхшиликларини доимо эслаб юрадилар. Бунинг акси бўлса, ривоятдаги ҳолат юзага келиши мумкин.

**Яна бир ривоят.** Яҳё ибн Салимдан ривоят қиласидилар:

«Маккада биз билан бирга Хуросон аҳлидан бўлган бир киши бор эди. У солиҳ киши эди. Одамлар унга ўз омонатларини ишониб топширап эдилар. Бир киши унга ўн минг дирҳам пулинни қолдириб, ўзи сафарга кетди. Омонат қўйган киши сафардан қайтганида у солиҳ одам вафот этган эди. Шу боис омонатчи у кишининг оиласидан молини сўради. Оила аҳли бундан бехабар эдилар. Омонатчи олимларга мурожаат қилиб,

маслаҳат сўради. Улар айтдиларки: «Бизлар у хурросонлик биродаримизни жаннат аҳлидан деб умид қиласиз. Кечанинг учдан бири ёки иккинчиси ўтган онда Замзам булоги яқинига келгин ва бу сўзлар билан ҳабар бергин: «Эй фалончининг ўғли фалончи! Мен омонат эгасиман!» Шундай десанг, жавоб эшигайсан». Ҳалиги одам келиб, бу сўзларни уч марта айтди. Ҳеч ким жавоб бермади. У одам олимларнинг ҳузурига қайтиб, воқеани баён қилди. Улар дедиларки: «Бизлар у биродаримизнинг дўзах аҳлидан бўлмоғидан қўрқяпмиз. Энди Яманга боргин, у ерда бир водий бор. Уни Бархут дейдилар. У ерда бир қудуқ бор, уни топ ва кечанинг учдан бири ёки учдан иккиси ўтганида: «Эй фалончининг ўғли фалончи! Мен омонат эгасиман!» деб бақиргин». У киши Яманга бориб, водидаги қудуқни топди. Биринчи чақиривдаёқ жавоб эшитилди. Шунда мол эгаси афсусланиб: «Шўринг курсин, сени бу ерга қайси амалларинг туширди? Ахир сен яхшилик эгаси эдинг-ку?», деди. Жавоб бўлдим: «Хурросонда менинг аҳли байтларим, қариндошларим бор эди. Ўлгунимга қадар улар билан борди-кеди қилмай, узилишиб кетдим. Аллоҳ Таоло мени шу азоб билан ушлаб, бу манзилга ташлади. Аммо молингдан ҳавотир олма. Мен ўғлимга айтиб қўйишга улгурмаган эдим. Уйимнинг фалон ерига кўмилган, ўғлимга айтгин, молингни кавлаб олиб, ўзингга қайтаради». Омонат қўйган одам молини қайтариб олди. Шу мол баҳона силай раҳмнинг куч-қудратини ҳам ҳис қилди.

Ўтмишдан бугунга қайтиб фикр қилайлик: у одам Хурсондаги қариндошларидан узилган экан. Орадаги масофа неча ойлик машаққатли йўл бўлса-да, кишига силай раҳмни узишга баҳона бўлолмас экан. Бизчи? Бир шаҳарда, ҳатто бир маҳаллада, ҳатто бир ҳовлида турганимиз ҳолда жигарларимиздан узилиб кетганимиз учун қандай жазо оламиз? Хаста овозимиз қайси саҳронинг қайси қуриб қолган қудуғидан чи-

қар экан? Шу фикрнинг ўзиёқ киши вужудини қўр-кувга солиб, қақшатиб юборади...

Юқорида саналган ўн хислатни жамлаб туриб, силаи раҳм фақат холис равишда бажариувчи ибодатлардан бири, десак ҳам бўлади. Силаи раҳмда таъна, ҳасад, риё, тама, кибр каби иллатларга зинҳор ўрин бўлмайди. Кимда бундай иллатлардан биттаси бўлса ҳам силаи раҳмдан сўзламоги қуруқ сафсата бўлиб қолади. «Аввал силаи раҳм қилган кишига кейин жавоб тариқасида силаи раҳм қилувчи ҳақиқий силаи раҳм қилувчи эмас. Чинакамига силаи раҳм қилиш деб силаи раҳм қилишдан бош тортган кишига силаи раҳм қилишни айтадилар». Катталар ҳаётида мазкур ҳадисга амал қилмайдиганларни учратиб турамиз. «Фалончи шифохонада экан, кўриб келайлик», десангиз, «У мен касал бўлганимда келиб кўрибмиди, бормайман», деган жавобни эшитамиз. Бир куни «Фалончи биродаримиз вафот этибдилар, фотиҳага бориб келайлик», деган таклифга «У одам отам ўлганида йигирма ошига келмаган эди, менам фотиҳасига бормайман», деган жавобни эшитиб, ҳайратдан ёқа ушладик. Яқинда бир кишининг холаси вафот этганини эшитиб, таъзия билдирганимизда ундан «Ҳаётилик пайтларида бизга фойда-заарлари йўқ эди, ўлганларидан кейин ҳам ҳеч нарса йўқотмагандаймиз», деган аҳмоқона жавобни эшитдик. У одам қариндошлийдан фойда кўзлаб яшар экан, комил инсон бўлишга интилиши экан. Унинг ўтмас ақли холасининг ўз онасидан ёдгор эканини ҳам фаҳм этмас экан. Холасини зиёрат қилмай юргани учун онасининг руҳи азоб чекканини ҳам ўйлаб кўрмагани аниқ. Ўзининг яқин қариндошига шунчалик бемеҳр одамнинг бошқаларга бўлган ҳурматини соxта дейишга ҳақимиз борми?

Шифохонда даволанаётганимда ён хонадаги бадавлат ва амалдор беморни танишларимдан бири ҳар куни йўқларди. Амалдорнинг ҳеч нарсага муҳтожлиги бўлмаса-да, қофоз халталарни тўлдириб, нималар-

дир олиб келарди. Ҳатто баъзи кунлари икки марта йўқларди. Мен унинг бу серқатновлигидан ғашланмадим. Агар ният холис бўлса, беморни йўқлаш ҳам савоб. Фашалигим бошқа томонда эди: унинг укаси, менинг танишим бедаво хасталикка чалиниб, икки йилдан бери тўшакда ҳаракатсиз ётарди. Унинг дори-дармонидан дўстлари хабар олиб туришарди. Ачинарлиси, шифохонадаги бой ва амалдор одамни тинмай йўқлаётган бу «серҳиммат» ўз укасидан хабар олмасди. Беморнинг хонадонидаги бирон маросимга айтилса, келарди. Шунда ҳам икки қўли қуп-қуруқ келарди. Атрофдагиларга сафсата сота-сота кетарди. «Эҳтимол ака-ука орасида гап қочгандир, келишмовчилик бордир?», дерсиз? Йўқ, талашиб-тортишиш бўлмаган.Faқат акада виждан йўқ. Укасидан фойда келмаслигини билиб, уни менсимайди. Афсусларки, бу дунёда «сендан угина, мендан бугина» деган шиор остида яшайдиганлар ҳам бор.

**Ҳадис.** Абдуллоҳ ибн Абу Авф (р.а.) айтадилар:

«Арофат кечасида Пайғамбар (с.а.в.) билан бирга ўтирган эдик. Айтиб қолдиларким: «Силаи раҳмни узган киши бу кеча мен билан бирга ўтирмасин, биздан кетсан». Мажлис аҳлининг пойтагида ўтирган кишидан бошқа ҳеч ким ўрнидан турмади. Бир оз вақт ўтганидан сўнг у киши қайтиб кириб, жойини эгаллади. Шунда Расулуллоҳ (с.а.в.) «Нима учун сендан бошқа ҳеч ким даврамиздан турмади?» деб сўрадилар. У киши айтдиким: «Эй Расулаллоҳ, сиздан бояги танбеҳни эшитиб, холамникига бордим. У киши билан жанжаллашиб, орамиз бузилган эди. Борганимда холам менга «Нима учун келдинг, бунақа одатинг йўқ эди-ку», деб сўрадилар. Мен сиз айтган ҳадиснинг хабарини бердим. Мендан олдинроқ холам кечирим сўрадилар, мен ҳам узримни айтдим». Расулуллоҳ (с.а.в.) бу гапни эшитиб дедилар: «Яхши қилибсан, бу кечани биз билан бирга ўтказ. Огоҳ бўлингларким, Аллоҳнинг раҳмати силаи раҳмни узган қавмга тушмайди». Тобароний

ҳазратлари мазкур ҳадисни бундай шарҳ этгандар: «Миллат ичидаги қариндошликтар алоқаларини узганлар бор бўлса, бу миллатга фариштадар тушмайди».

Яна Тобароний айтадилар: «Ибн Масъуд бомдод намозидан кейин бир жамоат ичидаги ўтиарди. Дедики:

– Худо ҳақи, қон-қариндошликтар алоқаларини узганлар бор бўлса, орамиздан туриб кетсин! Биз Раббинизга дуо ўқимоқчимиз. Қон-қариндошликтар алоқаларини узганлар бор жойда осмон эшиклари ёпиқ бўлади, дуолар қабул этилмайди.

Бу огоҳдантиришга эътибор берайлик: силаи раҳмни узган киши фақат ўзига жабр қилмай, унинг касри жамиятга ураг экан. Демак, қариндошликтини узган дўстларимизга вақтида танбеҳ бераб туришимиз зарур экан. «Гапирсам ранжийди, қариндошлар бугун бўлмаса эртага топишиб кетишар», деган истиҳолани йиғиштириб, орадаги силаи раҳмни тиклашга ўз ҳиссамизни қўшишимиз керак экан. «Бугун бўлмаса эртага...» Бугун силаи раҳм узилган бўлса, умид қилганимиз эртага ким бор-у, ким йўқ.

**Яна бир ҳадис.** Бир киши Расулуллоҳ (с.а.в.) хузурларига келиб: «Мен қариндошлар билан силаи раҳм қилдим, улар мендан узилдилар. Уларни афв этдим, менга зулм қилдилар. Уларга яхшилик қилдим, менга ёмонлик қайтардилар. Уларга энди худди ўзларидек муомала қиласверайинми?», деди. Расулуллоҳ (с.а.в.) айтдилар: «Йўқ, бундай қилсанг, уларнинг гуноҳларига шерик бўлиб қоласан. Сен уларга яхшилик ва силаи раҳм қилишда давом этавер. Шунда сенга Аллоҳдан қувват давомли бўлади». (Бошқа бир ривоятда Расулуллоҳ (с.а.в.) арз қилган киши «Улар жабру жафо қилсалар ҳам мен сабр этаман», деганида унга қараб бундай дегандар: «Агар гапинг тўғри бўлса, уларнинг оғзига қиздирилган кулни солгандай бўлибсан. Сен шу ишингни давом эттираверсанг, Аллоҳ Таоло сенга ёрдам беради ва уларнинг жабру жафосини даф қиласди».)

Ҳадиси құдсийда дейиладики: «Эй Одам фарзанди, қариндошларингга яхшилик қилиб, қүшилиб юр, умрингни узун қиласай». Умрнинг узайтирилиши масаласида айрим олимларимиз: «Тақдир аввалдан белгилаб қўйилган бўлса, масалан, умри фалон йил бўлса, Аллоҳ уни ўчириб, узайтирадими?» деган саволни ўртага қўйишса, бошқалари далил сифатида мана бу ояти каримани келтирадилар: «Аллоҳ Ўзи хоҳлаган нарсанни (яъни ҳукмни) ўчирур ва Ўзи хоҳдаган ҳукмни барқарор қилур. Она китоб (бошқача айтилса – Асл китоб, яъни Лавҳул-Маҳфуз) Унинг ҳузуридадир». («Раъд» сурасидан.) Шунга кўра ҳадиси құдсийни биз аслан, тўғридан-тўғри тушунсак бундай маъно ўқиймиз: ким силаи раҳм қилса, умридан уч кун қолган бўлса ҳам, Аллоҳ Таоло унинг умрини ўттиз йил зиёда қилади. Агар силаи раҳмни узган пайтида умридан ўттиз йил қолган бўлса, Аллоҳ Таоло уни уч кунга тушириб қўяди. Бу тушунча бўйича биз – омиларнинг адашишимиз табиий, лекин уламоларимиз ҳам ихтилоф қиладилар. «Танбеҳул ғофилун»да бу масалага ойдинлик киритилган экан: баъзилар айтадиларки: «Ким силаи раҳм қилса, умри зиёда бўлади», деган хабар зоҳирийдир. Яна баъзилар айтадилар: «Тақдир ўзгармайди, чунки Аллоҳ Таоло «Бас, қачон уларга ажаллари етса, уни бирон соат кетга ҳам, илгарига ҳам суро олмайдилар» («Аъроф» сурасидан), деган. Лекин умрнинг зиёда қилишнинг маъноси ўлимдан кейин унинг савобларини ёзишда давом этмоқдикдир. Ўлимидан кейин ҳам унга савоб ёзилаверилса, гўёки умри зиёда қилингандай бўлади. Бошқачароқ айтсак, яхши одамни ўлимидан кейин ҳам узоқ йиллар эслаб юрадилар, демак, у тириклар қалбида яшайверади.

**Воқеа.** Менинг Дишод исмли дўстим бўларди (Аллоҳ уни раҳмат қилсин). Дўстимнинг одамийликка хос фазилатлари анчагина эди. Аммо биттаси ҳақида атрофдаги одамлар кўп гапирадилар. Бу фазилати унинг силаи раҳм одобини бекаму кўст бажаришида

күринарди. Унинг акаси, беш синглиси ва бир укаси бор эди. Дўстим бошқа ҳовли-жой қилиб чиқиб кетгандилар. Аммо мен уни кунда бўлмаса ҳам, кун ора ота ҳовлига, муҳтарама оналарининг зиёратига келишларига гувоҳ бўлардим. Баъзан хизматда ушланиб қолсалар ҳам, «эртага борарман», демасдан одатларини канда қилмай зиёратга келардилар. Беш сингилга бўлган меҳрибонликлари онага бўлган эҳтиромларидан кам эмасди. Сингилларини ҳам тез-тез йўқлашни канда қилмасдилар. Бир куни «Сингилларнинг кўнгли яримта бўлади. Улар ҳар куни уйларидан бир одам келишини кутиб яшайдилар. Менинг қадам босиб боришдаги заҳматим уларнинг менинг кўрганларидаги қувончига арзимайди», деганлари эсимда.

У дамларда масаланинг диний моҳиятидан бехабар эдим. Кейинроқ билсам, дўстим Аллоҳнинг фарзларидан бирларини адо этиш билан банд бўлиб, охират саройини тиклаб юрган эканлар.

Расулуллоҳ (с.а.в.) «Қариндошлиликни боғланглар, агар салом билан бўлса ҳам», деб таъкид этганлар. Шу ўринда зиёрат одоби масаласида ҳам фикрлашиб олсак. Айрим одамлар қариндошларини йўқлашни ният қилишади-ю, лекин камхаржлик боисиданми ё бозорга тушишга эринибми, «қуруқ бораманми» деган баҳонада бу яхши амални бажаришни кейинга сураверадилар. Шаҳарларда новвойлар кўп, йўл-йўлакай тўртта нон олиб кириб йўқлаш одат тусига айланиб қолган. Қишлоқларда аёллар зиёрат маҳсадида маҳсус нон ёпадилар ёки ўзларининг боғларидан насиба оладилар. Агар буларнинг ҳам иложи бўлмаса, салом бериб кириб боришнинг ўзи ҳам уят саналмас экан. Бугунги кунда йўқлашнинг янгича турлари ҳам мавжуд. Мактуб ёзиб ёки телефонда ҳол-аҳвол сўраб туриш ҳам яхши. Халқимизда яхши мақол бор: «Борсанг – қариндош, бормасанг – бегона».

Мен умрнинг зиёда бўлишини шу дўстим мисолида кўраман. Ҳозир шукрким, акалари, укалари, бе-

шала сингиллари ҳаётлар. Шубҳам йўқки, улар акаларини ҳар куни меҳр билан эслайдилар. Унинг ҳақига дуолар қиласидилар. Оилада силай раҳмдан сўз очилса, «Тоғанг шундай меҳрибон одам эди, унинг ҳаёти сенларга ибрат бўлсин», деб фарзандларига тарбия берадилар. Бу фарзандлар вақти келиб ўз фарзандларига «Менинг тоғам шундай мусулмоншева эдилар», деб ибрат қилиб эслашларига ҳам ишонаман.

Баъзилар қариндошларидан узоқдашадилар-да, бу хатоларини яшириш учун ўша қариндошларини айблайдилар. Бир одамнинг гапларидан ажабланган эдим. Аммалари ҳақида сўзлай туриб айтдики: «Мен амманникига қадам босмай кўйдим, ўзи ҳам, болалари ҳам намоз ўқимайди». Ўзининг айбини яшириш учун мусулмончиликни ниқоб қилиши, айниқса, ажабланарли эди. Агар у чин мусулмон бўлса, яхши одобларини намоён этиб, ўша бенамоз аммасини тез-тез зиёрат қила-вермайдими, яхши фазилати билан ибрат бўлавермайдими? Бу киши каби янгишганларга Маймун ибн Маҳрон айтган ибратни эслатишни жоиз деб билдик:

«Уч нарсада кофир ва мусулмон баробардир: ким билан аҳдашган бўлсанг, аҳдингга вафо қилгин – хоҳ кофир бўлсин, хоҳ мусулмон. Албатта, аҳд Аллоҳ учундир. **Орада қариндошчилик бўлса, силай раҳм қиласин – хоҳ кофир бўлсин, хоҳ мусудмон.** Кимки сенга омонат берган бўлса, омонатини адо қилгин – хоҳ кофир бўлсин, хоҳ мусулмон».

Раббимиз Аллоҳ таборак ва таоло раҳмни яратиб, Ўзининг Раҳмон сифати билан марҳамат этдики: «Мен Раҳмонман, сен раҳмсан. Ким сени узса, узиламан; кимики сенга боғланса, боғланаман». Аршдан ўрин олган Раҳм эса кеча ва кундуз дер эканки: «Ё Парвардигоро! Сенинг йўлингда кимки менга боғланса, боғлангин, кимки Сенинг йўлингда мени узса, узилгин».

Абу Ҳурайрадан (р.а.) ривоят қилинган ҳадисда Расулуллоҳ (с.а.в.) бу мавзуга янада аниқдик киритиб, айтадилар:

Абдуллоҳ ибн Амр (р.а.) эса айтадилар: «Расулуллоҳ (с.а.в.) битта бармоқларини эгиб: «Раҳм сўзи Аллоҳ Таолонинг Раҳмон номидан шу бармогимдек униб чиққан бир шохчадир. Уни бирор узмаса, Аллоҳ Таоло узмайди ва ким узиб қўйса, Аллоҳ ҳам уни узиб ташлайди. Қиёмат куни Аллоҳ Раҳмга фасоҳатли, ўткир ва очиқ сўзлайдиган тил беради», дедилар».

Бу ўринда жуда гўзал ташбеҳ бор: чиндан ҳам кишининг бармоғини бирор узмайди. У фақат ўзининг эҳтиётсизлиги учун бирон нимада чопиб олиши мумкин. (Ўғирлиги учун чопилса ҳам ўзи айбдор.) Қариндошлик занжирини узгани туфайли Аллоҳнинг раҳмшафқатидан бебаҳра қолгудай бўлса, киши ўзининг эҳтиётсизлиги ёки аҳмоқлигига даъво қиласерсин.

Қариндошлар қандай сабаблар билан узилиб кетадилар?

- кўп ҳолларда мерос талашиш оқибатида;
- ота-оналаридан мерос қолган бемеҳрлик, лоқайдлик, худбинлик каби иллатларига даво тополмаганлари туфайли;
- кибр хасталигига чалингланлари учун. Бу ҳолда бойроқ қариндош камбағалроқ жигарини менсимайди. Бундан унинг кўнгли ранжийди. Силаи раҳм қиласман, деган ниятда бу кибрли қариндошиникига борганида у нимани кўради? Фақат такаббурликни кўрса, эҳтимол, чидар. Аммо бадавлат қариндошининг кўзларидага «Бу бир нимага муҳтож бўлиб, тиланиб келдимикин?», деган хавотирли савонни кўргач, чидаши қииндир. Аммо бу ҳам бир синов, чидаб сабр қилгани маъқул;
- ҳасад касалига банди камбағалроқ қариндош бадавлатроқ жигарини кўра олмайди. Ҳатто «нима учун унга беради-ю менга бермайди?» деб Аллоҳ билан ҳақ талашиб ҳам қўяди. Ёки тинмай тамагирлик қиласеради. Ёки қариндоши ҳақида фийбат ва ифволарни тарқатаверади. Бадавлат қариндош ундан безади. Аммо бу ҳам унинг учун бир синов, чидаб, сабр

қилгани маъқул. Ҳасадчи қариндош бизга ёмонликни право кўрса, биз унга инсоф тилаб, дуо қиласайлик. Унинг инсоф ва ҳидоят сари бурилгани бу сабримиз учун бизга берилган мукофот бўлади;

• қариндошлар орасига совуқчилик тушишига маълум бир одамларнинг билиб-бilmай айтиб юборган гаплари ҳам сабаб бўлиши мумкин. На иложки, орамизда гап ташувчилар кам эмас. Гапни шунчаки ташиб қўя қолса майли-я, қўшиб, кўпиртириб юрадиганлари кўп. Шундай номаъқул гапни эшитганда айримлар «Бу бир гийбат-да», деб ортга ташлаб юборсалар – олам гулистон! Лекин гийбатлигини била туриб ҳам разабланана бошлайди. Ҳолбуки, бирон киши қариндошингизни ёмонласа, сиз унга қўшилишиб ёмонламанг. Аксинча, унинг яхши томонларини эслай бошланг. Шунда вужудингизда уйғонаётган нафрат чекинади. Нафратдан қутула олмасангиз, ўзингизни қийнаб юраверманг-да, ўша қариндошингиз ҳузурига боринг. «Менга қарши шундай дебсиз» ёки «Менга қарши шундай иш қилибсиз, сабабини тушунтиринг, айбим бўлса мен узр сўрай, сиз эса кечиринг», денг. Балки сизга ёмонлик истаган қариндошнинг вижденида иллат бордир, у ҳолда кўп айтишманг, жанжалга яқинлашманг. Агар комил виждон ва инсоф эгаси бўлса, йўл қўйилган хатони бартараф этиш чоралари бўйича биргаликда фикрлашинг. Икки жигар орасида нифоқ қўзғовчилар орасида хотинларни кўп учратамиз. Овсинларнинг бир-бирига нафрати кундошникидан ёмонроқ бўлади. Қариндошлик занжирини узишга интилувчи хотинларни калтафаҳмликда айблаймиз. Лекин уларнинг гапларига лақда тушиб жигарларидан юз ўгирувчи эрни-чи? Хотин «акангиз (ёки опангиз) ундин» деб гийбатни бошлаганида эр «Тўхта, сен айттаётган одам билан биз бир қориндан тушганимиз. Шу одам менга йигирма (ёки ўттиз) йилдан бери ака. У менинг бешигимни тебратган. Унинг кимлигини, яхши-ёмонлигини сендан кўра мен яхшироқ би-

ламан», деб түхтатса, ҳар қандай хотин иккинчи марта үйлаброқ гапирадиган бўлади. Яна шундай аёллар борки, тил билан фийбат қилганлари етмагандай турли илму амал, жодулар билан қариндошлардан қутулиш чораларини излайдилар. Шукрки, бундай бузгунчилардан кўра оқила аёлларимиз кўпроқ. Бир дўстим аёллардан гап кетганида шундай деган эди:

– Худо менга оқила аёл неъматини берди. Мен акамдан ранжиб, борди-келинини ҳам йиғиштиromoқчи бўлган эдим. Аҳли аёлимга, фарзандларимга ҳам акамнигиба боришини таъқиқлаб қўйган эдим. Бир куни аҳли аёлим акамни туғилган кунлари зиёрат қилиб келибди. Бориб келганини яширмай ўзи айтди. Фазабланган эдим, босиқлик билан тушунтириди: «Агар акангиз билан юзкўрмас бўлиб кетсангиз билган-бilmagan қариндошлар, танишлар биринчи навбатда мени айблашади. Чунки мен келинман. Жигарлар озгина хафалашиб юришиб кейин барибир яқинлашиб кетасизлар. Жигарни жигардан узиб бўлмайди. Акангиз ёмон бўлсалар сиз яхши бўлаверинг». Шу гапига фаришталар омин дейишган эканми, орадаги нифоқ кўтарилиди.

• Баъзи қариндошлар келажакда узилиб кетмаслик учун қуда бўладилар. Бироқ ёшларнинг оиласи бузилиши натижасида юзкўрмас бўлиб кетадилар. Айнан мана шу ҳолат кишини ўйга толдиради. Яқин қариндошлик занжирини мустаҳкамламоқчи бўлган ака-ука ёки опа-уканинг айблари тўйдан кейин кашф этила бошлайди. «Қизи ундей экан, яхши тарбия бермабди», деб бир томон иккинчи томонга мағзава афдарса, иккинчи томон ҳам тек турмайди. Оқибат эса равшан. Оиласи бузилган йигит ва қиз бошқа турмуш куриб кетади, бироқ узилган қариндошлик тикламайди. Баъзан эса аксинча ҳолат ҳам юз беради. Масалан, ука опасининг ёки акасининг ўғлини куёв қилиш ниятида. Очик айтолмайди-ку, бироқ ташрифларини беҳад қуюқ қилади. Бу уйдаги ҳар бир

маросимда хотини билан келиб хизмат қилади. Кейин бир куни орқаворатдан эшитиб қоладики, у ният қилган йигитга қиз қидиришаётган эмиш. Шунда яқинлари орқали ниятини маълум қилганда «Қариндошдан келин қилмайман», деган жавобни эшитиб, ташрифларини буткул узмаса-да, аввалги меҳрибончиликларини тұхтатади.

Яна шунга ўшшаган турли катта-кичик сабаблар күпки, буларнинг биронтаси Қиёматдаги ҳисоб чоғида узрли баҳона ўрнида қабул этилмаса керак.

Силаи раҳмни мукаммал равишда бажаришда қариндошлиқ ҳақдарини адо этиш ҳам бор. Бандаларга «Қариндошларингга, мискин ва мусофиirlарга ўз ҳақини бер!» деб буюрган. «Исрө» сурасидаги ояти кариманинг бу маъносини Абдулоҳ ибн Аббос шундай тафсир қиладилар: «Бунда ҳақларнинг энг зарурини бериш буюрган. Маблаги бўлса, қариндошларга, мискин ва йўлда қолган мусофиirlарга беришга даъват қилинади. Агар маблаги бўлмаса, ночор кишиларга қандай муомала қилиш лозимлигини ўргатилади: «Парвардигорингдан кутадиган раҳмат (ризқ) қўлингда мусассар бўлмай, уларга қарай олмасанг, уларга мулоийим гапир». Яъни ўша ночор одамни ноумид қилмай, «ҳозирча йўқ, аммо яна мол келиб қолар, шуни кутиб турибман», каби умидбахш сўзлар билан яхши ваъда қилишга чорланяпти.

Имкони бор, ўзига тўқ кишида ночор, ёрдамга муҳтож қариндошларнинг ҳақи бор. Бой-бадавлат киши ўз қариндошларига ёрдам берганида миннат ёки фазлини кўрсатиш учун эмас, балки одамийлик бурчини адо этиш учун қилган бўлади. Шунингдек, ночор қариндош ўзининг бадавлат қариндошидан бирор нарса олганида унинг ҳузурида хору зор бўлиб эмас, Аллоҳ унга белгилаган ҳақни олаётганини тушуниб, ўзини эркин тутиб олади.

Баъзан aka-ука (ёки опа-сингил) тутинганларни учратамиз (яхши амаллардан ҳисобланмиш бу одоб ху-

сусида дўстликка оид сұхбатимизда яна фикрлаша-  
миз). Юсуф Ҳожиб ҳазратлари ёзадиларки:

*Қодошлиқ киши куси чови бедук,  
Одошлиқ киши оти сови бедук.  
Қодошинг йўқ эрса юри тут одаш,  
Одаш эзгу бўлса, бу – булди қодош.*

Дейилмоқчики: қариндошлари бор одамнинг шаъни шуҳрати улуғдир. Дўсти бор одамнинг эса сўзи улуғдир. Кел, қариндошинг бўлмаса, дўст тут. Яхши дўст қариндош ўрнида бўлур.

Чиндан ҳам шундай. Аммо қариндошидан узилган ҳолда бегона билан ака-ука тутинишни англаб этиш қийин. «Қутадғу билиг»да яна шундай сатрлар бор:

*Ёғиз ер яшил сув ёрошти била,  
Оро юз чечаклар ёзилди кула.  
Ярашиқ юриса қодош ё одаш,  
Улардин бўлур қо қодошқа била.*

Дейилмоқчики: бўз тупроқ билан сув иттифоқ бўлгани учун юз хил гул-чечаклар кулишиб очилди. Қариндош ёр-биродарлар иттифоқ бўлишса, ундан тарқалган гўзал жамоатлар вужудга келади.

**УМИДИМИЗ ЮЛДУЗЛАРИ**, бу сұхбатимиз сизларга тушунарли бўлдими ё йўқми, билмайман. Ҳар ҳолда маъқул келишига умидим бор. Баён этилган масалаларнинг айримларига сиз келажакда дуч келасиз, лекин бу масалани ечимиға ҳозирдан тайёргарлик кўришингиз керак. Шу боис батафсилоқ фикр юритишни маъқул кўрдим. Шундай бўлса-да, барча масалаларни тўла қамраб ололмадим. Ишонаманки, донолар суҳбатидан баҳраманд бўлганингизда ва донишмандлар китобларини ўқиганингизда бу билимларингизни янада бойитасиз, билимингиз бойигач, амалга ҳам эътибор берасиз. Шунда келажагингиз янада саодатли бўлади.

## **Дўстлик чамани**

Дўст меҳри ўликни тирилтиради, дўстга хиёнат эса тирик қалбни вайрон қиласди.

Бир ажиг қушни кўз оддингизга келтирингки, унинг қалби Аллоҳга ишқ бўлса, қанотларидан бири ота-онага, иккинчиси дўстга муҳаббат ва вафодир. Дўстлик ҳақида, дўстликдаги вафо ва хиёнатлар ҳақида шу қадар кўп ривоятлар тўқилган, ҳикматлар битилганки, барчасини тўплаб, нашр этилса, дунёнинг қофозлари етмас, эҳтимол. Кишининг ҳаётида тиш ўтмас муаммолар кўп. Шулардан бири айнан дўст топиш, дўст танлаш муаммосидир. Киши умри давомида адаш йўлларда кўп қоқиласди. Энг кўп қоқилиш дўст кўчасида бўлади. Киши ўлгунига қадар кўп дўст топмайди, аммо кўп дўст йўқотади. Нега шундай? Бунга ким айбдор? Кишининг ўзими ё дўстми?

**Умидимиз юддузлари**, ҳаётда оддий ҳақиқат бор: одам ота-онани танлаш ҳуқуқига эга эмас. Лекин дўстлашиш учун одам танланади. Бунинг учун одамга ақл берилган. Яна бир ҳақиқат шуки, одам маълум ёшга етганида ота-онасиз яшаши мумкин, дўстсиз ҳаёт кечириши эса оғир, жуда оғир. Одам ота-онасининг вафотига аста-сеин кўникади. «Дўстим» деб юрган одамнинг хиёнати туфайли ундан тириклайн айрилса, чидаши қийин.

Боғчада орттирган дўстингиз, мактабдаги, лицей ёки коллеждаги дўстингиз бор. Буларнинг бири иккинчисига ўхшамайди. Боғчадош, синфдош дўстларингиз билан қадрдонлашиб қолганингизда лицей ёки коллежга бориб янги дўстларни кашф қилишингиз керак бўлади. Сўнг институтда, кейин хизматда...

Кўнглимиз ҳамиша вафоли дўст тилайди. Айни дамда кимдир бизнинг дўстлигимизга, садоқатли дўстлигимизга муҳтоҷ. Бирорта дўсти бўлмаган одам дунёда яшамаса ҳам бўлади. Биз дўст деб юрганимиз душманлик чопонига бурканниб олса, азиятлар чекамиз, аммо ўзимиз баъзан билиб, баъзан билмай бошқа бир

одамга душманлик қилиб юрганимизни англаймизми? «У ёмон одам, шунинг учун менга душман», деймиз. Эҳтимол, ўзимиз ёмондирмиз, эҳтимол, дўстлик бурчи нима эканини яхши англамагандирмиз, эҳтимол, яхши дўст тарбиясини четлаб улгайгандирмиз?

Катталар сиз билан дўст ҳақида сухбатлашишдан аввал ортларига бир қараб олсалар, шу ёшларига етгунча топган ва йўқотган дўстларини бир-бир кўз олдиларига келтирсалар, дуруст бўларди. Уларнинг фазилат ва иллатларини эсласалар-да, сўнг ўзларига савол берсалар: «Шу фазилат менда борми, бу иллатдан қутула олганманми?» Расулулоҳ (с.а.в.) «Аллоҳ назидда энг яхши дўст деб одамларга доимо хайрли ишларни қилиб юрувчи кишига айтилади», деб марҳамат қилганлар. Яъниким, дўстларнинг яхшироғи ҳамдамларини ўз шафқати соясида тутар ва карам эшигини улар юзига очиб қўяр, тилакларини ва ҳожатларини юзага чиқарар. «Биз шундаймизми? Ёки дўст деб юрганимиз бир гурӯҳ кишиларгагина яхшилик қилиш билан чекланамизми?»

Саволлар кўп... Жавоб ўйлаш баробарида ҳикматлардан қувват олайлик-чи...

Дўстликнинг аввали – танишмоқлик. Таъбир жоиз бўлса, танишиш – дўстлик манзилига олиб борувчи бир йўл. Агар бу йўлдан тўғри бормай, пойинтар-сойинтар, эгри-буғри қадам ташланса, фийбат, ифво, ҳасад ариқларидан сув ичиб турилса, ўртада душманлик пайдо бўлиши шубҳасизdir. Бир киши билан танишиб, уни дўстликка қабул қилишда ғоят эҳтиёткорона ҳаракат қилиш керак.

Дўст йўлидаги боғлардан бири – яхшиликни эътироф этиш. Яъни дўстнинг дўстга қилган яхшилигини тан олишdir. Агар бу йўлда миннат дарахти соясида роҳат қилинса, дўст манзилидаги кўшкка умид қilmай ортга қайтаверган маъқул.

Табиийки, ҳар қандай аҳил дўст орасида тортишув бўлади. Шундай ҳолларда майдо-чуйда нарсаларга

ўралашиб, киши дўстдан ажраб қолиши ҳеч гапмас. Демак, икковдан бири йўл бериши шарт. Дўстлик оламида кибр қуёшидан баҳра олиш мукофоти – юлдузсиз тундир.

Хуш муомала – дўстлик боғидаги дарахтларга ҳаёт суви берувчи бир чашмадир. Ширинсўзлик, очиқ юзлик, гўзал ифода, тавозе, мулоимлик, тилни маъносиз беҳуда сўзлардан тийиш каби гўзал хулқлардан хушмуомала ҳосил бўладики, бу душманлик саҳросидан ёпирилажак оғатлар йўлини тўсмоқликка қодир бўлур.

Дўстга муҳаббатнинг ҳақиқий таржимони **иждос** саналади. Дўстга хайриҳоҳ бўлиш, керакли вақтда унинг манфаати йўлида хизмат қилиш буни исбот этади. Муҳаббат ихлосга тескари эмас, аксинча уни қувватлайди, чунки икки дўст орасидаги муҳаббатдан мақсад – бир-бирларига манфаат етказиб, ёрдамлашишдир. Агар икки дўстдан бирисининг кўнглидан бу чиқиб кетса, унинг муҳаббати чин эмас, балки муҳаббат ниқобидаги мунофиқлик, риёкорликдан иборат бўлиб қолади.

**Ҳикоят.** Бир киши пулга муҳтоҷ бўлиб дўстининг уйига келди-да, муродини айтди. Ҳижолатлиги туфайли дўстининг таклифини қабул қилмади, уйига кирмади. Дўст ичкари кириб айтилган пулни олиб чиқиб бериб, биродарининг кўнглини кўтарадиган, ҳижолатликдан холи қиласиган оқил сўзларни айтди. Муддаоси ҳосил бўлган киши изига қайтгач, дўст уйига кирди-юйифлай бошлади. Хотини «Эрим кўпроқ пул бериб юбориб, ачиниб йиглаётпти шекилли», деган хаёлда «Бирор нарсани баҳона қилиб пул бермасдан қайтариб юборсангиз бўлмасмиди, энди пушаймонлигингидан нима фойда?», деб таъна қилди. Шунда дўст дедики:

– Йиглаётганим сабаби сен ўйлаганча эмас, мени гафлат босибди, дўстим пулга муҳтоҷ бўлиб қолганини билмабман. У келиб сўрамасидан аввал ўзим бориб, мушкинуни осон қилишим керак эди. Дўстнинг

ҳожатидан бехабар мендай ғоғилнинг дўстлигидан Тангрим рози бўлармикин?

Қарз сўраш жараёни дўстлик кўчасидаги оғир ва нозик муаммолардан, айни пайтда жиддий синовлардан саналади. Пул гўё ўткир қилич, дўстлик занжирларини узишга, дўстликнинг бузилмас иморатини барбод этишга ҳам қодир. Қарз сўраш бошланса, заиф дўстлик иплари узилиб бораверади.

**Ривоят.** Бир одамнинг қадрдон уч дўсти тақдир тақозоси билан уч шаҳарда яшар эди. У дўстларининг садоқатини синамоқни хаёл қилди. Аввал бирига хизматкорини жўнатди. Хизматкор хожасининг иши юришмай, қарзга ботганини айтди. Дўст уни юпатиб, у айтган қарзни тўлашга етгулик миқдордаги пулни бериб, изига қайтарди. Синовчи дўст биродарининг бу қарамидан қувониб, хизматкорини иккинчи шаҳарга жўнатди. Иккинчи шаҳардаги киши ҳам дўстининг қарзга ботганини эшлиб ғоят қайтурди. Эртасига хизматкорнинг кўлига қарзни қопладиган ва яна ўн йил давомида тирикчиликка асқотадиган маблағ бериб жўнатди. Синовчи дўст бундан ҳам қувонди, шундай дўстларни берганига Аллоҳга шукрлар қилди. Учинчи шаҳарга жўнатишдан олдин хизматкорига қаттиқ тайинлади:

– Бу дўстим бадавлат эмас, ўзи олим одам. Унда илмдан бошка нарса йўқ. Шу сабабли «хўжайнинмнинг аҳволи хароб, катта қарзга ботган», деб ваҳима қилма. «Ишлари ёмон эмас, фақат беш тангагина қарзлари бор, Худо хоҳласа, яқин кунларда қарздан қутиулиб, ишлари авж олиб кетади», дегин.

Хизматкор олим дўст ҳузурига бориб хожасининг буюрганини билдириди. Олим дўст бу хабарни эшлиб, бошини эгди. Сўнг ўрнидан туриб, ташқарига чиқди. Хизматкор ўтирган уйига назар солди: йиртиқ гиламу эски кўрпачадан бошка нарса йўқ экан. «Ҳеч бўлмаса беш тангаси бордир», деб ўтирганида уйга нотаниш одам кирди-да:

– Хожаси беш танга қарз бўлиб қолган хизматкор сенмисан? – деб сўради.

– Ҳа, – деб жавоб берди хизматкор.

– Мана сенга беш танга, буни шу уй эгаси бериб юборди.

– Ўзлари қанилар?

– Ўзи меникида. У қул бозорида ўзини менга беш тангага сотди.

Бу гапдан хизматкор ҳам ажабланди, ҳам даҳшатга тушди. Қулдорга эргашиб унинг уйига борди ва олим дўст қаршисида тиз чўкиб:

– Ундай қилманг, пулни қайтариб берайлик, – деб ялинди.

– Мен бу одам билан шартлашиб, беш танга эвазига беш йил ишлаб беришга ваъда берганман. Ваъдамга хилоф қила олмайман. Дўстимни муҳтоҷликдан қутқариш учун беш йил ишлаб бериш мен учун ҳеч гап эмас, – деган экан олим дўст.

Мазкур ривоятни бир даврада ҳикоя қилиб берганимда кимдир дедики:

– Ўша синаётган одам бу биродарининг қашшоқлигини билар экан, ўзи унга ёрдам берса бўлмасмиди?

Бу саволда ўзимиз учун икки ибрат бор:

- олим ўзини қашшоқ санамайди, чунки унинг илми бор. У илмни ҳар нарсадан устун кўяди, биродарининг ёрдамини қабул этмайди. Бадавлат биродарлари ҳисобига яласа, у олим бўлмайди;

- бошқани синамоқчи бўлган одам аввал ўзини си nab кўриши керак.

Бу дунёнинг одамлари бир-бирларига дўст бўлишини истасалар, бу йўлда ўз азиз жонларини ҳам аямайдилар. Бундай одамлар садоқатли асл дўстлардирлар. Лекин бу дунёда шундай тоифа одамлар ҳам борки, улар ёлғиз ўз вазифаларини яхшиламоқ, қўлга бир нарса киритмоқ, яхши кун кечирмоқ учун дўст бўладилар. Бундай одамлар мол-давлат дўстларидир. Улар

кушларни тўйдириш учун эмас, тутиш учун дон сепадиган овчига ўхшайдилар. Дўсти учун жонини фидо этадиган одамларнинг қадр-қиммати молини фидо этувчидан жуда ва жуда юксакдир. Ривоятдаги олим дўстни ана шу юксак мартабада кўрамиз.

Дўстлар икки хил бўладилар: биринчилари – ўз ихтиёrlари билан самимий дўст бўлганлар. Иккинчилари – мажбурият ва зарурият юзасидан аҳду паймон боғлаганлар. Буларнинг мақсади фойда кўрмоқ ва зарадан қочмоқдир. Лекин самимият ва садоқатга асосланган дўстлик ҳамиша, ҳар ерда ва ҳар шароитда ишончли бўлади. Зарурият ва мажбурият натижасида пайдо бўлган дўстлик эса бундай кувватга эга эмас. У дарё каби гоҳ тошиб, атрофни босади, гоҳ қуриб, суви озайиб қолади. Зарурият юзасидан пайдо бўлган дўстликка ишониш дуруст эмас. Зарурият ўртадан кўтарилиши замон дўстлик адоватга айланиши, эҳтимол. Демоқчимизки, олим агар зарурият туфайли дўст бўлганида ўзини беш тангага сотмас эди.

**Масал.** Қарға, оҳу, сичқон ва тошбақа дўст эдилар. Иттифоқо оҳу йўқолиб қолди. Қарға осмонга учиб, уни қидирди. Қарасаки, оҳу овчининг тўрига ўралиб, азоб чекиб нолалар қиласпти. Қарға сичқонни фожиа ерига бошлади. Сичқон тўр арқонларини қирқди, оҳу озод бўлди. Шунда оҳу дўсти тошбақага қараб, ажабланиб сўради:

– Сен нега келдинг? Овчи бу ерга қайтса, сичқон, тешикка кириб беркинади, қарға осмонга кўтарилади. Тўрдан кутулдим, энди мен ҳам қочиб қутула оламан. Сен-чи?

Тошбақа бу гапни эшитиб бошини чайқаганича дебдики:

– Биродар, қандай қилиб келмайин? Дўстлардан узокда, фироқ ва ҳижронда кечган ҳаётнинг нима лаззати бор? Қандай ақлли одам айрилмоқни афзал кўради? Бахтсизликка учраган одамга тасалли берадиган, оғир кунларингда дардингни енгил қиласдиган дўстлар

билин бирга бўлиш лозим. Ҳижрон ўтида ёнган, дўстлардан узоқда тушган одамнинг дили ҳамиша кам ва алам билан тўла, сиҳатлик унинг вужудидан йироқ бўлади. Сабр ва қаноат уни тарк этади. Ақд ва камолот ўз кучини йўқотиб, фойдасиз бўлиб қолади... Дўстдан ажралишдан ҳам оғирроқ мусибат борми дунёда? Фироқ алангаси етти дарёни қуритади...

Масалдан олинажак фикр шуки, шиҷоатли ва кучли ботирлар урушда, хотин ва фарзандлар камбағалликда, дўстлар эса бошга кулфат тушганда таниладилар.

Ҳайвонлар дунёсини тарк этиб, ўзимизнинг ҳаётга назар ташлайлик-чи, нималарни кўрар эканмиз.

**Воқеа.** Бир йигитнинг бошига иш тушиб, бойлигидан ажралди, ўзи эса қамалди. Шунда унинг хотини ҳар ҳафтада ошхўрлик қилувчи улфат-дўстлардан ёрдам кутди. Дўст қамоқда, ошхўрлик ўша-ўша давом этарди. Ошхўр улфатлар болаликдан бирга катта бўлган ўртоқларини эслаб қўйиш билан дўстлик бурчларини адо этардилар гўё. Тўғри, улар сичқон каби тўр арқонларини қирқиб, дўстларини тутқунликдан қутқара олмайдилар. Аммо фақат одам боласига хос фазилат – тутқунликдаги дўстнинг отонаси, оиласидан хабар олиб туриш-чи? Қамоқдаги дўстнинг хотини эрини қутқариб олиш умидида елиб-югуради. Иттифоқо автомашинаси бузилиб қолиб, эрининг энг яқин дўсти ҳисобланган одамникуга бориб илтимос қиласди:

– Кунда беш-үн идорага учрашишга тўғри келяпти, машинасиз улгура олмайдиганга ўхшайман. Темирни қизигида босмаса, армонда қоламиз шекилли. Машинангизни икки-уч кунга бериб турсангиз.

Дўст хотиннинг илтижосига жавобан шундай деди:

– Бирор менинг хотинимни сўраса бериб туришим мумкин, аммо машинани бериб тура олмайман.

Тўғри, машинани бирорга бериш қонунга зид, дерсиз. Лекин кўнгил тоза бўлса, шу машинани «ишонч

қоғози» билан ҳам бериб туриш мумкин-ку? Ёки агар у чин дўст бўлса «Бир-икки кун эмас, қанча лозим бўлса ўзим машинам билан хизматингизда бўламан», демасмиди? «Улфат», «ошна» деган тушунчалар бор, шунинг баробарида «ош дўстлари», «улфатдаги дўстлар» деган иборалар ҳам мавжуд. «Ош дўстлари» билан бир товоқдан палов ейиш мумкин, лекин улар орасидан меҳр-оқибатни қидириб топиш мушкул.

**Умидимиз юлдуздари**, сиз балки биларсиз ё бил-массиз, катта ўшдагилар чойхонадаги ошга ёки уйда-ги «гап»га келмаганлардан гина қиласидилар, бундай ул-фатга қўшилмаганлардан ҳатто нафратланадилар. Аммо қўполроқ бўлса ҳам бир ҳақиқат бор: от ва эшак бир охурда хашак есалар ҳам дўст бўлмайдилар.

Бир одамнинг афсус билан айтиб берган ҳикоясига сиз ҳам гувоҳ бўлинг.

**Яна бир воқеа.** Икки йигит. Иккови ҳам бадавлат отанинг эрка фарзанди. Бирига отаси «Мерседес» инъом этиб, улфатда «ювиди». Зиёфатдан қайтишда уларнинг бири ҳалокатга учради: машинаси пачоқ бўлди, ўзи оғир жароҳатланди. Унинг изидан келаётган дўст – янги «Мерседес» эгаси тўхтади. Дўстининг аҳволини кўриб, йўловчи машина тўхтата бошлади. Бу воқеани ҳикоя қилаётган одам машинасини тўхтатганда йи-гит: «Дўстимни шифохонага олиб боринг, мен изин-гиздан этиб бораман», деб пул тутқазди. У одам эса «Бу қонга беланиб ётган йигит дўстингиз экан, ўзингизнинг машинангиз бор экан, ҳар нафас ғанимат-ку, нега ўзингиз олиб бормай, машина тўхтатмоқчисиз?» деб сўраса «дўст» дебдики: «Ие амаки, менинг машинам янги-ку, уни ўтқизсам қон бўлади-ку?»

Бу ҳолатга изоҳ шарт бўлмаса керак. Яна бир воқеа хусусида эса эҳтимол баҳслашишга ҳам тўғри келар. Аммо ундан аввал ибрат сифатида бир масал билан танишсак.

**Масал.** Бир хушманзара, ажойиб чаманзордаги ба-ланд дарахт устида қарғанинг ини бор эди. Бир куни

овчи шу дарахт атрофига дон сочиб, түр ёйди. Қарға буни кўриб ўйланди:

– Бу одам бир балони бошлаяпти. Кимни тўрга солиш қасдида экан? Мени тутмоқчими ё бошқаними? Ўз жойимда қимир этмай турай, қани нима бўлар экан?

Шу онда кабутарлар учиб келдилар. Уларнинг бошлигини Чинкабутар дер эдилар. У фоят зеҳни, чаққон эди. Кабутарлар донни кўргач, эҳтиёткорликни унудилар ва тўрга илиндилар. Кабутарлар патиллаб, жонларини халос қилиш учун бир-бирларига урилавердилар. Шунда Чинкабутар деди:

– Ваҳимага тушманглар Ҳар бирингиз ўзингизни эмас, ҳамманинг бараварига халос бўлишини ўйланглар. Биз бараварига парвоз қиласиз.

Кабутарлар унинг айтганини бажариб кўкка кўтарилидилар. Овчи уларнинг ортидан югурди. Қарға эса ўз-ўзига деди:

– Мен буларнинг ортидан бориб, иш нима билан тугашини кўрай, чунки шундай ташвиш эртами-кечми менинг бошимга ҳам тушиши, эҳтимол. Бошқаларнинг бошига тушган ҳодисадан ўзи учун ибрат олганни хушёр ва фаросатли дейдилар.

Овчининг изма-из югуриб келаётганини кўрган Чинкабутар ёронларига деди:

– Бу сурбет овчи биздан воз кечадиганга ўжшамайди. Агар кўзидан фойиб бўлмасак, биздан кўнгил узмайди. Очик жойга эмас, дарахтзорларга бориб қўнайлик, шунда у бизларни топа олмай, изига қайтиб кетади. Шу яқин орада менинг бир сичқон дўстим бор, унга айтсан, бу тўрни қирқади ва биз озод бўламиз.

Кабутарлар у айтган томонга учдилар. Овчи уларни йўқотиб, изига қайтди. Қарға эса улар изидан учиб бораверди. Чинкабутар айтган дарахтзорга учиб келдилар. Сичқонни чақирдилар. Исми Зийрак бўлган бу сичқон жуда ақдли ва чаққон эди. Бирор фалокат юз берса қочиб чиқиб кетиш учун инидан анчагина те-

шикчалар очиб қўйган, бир неча кунга етарли озуқа ҳам ғамлаган эди. Дўстининг аҳволини кўриб, Зийракнинг кўзлари ёшланди. «Сени ким бу аҳволга солди?», деб сўради. Чинкабутар дўстига шундай деди:

– Яхшилик ҳам, ёмонлик ҳам тақдирдан. Кимнинг пешонасига нима ёзилган бўлса, эртами-кечми, шу нарса унинг бошига келади, ундан қочиб қутулиб бўлмайди... Қисмат бизни бу бало гирдобига солди. У бизга дон кўрсатиб, кўзимизни боғлади ва ақдимизни қора пардага чулгади. Ҳаммамиз бало занжирига банди бўлиб, баҳтсизлик чангалига тушдик. Мендан кўра қувватлироқ ва шаън-шавкатлироқ бўлганлар ҳам қисматдан қочиб қутула олмаганлар. Вақти-соати келганда кун ва ой тутилади, балиқ дарё тагидан юзага қалқиб чиқади, қуш осмон бағридан ерга тушади, но-донлар мақсадга етади, ақллилар ожиз қоладилар.

Зийрак бу сўзларни эшитгач, Чинкабутарни ўраб турган тўр ипларини қирқа бошлади.

– Аввал дўстларимни ўраб турган ипларни қирққин, – деди Чинкабутар. Зийрак унинг гапига эътибор қилмади. Шунда Чинкабутар унга ялинди: – Эй азиз дўстим, сен биринчи галда ўртоқларимни банддан озод қил.

– Сен ўз жонингни халос этишни истамайсанми, яшашга сенинг ҳақинг йўқми? – деди Зийрак.

– Мен уларга раҳбар бўлишни ўз зиммамга олганман, – деди Чинкабутар. – Шунинг учун уларнинг менда ҳақлари бор. Уларни асраш менинг бурчимдир... Бунинг устига мен уларнинг ҳаракати ва ёрдами туфайли овчининг таъқибидан халос бўлдим. Энди мен ҳам ўз бурчимни адo этиб, ўзимдан аввал уларни қутқазиш имкони керак. Яна шуниси борки, сен мени ўраб турган ипларни қирқа бошласанг чарчаб қолишинг ва оқибатда дўстларим тўрдан қутула олмай ҳалок бўлишлари мумкин. Лекин мен тўрда эканман, сен қанчалик чарчамагин, барибир, мени бу тўрда қолдирмайсан. Тушунгин, ҳаммадан олдин ўзимни қутқарсан,

умрим таъна ва маломат тамғаси остида ўтади. Мен бунга чидай олмайман.

– Бу мурувватли ва инсофли одамларнинг хосияти-дир. Бу хосият дўстларнинг сенга бўлган ишончи ва муҳаббатини янада мустаҳкамлайди, – сичқон шундай деб бошқа кабутарларни ўраб турган ипларни қирқа бошлади. Шу тарзда кабутарлар озод бўлиб, Зийракка миннатдорлик сўзларини айтдилар-да, учиб кетдилар. Бу воқеани кузатиб турган қарға эса сичқоннинг маҳоратига қойил бўлиб, «кабутарлар бошига тушган ташвиш менинг бошимга ҳам тушиши мумкин, менга бундай дўст бугун бўлмаса эртага керак бўлиб қолади», деган фикрда у билан дўстлашмоқни истади. Пастга тушиб сичқонни чақирди ва мақсадиди айтди. Сичқон унга деди:

– Сен билан менинг ўртамда ҳеч умумийлик йўқ. Бинобарин, дўст бўлишимиз ҳам мумкин эмас. Нодонлар аҳволига тушмаслик ва ҳикмат аҳдига калтафаҳм бўлиб кўринмаслик учун ақл эгалари мумкин бўлмаган нарсаларни орзу қиласликлари керак. Қуруқликда кемадан, денгизда эса отдан фойдаланишни истаганлар ўзларини кулгили ҳолга солган бўладилар. Сен билан менинг орамизда қандай муҳаббат бўлиши мумкин? Ахир мен сенинг таомингман, демак, сенинг ёнингда бир лаҳза бўлса-да, тинч ва бехавотир яшай олмайман. Кимки ўз тенги билан бўлмаса, охирда пушаймон ейди...

Энди ваъда қилганим, бугунги кунларда содир бўлган ҳодиса.

Яна бир воқеа. Болалиқдан бирга катта бўлган икки дўст тижорат билан шуғулланмоқчи бўлишди. Бири қаердандир арzon-гаровга шампан виноси олиб, харидор топиш мақсадида бозорга келишди. Машина эгаси бўлмиш дўст дўкондор билан савдолашмоқ мақсадида ичкари кирди. Иккинчиси кўчада қолди. Ўзича савдо қилиб кўрмоқчи бўлиб, машинадан уч-тўртшиша вино олиб кўчанинг ўзида сотувга қўйганда

милиция ходимларининг қўлига тушди. Дўйондан чиққан машина эгаси дўстининг бу аҳволини кўргач, «Мен бу одамни танимайман», деб жўнаб қолди. Уни кутқаришга ҳаракат ҳам қилмагани дўста хиёнат эмасми? Вижданан қаралса шундай. Лекин масалага иқтисодий томондан ҳам қарашибор экан. Дўстлар даврасида, яъни «улфат гап»ида бу воқеадан хабар топганлардан бири биринчи дўстни айблади. Аммо у дўст айбига иқрор бўлмади. «Мен унга кўчада сот, дедимми? Ўзининг аҳмоқлиги учун ўзи жавоб бериши керак», – деди. Орада баҳс бошланганида тижорат илмидан яхши хабардор дўстларнинг бири орани очиқ қилди. «Бу дўстимиз кетиб қолиб тўғри қилган, – деди у, – агар шу менинг дўстим деса, милиса уни ҳам ушларди. Кутулиш учун икки ҳисса пул тўлаш керак бўларди».

Сиз бу ҳукмга қандай қарайсиз?

Иқтисодий манфаат бор жойда дўстликка ўрин йўқми? Дўстлик ўрнини бевафолик эгалладими? Эҳтимол, саволимизга қуйидаги ривоят жавоб берар. Маълумки, бевафо дўстлар ҳақида кўп ривоятлар битилган. Қадим фозилларидан бирининг ҳикояси билан танишсак.

**Ривоят.** «Хоразмга сафар қилганимда бир киши менга йўлдош бўлди. Уни едириб-ичириб юрдим. У эса менга нисбатан бўлган мұҳаббатини, самимий дўстлигини тинмай сўзларди. Йўлда бизга бир ит ҳам ҳамроҳ эди. Овқат қолдиқларини мен итга бериб турадим.

Йўлда икки ўгри бизга ҳужум қилди. Йўлдошим ўғриларни кўрибоқ, мени ёлғиз ташлаб қочиб кетди. Ит эса мени ҳимоя қилди. Бир ўғрининг обёғидан тишлаб йиқитди, талади, оқибатда ўгри аранг қочиб қолди. Иккинчи ўғрини мен ўзим мағлуб этдим. Шундай қилиб, итнинг ёрдамида ўғрилардан кутулдим. Ҳамроҳим ўғриларнинг қочганини кўриб ёнимга қайтди, риёкорлик қилиб, ҳолимни сўради. Мен эса «Сен каби дўстдан шу вафоли ит яхшироқ», деб уни ёнимдан нари қувдим».

Бизнингча, вижданга суюнмаган дўстликда яхшилик йўқдир. Бу отасининг мол-мулкини совурган шаҳзодани эслатади.

**Яна бир ривоят.** Бир шаҳзода отасининг вафотидан кейин юртни идора қилишни унугиб, дўстлари билан айшу ишратга берилибди ва тез муддатда хазинани кўкка совурибди. Бу ҳолдан хабар топган бир қариндоши вазиятдан фойдаланиб, мамлакатни босиб олибди. Подшоҳликка ҳаваси йўқ, шаҳзода бунга парво қилмай тожу тахтни топширибди-да, ўзи ўша текинхўр дўстлари билан ялло қилиб юраверибди. Охир-оқибат бор-йўридан ажраб, кафангаго бўлгач, эски ёр-дўстларидан бирортаси унинг ҳолидан хабар олмабди, аксинча барчаси ундан юз ўтирибди. Шаҳзода ҳар куни бозор бошига чиқиб ўтирап, отасининг содиқ фуломларидан бири унинг қорнини тўйғизар экан. Бир куни собиқ дўстлари уни мазах қилиш мақсадида зиёфатга таклиф этишибди. Ҳаммалари кайфу сафога берилгандаридан ит келиб гўштни кўтариб кетибди. Дўстлар «Бу шаҳзоданинг иши, неча кунлардан бери гўштнинг афтини кўрмагани учун кўзи очлиқ қилиб яшириб қўйган», деб маломатлар қилишибди. Шаҳзода «Гўштни мен олганим йўқ», деб қанча онт ичмасин, ишонишмабди. Маломатдан эзилган шаҳзода паришон ҳолда дўстлари даврасидан чиқиб кетиб, қон-қон йиглабди. Унинг бу ҳолини кўриб қолган энагаси «Болажоним, сенга нима бўлди?», деб сўрабди. Шаҳзода аҳволини баён қилибди. Шунда кампир подшоҳнинг васиятини етказиш вақти келганини англаб, шаҳзодага учта мактуб берибди. Биринчисида айтилишича, фалон ердаги капитархонага ўн минг тилла яширилган экан, иккинчи мактубдаги баёнга кўра, фалон шаҳардаги фалончи исмли кишига ўн минг тилла бериб қўйилган экан. Учинчи мактубда пистон шаҳардаги пистончи исмли кишига ўн минг тилла танга омонатга бериб қўйилгани билдирилган экан. Шаҳзода бу пулларни олиб, бирорвга муҳтоҷ бўлмасдан яшай

бошлабди. Унинг ишлари юришиб қолганидан хабар топган эски жўралари яна хира пашшадай пайдо бўлишибди. Шаҳзода бир куни уларни зиёфатга чорлабди. Улар келгунга қадар тоштарошни чақиртириб, катта бир тегирмон тошини илма-тешик қилдириб тешдириб, кўзга қўринарли жойга қўйибди. Зиёфатга келган жўралар бу тошни кўриб, «Унда қандай ҳикмат бор экан?», деб ажабланишибди. «Отам замонида, – дебди шаҳзода, – арабистонлик одам бир талай чумоли олиб келган экан. Ўша чумолилар шу тошни илматашик қилиб ташлашибди». «Шундай бўлгани аник, – дейишибди жўралар, – биз ҳам шунаقا чумолилар борлигини эшитганмиз».

Бу сўзларни тинглаган шаҳзода ўзича шундай дебди:

«Ана холос, бир бурда гўшт учун ўша куни қанча қасам ичсам ҳам, буларнинг ҳеч қайсиси менга ишонмаган эди. Ҳозир ақл бовар қилмас ёлғонни айтсам, барчалари тасдиқлаб ўтиришибди. Демак, буларнинг барчаси яхши кунимдагина пайдо бўладиган дўстлар экан. Менга эса ёмон кунимга ярайдиган, ноним учун эмас, жоним учун дўст бўлувчилар керак...»

Одамнинг ҳаётда дўстлари кўпдай туюлади. Аммо ўзини дўст деб юрганларнинг юздан саксони **манфаат дўстлари**, десак фикримизга қўшиласизми? Биласиз, қоғоз пулларнинг, ҳатто дуру жавоҳирнинг сунъийлари, қалбакилари учраб туради. Уларни маҳсус мосламалар саралаб беришади. Ҳаётда сохта дўстларни саралайдиган мослама йўқ, ҳар ким ўз зеҳни, ҳаётий тажрибасига қараб ажратиб олади-ю, аммо ажратиб олгунича кўп азиятлар чекиши ҳам мумкин. Ҳаётда учраб турадиган таҳликали ва мусибатли кунларнинг фойдали томони шундаки, бир-бирларини танимаган одамларнинг танишиб, дўст бўлишларига йўл очиб беради. Айни чогда дўстнинг садоқатини синайди. Дўстларга манфаат етказмасдан улардан манфаат кутиш, ерга уруғ сепмасдан туриб, дон олишни

тама қилиш каби маъносиздир. Машойихлар «Киши ёндирилмайин сұхбатда шамни, ёруғликнинг нишонин күролмас», деб бежиз айтмаганлар.

Үз нафсини үйлаб қилингандыкка жуда тез соя тушади. Дейдиларки, дүстни фойда-зарап ичида си-намоқ керак. Яъни, сен дүстинг учун оёқ, қўйсанг, ўзингни маҳкам тут. Дүстнинг ҳақиқий дилини билмоқчи бўлсанг, синаш учун унга тилингда ғазаб қилиб ёки қовоғингни солиб кўр. Дүстнинг сенга қанчалик муҳаббати борлигини билмоқчи бўлсанг, унинг энг яхши кўрган нарсасини сўра. Шу иккаласидан сўнг ҳам у қовоғини солмаса, бундай дүстни бошга кўта-риш, ширин жон билан баробар тутиш керак.

Бир донишманндан «Қанча дўстингиз бор?», деб сўрадилар. Жавобан дедики:

– Буни билмайман. Ҳозир туриш-турмишим яхши. Умрим фаровонлик билан кечиб турибди. Шунинг учун ҳамма менга хушомад қилиб, ўзларининг дўст эканликларини билдириб турибдилар. Мабодо давлатим қўлимдан кетса, у чоғда қанча самимий дўстим борлигини билиб оламан.

Хорун Рашид «Энг яқин дўстинг ким?», деб сўра-дилар.

– Қорнимни тўйдирган киши, – деб жавоб берди Баҳдул.

– Қорнингни тўйдирсан, мени ҳам дўст деб била-санми? – деб сўрадилар Хорун Рашид.

– Дўстлик ҳам насия бўладими? – деди Баҳдул.

«Бу одамни танимайман», деган «дўст» ва унинг ҳаракатини оқлаган улфат бу ҳикматларни билса, мағзини чақса, эҳтимол, бошқача хуросага келармиди?

Дўндамас ва Амазак деган йигитларнинг дўстлиги ҳақида қадим афсона бор. Бу афсонани Александр Македонский тарихчилари юртимизда бўлганларида ёзib олганлар ва бу тарих китоби ҳозир юнонлар диё-ри кутубхонасида сақланади. Иккинчи асрда яшаган Лукианнинг «Дўстлик» деб номланмиш асарида бу

садоқатли дўстлик баёни берилган. Сиз ҳам танишингчи. Дўнда мас ва Амазак қиёматли дўст бўлишга аҳд қилдилар. Қабила одатига қўра, билакларини тилиб, бир-бирларининг қонларини яладилар ва бу билан аҳдларини қатъийлаштирилар. Улар шундай дўст эдиларки, гўё икки танда бир жон ва бир кўкракда икки юрак каби... Аҳднинг тўртинчи куни уларга душман ҳужум қилди. Қабиланинг маълум бир қисми Сирдарёни (у пайтларда дарё Танаис деб аталган) кечиб ўтиб, жон сақлади. Дўнда мас ҳам дарёдан сузиб ўтди. Дўсти Амазак эса қоча олмай, душман қўлида қолди. У алам билан фарёд уриб, дўсти Дўнда масни ёрдамга чақирди. Дўстининг ноласини эшитган Дўнда мас ўйлаб ҳам ўтирмай ўзини дарёга ташлаб, у қирғоқса сузиб ўтди. Душман уни найзага рўпара қилиб ўлдирмоқчи бўлганида «Олтин!» деб ҳайқирди. Бу сўз ўзига тегишли асирни пул ҳисобига қутқариб олишни англатгани учун уни ўлдирмай, лашкарбошига рўпара қилдилар. Дўнда мас дўстини озод этишни сўради. Лашкарбоши эса бунинг эвазига кўп олтин талаб қилди. Шунда Дўнда мас:

– Бойлигимизни талаб аддо қилдинг. Энди менинг ҳеч вақом йўқ. Дўстимнинг ўрнига мени асир эт, истагингни бажарай, – деди.

– Нега бойлигим йўқ, дейсан? Сен бебаҳо бойлик эгасисан-ку? – деди лашкарбоши унга синовчан тикилиб.  
– Сенинг шу икки кўзинг – энг бебаҳо бойлигинг, шуни билмайсанми? Сен шу икки кўзингни дўстинг учун бера оласанми? Биз кўзларингни ўйиб олайлик-да, сен дўстингни олиб истаган томонингга жўна!

Дўнда мас бу шартга кўнди. Кўзларини ўйиб олишаётганда дўстини қутқаришга эришгани учун шукр қилди. Сўнг икки кўзи ўйиб олингани ҳолида дўстига суюниб, қабиласига бориб қўшилди. Амазак дўстининг бу ҳолига чидамади. У ҳам ўзининг кўзларини ўйиб ташлади. Шундай қилиб икки дўст бир-бирига сую-

ниб, дўст садоқати ҳақида достонлар айтиб, ер юзи бўйлаб юрдилар... Асрлар ўтди, урушлар ўтди, қирғинлар ўтди... Аммо бу воқеа унугимади. Афсус шуки, буни кам одам билади. Шу боис фарзандлар тарбиясида бу ибрат четлаб ўтилади.

Ўтган йили Курбон ҳайити арафасида Тошкентдаги бир уйта ўт тушди. Ёнгин қўшниникига ҳам ўтди. Бу хонадон эгалари айни дамда Ҳаж ибодатида эдилар. Энди тасаввур қилинг: кексайиб қолган эр-хотин улуғ ибодатдан қайтсалар-у куйиб ётган уйларини кўрсалар! Хонадон соҳибларининг фарзандларига садоқатли дўстлар берилган экан. Дўстлар бу уйни бир неча кун ичидан тиклаш аҳдини қилдилар. Ҳар ким имкониятидан зиёдароқ ҳисса қўшишга ҳаракат қилди. Гап бу ерда фақат маблағ тўплашда эмас. Дўстларнинг барчалари ёнгин соатидан бошлаб, то уй қайта қурилиб, ҳожи ота ва ҳожи она кутиб олингунга қадар шу ерда бўлдилар. Иш кечаю кундуз давом этди. Дўстлар усталар ва мардикорлар сафида хизмат қилдилар. «Битта кулчани иккига бўлиб, ярмини оч одамга берганни «сахий» деб, ўзи емай, ҳаммасини муҳтоҷ одамга берганни «сахий дўст» деб бил», деганларидек, маҳалла аҳди шу кунлар ичи сахий ва беғараз дўстликнинг яхши намунасини кўрдилар. «Яхши либос – танга оройиш, яхши ўртоқ – жонга осойиш», деб бежиз айтмаганлар. Яна ҳазрати Алишер Навоий ёзганларким:

*«Ҳар ким бирор билан дўст-ёр бўлса, дўст-ёрлик даъвосини қилса, ўзига раво кўрмаганни унга ҳам раво кўрмаслиги керак. Баъзи нарсаларни ўзига раво кўрса ҳамки, ёрига раво кўрмаслиги лозим. Кўп машиқатлардан киши руҳига алам етади. Жисму жони бунга тоқат қилади. Аммо бундай машақкат дўсти бошига тушишини хаёлига ҳам келтира олмайди. Мабодо хаёлига келтиргудек бўлса, даҳшатдан ҳаёти сўнади.*

Ёр улдурки, ҳар неким ўзига  
Истамас, ёрига ҳам истамагай.  
Ўзи истарки, ёр учун ўлгай,  
Ани мундоқ шарик айламагай.

Дейилмоқчики: ўзи дўсти-ёри учун ўлмоққа тайёр, аммо бу ишга дўстини шерик қилмайди.

Сўфи Оллоҳёр ҳазратларининг таъбири билан айтилса, «Сен Аллоҳ Таоло учун бирор билан дўст тутинсанг, уни сут устидаги қаймоқдек кўргин. Уни азиз жонингча, балки ундан ҳам ортиқроқ кўргин:

*Тут ул дўстингни сут устинда қаймоқ,  
Азиз жонингча кўргил, балки беҳроқ.*

Айтилганлардан мурод шуки, дўстининг куйган уйини тиклашда хизмат қилганларни чин дўстлик хусусидаги бурчларини аъло даражада бажарганлар, демоқдик мумкин.

Ҳаётда энг қадрдан дўст орасида ҳам келишмовчилик, тушунмовчилик ва бунинг оқибати ўлароқ аразлаш ҳам учраб турди. Аразлаш, яъни «пўм чиқиши» фақат болаларда ёки сизнинг ёшингиздагиларга хос эмас, балки катталарда ҳам тез-тез учрайди. Банда хато ва камчиликлардан холи эмас. Аммо йўл қўйилган хато икки дўстни бир-биридан ажратиб юбормаслиги керак. Ҳақиқий дўст биродарининг айбини дарров кечира олиши шарт. Бир оғиз хато гап учун ёки ноўрин ҳаракат учун ажралиб кетадиган дўстнинг дўстлиги ҳақиқий эмас экан. Расууллоҳ (с.а.в.) шундай марҳамат қилганлар: «Хеч бир киши ўз биродаридан уч кечадан ортиқ аразлаб юрмоги **ҳалол эмас**. Иккаласи тўқнашиб, бири у ёққа, иккинчиси бу ёққа юз ўгириб кетмасин. Уларнинг яхшироғи аввал салом берганидир».

Дўстларнинг уч кундан ошиқ аразлаб юришлари мумкин эмаслиги ҳақида яна бошқа ҳадисларда ҳам

қайта-қайта таъкид этилади. Ҳатто Абу Харрош Суламийдан ривоят қилинган ҳадисда ўз биродари билан бир йилгача аразлашиб юрса, тўё унинг қонини тўккан бўлади.

Донодан сўрабдилар: «Дўстларингдан қай бири барчадан кўра сенга кўпроқ ёқади? Қайси бирини чин биродарлик даражасига етган, деб ўйлайсан? Қайси бирига сенинг муҳаббатинг кучлироқ?» Донишманд жавоб бердики: «Айб қилсам яширадиган ва узр сўрасам кечирадигани менга ёқиб тушади...»

Дўстнинг васли кўрар кўзларга роҳат беради. Уларнинг кўзлари бу роҳатдан бенасиб экан. «Емайсан, аммо тўясан, бу дўст меҳридир». Афсусларки, ҳаётда дўст меҳрига оч яшовчилар ҳам учраб туради. Ҳар ким айбсиз дўст қидираверса, дўсти камайиб бораверади, дўстларини ранжитаверса, душманлари кўпаяверади. Ҳар бир гулнинг тикони бўлгани каби, ҳар бир дўстнинг ҳам нуқсони бўлиши табиий. Ўз дўстларининг хатоларини кечирмасликнинг, уларга етказган зарарни унутмасликнинг одам учун нима фойдаси бор? У қандай инсонки, ўз дўстининг тавба ва узрини қабул этмасин ва уни севинч билан қарши олмасин!? Олижаноб ва мард одам оғир кунларда ҳам ўз дўстини ташлаб кетмайди. Ҳар қандай шубҳа ва гумонга асосланиб, ўртоқлик алоқаларини узмайди, бориш-келиш, салом-аликни канда қилмайди.

Араб фозилларидан Асмайи ёзадилар: «Бир киши ни зиёрат қилиб кирдим. У зот кичик бўйра устида ўтирап эдилар. Сурилиб, ёnlаридан жой кўрсатдилар. Мен бу илтифот учун раҳмат айтиб дедимки: «Бўйрангиз тор, мен ҳам ўтирсан сиз роҳатсизланасиз». У зот дедиларки: «Бир-бирига гапи тўғри келмаган икки кишига бутун жаҳон ҳам танглик қиласди. Аммо дўстлар учун бир қарич ер ҳам бемалол етади».

Дўстларни бир-бирларига яқинлаштирадиган нарса, албатта, зиёратдир. Юрилмаган йўллар устини тикан ва буталар қоплагани сингари зиёратдан холи

дүстлик йўллари ҳам беркилиб қолади. Бирор сизга «Дўстимни бир-икки ойдан бери кўрганим йўқ», деса билингки, у муҳаббатли чин дўст эмас экан. Лекин бу соҳада ҳам биз баъзан чегарарадан чиқиб кетамиз ёки меъёрга етказмаймиз. Расууллоҳ «Дўстингни унга малол келадиган даражада эъзоз-икром қилма», деб таъкидлаганлар. «Гулистон»да бу ҳақда шундай баён этилади:

«Абу Хурайра (р.а.) Пайғамбаримизнинг (с.а.в.) хизматларига келур эрди. Ул ҳазрат дедилар: «Эй Абу Хурайра, ҳар кун келмагил, то ўртада муҳаббат зиёда бўлгай ва соҳиби диллар дебдурларким, агарчи офтобнинг мунча ҳусн ва хўблиги бордир, аммо ҳеч киши ани дўст тутмолусидур, онинг учунким, ҳар кунда кўрунодур ва лекин қишдаким аксари вақт маҳжубдур, бу жиҳатдин ҳаммага маҳбубдур».

Байт:

*Дўстни кўрмакка бормоқ айб эмас,  
Лек безор ўлгудек кўб бормогил.  
Қил муҳаббатни фузун кам-кам бориб,  
Беҳуда ортуқсан, ранжи ахтармагил.*

Одамлар бир-бирларига муҳтождирлар. Ўзаро муносабат пайдо қиласалар, ишлари нотамом қолади. Одамларга аралашмасдан ёлғизликни севиш, жамиятдан қочиб юриш ақдга мувофиқ иш эмас. Ёлғизликни севишни ножоиз дедик. Аммо ҳаётда яна бир ҳақиқат бор – нодон дўстдан кўра ёлғизлик яхшироқ. Нодон одам дўст бўла туриб шундайин кунларни бoshингга соладики, кейин душманларинг чангалидан мутлақо қутулиб чиқа олмайсан. Биз дўстни нодон деймиз, ҳолбуки, сўраб-суриштирмай ҳар қандай одам билан дўстлашиб унга кўнглидаги борини очиб ташлайдиган одамнинг ўзи нодон эмасми? Низомий ҳазратлари ёзганлар:

*Жоннинг душмани ҳам гар бўлса доно,  
Ақлсиз дўстдан у юз карра аъло.*

Тилимизда «сирдош дўст» деган атама бор. Ҳар кишининг юрагини қон қилювчи сири бўлганидек, бу сирни ошкор қилишга арзигуллик дўсти ҳам бўлади. Дўст-ку, сирингизни эшитар, ошкор қилмасликка ваъда ҳам берар, аммо ваъдасига вафо қилишидан кўра хиёнат қилиши аникроқдир. Дўстларни бир-биридан айириб юборадиган сабаб ҳам айнан шундадир. Дўстига сир айтиб сўнг пушаймон бўлганларнинг сони-саноғи йўқ. Ҳолбуки, жаноби Расулуллоҳ (с.а.в.) «Бир одамни жуда яқин олмагинки, у вақти келиб душман бўлиб қолиши мумкин», деб огоҳлантирганлар. Яқин деб билинганд дўст душманга айланмаса ҳам, айтилган сирга хиёнат қилиши кутиласак ҳолдир. Бир шогирд донишманд устозидан сўраган экан:

– Менинг жуда муҳим сирим бор. Шу сиримни дилимда сақлайвериб, юрагим қон бўлиб кетди. Ишончли дўстимга сиримни айтиб, юрагимни бўшатиб олмоқчиман.

Бу гапни эшитиб устоз дедики:

– Сенинг сиринг фақат ўзингагина керак, бошқа одамга сира ҳам керакмас. Модомики, ўз сирингни ўзинг сақлай олмасанг, бошқа киши ўзига мутлақо кераги бўлмаган бу сирни қандай сақлай олади? Агар у сирингни ошкор қилса, бунга таажжуб этишнинг ҳожати бўлмайди.

Табиатда ҳамма нарса ўз хили билан юради. Оққуш қорақушга қўшилмайди. Одамлар гарчи бир хилга ўхшасалар-да, бирининг қалби оққуш, иккинчисиники қорақуш кабидир. Ҳаттоқи учар қушлар ҳам ўз шерикларини ажратишни уддасидан чиқар экан, инсоннинг бунга амал қилмоғи мутлақо шартдир. Шу боис шоир дейдики:

*Бўлмагил ҳар кимга жонинг бирла, йўлдош ўзгадир,  
Айтмагил ҳар кимсага сирингни, сирдош ўзгадир.*

**Масад.** Кичкинагина, тажрибасиз сичқон боласи ҳеч құрқасдан ҳар жойларга кириб-чиқаверарди. Бир куни у хүroz билан мушукка дуч келди. Хүrozнинг қичқириғидан құрқиб кетган сичқонча юрганича уясига қочиб кирди-ю онасига деди:

– Онажон, бугун икки ҳайвонни құрдим. Бириси шундай ақлли, ёқимли ҳайвон эканки, уни қучоқлаб олгим келди. Иккинчиси катта қанотли, ёқимсиз шовқин соладиган гердайған ҳайвон экан. Хушфеъл, ипак-дай майнин жүнли, ҳатто бизниридай думи бор ҳайвон билан дўстлашмоқчиман.

Она боласининг гапини эшитиб дакки берди:

– Болагимнам, ўша гўзал, хушфеъл кўринган ҳайвондан қўрқишинг керак. Қичқирган хўroz бизга егулик ҳозирлайди. У бизга зиён етказмайди. Сенга майнин кўринган ҳайвон эса ўта маккордир. Мушукнинг ичи билан сирти бир хил эмас.

Бу масалда кишилар учун зарур ибрат бор. Кўпгина содда одамлар сезмаганликлари туфайли душманларини дўст деб эъзозлайдилар. Уларнинг ташқи кўриниши – зоҳирига қараб ақлли ва одобли, тоза қалбли деб ҳисоблайдилар.

Хўрозларга ўхшаган бақироқ кишилар ҳам бордир. Аммо улардан жамиятга маккор, буқаламун кимсалар каби зиён етмайди. Айёрлик маккор кимсаларнинг яширин қуролидир. Дўст танлашда киши ўз ҳаётини таҳликаға қўймаслиги керак.

Дўстлар орасидаги муҳаббат занжири қанчалик бақувват бўлмасин, уни уза оладиган куч топилади. Унутмаслик керакки, муҳаббатли, чин дўстларнинг биродарлигини кўролмайдиган ҳасадгўйлар кўп учрайди. Улар шунчаки ҳасад қилиб юра қолишмайди, дўстлик занжирини узишга обдан уринишади, уза олишса, роҳатланишади. Яна бир масалнинг ўрни келди.

**Яна бир масад.** Бир оролда маймунлар салтанати мавжуд эди. Подшоҳи ақлли ва доно эди. Бироқ ум-

рининг баҳори ўтиб, қарилик исканжага ола бошлагач, ўрнини пешанасида саодат нури порлаган ёшга бериб, ўзи денгиз қирғоғидаги ўрмонда ёлғиз яшай бошлади. У бир анжир дарахтига чиқиб, меваларидан тановул қилди. Шу онда бир анжир меваси узилиб, сувга шалоплаб тушди. Бу овоз маймунга ёқиб қолиб, дам-бадам анжир узиб сувга ташлайверди. Шу сувда бир тошбақа сузиг юрган эди. У маймун ташлаган анжирларни тутиб маза қилиб егач: «Маймун буларни атайин мен учун ташлайпти, таниш бўлмагани ҳолда шунчалар меҳрибонлик кўрсатяптики, агар дўстлашиб олсан, муҳаббати бундан-да зиёда бўлар», деб ўйлади-да, қирғоққа чиқиб у билан саломлашди. Шу тарзда дўстлашиб қолдилар. Маймун подшоҳ бўлганини, энди кучдан қолиб шу ерларда ҳасрат билан яшаётганини сўзлаб берди. Тошбақа унга маҳлиё бўлиб қолдики, ҳатто уй-жойига, хотини ҳузурига қайтишни ҳам унутди. Тошбақанинг хотини эрининг узоқ муддат хабарсиз кетганидан хавотирланиб, қўшнисига арз қилди. Қўшниси: «Мен эшитдимки, эринг бир маймун билан дўстлашиб, унга мафтун бўлибди, унинг васлини сенинг ҳижронингдан устун тутиб, сенинг фироқинг оловини унинг висоли суви билан ўчириб юрибди. Энди ғам чекишнинг фойдаси йўқ. Бир тадбир кўриш керакки, токи эринг уйга қайтсин ва у дўстни унутсин», деб маслаҳат берди. Улар ўйлай-ўйлай «маймунни ўлдиришдан бошқа чора йўқ», деган қарорга келишди. Тошбақанинг хотини «офир хастаман», деб эрига хабар жўнатди. Тошбақа маймунга узр айтиб, уйига келиб қарасаки, хотинининг аҳволи оғир. Тошбақа савол сўраса жавоб бермайди. Шунда қўшниси:

– Беморнинг дарди оғир, маймуннинг юрагини пишириб емаса, ўлиши тайин, – деди.

Тошбақа «Маймуннинг юрагини қаердан топсам экан?», деган ташвишда ғамга ботди. Қанча ўйламасин бирон-бир чора топа олмади. Охири дўсти бўлмиш маймун ёдига тушиб, ўзига ўзи деди:

– Агар орамиздаги дўстлик ва садоқатга қарамай унга хиёнат қиласам, бу номардлик ва инсофисизлик бўлади; агар аҳдга вафо қиласман десам, уйимнинг таянчи, ҳаётимнинг безаги, фарзандларимнинг паноҳи бўлган хотинимдан ажралиб қоламан.

Тошбақа анчагина вақт бу ҳақда ўйлаб изтироб чекди, шубҳа ва тараддуд ичида қолиб, ниҳоят хотинининг ишқи ғалаба қилди. Оқибатда у вафодорликдан воз кечиши қарорига келди. Лекин яхши билардики, маймунни бу ерга келтирмагунича мақсадига эриша олмайди. Шу боис у маймуннинг ҳузурига қайтди. Айрилиқ ўтида ёнаётган маймун уни зўр қувонч билан кутиб олиб, оиласининг ҳол-аҳволи, хотинининг сиҳат-саломатлиги билан қизиқди.

– Сенинг фироқинг ўти шундай ёндиридики, уларни кўришдан бирон ҳам лаззат ололмадим, – деди тошбақа. – Ёлғизлигинг эсимга тушганида тинчлигим бузилиб, дунё кўзимга қоронғу бўлиб кетди. Мен сени уйимга олиб кетгани келдим. Марҳамат қилиб, борсанг, фарзандларимни кўриб, хаста хотинимни ташрифинг билан севинтиранг, қавм-қариндошларим, дўст-ошналарим олдида бошим осмонга етарди. Улар тайёрлаб қўйган овқатларини олдингга қўйиб, меҳмондўстлик бурчларини бажарсалар, шу билан менга кўрсатган меҳрининг яраша, оз бўлса-да, жавоб қайтара олганимдан қувонардим.

Бу гапларни эшитган маймуннинг қалбига ҳаяжон оралаб деди:

– Сен дўстлик ва аҳд-вафода мени ўзингдан устун қўйма, чунки орамиздаги дўстлик ипини сен бошлаб мустаҳкамладинг. Энди мен ўз кўнглимнинг хоқониман. Сен билан дўстлашганимдан бери баҳт-саодат ичида яшайпман. Агар бу дўстликнинг роҳатбаҳш шамоли менинг димоғимга аввал етганда эди, бундай тинч, баҳти яшашнинг шундай ширин эканлигини билайдим, фойдаси оз, ғами эса кўп ҳукмдорликдан аллақачонлар воз кечиб юборган бўлардим. Саховат

аҳди назарида дўстлик ғоят бебаҳо нарсадир. Ҳақиқий дўстларнинг бири машриқда, бошқаси мағрибда бўлса ҳам, барibir, бир-бирларини эслаб ва шундан тасалли топиб яшайверадилар. Денгиз сафарига чиқдан одам ўзига ҳамроҳ ахтаради, лекин дўстлари бундай сафарга бормасалар, буни душманлик деб ҳисобламаслик керак. Мехмонга таклиф қиляпсан, майли борай, аммо сувдан сузib ўта олмаслигимни биласанми?

– Хотиринг жам бўлсин, сени ўз орқамда кўтариб, манзилимга олиб бораман. Сен у ерда роҳат ва фароғатда яшайсан, – деди тошбақа.

Хуллас, маймун ўз тақдирини дўстига топширди. Тошбақа уни орқасига миндириб, сувда сузib кетди. Ярим йўлга етганда ўйланиб қолди ва ўз-ўзига деди:

– Олимлар «вафосизлик ва хиёнат, айниқса, эътиборсиз хотинлар учун қилинган хиёнат энг катта гуноҳдир», дейдилар. Улуғларнинг яна бир ҳикмати бор: олтиннинг соғлигини ўтда, ҳайвоннинг қучини оғир юқ ортилганда, инсоннинг тўғрилигини омонатга хиёнат этмаслигида билса бўлади. Ҳар ҳолда донолар хотинларнинг макр-ҳийлаларига алданмасликни аъло кўрадилар.

Тошбақа бир-бирига зид шундай фикрларга банди бўлиб, сув ўртасида тўхтаб қолди. Унинг қалбida қандайдир ғалаён мавжудлигини сезган маймун шубжаланиб, дўстидан сўради:

– Сенга нима бўлди, фикрлар уммони сени ғарқ этяптими ё мени кўтариш сенга оғирлик қиляптими? Сезиб турибман, сени виждон азоби қийнаяпти. Сен шу дамда ўз нафсинг билан курашяпсан.

– Виждоним қийналаётгани рост. Сен бизникига биринчи марта боряпсан. Хотиним касал, уй ивиришиб ётгандир, сени кўнгилдагидек кутиб ололмасам-чи, деб кўнглим ғашланяпти, – деди тошбақа сир бой бермасликка тиришиб.

– Сенинг номусли ва тўғри бўлганлигинг, мени дилдан дўст ҳисоблаб яхши ният билан уйингга олиб бо-

раётганлигингни билиб турибман. Ўтиришимиз қанчалик содда, дастурхон қанчалик фақирона бўлса, сұхбатимиз шунчалик самимий ва ширин бўлади. Сен бу борада ташвиш тортма.

Тошибақага бу далда маъқул келгандай бўлиб, яна бир оз судзи-ю ўй-хаёлга берилиб, яна тўхтади. Бундан маймуннинг шубҳаси ортди ва ўзига-ўзи деди:

– Дўстидан шубҳа қилган одам ўша соат тадбир кўриб, унга нисбатан эҳтиётли муносабатда бўлиши, ўзини сақлаши керак. Агар шубҳалари тўғри чиқса, муқаррар бўлган фалокатдан ўз жонини сақлаб қолган бўлади. Гумони хато бўлиб чиқса, эҳтиёткорлик қилгани учун уни койимайдилар.

Юрак тез-тез ўзгариб тургани учун уни қалб деб атаганлар («Қалб» - араб тилида «айланувчи», «ўзгарувчи» деган маънони англатади). Ҳар дақиқада у нима хаёлга тушади, нияти яхшими ё ёмонми билиб бўлмай қолди.

Маймун хаёлидан шуларни ўтказиб дўстидан «Яна нима бўлди, яна хаёл дарёсига чўқдингми?», деб сўради.

– Нима қилай, хотинимнинг касаллиги, сиҳатининг ёмонлиги хаёлимни паришон қилмоқда.

– Дўстлик ҳурмати учун юрагингдаги ташвишни очиқ айтдинг. Хотинингнинг дардига нима даво экан, табиблар айтишибдими?

– Табиблар шундай дармон белгилашганки уни тошиш мумкин эмас.

– У қандай дармон экан?

– Маймуннинг юраги...

Буни эшитиб маймуннинг қути учиб кетди. Кўз олди қоронғилашди ва ўзига-ўзи деди:

«Мени бу даҳшатли фалокатга судраган нарса бад-нафслик ва очкўзалик бўлди; мени бу қўрқинчли гирдобга шуҳратпарастлик ва ҳарислик солди. Энди эса мени ҳийла ва тадбирдан бошқа ҳеч нарса халос эта олмайди. Агар оролга борсам, ўлишим муқаррар, ўзим-

ни бу ерда сувга ташлаб қочмоқчи бўлсам, чўкиб ке-тишим тайин...»

Маймун шу фикрларни хаёлидан кечириб, дўсти тошбақага деди:

– Олимлар айтубдирларки, халқقا зарур бўлган озуқани яширган шоҳ, биродарларининг баҳтли бўлиши учун керак нарсани бермаган дўст «шоҳ» ва «дўст» деган номларга нолойиқдирлар. Мен хотинингни қанчалик севишингни биламан, унинг соғайиб кетиши учун зарур бўлган дармонни бермаслик, дўстликка хиёнат қилиш демакдир. Менга хотинингнинг дарди маълум, чунки бизнинг маймун хотинларда ҳам бунақа хасталик тез-тез учраб туради. Биз уларга юракларимизни бериб, даволардик. Ўзимиз эса юраксиз ҳам яшаб юраверардик. Агар сен буни соҳилда айтганингда, мен юрагимни ўзим билан бирга олиб чиқар эдим. Қариган вақтимда менга юракнинг сираям кераги йўқ. Қайтага уни кўтариб юриш мен учун ортиқча юк, ортиқча заҳмат. Чунки шу пайтгача юрагимга қўнган ғам-андуҳлар жуда ҳам кўп. Кеча юрагимнинг дарди бир оз камайсин, деб жойидан олиб қўйган эдим.

– Юрагингни нима учун уйда қолдирдинг? – деб сўради тошбақа ажабланиб.

– Маймунларда бир одат бор: яқин дўстларининг уйларига кетаётгандарида меҳмондорчилик яхши ва ширин ўтсин, деб ғам ва алам маскани ҳисобланган юракларини ўзлари билан олиб бормайдилар. Ақлли ва иффатли хотинингнинг хасталигини эшитгач, юрагимни олиб борсам, эзилиб кетади, деб ўйладим. Албатта, сен менинг дўстлигимни синағансан, шунинг учун сўзларимга ишонасан. Лекин сенинг қавму қариндошинг «қалин дўст бўлса ҳам ўзига унча зарур бўлган нарсани бизга беришни истамаяпти», деб бадгумон бўлишлари мумкин. Яхшиси, орқага қайтайликда, юрагимни оловолайлик.

Тошбақага бу таклиф маъқул келиб, орқага қайтди. Қирғоққа етишгач, маймун бир-икки сакраб, дарахт устига чиқиб кетди...

Масалдан олинажак маъно шуки, дўстлик саройини тиклаш осон эмас, тикланган саройни турли оғатлардан сақлаш ундан-да қийинроқ. Оғатлардан бири айнан шу – фитна. Фитна бўронини ҳар томондан кутиш мумкин. Аввал айтганимдек, ўзини дўст деб танитган учинчи одам, фарзандига дўсти томонидан ёмонлик келишидан гумонсираган ота-она ёки масалда баён этилган – хотин. Дўст либосидаги фитначиilar ҳаётда бошқаларга нисбатан кўпроқ учрайди. Уларнинг кўлларида гараз қиличи бордир ва бу қилич аёвсиздир.

Фарзандини дўстидан айирмоқчи бўлган ота-она да гараз йўқ.

**Умидимиз юлдузлари**, сизга аниқ аён-ки, фарзанди танлаган дўст айрим ҳолларда ота-онага ёқмаслиги мумкин. Отa-она бу дўстга баҳо беришда кўпроқ унинг ота-оналари нуфузига эътибор қаратадилар. «Яхши оиласининг фарзанди, демак, у билан, албатта, дўстлашиш керак». Уларнинг ҳукми шу! Бу ҳукм кўпинча алдамчи хулосаларга асослангани учун хато бўлади. Отa-оналар ўзларининг калтабинликлари ва ўжарликлари туфайли фарзандларини яхши дўстлардан ҳам айриб юборадилар. Аввал насиҳат билан, сўнг қатъий талаблар билан, агар булар таъсир этмаса, бирон-бир ифво билан бўлса-да, муддаоларига эришадилар. Фарзандларининг дўстдан айрилиши ота-она учун жиддий масала бўлиб туюлмайди. Фарзандлари бирон тутгача ёки рўмолча йўқотсалар ачинишлари мумкин, аммо дўстни йўқотсалар ачинмайдилар. Бу йўқотиш ўзларининг ҳаракатлари натижаси бўлса «шу боладан узоқлашганига шукр», деб қувонадилар. Катталар шунаقا: қувонадилар. Сизлар эса... аҳволингизга тушуниб турибман.

**Умидимиз юлдузлари**, эҳтимол шу онда отангиз ёки онангизнинг, ҳатто устозингизнинг кўнглида ҳам бирон-бир дўстингизга нисбатан норозилик бордир. Истардимки, улар сизни дўстингиздан ажратиб юбо-

ришга киришишдан аввал ўйлаб кўрсалар: у йигит (ёки қиз) сизга дўст бўлишга нолойиқ экан. Хўш, ўзларининг фарзанду аржумандлари (яъни сиз) бошқаларга дўст бўлишга лойикми? Отангиз ёки онангиз сизни дўстингиздан узоқлаштириш чораларини ўйлаб ўтирганларида қайсиdir ҳонадан соҳиблари сизни ноқобил дўст ҳисоблаб, ўз фарзандларидан нари қилишни ўйлашаётгандир? Ота-она икки ёш дўстни ажратишдан аввал яна ўйласин: фарзанди бундан кейин яна шундай дўст топа олармикин? Эҳтимол, ёмон деб тамға босаётган дўст даражасидаги бошқа одамга умр бўйи муҳтоҷ бўлиб яшар? Албатта, ота-она фарзандларининг дўст ташлашларига эътиборсиз қарамаслиги керак. Ёшларнинг бу борада тажрибасиз эканини унтишга ҳақлари йўқ. Аммо ёш ўртасида йигирма-уттиз йиллик фарқ борлигини ҳам унутмасин. Замонлар ўзгарувчан эканини ҳам ҳисобдан чиқарилмасин. «Менинг ёшлигимда дўстим шундай эди», деган гаплар бугунга тўғри келмай қолиши табиийдир.

**Умидимиз юлдузлари**, ота-онангизнинг ёки устозингизнинг талаблари ҳаддан ошиб кетса ҳам, улардан ранжиманг, уларнинг бу борадаги ташвишларини тушунишга ҳаракат қилинг. Атрофингизда ақдли, одоблилар билан бирга ёмонлар ҳам кўп. Ҳаёт тажрибаси етарли бўлмагани учун сиз уларни ажратишда янгилишиб қолишингиз эҳтимоли бор. Сизга яхши бўлиб кўринган йигит ёки қиз гиёҳванд ёки ўфри бўлиши, жиноят ёки бузуклик олами билан боғланган бўлиши мумкин. Сиз буни билмай яқинлашасиз-у, кейин пушаймон бўласиз. Катталар сизни шу пушаймонликдан асраш мақсадида ҳамиша кузатадилар, талабни кундан кунга ошираверадилар. Бу ҳаракатларини уларнинг айби, камчилиги эмас, бурчи ва масъулияти деб қабул қилишимиз керак. Фақат... баъзан керагидан ошириб юборсалар, қаттиқ ранжиманг. Орадан йиллар ўтиб, ўзингиз ота ва она бўлганингизда уларнинг хавотирини англаб етасиз. Бугун эса... дўст ма-

саласида ота-онангиздан танбек әшитавериб, охири: «У ўртогимни ёмон дедингиз, бунисини ялпоқ дедингиз, қанақа одам билан дўст бўлайин?», деб сўраб қолсангиз, жавоб олармикинсиз? Эҳтимол, ота-онангиз донишмандлар китобларидан хабардор бўлсалар, сизга бундай жавоб берарлар:

– Ким дўстларига нисбатан макру ҳийла билан иш тутса, дўстлари унга нисбатан ёлғонни «туҳфа» қиласидилар. Душман билан яқинлашган кишидан унинг дўстлари қочадилар. Сўрасаларки: «Номуносиб дўстдан қандай қутулмоқ мумкин?» Жавоб будирки: «Зиёратига бормаслик ва бирон нарса сўрамаслик билан». Сўрасаларки: «Жондин ҳам ширинроқ нарса надир?» Жавоб будирки: «Бегараз дўст сұхбати». Сўрасаларки: «Кимлар билан дўстлашмоқ мумкин?» Жавоб бундайдир:

«1.Қаноатли кишилар. 2.Ўз сўзидан қайтмайдиганлар. 3.Олим ва ҳунар соҳибларини қадрлайдиганлар. 4.Хиёнат ва номардликдан нафрат этадиганлар. 5.Яхши хулқли назокатли кишилар. 6.Фазаб вақтида ўзини қўлга оладиганлар. 7.Сахийлар. 8.Бадахлоқ одамларнинг айшу ишрат мажлисларидан нафратланувчилар билан дўст бўлувчиларнинг йўли саодат йўлидир».

Сўрасаларки: «Кимлар билан дўстлашиб бўлмайди?» Жавоб бундайдир:

«Ақлдан маҳрум бўлганларнинг маслаҳатларига амал қилувчилар; ўз сўзида турмайдиганлар, сўзидан тонувчи ва ёлғончилар; буюк ишлардан сабри тез тугайдиганлар ва кам ҳафсалалилар; нонкўрлар; ёшининг катталигига қарамай одоб қонун-қоидаларига амал қилмайдиганлар; осонликча хиёнат йўлига тушиб кетадиганлар; пулни ҳаётдан афзал кўрувчи очкўзлар; пасткаш ва майшатпарастлар; ҳаёсизлар; одамлардан сабабсиз шубҳаланиб, уларни асоссиз гуноҳкор қилувчилар; ўзининг заиф эканини била туриб, узоқ сафарга чиқиши қасд қилганлар; ўз муаллимини ва боши

лигини танимаган худписандлар билан дўст тутинган кимсанинг йўли оқибат хорлик йўлидир».

Яна дейликки:

«Сенинг ранж-аламингни баробар тортадиган, шодлигингга шодланадиган дўстни изласанг, бундай дўст ноёбdir. Сенга ўзини дўст қилиб кўрсатадиган тасодифий дўстлар эса жуда кўп».

Сўрасаларки: «Агар ҳақиқий дўст топиш менга мусассар бўлса, у билан қандай муомала қилишим керак?» Жавоб бундайдир:

«Ҳақиқий дўст топсанг, унга содик бўл, хиёнат қилма. Ҳамма вақт дўст тутмоқни одат қилгил. Зероқи, ҳар кишининг дўсти кўп бўлса, айблари шунча сир тутилур ва фазилати кўпаюр. Ҳар кишики дўстларини ёд қилмаса, дўстлари ҳам уни ёд қилмаслар ва оқибат бу киши дўстсиз қолғусидир. Кўнглингдаги дўстлик муҳаббатини сўзинг ва ишинг билан кўрсат, дўстинг сирин ошкор қилишдан сақлан, унинг ёнида бошқаларни гийбат қилма. Дўстинг муҳтоҷликда қолса, дарҳол унга ёрдам бер. Унда бирор айб содир бўлса, **холи жойда (!)** айбини айтиб, юмшоқлик билан насиҳат қил. Агар дўстинг сенинг айбингни айтиб, насиҳат қилса, ундан миннатдор бўл. Ҳар дўстким, сендан ҳеч сабабсиз гинали бўлса, унинг дўстлигидан тама қилмагилки, жаҳонда ундан айблироқ ва ундан ёмонроғи бўлмагай. Билгилким, жаҳонда айбсиз одам бўлмас, аммо сен салоҳиятли, муруватли бўл, чунки бундайларнинг айби кам бўлурлиги аён. Агар дўстингнинг кўнгли ҳеч гуноҳсиз сендин қолса, уни қайтаришга машғул бўлмагил, бундай тамагир ва кекчи дўстдан узоқроқ бўлганинг маъқулроқ. Бундайларнинг дўстлиги ҳақиқий саналмайди, балки тама учун бўлади. Ҳасадли кишилар билан яқинлашишдан ҳам парҳез қил, чунки ҳасадли киши дўстликка сира ҳам лойик эмас, чунки ҳосиднинг ҳасади ҳаргиз кетмас ва сендан гина қилишни сира канда қилмас. Муруватсиз, фазилатсиз кишини ҳам дўст тутмагилким, бундай

кишининг хосияти бўлмас, уларни мол-дунё дўстлари сафида кўр, улар ор ва номус дўстлари қаторидан жой ололмаслар. Дўстингга ёлгон сўзлама. Унинг душмани билан дўстлашма. Дўстинг бошига бирор мушкул иш тушса, қайгули ҳодиса юз берса, уни шу мусибатдан қутқазишга жону дилинг билан кириш, дўстингнинг ота-она ва оила аъзоларига меҳрибон ва шафқатли бўл. Ҳар вақт янги дўст топсанг, эски дўстларни тарк этма ва воз кечма. Дўстинг ҳамиша кўп бўлаверсин, чунки яхши дўст киши учун бебаҳо хазинадир, деганлар. Одамлар билан дўстлигинг ўртача бўлгани маъқул. Дўстим кўп деб барчасига умид билан кўнгил боғлай-вермагин, орқа-олдингга қарагин. Дўстларингнинг эътиқодларидан ғофил бўлмагин. Уларни фароғатли ва ташвишли кунларингда имтиҳон қилгин. Агар ўзинг қашшоқ бўлсанг, бой дўст талаб қилмагин, чунки қашшоқни дўст тутувчilar кам бўлади. Абу Ҳамза Бағдодий дебдуруларким: «Фақирларни дўст тутиш оғир, унга сиддиқлардан бошқалар чидай олмайдилар». Ҳаётда кўп учратамизки, молдорлар қашшоқларни хуш кўрмаслар. Шу боис киши ўзига teng дўст ахтаргани маъқул. Аммо киши молдор – бой бўлса-ю қашшоқдан дўсти бўлса бу унинг аъло фазилатидир. Билмоқ жоизким, дўст уч хил бўлади:

- 1) дўст;
- 2) дўстнинг дўсти;
- 3) душманингнинг душмани.

Душман ҳам уч хил:

- 1) душман;
- 2) дўстингнинг душмани;

3) душманингнинг дўсти. Энди билгилки, дўстларнинг дўстлари ҳам сенинг дўстларингдир. Эҳтимолки, унинг ўша одамга дўстлиги сенинг дўстлигингдан аълороқдир. Агар дўстинг сенинг душманингни севса, бундай дўстдан эҳтиёт бўл. Чунки бундай дўст душман тарафидан сенга ёмонлик қилишдан ҳам андиша қилмайди. Сенинг дўстингга душман бўлган дўстдан

ҳам пархез қилганинг яхши. Ҳар дўстки, сенинг душманингни душман тутмас, уни дўст демагил.

Яна сўрасаларки: «Тасодифий дўстлар билан қандай муносабатда бўлиш лозим?» Жавоб бундайдир:

«Тасодифий, юзаки дўстларга ҳам қўлингдан келганича яхшилик қил. Лекин сиру асрорингдан хабардор этма, улар ёнида ҳар хил сўзлар сўзлашдан тилингни тий. Уларни юзаки муомала билан қувонтириб, кўнгилларини ўз тарафингга мойил қил. Улардан бири кўринмай қолса, бошқа шундай ошна-оғайнилардан унинг аҳволини сўра, бироқ мол-ашёларингни уларга айтма, ўз аҳволингни яширин тут. Сенга ярим дўст бўльувчилар ҳам учрайди. Улар билан ҳам соз муносабатда бўл, улар сендан яхшиликлар кўравергач, якдил дўст бўлишлари мумкин.

Искандардан сўрабдиларким: «Оз сармоя билан бунча кўп мулкни қандай қўлга киритдингиз?» Искандар дебдики: «Раҳмдиллик билан душманларимни қўлга олдим, аҳдга вафо билан дўстларимни йўлга солдим». Яхши ва ёмон одамни бир-биридан кўнгил кўзи или ажратади олгил. Уларнинг икковига ҳам дўстлик қилгил. Яхшиларга қўнгил билан, ёмонларга тил билан дўстлик қилгилким, токи икки тоифанинг ҳам дўстлиги сенга нисбатан пайдо бўлсин. Чунки кишининг ҳожати бир дўст билангина раво бўлмас. Бир вақт бўлурким, кишининг ҳожати зарурат юзасидан ёмонларга ҳам тушиши мумкин. Демак, ҳар икки тоифанинг дўстлигига эътибор қил. Нохуш хабарни чин бўлса ҳам, дўстингга етказма. Қўявер, ўша чин хабарни душман етказсан ва сен сабр қил. У айб можаросини душман қиласерсан. Чунки адоварат қилмоқдик – душман ҳунаридир.

– Ақдиз одамлар билан ҳаргиз дўст бўлмагил. Ақдиз дўст ақлли душмандан ёмонроқдир. Чунки ақдиз дўст шундоқ ишлар қилурки, ақлли душман уни қила олмас. Мурувватли, илмли ва вафоли кишилар билан дўст бўлсанг, уларнинг фазилатлари туфайли

сенинг ҳам шухратинг ортгай. Бемуруват, меҳр-шафқатсиз, илму ҳұнарсиз кишилар билан бирга бұлғандан күра танқолик афзадроқдир. Дүстга лойик одамни икки нарсадан билса бўлур. Бири – дўстининг ҳоли танг бўлиб қолса ёки қашшоқликка юз тутса ундан юз ўтирамайди, балки молини ундан дариғ тутмайди. Яна бири – дўсти вафот этганидан сўнг ҳам дўстининг фарзандлари, қариндошларини ва дўстларини зиёрат қилиб тургай. Уларга яхшилик қилгай. Дўстининг мозорига бориб зиёрат қилгай, ҳасрат чекиб дуолар қилгай.

Талаб қилинаётган дўстга хос фазилатларнинг барчасини бир сўз билан «виждон» деб атасак адашмаймиз. Яъни виждонли кишидагина шу фазилатлар жам бўлади. Демоқчиманки, дўстни виждонлилар сафидан қидиринг. Виждонизлар сафида фақат душманни учратасиз.

Бу мавзудаги сұхбатимиз поёнида сиз – азиз умидимиз юлдузларига атрофингизда ҳамиша садоқатли дўстлар бўлиш баҳтини тилайман.

### **Ватан туйгуси**

Ватанга муҳаббат ҳаётдаги биринчи даражали вазифа сифатида тилга олинади. Бу муҳокама талаб этмайдиган ҳақиқат. Лекин ота-онаси, қариндошлари, дўстларига муҳаббати бўлмаган одамдан Ватанга муҳаббат фазилатини кутиш қийин. Шу боис мазкур мавзуни бу навбатда ўрганамиз.

Бир донишманд айтган экан: «Ватан бир боғдир, Ватаннинг содиқ фарзандлари бу боғни ўз юрак қонлари или сугормаклари даркордир...»

Ватан боғини юрак қони или сугормаклик мажозий маънода айтилган. Ўзини Ватан фарзанди деб ҳисобловчи одам бутун тану жони билан бу боғни яшнатиш учун хизмат қилиши керак, дейилмоқчи. Баҳорий озодликка аямажкуз хуруж қилгудай бўлса, том

маънодаги юрак қонини тўқмаклик билан ҳам ҳимоя этмоқ зарурати туғилади. Табиат баҳорининг қонунияти барча жойда бир бўлгани каби, Ватан бофини эҳтиётлаш, яшнатиш мажбурияти ҳам барча мамлакатларга хосдир. Яъниким, немислар Олмон диёрини, можорлар Можористонни, инглизлар Англияни қандай авайлаласалар, биз – ўзбеклар Ўзбекистонимизни ўшалар каби, балки улардан-да юксакроқ мартабада севмоқлигимиз фарздир. Биз бутун тараққиёт бобида айрим мамлакатлардан ортда эканимиз айб эмас, бу ўтмиш жамиятнинг қолоқлиги таъсиридандир. Аммо Ватанга бўлган муҳаббат бобида ортда қолмоқлигимиз мутлақо мумкин эмас.

«Ватан» атамасига улуғлар, донолар турли сифатлар беришган. Улардан аълороқ тарзда сифатламоқни даъво қилмаганим ҳолда онгим қулочи етар даражада фикр билдиримоққа ҳаракат қилиб кўраман. «Ватан – одамнинг киндик қони тўкилган ердир», деган таърифга эътиroz билдиримасам-да, айтмоқчиманки, бу шартли бир тушунчадир. Агар туғилган жой тўла маънода Ватан бўлганида эди, Ўзбекистон тупроғида туғилиб ўсган немислар, юнонлар, яхудийлар, Қрим татарлари ва яна бошқа миллатларнинг вакиллари отабоболари юртига кўчишмас эди. Хорижда туғилган ўзбеклар эса «Ватан!» дея Ўзбекистонга интилмас эдилар. Демак, Ватан, энг аввало, ота-боболарнинг покиза хоклари ила шарафланган жойдир. «Ватан остодан бошланади», деган таърифга ҳам бир оз таҳрир киритмоққа эҳтиёж сезамиз: Ватан ҳар бир кишининг ўз қалбидан, виждонидан бошланади. Яъни, ҳар кишининг қалбидаги Ватаннинг жажжи қиёфаси яшайди. Ватан – биз нафас олаётган ҳаводир. Ватаннинг бир зарраси эканини англамоқ киши учун ифтихор ва шарафдир. Ватанга муҳаббатни жамлай олган юрак фақат Одам боласига хосдир.

Юрак, ўпка, жигар... барча жонзорларда мавжуд. Ҳатто кўзларимизга аранг илинадиган чумоли, чивин-

да ҳам юрак бордир. Бироқ ота ва онага муҳаббатлари чеклангандир – вақти келиб, ота-оналарини унудилар. Батан муҳаббати ҳам чеклангандир, туйфу эмас, илмда «шартли рефлекс» деб аталувчи одатдир. Жонзотлардаги «Ватан» тушунчаси ўз уяларини ҳимоя қилиш билангина чекланади. Даф қилаётган кучдан ожиз бўлсалар, бошқа уяга кўчиб яшайверадилар.

Ота-онага, Ватангага бўлган муҳаббат фазилати фақатгина Одам болаларига берилган. Шундай экан, Ватан қадрига етмасликни берилган неъматларга нoshукрлик, беписандлик, деб баҳоламоқ ҳам мумкин.

Ватан равнақи – қудратли иқтисодий кучга айланнишdir. Айни чорда инсоннинг руҳият, маънавият жиҳатдан қудратли қаълаға айланмоғидир. Ватан юксалишини ўйламак – бир пайтлар қўлдан кетган ҳуррият ва номусни ўз ўрнига келтиришга ҳаракат этмоқлиkdir. Энди ўйлаб кўрайлиқ: ҳуррият ва номусни нима йўқотади? Ноаҳиллик. Энди уни нима ўз ўрнига тиклай олади? **Аҳидлик, яқдидлик!** Боболаримизнинг шарафли кунларини, одилона давларини нима тирилтиради? Иттифоқлик!

Бу иттифоқликнинг бир кушандаси бор. Уни «маҳаллийчилик» дейдилар. Маҳаллийчилик миллат равнақини бўғиб турувчи бўғма илондир. Ўз ҳамشاҳри ёки ҳамқишлоғини бошқалардан аъло кўриб, атрофига тўпловчи инсонни нодонликда айбласак адашмаймиз. Маҳаллийчиликнинг зарари миллатчиликдан кўпроқдир.

Бир гуруҳ одам қасида айтмоқ билан овора бўлса, яна бир гуруҳ «қани, нима бўларкин?» деб пайт пойласа-ю бошқалар эса зўр бериб ишлагани билан тараққиётга яқин йўланмайди. Бу ҳол машҳур масалдаги аравани уч ёнга тортаётган нодон жониворларни эслатади. Тараққий топмоқликнинг шарти – бир тан, бир жон бўлиб ишламоқлик.

**Ривоят.** Подшоҳ оқ мармардан ажиб ҳовуз бунёд этибди-ю «Аҳли фуқаронинг ҳар бири эрта тонгда бир

косадан сут келтириб ҳовузга тўксин» деб амр қилибди. Фармонни эшигтан бир киши «шунча минг одам орасида битта мен сут ўрнига сув олиб бориб тўксам, ким билиб ўтирибди», деган қарорда сув кўтариб борибди-ю ҳайратга тушибди: ажабки, шаҳардаги бошқа одамлар ҳам айнан шу фикр, шу аҳд билан сув келтирган эканлар.

Ривоятдан ибрат шуки, Ватан билан ўзни бир бутунликда деб ҳис этган, виждони покиза одамда Ватан фойдаси, тараққиёти учун меҳнат қилиш иштиёқидан бошқа нарса бўлмаслиги керак. «Йилларнинг йиғини умр саналмас, Ватанга наф теккан кунинг умрдир», деган мақол бекорга айтилмаган. Донолар Ватан юксалиши йўлидаги хизмати билан шуҳрат то пишини «иккинчи умр», деганлар. Киши ўзини Ватанга қанчалар яқин ҳис этса, уни шу қадар жонли вужуд каби аникроқ ва севиброқ тасаввур қиласди.

Ватан тараққиёти ҳавоий тушунча эмас, балки аниқ бир ҳаракатдир, бу ҳаракатнинг асоси ҳар бир одамнинг ташаббусидан бошланади. Сиз – умидимиз юлдузларининг мактабда битта ҳарф ўрганишингиз ҳам, қурувчининг янги иморатга қўйган битта гишти ҳам, олимнинг илмдаги оламшумул қашфиёти ҳам ана шу ташаббуснинг меваларидир. Эрталаб Ватандан бир нима олиб, шомда ўша битта миқдорда қайтарсак – ютқизамиз, бунда тараққиёт бўлмайди, аксинча, тушкунликка юз тутилади. Демак, олган нарсамизни бир икки эмас, ўн, балки ундан-да кўп ҳисса қилиб қайтаришга интилмоғимиз шарт экан. Биз Ватандан ниманидир талаб қиласмиз, оламиз ҳам. Аммо буни юз ҳисса, балки ундан-да кўп қилиб қайтармоқдикни ўйламас эканмиз, бу бизнинг ақдимиз заифлигига, диёнатимиз ожизлигига далолат бўлади. Ватандан олганимиз – қарзdir, қарзни эса қайтармоқдик фарзdir.

Мамлакат тараққий йўлини белгиловчи омиллар кўп. Шулардан бири ва энг муҳими – Ватан мустақиллигига, шукрларким, эгамиз. Аҳамияти ва эътибори

жихатидан иккинчи ўринда турувчи омил – аҳиллик ва иттифоқликни зикр этдик. Учинчиси – маориф, илм олмоқликдир. Маърифатпарвар устоз Исмоил Фаспирали: «Ватанни севмоқ, менингча, унинг маорифи учун қайғурмоқ, унга ёрдам этмоқдир», деганлар. Маърифатпарварлар фақат Ватан равнақинигина эмас, балки ўша дамдаги энг муҳим вазифа – истиқдолга эришмоқлик йўлини ҳам айнан шу маорифда кўрганлар. Илмсиз, жаҳолат ботқоғидаги миллатни озодлик курашига жалб этиб бўлмаслигини англағанлар. «Ўқишидан тўхтаган одам – фикрлашдан тўхтайди», дейдилар. Шундай экан, фикрламайдиган одамдан Ватанга қандай наф тегиши мумкин?

«Зиёли ўлмак гоят мушкул бир нарсадир, – деб ёзган эдилар Мунаввар қори. – Зиёли миллат, Ватан нима эдигини билур ва зиёли миллат учун жонини, молини фидо этар ва миллатнинг тараққийси учун доимо ҳаракат этар. Вақти келганда, миллат учун ўзини ҳалокат вартасина ташламакга муҳайё бўлур. Сизнинг билмагингиз лозимдирки, бизнинг миллатимизга садо ва сўз бирлан зиёли номини олгон инсонлар лозим эмас. Балки, хизмати, ҳаракати, ёрдами ва ҳиммати бирлан зиёли номини олгон инсонлар лозимдир. Йўқ эрса, «миллат», «Ватан», «маданият» – шунга ўхшаш сўзларни билмак билан инсон зиёли бўлмайдир...»

Илм олмоқ – ҳар бир муслим ва муслималарга фарз этилганини биласиз. Бизнинг миллатимиз шу фарздан чекинган даврлардан бошлаб таназзулга юз тутганини афсус билан бўлса-да, ёдда тутмоғимиз шарт. Аниқки, мусулмон мамлакатлар илм-фанга эътиборсизликлари туфайли тобора ҳолсизланиб бордилар. Бу масалага эътиборни кучайтирган Европа қудрати эса ошиб борди. Айниқса, XIX – XX аср уларнинг доруломон даврлари сифатида тарихга муҳрланди.

Менинг бир танишим бор, уни ўттиз йилнинг нариберисида биламан. Шу вақт мобайннида бирон марта

бұлсın, унинг эгнида хорижда ишлаб чиқарылған ки-  
йимни күрмаганман. Сифатсызроқ бұлса ҳам, фақат  
ўзимизникини олиб кияди ва буни ватанпарварлик-  
нинг кичик бир зарраси деб билади. Саноатимиз юк-  
салиш палласига кирган айни дамларда шундай зар-  
ралар ҳам зарурмикин, дейман.

Хорижда истиқомат қылувчи ватандошимиз бир  
ибратли воқеани айтиб берган эди: Берндаги ресто-  
ранда немис ва яхудий дүстлари билан ўтиришган  
экан. Газета сотиб юрган йигитча яқинлашганида,  
яхудий уни чақириб, Истроилда чиқадиган газетани  
сотиб олибди. «Сен ибрит тилини билмайсан-ку, газе-  
тани нега сотиб олдинг?» деб ажабланибди немис. «Ҳа,  
афсуски, она тилимни билмайман, бу менинг уятли то-  
моним. Лекин бу газета она Ватанимда чиқади. Уни  
сотиб олиш билан у ердаги биродарларимга ёрдам бер-  
ган бұламан», дебди яхудий. Бу ҳам Ватанга хизмат  
қишишнинг ўзига хос бир зарраси.

Үттиз йилча муқаддам Рига шаҳрида бұлганимда  
ҳақиқий Ватан түйгуси қандайлигига гувоҳ бұлган  
эдим. У дамларда худди биз каби «совет социалистик  
республикаси» бұлган Латвияда бир қонун бор экан:  
айрим саноат моллари фақат шу республика фуқаро-  
ларига сотилар экан. Бунинг учун харидор паспорти-  
ни күрсатиши шарт экан. Бир ригаликдан болалар  
күйлагидан олиб беришни илтимос қылган эдим, у мен-  
га норози қиёфада қараб: «Мен Ватанимни сотмай-  
ман», деди. Бу аввалига майда гапдай туулган эди  
менга. Кейин ўйласам, ҳар қандай хиёнат мана шу-  
нақа «майда гаплар»дан бошланар экан. Кейинчалик  
бизда ҳам шунга ўхшаш тартиб белгиланди. Махсус  
талон жорий қилинди. Талон маошга құшиб берилар  
эди. Бу талонсиз ҳеч нима сотиб олиш мумкин эмас-  
ди. Яъни четдан келган киши бизнинг республика то-  
беларига аталған молдан ололмасдилар. Лекин... кат-  
та дўконлар атрофида шу талонларни сотувчилар пай-  
до бўлишди. Бу ҳақда кўп ўйлайман: улар фақат ти-

рикчилик важхидан шу ишни қилишдимикин? Вақти келса, Ватанни шу тоифадаги одамлар сотмасмекинлар?

Баъзан божхона хабарларини эшишиб, кўриб ҳайратга тушаман. Ўзбекистонликларнинг ўзларига зарур бўлган маҳсулотларни қўшни республикаларга олиб ўтишга уринишади. Ёки у ёқлардаги арzon-гаров сифатсиз маҳсулотларни олиб келиб бизларга қиммат баҳоларда сотишади. Ёки қадимий ёдгорликларимизни четга пуллашади.

**Нафс ғолиб юракда Ватан туйгуси бўлмайди.** Маънавий дунёмизни бузишга хизмат қилувчи нарсаларни хориждан олиб келиб сотиш ҳам шунинг айнан ўзи. Бундайларда жонни фидо қилиш деган юксак туйгуни кўя турайлик, оддийгина «Ватанга меҳр» деган тушунча бормикин? Виктор Гюгонинг «Ватанга доғ тушириш – уни сотиш демак», деган гапи нақадар тўғри! Шоир тили билан айтганда: «Кимда ўз юртига бўлмаса меҳр, у қалбан шикаста, у қалбан мажруҳ».

Жомий ҳазратларидан бир ибрат: қишлоқ этаги туашган тоғда бир гала каклик тонгдан бери чуурлашибади. Улар учун кенглиқ, тоза ҳаво, эркинлик ҳаркуни байрам эди. Қуёш кўтарилиши билан қишлоқдаги хўролар ҳам бошпаналаридан чиқиб, ахлатхоналарни титиб, фурур билан қичқириб қўярдилар. Бу ҳолни кўрган бир каклик қаҳ-қаҳ уриб кулди ва гердайганича ахлат титаётган хўрозга деди:

– Эй кеккайган аҳмоқ! Бир ҳовуч дон учун одамларга асир бўлиб ўтирибсан-а! Шу ахлатхонани ўзингга жаннат деб биласан. Ахлатхонадан қутулсанг-чи!

Шарқнинг улуғларидан ҳисобланган Жомий ҳазратлари бу масални баён қилиб демокиларки:

– Э инсон! Бу дунёда ўзинг учун энг азиз бўлган озодлигинги бир ҳовуч емишга сотма. Доим озод яша ва озодликни сев! Сен озод қилиб яратилгансан. Бир ҳовуч емишга алданиб, азиз ҳақингни сотма!

Илмдан йироқлашиш – жаҳолат, мамлакат тарақ-қиётининг биринчи душмани бўлса, иккинчи душмани ана шу нафс, бойишга ва фақат бойишгагина интилишдир. «Ватан манфаати» ва «нафс» деган тушунчалар бир-бiri билан келиша олмайди. Нафс ғолиб ерда хиёнат эшиклари очилади. Ингичка игна ҳам, йўғон мих ҳам кўзга кирса кўр қилиши мумкин бўлгани каби, Ватан манфаатининг бир заррасини сотиш ҳам хиёнатдир. Шу ўринда қўполроқ бўлса-да, «Ватан равнақини ўйламайдиган инсон озод мамлакатда яшашга ҳақлими?» деб сўрашга тўғри келади.

Темирми ё бирон маъданми етишмаса, бошқа ерлардан олиб келиш мумкин. Лекин қашшоқ юракда Ватанга муҳаббат, фидойилик ҳисси бўлмаса, бу туйгуларни ўзга юртлардан келтириб жойлаб бўлмайди. Шу боис ҳам ҳар биримиз қалбимизни тарбия этмоғимиз шарт ва демогимиз керакки: «Ватан, биз сени севувчи фарзандлармиз, бизгина кўтаргумиз ҳар не дардинг бор!»

**Ривоят.** Яқинда бир дўстимизнига бордик. Ҳовлисига ертўладан қазилган тупроқни уюб қўйган экан. Ҳамроҳимиз, Швецарияда яшайдиган ватандошимиз доктор Усмон Жондонга қараб ҳазиллашдим:

– Усмон ака, бунинг тозалигини қаранг, бунақа созтупроқ Швецарияда бўлмайди.

Шунда доктор Усмон тупроқ уюмiga бир оз қараб турдилар-да, кейин жавоб бердилар:

– Сиз ҳазил оҳангига галирдингиз, мен жиддий жавоб беражакман. Сиз дедингизки: «Бунақаси Швецарияда йўқ». Мен дейманки: «Бу тупроқ дунёning ҳеч ерида йўқ. Чунки бу Ватан тупроғи. Биз мустақиллик кунига етишмай туриб Ватанга келиш баҳтидан бебаҳра эдик ва унинг бир кафт тупроғига зор эдик. Ким илож қилиб Ватанга бориш баҳтига эришса, биз ундан қимматбаҳо совға-салом олиб қайтишини сўрамасдик, бир ҳовуч тупроқ олиб келишини илтимос

қиласылардик, сүнг бу тупроқни күзларимизга суртардик, ўпардик, түйиб-түйиб ҳидлардик...

Усмон аканинг бу сўзлари барчамизни бир ажиб түйғуга чулғади. «Ватанин севмоқ – иймондандир» шарафли ҳадисини ёдга солди. Ватанга меҳр – иймондан, иймонсиз одам Ватанини сева олмайди. Кўп тилга олинадиган бу ҳадисни ўрганишга ҳаракат қиласак: уламоларимизнинг айрим шарҳларида дейиладики, Одам Ато ва Момо Ҳаввонинг яралмиш жойлари – жаннат. Демак, одамзотнинг асл Ватани – жаннат ва оқибатда унга қайтилгусидир. Яъни, дейилмоқчиким, унга фақат иймон эгалари қайтурлар. Демак, жаннатни севмоқликнинг маъноси бу дунёда тўғри, ҳалол яшаб, унга қайтмоқликнинг тадоригини кўришидир. Яъни, мукаммал иймонга етишмоқликдир. Иймон талаблари эса оз эмас. Шулардан бири Ватанга меҳр-муҳаббат қўйиш.

Агар инсон хур бўлмаса, Ватан ичра беватан ҳисобланади. Ватан эркин ва озод инсонлар билан гўзалдир. Дейидиларки, доно ҳаким машриқдаги бир мамлакатга саёҳат қилибди. Бу мамлакат одамларининг бағри кенг, диллари тоза, ниятлари пок экан. Табиат ҳам бу хокисор одамларнинг феълларига яраша она ерларини ҳосилдору, турли ҳазиналарга бой қилиб яратган экан. Доно ҳаким бу мамлакатни жаннатга қиёслабди-ю, аммо бир жумбоқ бўйича ўйланиб қолибди. Худо бу мамлакатга беҳисоб бойлик берганига қарамай, аҳоли қашшоқ яшар экан. Чунки уларни кўшни мамлакат истило қилиб олган экан. Аҳоли эса «такдиримизга ёзилгани шу экан-да», деб сабр қиласар, озодликка чиқишини ўйламас экан. Доно ҳаким юртига қайтаётганда бу мустамлака ўлка аҳлидан бири «Бизнинг юртимиз қандай экан?» деб сўрабди. «Мен дунё кезиб, сизлардай меҳнаткаш одамларни кўрмадим, – дебди доно ҳаким. Кейин истеҳзо билан қўшиб қўйибди: – Бахтили ҳалқ экансизлар. Сизлар шундай жаннатмаконда яшаб, ҳақ-ҳукуқларингизни ўзгаларга

бериб қўйибсизлир. Сизларнинг бахтингиз шундаки, бахтсиз эканлигингиши билмас экансизлар...»

**Ҳикоят.** Бир куни бўри ҳўкизга деди:

– Ҳой қудратли ҳайвон! Сенга ҳеч тушунолмайман. Нега сен ўзингдан беҳад заиф жонзотга қулсан? Ахир сен одамдан кучлисан-ку?! Нега уларга бўйсунасан? Жуссам кичик бўлгани билан мен одам зотига бўйсунмайман. Ҳар увиллаганимда уларнинг тинчини оламан.

**Ҳўкиз** деди:

– Эй жуссаси кичик ҳайвон! Одам менинг емишимни, ичадиган сувимни беради. Эркалаб, пешонамни силайди. Мен бу яхшиликларини унута олмайман. Шу боис уларнинг хизматини бажараман.

– Эй баҳайбат ҳайвон,-деди яна бўри, – шу катта каллангда менчалик ҳам ақдинг йўқ экан. Уларнинг эркалаб силашлари сени алдамасин. Улар ўз манфатлари учун сени эркалаб силайдилар, сув, ем берадилар. Сен эса пешонангни силаганлари учун бўйинтуруқ остига кирасан. Мен эса ҳеч қачон уларга бўйин бермайман. Эркимни бергандан кўра ўлимни афзал кўраман!

Қиссадан ҳисса шуки, қорин тўқлиги инсонни алдаб қўймаслиги керак. Баъзида бу нарса инсон учун тузоқ бўлади. Қорин тўйиши инсонни бўйинтуруқса солиб, ўзи учун энг қимматли бўлган озодликдан маҳрум этади. Бўйинтуруқдаги инсон ҳам қачондир ўлади, лекин қулликда ўлишдан кўра озодликда ўлмоқлик минг марта афзалдир.

**Яна бир ҳикоят.** Ўтган замонда Андроклес исмли хушхулқ бир асир Рим зодагонининг қўлидан қочиб, ваҳший ҳайвонлар яшайдиган ўрмонга яширинди. Озодликда яшашни истади. Машаққат ва азобларга чидади. Бир кеча яраланган арслоннинг овозидан ўрмон ларзага келди. Андроклес аввалига қўрқиб кетди. Кейин овоз келган томон юрди. Арслонни топиб, ярасини боғлади.

Кунлардан бир кун Адроклесни тутиб олдилар. Бу онда овчилар арслонни тутиб, ҳукмдорга тортиқ қилдилар. У замонда қочоқ асиirlарни оч арслонга ем қилдириш одати бор эди. Андроклесни ҳам шундай ўлимга ҳукм қилдилар. Одамлар бу томошадан завқланиш учун тўпландилар. Андроклес ўртага қўйилиб, оч арслон қафаси очилди. Баҳайбат арслон отилиб чиқди-ю, Андроклесга яқинлашганда шашти пасайиб, унинг оёқларига суйкалди. Бундан оломон ҳайратга тушди. Шунда Андроклес уларга қарата бундай деди:

– Эй инсон қиёфасидаги ваҳшийлар! Мана шу ҳайвонга бир мартагина яхшилик қилган эдим. Яхшилигимни унутмабди. Сизларга йиллар бўйи хизмат қилган бўлсам-да, кичик бир айбим учун мени ўлимга ҳукм қилиб, томошага тўпландинглар. Мен озод яшани истаган эдим, сизлар буни айб деб билдинглар.

Қиссадан ҳисса шуки, киши қанчалик озодликка, ҳурриятга эришса, раҳмдилликка дуч келса, у шу қадар **инсонлигини** ҳис қиласди.

Меҳр тушунчаси ҳам ғоят кенг. Ҳаққа, ота-онага, Ватанга... Буларнинг барчалари ажralmas ҳалқалардир. Бир ҳалқа узилиб йўқ бўлса, қолганлари ҳам йўқ бўлади. Бир дараҳтни тасаввур этайлик: ўқ илдиз, тана ва шоҳлар. Ўқ илдизни ёки шоҳларни кесиб ташлангчи, дараҳт яшармикан? Ўз ота-онаси ёки дўстига меҳри йўқ одам «Ватанни севаман!» деб ҳайқирса ҳам ишонмаслик керак. Ўз ота-онасига меҳрсиз одам бегоналарни ҳурмат қилмайди. Ҳақни севмаган одам Ватанга хиёнат қилишдан уялмайди. Жаҳон ардоқланган машҳур шоир Байроннинг «Ўз юртига меҳри бўлмаган одам бошқа ҳеч нимани сева олмайди», деган гапида беназир ҳикмат мавжуд. Бизга ота-она, қариндошлар... барчалари қимматли ва аржуманд. Шунинг баробарида меҳр-муҳаббат ҳақидаги тасаввуримиз занжири ҳалқалари Ватан тушунчасига мужассамланган. Ватан учун нафи теккудек бўлса, қайси

виждонли одам унинг учун жон бермоқ талаб этилганида иккиланар экан?

Ватанга муҳаббат тушунчасини икки равишда ўрганиш мумкин. Биринчиси – жисмоний тарзда. Яъни: туғилган жой. Аввалроқ айтганимиздай, бу ҳол барча жониворларга хос. Чумолидан тортиб, филгача ўзи туғилган, емиш ейдиган жойини авайлайди, лозим бўлганида жон-жаҳди билан ҳимоя қиласи. Қани, чўп олиб арининг уясини бузишга уриниб кўринг-чи? Иккинчи тушунча – фақат юксак онг эгаси – инсонга хос, руҳий, янада аниқроқ айтсак, маънавий ҳолатдир. Бу ҳолат кўпроқ қалбга, онгга, туйфуга боғлиқ.

Биз Ватанни тинмай мадҳ этишини ватанпарварлик деб ўйлаймиз. Тўғри, мадҳ этмоқ ҳам лозим, аммо бу бир заррадир, холос. Уммонга томизилган биргина томчидир. Донолар айтадиларки: «Ватанпарварлик – но-мусли ва назокатли туйфудир. Муқаддас сўзларни эҳтиёт қил, шамолга совурма. Ватанга муҳаббат хусусида дуч келган ерда оғиз кўпиртирма, яхшиси унинг фаровонлиги ва қудрати йўлида индамайгина меҳнат қил». Баъзи биродарларга ҳайрон қоламан: кундузи бирон минбарга чиқиб олгудай бўлса баландпарвоз гапларни қалаштириб ташлайди, оқшомда эса чойхонага чиқса, ношукурчилик дарвозаларини ланг очиб, майда гапларни кавлаштириб ўтиришдан уялмайди. Донолар таъкидлаган номусли ва назокатли туйфудан бебаҳра бундай кишиларнинг минбардаги гаплари шунинг учун тингловчилар қалбига етиб бормайди, шунинг учун ҳам ҳиссиз ва тузсиз бўлади.

Ватанга меҳр-муҳаббатли бўлиш – фоят чидам, фоят юксак онг талаб этувчи ўзига хос илм ва буни эгаллаш ҳам бешикдан бошлиномоги ва оқибат сўнгги нафасга қадар давом этмоғи лозим. Ватанпарварлик – Ватанини севмоқликинг англатса, бу илмни эгаллаган киши Ватанга жонини атаган комил инсон мартабасига етган бўлади. Файласуф Гегел айтганидай, «Маърифатли халқларнинг ҳақиқий жасорати Ватан йўлида қурбон

бўлишга тайёр эканликларида акс этади». Мана шу нуқтадаги фарққа диққатни жалб этайлик: Ватанни севаман, деб юрувчилар кўп. Аммо ҳамма ҳам Ватанга жонини фидо қилишга тайёр турмайди. Ватанга меҳр ва муҳаббат мавҳум тушунча бўлмай, балки **ҳақиқий маънавий туйғудир**. Яъни, ватанпарварлик – Ватанга меҳр қўйишдангина иборат эмас, балки Ватан билан ўзни бир бутунликда кўришдир. Унинг яхши-ёмон кунларида асқотищдир.

Виз – ҳар биримиз Ватанни севамиз, чунки Ватан – биз нафас олаётган ҳаводир. Дунёда «Ватанни севмак» деган тушунчадан ташқари «Ватан билан гурурланмак, фахрланмак» деган тушунча ҳам мавжуд. Зеро, бу икки тушунча бир-бирисиз яшай олмайди. «Киши ўзининг етти аслини (яъни ўтган етти аждодини) билиши керак», дейишади. Хоссатан шундай. Омматан эса киши ўз Ватанининг тарихи, улуғлари билан яхши таниш бўлиши, кимларнинг вориси эканини билиши керак. Шоир Faфур Fuломнинг 1949 йилда «бизларни «қабила» деб атаган» инглиз лордига жавоб тарзида ёзган ажиб шеъри бор:

*Қадим ўзбек ҳалқисан, асл Одам авлоди,  
Миср эҳромларидан тарихинг қарироқдир.  
Хоразмнинг ҳар гиштида – боболарнинг ижоди,  
Англо-саксонлардан анча юқорироқдир.  
Бизда логарифманинг мушкул муаммолари,  
Қўлдаги бармоқлардай оддий қилингандা ҳал,  
«Олий ирқ» даъвогари, Черчилинг боболари  
Ҳатто санай олмасди ўн бармоқни мукаммал...*

Ўзбекистоннинг фазилатларини бўрттириш шарт эмас. Бу ҳалқ рўйи заминнинг тарихини бойитишга, маънавий оламининг ривожига бекиёс даражада улуғ ҳиссасини қўшиб келган ва бундан сўнг ҳам шундай бўлажак. Оталарнинг бутунги кундаги вазифаларидан бири – улуғларни таниб, улар билан фахрланиш ҳис-

сини фарзандлар қонига сингдирмоқликдир. Шу ўринда яна бир вазифани ҳал қилишимиз керак бўлади: ўтмиш билан фақат фаҳрланибгина қолмай, Ватан равнақи учун улуғлар анъанасини давом эттиришга масъул эканимизни унутмай, шунга яраша ҳаракат қилишимиз шарт. Ўзбекистон, яъни Ватан ҳар биримизсиз кунини кўравериши мумкин. Беш-олти ёки неча юз, ҳатто минг кишисиз ҳам яшайди, келажаги пойдеворини қураверади. Аммо биз – биронтамиз Ўзбекистонсиз яшай олмаймиз. Ким Ватансиз яшаш мумкинлигига ишонса – у аҳмоқдир. У хору зордир. Ўз юргидан юз ўтирганлар, энг аввало, ўз вижданларидан юз ўтирган бўладилар. Ўз юртини севмаган, сева олмаган одам ҳатто ўзини ҳам сева олмайди, оқибатда эса ўзидан ўзи нафратланади. Бу кунларимизда бахтини чет мамлакатлардан излашга иштиёқмандлар кўриниб қоляпти. Хорижга бориб, азобланәётгандар ҳақида эшитиб турибмиз. Лекин чет элга бориб бойиб қайтган кишини ёки ақлу фазли ила дунёга танилган одамни ҳали кўрганимизча йўқ. Ҳазрат Навоий айтганларидай, «Фурбатда гарид шодумон бўлмас эмиш...» Мирзо Бобурнинг қалб яраси гўё ҳали ҳам битмагандай: «Ўз юртни қўйиб Ҳинд сори юзландим, ё Раб, бу не юз қародиқ бўлди...»

**Ривоят.** Қадим замонда бағдодликлардан бири чўлда йўлдан адашди. Оч-наҳор, юпун қолди. Ниҳоят, бир куни узокдан қора жундан тўқилган бир чодир кўринди. Бағдодликнинг юраги севинчдан ҳапқирди. Ҳолдан тойганича чодирга етиб келди. Ундаги аёл ноҷор ўловчини очиқ чеҳра билан қаршилади, ҳордиқ чиқариши учун жой берди.

– Э меҳрибон аёл, жуда чанқадим, сув борми? – деб сўради ўловчи.

Аёл унга бир коса сув берди. Сув илиқ, бунинг устига шўр эди. Мусоғирнинг оғзи куйгандек бўлиб, баттар қийналди. Шу аснода ўз шаҳрини эслади: «Оҳ, Бағдод, оҳ! Қандай диёр экансан, энди қадрингни билдим!»

- Э меҳрибон аёл, сен ҳеч Бағдодни күрганмисан? – деб сўради у.

- Кўрмаганимдан бери ҳаётим шу чўлларда ўтилти. Биз доим шу сувни ичамиз. Эрим овга кетган, чўлдан каламушми, калтакесакми тутиб келтирса, қорнингизни тўйдириб оларсиз, – деди хотин.

Бағдодлик буни эшитди-ю, дили яна фарёд қилди: «Оҳ Бағдод! Қандай муборак шаҳар экансан, билмай юрган эканман мен нодон!» Хаёлидан шу фифон ўтди-ю, ўзини овтиш мақсадида аёлга она шаҳрини мақтайди кетди:

- Э меҳрибон аёл! Бу жойларинг жаҳаннам экан. Бу ерда қандай яшаяпсанлар, ҳайронман! Бағдоднинг ғоят латиф ҳавоси, боғлари, оқар сувлари... анвойи турли неъматлари бор. Бу ерда эса ҳатто майса ҳам ўスマйди. Жаҳаннам каби оловли бир қум дарёси ичидаги турасан. Агар истасангизлар, сизларни Бағдодга олиб кетайин, ўша ерда роҳатланиб яшанглар.

Бир оздан сўнг аёлнинг эри овдан қайтди. Аёл эри келтирган чўл каламуши билан калтакесакни сўйиб, иссиқ тошларнинг устига қўйиб пиширди. Мусофирни ҳам бу таомга таклиф этдилар. Бағдодликнинг кўз ўнгига шаҳрининг гўзал боғлари, қўй гўштидан пиширилган кабоблар, ширин сув гавдаланди, кўзлари алам ёшларига тўлди. Бўғзини куйдирган шўр ва илиқ сувни ичайтганида, ёқимсиз емакларни чайнаётганида «Оҳ Бағдод, оҳ! Қандай гўзал диёр экансан!» деб ичидаги нола чекиб, афсусланаарди.

Эр хотин меҳмонга чодирдан жой қилиб, ўзлари ташқарида ётдилар. Шунда хотин эрига деди:

- Бу мусофир нуқул «Оҳ Бағдод, оҳ!» деб нола чекяпти. Сиз Бағдодни күрганмисиз? У ер жаннатга ўжшар эмиш. Бизни таклиф қиляпти, агар чинданам жаннат бўлса, ўша томонларга кета қолсакмикин?

Бу гапни эшитган эр аччиқданди:

- Э нодон хотин, сен унинг гапларига ишонма. Бизнинг жаннатимиз шу ернинг ўзида. Бу ердаги кўнгил

эрки у ерда йўқ. Бу ерда вужуд жафоси бор, аммо ундан-да аълороқ бўлган ҳуррият ва кўнгил сафоси ҳам бор. Сен ўз аҳволингдан мамнун бўлмагунингча, жаннатга кирсанг ҳам роҳат топа олмайсан.

Қиссадан ҳисса шуки, ўзи яшаётган жойнинг қадр-кимматини тўла англаб етмайдиганлар ҳам бор. Бундайларни тақдир фалокатларга, фожиаларга дуч қилгандагина, яшаган жойларининг қадрини ҳис қила бошлайдилар. Деганларки: «Ўзга юртнинг подшоси бўлгандан кўра ўз юртинг гадоси бўл».

Инсоннинг баҳти тасалли топган еридадир. Кўнгил тасаллисиз қолган пайтда киши саройда турган бўлса ҳам, у таскинга муҳтоҷ бўлади. Шу боис орифлар кўнгил сафосини вужуд жафосидан устун қўядилар. Мавлоно Румий дедиларки: «Қудуқ тубида вужуд жафоси, лекин кўнгил сафоси бор. Халқ орасида вужуд сафоси, лекин кўнгил жафоси бордир».

*Тавоғ қилгин ўйнаб-ўсган ерингни,  
Ўз халқингга тўйкин манглай терингни.  
Ҳар нарсадан мусофирилик ёмондир,  
Ўзга элда дўстга айтма сирингни.*

Бир одам суҳбатда дедики, «Мабодо уруш бўлса-ю, мени аскарликка чақирсалар бормайман. Нега энди мен боришим керак? Мен жангга кетайину, бунда қолганлар айш-ишрат қилиб юраверсиниларми? Мен анойи эмасман, урушга борадиган аҳмоқ йўқ...» Бу гапни бир дўстимга айтган эдим, у дедики: «Бундай фикр бир кишининг қаноати эмас. Бу гап Ватан ва миллатга нисбатан ичida озми-кўпми хиёнат фикри бўлган кишиларнинг оғзидағи сақичдир. Сен буларнинг биттасига дуч келибсан...»

Тилимизда оҳангдош, аммо маъно жиҳатдан зид сўзлар кўп. Шулардан бири – «диёнат», яна бири эса «хиёнат». Қаранг, фарқи биттагина ҳарфда. Масофа жиҳатидан ҳам яқинлиги бор. Диёнатсиз одам ёмон

йўлга бир қадамгина қўйса, хиёнат оламига кириб қолганини ўзи ҳам сезмай қолади.

Ҳазрат Навоий айтмоқчى:

*Барча хиёнатни диёнат этиб,  
Барча диёнатни хиёнат этиб...*

Шунисидан Худо арасин!

Ҳар бир ватандошнинг энг асосли, энг муқаддас вазифаси Ватани севиш ва унга ҳаётининг сўнгги дақиқаларигача хизмат этишдир. Ватанимизга бўлган муҳаббат ва ҳурматимиз ҳеч бир нарса билан ўлчана олмайди. Ватанга муҳаббат тарбиясини оила қучогидан бошлиш лозимдир. Биласизки, кичик болаларда Ватан тасаввури торроқ бўлади. Яъни, улар учун Ватан – она қучогидир. Болалар ўз оилаларини сева-сева Ватани севишни ўрганадилар. Чунки оила муҳити Ватан муҳитининг асосини ташкил этади. Ватан муҳити дастлабки озифини, дастлабки қувватини оила қучогидан олади. Силаи раҳм фазилати камол топган оиладан Ватанга хиёнат қилувчи чиқмайди. Оила аъзолари орасида нақадар қувватли боғланиш ва муҳаббат бўлса, Ватан муҳаббати ҳам шунчалар қувватли ва мустаҳкам бўлади. Ўз оила аъзоларига нисбатан хайрли туйфуга эга бўлмаган, уларга фидокорлик қилишни билмаган бир киши Ватанга ҳам фидокорлик туйфуси билан туйфулана олмайди. Шундай экан, оила муҳити Ватан муҳитининг бошланиши, биринчи босқичи эканини бир нафас ҳам унутмасак бас.

## ИККИНЧИ БҮЛİM САОДАТ САРОЙИННИНГ КАЛИТИ

### **Бахтиёрлик ичра сен...**

Инсон бахтиёр бўлиш учун яралган. Киши дунёда бой бўлиш учун эмас, балки бахтли бўлиш учун яшайди. Зотан күш парвоз учун, инсон эса бахтиёр бўлиш учун яралгандир. Шунинг учун ҳам катталар ёшларни дуо қилишганда, энг аввало, баҳт тилайдилар.

Баҳт нима ўзи? Унинг ўлчови, миқдори борми? Кимни бахтли, кимни эса баҳтсиз деймиз?

Инсоният бу саволларга минг йиллардан бери жавоб излайди. Ягона жавоб эса йўқ. Дунёда неча миллиард одам яшаётган бўлса, баҳт ҳақидаги тушунча ҳам шунчадир.

**Умидимиз юлдузлари**, сиз билан каминанинг бу масаладаги қарашларида фарқ бўлиши табиий. Шу боис мазкур боб шунчаки суҳбат бўлмай, баҳслашув даврасига айланмоғи ҳам эҳтимолдан холи эмас. Аввалги суҳбатларимизда кўрилган масалаларга амал қилмоқдик – баҳтиёрликнинг пойдеворини, ўзгачароқ таъбир билан айтсак, ўқ илдизни ташкил қиласди. Энди кўриладиган мавзулар эса баҳтиёрлик дараҳтининг жонбахш шохларидир. Дараҳтни ўқ илдизсиз ёки шохлариз тасаввур қилиш қийин. «Ўқ илдиз»дан «жонбахш шохлар»га ўтишдан аввал баҳт ҳақидаги умумий тасаввуримизни жамлашни ният қилдим.

Соддароқ айтсам, инсон ўзини муҳофаза этишга ҳамда баҳтиёр бўлишга интигувчи таъсирчан, сезгир, ақлли ва фикрловчи мавжудот саналади. Тўла-тўкис баҳт одамзотга насиб бўлувчи юксак даражадаги ҳузур-ҳаловатdir, баҳтсизлик эса юксак даражадаги мусибатdir.

Ҳузур-ҳаловат дейилганда фақат моддий маъно англашилмаслиги керак. Агар ҳузур-ҳаловат фақат

нафсни қондиришдангина иборат бўлса, емиш топган жониворларнинг барчасини баҳтли, оч қолганини баҳтсиз, дейишимиизга тўғри келади. Биз жониворларда шундай тушунча, туйбу бор ёки йўқдигини билмаймиз. Фақат бордир, деб тахмин қиласиз ёки «йўқ» деб инкор этамиз. Бизнингча, жониворларга хос бўлган баҳтлилик ҳам фақат қорин ғамига бориб тақалмайди. Масалан, уйда боқилаётган итга эгаси томонидан ташланган суюк баҳтли ҳолат саналса, эркни ҳеч нарсага алмашмайдиган бўри учун (аввалрок баён қилинганидай) бу баҳт эмас, балки бир хорлиқдир. Эгаси ташлаган бир ҳовуч донга қаноат қилувчи хўроз катакда туғилиб, катакда жон беришни, эҳтимол, баҳт деб ҳисоблар. Чўққида туғилиб, осмонда эркин парвоз қилишга ўргангандар бургут учун эса бу тубанликдир. Аслида Аллоҳ барча жониворларни эркин қилиб яратган. Фақат айримлари эркларини емишга алмашганлар. Буларни биз «уй ҳайвонлари» деймиз. Эркни ҳар нарсадан аъло қўйғанларини эса «ёввойи ҳайвонлар» деб атаемиз. Демоқчиманки, баҳт тушунчасининг моддий томонидан кўра, маънавий томони ортиқроқ. Агар фақат моддий томони билан чеклансан, барча камбағаллар баҳтсиз, бойлар эса баҳтли деган маъно келиб чиқади. У ҳолда «Мерседес» каби автомашиналарда юрувчи кимса дунёдаги энг баҳтли инсону, тикин автобусда хизматига шошаётган одам баҳтсизми? Балки аксинчадир? Автобусдаги одам кўнглида ҳаловват бор. Уни бойлигини йўқотиб қўйиш хавотири таъқиб қилмайди. Ўтмиш донишмандлар шу боис ҳам Аллоҳдан руҳ ҳаловатини истаб, бойлик бермагани учун шукрлар қилганлар. «Мерседес»да юрувчи биродарларимиз каминадан ранжимасинлар. Мен уларни айбламоқчи эмасман. Ҳалоддан топган бўлсалар, баҳтли кунларида буюрсин. Лекин бунинг роҳати мавжудлиги баробаринда хавотири ҳам бор-да. Агар автомашина бузилиб қолса ёки ўғирланса, ёки бирон фалокатга учраса, улов эгасининг кўзига дунё тор бўлиб

кетиши аниқ-ку? Кимки «пулни – бахт, бахтни эса – пул», деб ўйлаётган бўлса, демак янгиш ҳаёт кечираётган экан. Аммо моддий бойликни бутунлай инкор этиш ҳам дуруст эмас. Тўғри, бойликсиз яшаш мумкин. Бироқ, фаровонлик – бахтиёр яшаш учун зарур шартлардан бири ҳисобланишини инкор ҳам этолмаймиз. Мен бу ўринда фақат ҳалоллик билан топилган бойликни назарда тутяпман. Ҳаром йўл билан топилган бойлик фаровонлик эмас, аксинча, ҳасрат бўлгани туфайли масъудликка бегонадир.

Дуоларимизда кўпинча бахт ва саодат тилаймиз. Бахт нима? Саодат-чи? Иккаласи бир маънони англатадими? Йўқ. Бахт – торроқ маънодаги тушунча. Ҳар бир одам бахтли бўла олиши мумкин. Бирор йўқотган минг сўмини топиб олса, ўзини бахтли ҳис қиласди. Боща бирор набира кўрган куни ўзини дунёдаги энг бахтиёр инсон деб ҳисоблайди. Одамлар ўзлари учун кутилмагандаги бахтли бўладилар. Саодат эса Аллоҳнинг раҳматига, марҳаматига етишмоқлиkdir. Саодатга пул топиб олган каби етишилмайди. Гўзал хуљ ва бошқаларга яхшилик қилиш саодат саройининг калитидир.

Бир одам ўзини гоят бахтли ҳисобларди. Чунки унинг «суюнган тоги» бақувват эди. Бу «тог»ни умри боқий деб биларди. Тог жилғаларидан оқиб келаётган бойлик оқибатда денгизга айланади, деб умид қиласди. Чинакам тоғлар емирилиб кетадиган бу фоний дунёда ўзини тог фаҳмлаб юрган одам қуламайдими, емирилиб йўқ бўлмайдими? «Суюнган тоги» қулагач, ўзини бахтиёр санаб яшаётган одам гангигб қолди. Нима бўлди, бахт қуши учеб кетдими? Дунё – ажабтовор, бирорининг «суюнган тоги» қулагани ҳамон боща бирорининг шундай тоги қад ростлайди. Аввалги «тог» паноҳидаги одамга «янги тог» яқинида ўрин йўқ. Энди у ўзини энг бахтсиз ҳисоблайди ва икки ўртада бахт учун кураш бошланади. Дунёвий фалсафада «Бахт – курашдан иборат», деган фикр бор. Аммо баён

этилаётган ҳолатдаги курашнинг баҳтга сира алоқаси йўқ. Бунда курашнинг номигина «баҳт учун». Ҳақиқий номи эса: «нафс бандаларининг кўпроқ емоқ ва ичмоқ учун олишуви». Бу курашда кимдир енгандай бўлади. Галаба нашидасини сургандай ҳам туюлади. Бироқ ҳақиқат шуки, бу олишувда ҳеч ким, ҳеч қачон голиб бўлмайди. Ҳар икки томон ҳам мағлубдир, хордир, ҳақирдир.

Баҳт – **фақат** бойликда, деб ҳисобловчи кимсада, албатта, кибр мавжуд, баҳиллик мавжуд, хиёнат, риё... мавжуд. Бу ёмон хулқлар эгаси ўзини баҳтли санаши, саодатга етишмоқни умид қилиши фоят кулагили, ҳатто ачинарли эмасми?

Бу дунёда ҳамма нарса бир-бири билан чамбарчас боғланган. Бу боғлиқликни баъзан кўрамиз, баъзан эшитамиз, баъзан эса сезамиз. Баъзан эса тасавури-мизга сифдиrolмаймиз ёки бефарқ қараймиз. Шулардан бири – «баҳтлиман!» деймиз-у, ёлғиз ўзимиз баҳтли бўла олмаслигимизни англаб етмайдиган пайтлар ҳам бўлади. «Нақадар баҳтсизман!» деб нола қиласиз-у, баҳтсизлигимизга бошқаларнинг ҳам шерик эканини ўйлаб кўрмаймиз. Масалан, ўн кишидан иборат оиласда бир одамга баҳтсизлик ёпишса, қолган тўққизтасини четлаб ўтолмайди. Биттаси баҳтиёр бўлса, қолган тўққизтаси ҳам бу масъудликдан озми-кўпми баҳраманд бўлади. Чунки баҳтсизлик битта одамнинг айби билан келмайди, бу ташвишда қолган тўққизтасининг ҳам ўзи билган ёки билмаган ҳолда ҳиссаси мавжуд. Баҳтга эришишда ҳам шундай. Биз таомни ошпаз пиширганини кўрамиз ва унга раҳмат айтамиз. Ҳолбуки, пишган таом – ошпаз томонидан бажарилган энг сўнгги ҳаракат маҳсули. Дастлабкиси эса ерни шудгор қилган, уруғ қадаган дехқоннинг заҳматидан бошланади. Лаганга сузиб берилган паловда юзлаб одамларнинг хизмати борлигини камдан-кам ҳолларда ўйлаб кўрамиз, янада камдан-кам ҳолларда уларни дуо қиласиз. Ҳаётда бирон ютуққа эришсак, дей-

лик, мансаб эгаси бўлсак ва буни баҳт деб ҳисоблаб кувонсак, шу мансабни бизга раво кўрган акахонимиздан миннатдор бўламиз. Назаримизда бу баҳтни бизга айнан шу акахон ўз хазиналаридан чиқариб бергандай туюлади. Шу мансабга эришишда бизга биринчи ҳарфни ўргатган муаллимнинг ҳиссаси борлигини ҳеч ўйлаб кўрамизми? Тижоратда омадимиз келган пайтда карра жадвалини ўргатган устозни эслаймизми? Агар шуларни ўйласак, биродаримизнинг баҳтли бўлишига ҳисса қўшиш учун рағбат қилишимизга тўғри келади. Чунки бирорвнинг баҳтимиз учун қўшган ҳиссаси биз учун қарздириб қўйиш ёки дуо қилиш билан қарздан қутула олмаймиз. Баҳтсизликда бошқаларнинг ҳиссаси мавжудлигини англағач, биз туфайли кимнингдир баҳтсиз бўлиб қолишидан ўзимизни сақлашимиз керак. Баҳтсизлик дараҳти сув ичадиган булоқлар кўп атроғимизда. Хиёнат, туҳмат, ифво, чақимчилик, фийбат... Баҳтсизликка учраган кишига етти ёт бегона одам хиёнат қилмайди, нотаниш инсон туҳмат ботқоғига ботирмайди. Бу бадкирдорликлар яқин кишиларидан чиқади. Виждонсиз одамгина бирорвнинг баҳтсиз бўлишини истайди ва бу иллатидан ўзи роҳатланади. Бир одамни кимдир баҳтсизлик чодирига чирмаб, ўз йўлидан олиб ташлашга уринади. Муддаога етгач, ўзини баҳтли санайди. Бу нодон билмайдики, бирорвнинг баҳтсизлиги эвазига киши ҳеч қаҷон баҳтли бўла олмайди. Вошлиғига туҳмат қилиб, уни жилдирган одам амал курсисига ўтиргани билан қанча вакт ўзини баҳтли деб ҳисоблаб юради. Охирокибат ўзининг ҳам туҳматга учраб, амалдан ажрагунига қадарми? Эҳтимол, баҳтсизлик унга илгарироқ бошқа бир сабаб билан даф қилар? Тижоратда шериғига хиёнат қилиш эвазига катта фойда олган одамнинг баҳтли кунлари шу бойлиги тугагунча давом этармикин?

Бироннинг бахтга эришуви ёки бахтсизликка гирифтор бўлишига қўшадиган ҳиссамиз моддий ва маънавий томондандир. Моддий томони маълум. Маънавий томони эса бундай: агар адашган дўстимизни яхшиликка даъват этсак, бахт қасрига фақат виждан ва яхшилик йўли орқали борилажагини англата олсак, демак, бахтга эришувига ҳисса қўшибмиз. Яхшилиқдан нари йўлларда тентираётган кишига бефарқ қарабмизми, демак, унинг бахтсизлигига шерик бўлибмиз.

Одам боласи ўзгалар бахти учун хизмат қиласагина ўз бахтини топа олади. Бироннинг шодлиги ва бахти учун қанчалик хизмат қиласа, ўзи ҳам шунчалик бахтга даъвогар бўлиши мумкин. Энг бахтиёр киши ким? Иложи борича кўпроқ одамларнинг бахтли бўлишлари учун хизмат қилган одам эмасми? «Мен бахтли инсон бўлишни истайман, қолганлар билан ишим йўқ», дейиш нодонликдир. «Ён-атрофимдагилар бахтли бўлмагунларича менга бахтиёрлик шоҳсупаси насиб этмагай», демоқлик эса доноликдандир. Билмоқлик шартдурки, бироннинг бахтсиз бўлишини истаган киши, олдинроқ бахтсизлик жарига ўзи қулайди. Бу жарда умрбод қолиб кетмас, бир куни чиқар, аммо пешонасидаги лаънат тамғаси сира-сира ўчмагай. Инсон нима учун азизу мукаррам саналади? Ўзгаларнинг бахтсизлигини ўз бахтсизлиги деб санагани учун эмасми?

Устозимиз Асқад Мухтор ёзган әдилар:

*Мухбир келар: «Бахтлимисиз?» эмиш.  
Қандай бахт? Ўзимга алоҳидами?  
Алоҳида уй бор, алоҳида идиш...  
Одам қайда яшар, овлоқ уйдами?  
У қабрдагина одамзотдан гайри,  
Тирикмизки, олам ҳаммамизга бир.  
Ҳақиқат йўқ кимсага айри,  
Алоҳида бахт ҳам дунёда йўқдир.*

Баъзилар зиммаларидағи ҳаж фарзини адо этадилар. Албатта, бу улуғ баҳт. Баъзилар ҳар йили ҳаж қиласылар. Буни ҳам баҳт деймиз. Уларга зътиrozимиз йўқ. Лекин шундай саодатли кишилардан бирининг яқин қариндоши ёки қўшниси шундай баҳтга муҳтождир. Бу ҳолга қандай қараймиз? Аслида мўмин учун фарз – бир марта ҳаж қилиш. Дейлик, саодатли биродаримиз икки мартаами ё уч мартаами боргач, кейинги сафарига мўлжаллаган маблағини муҳтож қариндоши ёки қўшнисига берса-чи? Ўз саодатини муҳтож биродари билан баҳам кўрган одам энг баҳтли одам эмасми?

Баҳтни баҳам кўришни ҳам баъзан нотўғри тушунамиз.

**Воқеа.** Бир одам тўй қилаётган экан. Дўсти беш минг доллар сарф этиб, номи чиққан ашулачини бошлиб борибди. Ашулачи бир соатгина хизмат қилиб кетгач, тўй эгаси дўстига «Мени бағоят баҳтиёр қилдинг», деб миннатдорлик билдирган.

Савол туғилади: киндинги очиб олиб, беҳаё қилиқлар билан қўшиқ айтган ашулачи шу тўйга келмаса, тўй эгаси баҳтсиз бўлармиди? Дўст беш минг доллар эвазига чиндан ҳам баҳт инъом этдими? Бемаънилик! Баҳтни биз нақадар саёз тушунамиз! Тўй эгаси ўша ашулачини ўзи таклиф қилиш имконига эга бадавлатлардан эди. «Хотамтой» эса камбағал дўстининг тўйига бунчалик ҳиммат кўрсатмайди. «Баҳт улашув» деб номланаётган бу ҳаракатда кибр, риё, ҳатто фисқу фужур каби иллатлар мавжуд. Савоб эса йўқ. Агар ўша ашулачига сарф қилинган пулнинг ҳаммасини эмас, ақалли бещдан бирини қайсиdir камбағал оиласа сарф қилганида ўзгаларни баҳтиёр қилиш ҳақида гап юритсак арзирди. Қўшниси ёки қариндоши тўй қилишга курби етмаслиги сабабли қизига келаётган совчиларни турли баҳоналар билан қайтариб, эзилиб юрган кезларда беш минг долларни ҳавога сочган одам Қиёматдаги ҳисоботини ўйлаганида охиратда эришилажак чин ва боқий баҳтга етишган бўлармиди. Ҳозир наза-

рида шу тўйга келганларнинг барчаси унга тасанно айтишяпти, шу боис ўзини баҳтли санаяпти. Аслида эса ундан эмас. Одамнинг баҳти орзу ва тамаларига қараб бўлади. Энг тамагир одам – баҳти энг оз одамдир.

Ғаззолий ҳазратлари дебдиларким: «Бир кишининг тижорати охират тижоратига монелик қилса, бундай киши бадбаҳтдир. Бечорадир. Бу бир тандир учун бир хум олтин берган кабидир».

Нима учун айрим одамларга бадбаҳтлик саодат бўлиб кўринади? Катта ёшдагилар бу ўринда шайтон ҳийлаларини унутиб қўйяптилар. Шайтон хунук қиёфали бадбаҳтликни безаб, пардоз қилиб, банданинг кўзига гўзал ва мафтункор қилиб кўрсатмайдими? Кўрсатади! Иймони заиф банда пардоз ортидаги хунуқликни кўра олмайди. Саробдан умид қилгани каби унга интилаверади. Шайтон кирдикорларини телевизорда кўрсатилаётган тўкин дастурхонга қиёслаш мумкин. Киши дастурхонга маҳдиё бўлади, кўзлари ўйнайди. Аммо оламан, деб кўл узатганда тасвир йўқолади. Шайтон иши айнан шундай эканлигини билмайдиганлар ҳам бор.

Бундай кишиларга Анас ибн Молик (р.а.)нинг бу сўзларини ўқиб, ёдлагач, уқиб олишларини тавсия қилган бўлардик: «Бадбаҳтлик тўртта: кўзнинг қуруқлиги, қалбнинг қаттиқлиги, орзу-ҳаваснинг узунлиги ва дунёга ҳирс қўйиш». Ашулачининг бир соатлик хизматига беш минг доллар сарф қилган кишида шу тўрт иллат мужассам бўлгани учун ҳам уни «бадбаҳт» дедик.

Қалби соғлом одамгина баҳтли бўла олишини биламиз. Қалб саломатлиги нима? Ишемик хасталиклардан холи бўлишми? Тўғри, бу жисмоний саломатлик ҳам зарур. Лекин руҳи хаста одамнинг жисмоний жиҳатдан саломат бўла олмаслиги ҳам ҳақиқат.

Бир обид йигит табибдан сўради:

– Табиб афандим, сизда гуноҳларни юувучи ва қалбларнинг дардига даво берувчи дори борми?

Табиб дедики:

– Албатта бор. Аммо бу дорини мен эмас, ўзингиз тайёрлашингиз керак. Сиз энг аввал «**фақирлик**» ва «**тавозелик**» дараҳтлари илдизини сиқиб сувини оласиз. Бу сувга «**тавба**» ҳалиласини қўшасиз. Сўнгра сувни «**ризолик**» ҳавончасига соласиз ва «**сабр-қаноат**» гурзиси билан оҳиста эзасиз. Сўнгра уни «**тақво**» қозоннига солиб, устига «**ҳаё**» сувидан куясиз. Сўнгра қозонни «**мехр-муҳаббат**» оташи билан қиздирасиз ва ундаги нарсани «**тавба-шукр**» қадаҳига соласиз. Қадаҳни «**ражо-дуо**» шамоли билан совутганингиздан сўнг ажойиб дори ҳосил бўладики, уни «**ҳамду-сано**» қошиги билан ичгайсиз. Агар сиз бу амалиётни тўлиқ бажарсангиз, албатта, бу дунё ва охиратдаги барча дарду балолардан фориғ бўлиб, икки дунё саодатига етишасиз.

Шу ўринда бу дунёning имтиҳон дунёси эканини яна ёдга олиш керак. Бу имтиҳон бизни билиш учун эмас, бизни ўзимизга билдириш учундир. Чиндан ҳам шундай: имтиҳон қилювчи бизни яхши билади. Биз ўзимизни билмаймиз. Ўзни билиш имтиҳонидан ўтган одамни чинакамига масъуд десак арзийди. Бу имтиҳондан ўтганлар бошига қўнган баҳт қуши учеб кетмайди.

Ҳаётда баъзи кишиларга нисбатан «баҳтини қувиб юрибди», деймиз. Чиндан ҳам шундайми? Баҳтни қувиб юриб, сўнг тутамизми? Тасаввур қиласликки, баҳт билан сўзлашув имкониятимиз мавжуд. Унга хитобан десак-ки:

– Эй баҳт! Сени тутишнинг йўли борми?

Эҳтимол, баҳт хитобимизга шундай жавоб берар:

– Мен кийикка ўхшайман. Ҳамма ҳам мени тута олмайди. Тутса ҳам узоқ ушлаб туролмайди. Мени қўлга киритган одам қаттиқ ушласагина ундан қочолмаслигим мумкин. Аммо бунинг бир қатор шартлари бор: энг аввало, мени қўлга киритувчи кишининг қилиғи ўзгалар учун ёқимли, кўнгли юмшоқ, тили ширин

бўлиши шарт. Ўзини иллатлардан эҳтиёт қиласин, фууруланмасин, ёвуз ва ярамас ишларга, хусусан, ҳасадга, истрофгарчиликка, ҳийла-ю алдовларга яқин турмасин. У катталарга ҳурматни, кичикларга ширин сўзни раво билсин. Гердайиб, кишиларни оёқ ости қилмаса, ўзидан кичикларга менсимай қарамаса, феъл-авторини тўғриликда тутса яхши. Кимда-ким мана шуларга риоя қиласа, мен у билан бирга қоламан. Бўлмаса, кийикдек қочиб кетаман. Унда менга ким ета олади?

Тасаввуримизда гавдаланганди кийик қиёфасидаги баҳтнинг сўзлари талқини бундай: баҳт-саодатни изласангиз топа олмайсиз, қувсангиз тува олмайсиз. Зиммангиздаги инсоний вазифаларни адо этинг – баҳтнинг ўзи сизни излаб топади. Инсоний вазифаларни адо этиш учун эса кучли иродада талаб этилади. Ҳа, бизнинг баҳтимиз ўз ҳаётимизни идора қилувчи ўз иродамизга боғлиқ. Шу боис баҳтиёр бўлишни истаган кимса иродасини тарбия қилиши шарт.

Кимда-ким баҳтидан айрилиб қолса, бирорлардан айб изламасин. «Оҳ, қанчалик баҳти қароман-а!» деб бошини тошларга урмасин-да, зикр этилган шартлардан қай бирини бажармаганини аниқласин. Ва ҳамиша ёдда тутсинким, ўз ҳоҳиш ва истакларининг чегарасини билмасликдан ортиқ баҳтсизлик бўлмайди. Баҳт кимгадир кулиб боққудай бўлса, барча орзу-истаклари аклнинг бандасига айланади. Баҳт ундан юз ўғургудай бўлса, акл унинг орзу-истакларига муте бўлиб қолади. Инсон ҳаётидаги энг аянчли ҳолатлардан бири айнан шудир. Хитой донишманди Лао Цзининг «Оҳ, баҳтсизлик! У баҳтнинг таянчидир. Оҳ, баҳтиёрлик! Унда баҳтсизлик яширин», деб ёзиши бежиз эмас. Исталган баҳтиёрлик дараҳтининг соясида баҳтсизлик мудраб ётади. У кутилмаганда уйғониши, талвасага тушиб, бу дараҳтни қўпориб ташлаши мумкин. Арасту ҳаким айтмоқчи, баҳт-иқбол секинлик билан, баҳтсизлик эса тез суръат билан ҳаракат қиласи.

ки бахт пастликдан юқорига чиқишига, бахтсизлик эса чүққидан пастта тушишга ўхшайды. Шу сабабли ҳам «бахтиёрлик ичра сен бахтсизликка учрашдан қўрққин», дейдилар. Яна бир нарса аниқки, ортиқча бахтга интилавериш ҳақиқий бахтни қўлга киритишига тўсқинлик қиласди. Бу фикрнинг ҳамда сал илгарироқ билдирилган «ҳар ким бахтни ўз қаричи билан ўлчайди», деган қарашнинг исботи учун бир ҳикоятни ёдга оламиз.

**Ҳикоят.** Ададсиз мол-дунё эгаси бўлмиш Ҳалаб подшоҳи одилликда ном чиқарган эди. Аммо унинг ёлиз ўғли енгилтабиат ва қизиққон эди. Подшоҳ қанчалик одил ва оқил бўлмасин, ўғлини чексиз муҳаббати билан эъзозлагани учун унинг раъиидан ташқари иш қилмасди.

Кунлардан бир кун Ҳалабга Мисрдан савдогар келди. Подшоҳ ундан ўғли учун турли матолар сотиб олди. Савдогар кўпни кўрган, дунёning иссиқ-совуғини татиб кўрган киши бўлгани сабабли шаҳзода уни галга тутди. Атрофдаги мамлакатларнинг аҳволи билан қизиқди. Савдогар ҳар бир мамлакат подшоҳининг ўзига хос аҳволидан ҳикоялар сўзлади. Гал Миср подшоҳига келганда унинг гоятда гўзал қизи борлигини маълум қилди. Бундай соҳибжамол етти иқдимда ҳам топилмаслигини таърифлади. Чунончи маликанинг суратини чизиш учун барча Чин нақдошлари ожизлик қиласмишлар. «Унинг ҳусну жамоли васфи учун барча араб вассофларининг сиёҳдонларидаги сиёҳ етмайди», деб таърифига якун ясади. Савдогар Миср маликаси васфида шундай муболагалар қилдики, қизнинг ишқи шаҳзоданинг қалбига ғулгула солди. Шаҳзоданинг шитобкор қалби, аввал яхшилаб ўйлаб кўрмасданоқ, меҳр-муҳаббат ғавғосига гирифтор бўлди. Бахтга эришмоқдикнинг бирдан бир йўли шу маликага етишмоқдир, деб ўзи яратган ҳақиқатга ўзи қул бўлди. Отаси ҳузурига кириб: «Менинг бошимга мушкул савдо тушди. Миср маликасига ошиқ бўлдим.

Агар ўша қизни менга олиб берсангиз жонимни бу тубсиз дарёдан соҳилга чиқаргумдир, йўқса, ҳаёт билан видолашурман», деди.

Ўғлиниң қарори подшоҳни анча паришон қилди. У ўзини бевош дарё қаршисида тургандек ҳис қилиб деди: «Жон ўғлим, Миср подшоҳи бизни ўзига тенг кўриб, қуда-андаликка ризо бўлармикан? Ахир бизнинг мулкимиз унинг мулки олдида бир қатра мисолидек-ку?»

Ўғил отанинг гапини эшлишни ҳам истамади. Ёлғиз ўғилниң кўнглини чўқтираслик учун ота ҳар нарсага тайёр эди. У Миср подшоҳига элчи юборишга қарор қилиб, қимматбаҳо ҳадялар тайёрлади. Қизини ўғлига сўраб, бениҳоя шикастаҳоллик билан мактуб ёзди. Мактубни «Агар бандани бу шарафга мушарраф тутсалар, бу банда ҳам ул зотнинг бандаларидан бирига айланурмэн ва жоним сиз улуғ подшоҳнинг инонихтиёридадур», деб якунлади.

Миср подшоси элчиларни қабул қилди. Туҳфалардан мамнун бўлди ва дедики: «Мен Ҳалаб подшоҳининг ўғлини куёв қилмоқликдан орланмасмен. Аммо уни мол-мулқдан имтиҳон этишим мумкин. Агар уддасидан чиқолса, у ҳолда сидқидилдан жазм қилгани маълум бўлади. Аҳли аёлим «кимки менинг қизимга уйланмоқчи бўлса, олтмиш минг Миср динори баробарида кобин (маҳр) талаб қиласман», деган. Бу борада Ҳалаб подшоҳининг фикрини билсам мурод ҳосил бўлур».

Бу талабдан воқиф бўлган Ҳалаб подшоҳи хазинасидаги барча нақдларини тўплади – қирқ минг динор бўлди. «Хозирча хазинамда мавжуд олтинларни юборяпман, ўртамиизда аҳд-паймон боғланганидан сўнг қолганини ҳам етказаман», деган мактуб иловаси билан динорларни Мисрга жўнатди. Миср подшоҳи олтинларни қабул қилгач, никоҳга ризолик берди. Маликани Ҳалаб шаҳзодасига фотиҳа қилдилар. Хушхабар Ҳалабга етгач, қизиқон шаҳзода: «Узоқ кутишга,

интизорликка тоқатим йўқ. Бугун барча вилоятларга қўшимча солиқ тайинланг, токи тўласинлар ва олтинларни Мисрга юборайлик», деди. Бу талаб подшоҳни яна паришон қилди ва дедики: «Жон ўғлим, зулмнинг оқибати даҳшатлидир. Азбаройи сенинг тўйинг деб минглаб бева-бечораларнинг хонадонини фам-мотамга қўя олмайман. Бир киши кўнглининг осойишталиги учун юз мингларча кишиларнинг кўнглини фам-андуҳга тўлдиролмайман. Сабр қил! Токи, одамлардан йиғиб олинадиган солиқ манбаи вужудга келиб, хирожни тўлаш ва молларни йиғиб олиш мавсуми келсин. Ана ундан сўнг, секин-аста мазкур маблагни тўплаб сўнг Мисрга жўнатурмиз».

Шаҳзода оқиллик ва вазминликдан йироқ эди. У ўзининг бахтга етишиш онларини бирорларнинг азобланиши ҳисобига тезлаштироқчи бўлди. Навқирон ёшлиги ва кучига мағрурланди-да, «Мендайин бақувват ва эпчил йигитга мол топиш қийин иш эканми?!» деб, отасига заҳарли разаб ўқларини сочди.

Шаҳзода мукаммал равишда отланиб, биёбон томон равона бўлди. Иттифоқо, биёбонда қимматбаҳо моллар ортилган бир карвон Миср сари кетиб борарди. Шаҳзода бу бойликни қўлга киритиш мақсадида карвоннинг дам у, дам бу томонларидан келиб ҳамла қила бошлади. Карвон аҳли орасида Эъзоб Мағрибий исмли шижоатли ва жасур бир киши бор эди. У ҳамла қилаётган шаҳзодани кўриб, якка ўзи карвондан чиқди ва у томон от солди. Биринчи ҳамласидаёқ шаҳзодани эгардан олиб, ерга урди. Сўнг шаҳзоданинг қўлларини борлаб, арқон учини тую бўйнига илдилару йўлларига равона бўлдилар.

Мисрга етишгач, Мағрибий лойиқ тухфаларини олиб, подшоҳ ҳузурига келди. Миср подшоҳининг саройида Мағрибийнинг эътибори анча баланд эди. Подшоҳ у билан сұхбат қуриб ўтирган пайтда Ҳалаб подшоҳининг чопарлари бир мактуб етказдилар. Мактубда: «Муддатидурки, бандазода ёлғиз ўзи банданинг

ҳұзуридан ғойиб бўлмиш. Ўша қолган молларни топиб, подшоҳнинг хизматларига олиб борган бўлса керак. Агар бахти ёр бўлиб, мол топиб, у даргоҳга шитоб қилган бўлса, бизга хабар қилгайлар. Токи, хотиримиз таскин топгай», дейилган эди. Мактуб ўқилгач, Эъзоз Мағрибий англадики, йўлда асир олинган йигит шаҳзодадир. Мағрибий уйига келиб, шаҳзодани ҳұзурига чорлади:

– Сенинг бундай журъат қилмоғингга сабаб нима эканлиги менга маълум бўлди. Йўл тўсиб, ҳалойиқнинг молини олиб кетмоқ ҳар қандай яккабош ўткинчининг иши эмас.

– Ёшлиқ ғуури ва шайтон васвасаси мени шу йўлга олиб кирди. Оқибат, энди сенинг асирингман, – деди шаҳзода афсус билан. – Агар лутф қилиб, молларингнинг омон қолгани шукронасига мени озод қиласанг, камоли хайрли бўлур эди. Агар пул бадалига озод қилишни истасанг, қанча баҳо қўйсанг ҳам майли, мен тилхат берайнин. Қайси жойни тайинласанг, пулни ўша ерга ўзим етказайин.

Мағрибий шаҳзодани енгилтаклиги учун маломат қилгач, Ҳалаб шоҳининг адолат соҳиби эканлигини фоят қадрлашини айтиб, подшоҳнинг ҳурмати юзасидан уни озод қиласагани билдириди.

– Агар сенинг ишинг йигирма минг динор билан битса, сенга мазкур миқдор маблағни бераман ва қарз хусусида сендан тилхат оламан. Ҳалабга қайтганингда менга қайтарурсан.

Шаҳзода Мағрибийнинг бу лутфига ҳадсиз миннатдорчилик билдириб, ҳадяларни қабул қилди-ю подшоҳ ҳұзурига йўл олди. Шаҳзода Миср подшоҳига ёқди. Унга сарпо кийдирди-да, тўй ҳаракатларини бошлаб юборди.

Тўйдан аввал келин ва куёвни ясантириб, бир-бirlарига кўрсатардилар. Ўша куни шаҳзода шаробхўрликка машғул эди. У саржуш бўлгач, боғ сайрини ихтиёр қилди. Ногоҳ қарасаки, шоҳона ўтов тикилган,

сўраб билдики, бунда малика ясантирилмоқда. Ўтванинг боқقا қараган даричаси бор эди. Унинг кўнглида даричадан ичкарига қараш ихтиёри туғилди. Ҳарамдаги қиз-жувонлар жамоасини таниб олиш мақсадида даричадан ичкари қаради. Бу онда маликанинг кўзи даричадан мўралаётган бегона кўзга тушди. Канизакларга икки шохли илгични келтиришни буюрди. Канизаклар буйруқни адо этиб, илгичнинг икки шохини шаҳзоданинг мўралаётган кўзларига санчдилар. Шаҳзода оҳ уриб йиқилди. Хизматчилар югуришиб келишиб, шаҳзодани минг машаққатлар билан бошқа жойга олиб бордилар. Табиблар муолажаси кор қилмади. Тўй бўлди, аммо шаҳзода орзусидаги баҳтга етиша олмади.

**Умидимиз юлдузлари**, қиссадан ҳисса чиқариш, сиз азизларнинг ўзларингизга ҳавола. Ҳар ҳолда атрофингизда шаҳзодага ўхшаган енгилтабиат тенгдошларингиз ўйқ эмас, бор. Уларнинг кўзларини очиш учун биргина ҳикоят етарли бўлармикин? Шу ҳақда ўйлаб кўрайлик. Агар дўстларингизда шундай камчилик сезилса, буни хасталик деб билиб, даволашга бетўхтов равишда киришиш керак. Тўғри, ҳозирги эрка фарзандлар ёлғиз ўзлари карвонга ҳужум қилмайдилар, ўтov даричасидан ҳам мўраламайдилар. Балки бундан баттарроқ, аянчлироқ ҳаракатлардан қайтмайдилар, оқибат эса илгич шохи кўзларига эмас, юракларига санчилади. Мозористонлардаги ёшларнинг қабрларини кўрганимда шулар хаёлимга келади. «Баҳт қасрига интилганлари ҳолда нечун бу қора лаҳаддан макон топдилар?» деб ўйлайман. Сиз ҳам ўйланг азизларим, эҳтимол, биргаликда тўғри жавоб топармиз.

Кишининг баҳт ҳақидаги тушунчаси ёшига қараб ўзгариб бораверади. Богча ёшида отаси янги ўйинчоқ олиб берса, ўзини баҳтли ҳисоблайди. Бу баҳт унинг қувончида кўринади. Дўкон пештахтасидаги чиройли ўйинчоқни олиб бермасалар ўзини баҳтсиз ҳисоб-

лайди, бу ҳолат унинг хархашасида, йигисида зоҳир бўлади. Сиз боғча ёшидан қарийб ўн йил ўтдингиз. Лекин сизда ҳам ўша тушунчанинг зарралари сақланаб қолган. Яъни бахтни моддий томонига кўпроқ аҳамият берасиз. Дадангиз янги телефон олиб берсалар, сиздан бахтироқ одам йўқдай. Ўқишида тенгдошларингиздан ортда қолаёттанингизга эса эътибор бермайсиз.

Баъзилар бахтни толе билан боғлайдилар. Бу фикрни инкор этиш мумкин эмас. Лекин унга қадар бўладиган бошқа ҳолатлар ҳам мавжуд.

Буюк орзуга етишни истаган икки кишидан қайси бирида мурувват устун бўлса, орзуга ўшаниси етишади. Агар мурувватда ўзаро тенглашсалар, иродаси кучли бўлганига орзуга етишмоқ бахти насиб этади. Иродада ҳам баробармилар? У ҳолда ёрдамчилари ва дўстлари кўп бўлгани енгиг чиқади. Агар бу жиҳатдан ҳам ораларида фарқ йўқ экан, у вақтда толеи (бахт иқбали) баланд бўлгани етишади.

Абу Али Ибн Сино ўн гўзал хислатни барча саодатнинг манбай ва маъданидир деб таъкидлаганлар: инсоф ва адолат; тилак ва орзуларга бўйин эгмай, унга голиб бўлишлик; олим ва фозиллар билан суҳбатлашиб, уларнинг насиҳатларини ҳаётга татбиқ этиш; ҳақиқат ва тўғриликка ҳамиша ва ҳар қандай ҳолатда содиқ бўлиш; ёши катталарни иззат ва ҳурмат қилиш; кичикларга шафқатли ва марҳаматли бўлиш; дўстликда самимият; душманларга ҳам мулоийим муносабатда бўлиб, улар билан муроса-мадора қилиш; муҳтожларга ёрдам бериб, хайру эҳсон қилиш; жоҳил ва нодонларга насиҳат қилиб, уларни тўғри йўлга кўндиришдан эринмаслик.

Энди бу гўзал хислатларни дикқат билан ўрганайлик: сиз ҳар бир ишда инсоф ва адолат чегарасидан чиқмадингизми, демак, бошқалар ҳам сизга инсофсизлик ва адолатсизлик қилишдан тийиладилар. Аксинча бўлса, сизнинг бир ёмонлигинги зигга ўн, балки

ундан-да ортиқ инсофсизлик ва адолатсизлик ёғилади. Боши устида шундай бало чақини чақин чакиб турганда ким ўзини баҳтли ҳисоблаши мумкин?

Тилак ва орзуларга бандилик зарап экан, шайтоний иғвога қул бўлиб қолган кишини қандай баҳтиқаролик кутаётганини тасаввур этиш мумкин. Шайтон «Аканг (ёки дўстинг) сарой қурди, сен ҳам қур, сенга, болаларингга ҳам шундай баҳт насиб этсин», дейди. Ақл аввалига «Бунга менинг қурбим етмайди», деб бу иғвони қувади. Кейин эса бу иғво олдида енгилади. Ҳалоддан топаётгани етмагач, ҳаромдан ҳазар қилмайдиган бўлади. Бир куни пора олаётганида қўлга тушади. У қураётган сароймонанд иморатидан баҳтини топмоқчи эди, адашди – баҳтиқароликни қамоқхонадан топди. Фарзандларини баҳтли қилмоқчи эди, улар баҳтсизлик саҳросига ялангоёқ қувилдилар.

Ҳақиқат ва тўғрилик байроғини ҳамиша баланд тутган одамга баҳтиқаролик ҳамла қилишга журъат эта олмайди. Ким бир марта ҳақиқатдан чекинибди, ким тўғри гап турганда ёлғонни сўзлабди – ўзига ўзи инсофсизлик қилибди. Нима учун? Айтилган ёлғонга кимдир ишонди, дейлик. Лекин орадан кўп фурсат ўтмай бу ёлғон барибир фош этилади. Бир марта ёлғончи бўлган одамнинг кўпчилик олдида ўзини оқлаб олиши қийин бўлади. Ёлғони фош бўлишдан чўчиб яшайдиган одамнинг бошига баҳт қуши кўнганмикин?

Ёши катталарни хурмат қилган киши улардан хайрли дуо олади. Дуо – баҳт саройининг эшигини очувчи қалилтидир. Кичикларга шафқатли бўлган киши орадан йиллар ўтгач, улардан марҳамат кўради. Айниқса, кучдан қолиб, баҳтиқаролик кунларидан нола чекаётганида ана шу шафқат ва марҳамат эшик қоқиб келади.

Дўст ва баҳт эгизакка ўхшайди. Дўсти йўқ одам баҳтсиздир. Дўстига хиёнат қилган одам эса бадбаҳтдир. Агар дўстлик самимий ва холис бўлмаса, орада манфаат кўндаланг ётган бўлса, баҳт уларнинг иккавидан ҳам қочади.

«Чинакам бахти бўлиш учун қандай фазилатларга эришиш лозим?», деб ўзингизга ўзингиз савол берганмисиз? Агар шу савол билан ўзингизни ўзингиз тезтез тергаб турсангиз, сизни тарбия қилган устозингизга балли! Келинг, алҳол яна шу саволни ўртага қўяйликда, юқорида зикр этилган доноларнинг фикрлари асосида биргалашиб жавоб топайлик.

Чинакам бахти бўлиш учун илмдан орттирилган фазилат керакми? Шубҳасиз, керак! Ақл туфайли ҳосил қилинган феъл-автор зарурми? Албатта зарур! Молу мулкдан зиёда саломатлик-чи? Бегумон шарт! Ҳаё-чи? Муруват, садоқат, тавозеъ, меҳнат-чи? Саҳийлик, номус, омонатга вафо, ҳилм ва шижаат-чи? Керак!!! Булар ва булар каби яна ўнлаб фазилатлар ададсиз равишда керак!

Адоват, ҳасад, баҳиллик, такаббурлик, ёлғончилик, мунофиқлик, чақимчилик, хиёнат, жоҳиллик, ялқовлик ва булар каби яна ўнлаб иллатлар-чи? Улардан ҳеч бўлмаса бир ёки иккитаси лозимми? Алҳазар! Алҳазар! Буларнинг биттаси ҳам кўплик қиласи, чунки булар – бадбаҳтликнинг ҳомийлариdir!

Ҳамонки бадбаҳтликдан сўз очилди, бу зулумот салтанатига яна бир карра зийраклик билан қараб ўтайлик. Бахтга эриштирувчи фазилатларнинг зидди киши баҳтини, албатта, қаро қилиши барчага маълум бўлсада, бу иллатларни яна зикр этишдан эринмайлик, токи, баҳтиқаролик булути сиз азиз умидимиз юлдузларига хавф солмасин.

**Ҳикоят.** Валий зот Тустарийдан сўрадилар:

- Бадбаҳтлик аломати қайсилар?
- Илмли бўлатуриб амал қилмаслик. Амал қила туриб ихлосли бўлмаслик. Аллоҳ Таолонинг берганига рози бўлмасдан бошқа нарсалар ортидан қувмоқ. Ҳақ таоло дўстлари суҳбатига қўшилмаслик.

Ҳазрат айтган ҳикматнинг мағзини чақиш учун ўзимизни саволга тутиб, сўраб қўрайлик:

– Эй Одам фарзанди! Илм олишга разгбат қилган-мисан ёки умринг бекорчи ҳою ҳаваслар шамолида тўзиб ўтляптими? Озми-кўпми илмга эриша олган бўлсанг, энди қандай амал қиляпсан? Илмда «гийбат қилинмасин», дейилгани ҳолда сен кунда неча маротаба ўзингни гийбатдан тўхтата олдинг? Бахилликдан-чи? Фазабдан-чи? Амалинг бўлса, дуруст, аммо нима ниятда қилиняпти бу амалларинг? Дўстингга нима мақсадда яхшилик қилдинг? Бу яхшилик ортида тами борми ё холислик? Сен умринг энг гўзал палласида турибсан, сенга ақл ва зеҳн, саломатлик берилган, ота-онанг оила дастурхонини тўкин қилиб қўйган. Қорнинг тўқ, устинг бут. Энди илмни мукаммал олмоқ ўрнига яна ниманинг ортидан қувяпсан? Саноқли сониялар каби тез ўтиб кетувчи умринг давомида неча марта қўлингга китоб олдинг? Бу китобга ажратган вақтингни тарозининг бир палласига, телефон ёки компьютер ўйинига кетган вақтингни иккинчи палласига қўйиб кўр-чи?

Бадбахтиликнинг яна бир нишонаси бор: киши ўзини баҳтли ҳис қиласди-ю, айни чоқда бирон одамнинг баҳтсизлигидан лаззатланади. Кимда шундай иллат бор экан, тавба қиласин-у бу хасталигини даволаш чорасини топсин. Чунки баҳтсизликка учраш унинг қисматида ҳам бор. Баҳтсизликка учраганида бирор дадда бермаса, аксинча, кулса, лаззатланса, нақадар аянчли ҳолга тушаркин!

Мазкур мавзудаги сұхбатимизга «баҳтиёрлик – осоиишта қалбга эга бўлиш билан вужудга келади», деган фикр билан якун ясасак бўлади. Қалб осоиишталиги – илм олиш билан вужудга келади. Сиз ҳозир «баҳт» деб ўйлаётган бойлик, мансаб, ҳатто оила қувончи – барчаси ўткинчидир. Ёшлик кунларини илм олишга сарф этаётган кишининг баҳтигина боқийдир. Илм олиш баҳтига етган одамнинг келгуси ишлари уни саодатга етаклайди. Эндики сұхбатимиз шу ҳақда.

## Инсонийлик тожи

Сүкрот ҳаким «Үқиб-үрганмай туриб ҳам фойда ва зарарнинг фарқига ета оламан, деган одамни тентак деб билмоқ керак», деганлар. Қарайллик-чи, атрофимизда шундай тентаклар бормикин?

Илм хусусидаги суҳбат қилмасак ҳам бўларди. Чунки бу ҳақда кўп гапирилган, кўп ёзилган. Ҳар куни бирингиз шошилиб, бирингиз эриниб, ўқишга борасиз. Бирингиз хоҳишсиз, бирингиз кучли интилиш билан илм оласиз. Шунга қарамай, бу мавзуга кенгроқ тўхталишимиз керак. Зоро, бу мавзуда кўп гапирилгани билан тенгдошларингиз орасида мазкур фарзга амал қилиш лозимлигини ҳали ҳам тўла ҳис қила олмайдиганлар ҳам бор.

Ота-она олти ёки етти ёшга етган фарзандини мактабга беради, чунки ҳукумат белгилаган тартиб шундай. Мактабни битиргач, бировлари: «Шунча ўқиганинг етар, энди менга шаҳар олиб берармидинг», дейди (*Бу гап қизларга нисбатан кўпроқ айтилади, тўғрими? Бу ота-оналарга Расулуллоҳ (с.а.в.)нинг «Илм исташ ҳар бир муслим ва муслима учун фарзdir», деб марҳамат қилганларини эслатамиз. Мазкур шарафли ҳадисда «муслим» ва «**муслима**» деб алоҳида таъкидланишига эътиборни тортамиз. Кўп масалаларда умумий тарзда «мусулмонлар» ёки «эй иймон келтирганлар!» дейилгани ҳолда аёлларнинг илм олишилари фарз экани алоҳида таъкидланиши «қизларнинг ўқиши шарт эмас», дегувчиларга сабоқ бўлишини истардим).* Яна бировлари: «Ҳамма олим бўлиб кетаверса, подани ким боқади?», деб ҳам қўяди. Афсусимиз шуки, бу бемаъни талаб айрим ёшларга ёқиб тушади. Поданинг бокувсиз қолиб кетишидан ташвишланишлари яхши. Аммо бу ҳаракатимиз билан комил одамийлик талабларидан бирини инкор этаётганларини ўйлаб кўрадиларми? Уларга «подани боқиши учун ҳам илм керак», дейилса, эҳтимол заҳарханда қилар-

лар. Уларга балки Сүкрот җакимнинг «Ўқиб ўрганмай туриб ҳам фойда ва заарнинг фарқига ета оламан, деган одамни тентак деб билмоқ керак», деган ҳикматли гаплари жавоб бўла олар? Эҳтимол, Сўфи Оллоҳёр ҳазратлари бу сатрларни айнан шундай биродарларимизга атаб битгандирлар:

*Агар бўлмаса илминг, э сабук сайр,  
Билур болинг ву болинг барчасин хайр.*

Демоқчиларки, э шошиқалоқ инсон, илминг бўлмаса, сен учун фойда ҳам, зарар ҳам бирдир. Зеро, сенинг заиф фикрингча, гуноҳларингнинг барчаси ўзингга хайрлайдай бўлиб кўринади.

Одам маймунсифат, ҳеч нарсани билмайдиган, маданиятсиз ҳолда яратилмаган. Аллоҳ одамни илмли қилиб яратган. Аллоҳ таборак ва таоло элчиси Иброҳим алайҳиссаломга: «Эй Иброҳим, Мен олимман ва олимларни яхши кўраман», деб марҳамат қилган. Жоҳиллик Одам болаларида кейинчалик пайдо бўлган. Одам кўз, тил ва қалб билан ҳайвонлардан фарқланади. Айрим ҳайвонларнинг кўзлари пиёладек келади, боши ҳам шунга яраша жуда катта бўлади. Аммо улар ўқиши ва илм олиш фазилатидан маҳрумлар. Яралмиш маҳдуқлардан инсонгагина илм раво кўрилган. Ҳеч қайси маҳдуққа берилмаган маърифат кийимлари Одам болаларига насиб этилган. Донишманд: «Хотинлар ипак кийимларини безанмоқ учун эмас, балки ўз гўзалликларини кўримоқ учун киядилар», деган экан. Одам ўз инсоний қиёфасини асрashi учун ҳикмат ва маърифат либосини кийиши шарт. Баъзилар қилиб қўйган номаъқул ишлари учун нолиб, «Мени шайтон йўлдан урди», дейдилар. Шайтон йўлдан оздиргани рост. Аммо билмоқ лозим: шайтон алайҳилаъна илмли одамни, айниқса, илмига тўла амал қилувчи одамни йўлдан оздира олмайди. Илмга интилган киши энг яхши инсондир. **Илмдан юз ўгириш – инсонийлик**

**даи юз ўгириш** демак. Чунки **иљм – инсонийлик тожи** ҳисобланади. Инсон иљм билан шараф топади. Мол-мулк эса жоҳилнинг фууруландиган матоҳидир. Иљм одамни юксалтириб, ундан ёдгорлик қолдиради.

*Яна бир ҳикмат бор: ҳазрати Одам –  
Билим, ақлу идрок сабаб муҳтарам.*

«Қутадғу билиг»даги бу байт бизнинг аждодимиз ким эканини эслатиб турмайдими? Тарихдан аёнким, Одам болалари ер юзида пайдо бўлган дастлабки пайтларданоқ иљм сари, ўрганиш сари интилганлар. Ҳазрат Али (р.а) дебдиларким: «Жаннатга кириш ҳайратланарли муваффақият эмас, **маърифат – дунёнинг ўзида жаннатга эришиш** демакдир». Ўқув-идрок қоронги тундаги машъалага ўхшайди. Билим эса машъаладан тараалаётган нурга қиёс. У кишини ёритади, унга рўшнолик беради. Ҳар қандай ҳурмат кишининг ўқув-идрокидан келади. Ўқув-идроксиз киши бир ҳовуч кепак билан тенг, дейдилар. Заковат – ўзаро онт ичишиб дўстлашган кишиларга ўхшаса, билим – яқин қариндошларга ўхшайди. Буни дилга туғиб олмоқ, фойдалидир. Дўст-оғайнилар, қариндош-уруглар даврасидаги киши ўзини дадил сезади. Шундай экан, билимсизлар-чи? «Сўзни билимдон кишига сўзлаш керак, билимсизнинг тилини тушуниш қийин», деб бекорга айтмаганлар.

Билим – мисоли бир жилов, у одамни барча ёмон, ярамас ишлардан тийиб туради. Иљм эгаси ўз тилакларини топади, орзу-мақсадларига эришади. Ақл-идрок эгаларининг нафи ҳар доим кўпчиликка тегиб туради. Билимлилар элда азиз бўладилар. Ҳурмат қозонадилар. Бутун ишлар уқув-идрок билан амалга ошади. Барча мураккаб ишлар билим билан ҳал этилади. Билимсиз кишилар – доноларнинг душмани. Билимсиз доимо доноларга хорлик тилайди. Бу улар кўнглиниг туб-тубига чўкиб ётган ҳасад аломати. Иљмсиз

одам сүқирга ўхшайдыки, уни камситиб, четга суриб ташлаш инсофдан эмас. Балки кўр кўзни очиш учун билимдон илм хазинасидан унга нур бериши лозим.

Бақувват одамнинг жисмоний кучи доимий эмас, бутун бўлмаса, эртага тугайди. Лекин илм мангу яшайди. Илм эгаси бадавлат бўлмаса-да, ўз иззат ва журматини йўқотмайди. Аксинча, итнинг бўйнига тилла занжир боғланса-да, ҳамма жойда ҳаром ҳисоблангани каби, илмиз ва саховатсиз давлатманд ҳам кишилар нафратига дучор бўлади.

Илмли одамлар давлатнинг кўплигидан қувониб, озлигидан ранжимайди. Чунки илм шундай битмас ва туганмас хазина ва давлатки, уни ҳеч ким инсондан тортиб ололмайди. Фалакнинг айланиши ҳам унга таъсир эта олмайди. **Ҳар нарса кўпайса, қиймати тушади. Аммо илм ва одоб бундан мустаснодир.**

Улуғларимиздан Абулқосим Замаҳшарий айтадилар: «Хушсифат ва яхши хулқлар билан зийнатланмаган кимсани ипак кийимлар зийнатлай олмайди. Ернинг зийнати илм эгалари билан, кўкнинг зийнати юлдузлар биландир. Илм бир төр мисолидир. Бу тоғдан ошув кўп душвордир, тушув эса осондир. Билувчи билан кўп текшириб янгилик кашф этган билимдон орасида фарқ каттадир. Капалак ҳам, қарчифай ҳам қанот қоқиб учади, аммо икковининг учиши бирдай эмас. Байт:

*Чин олим ҳийладан узоқдир, узоқ,  
Нурнинг ўз сояси бўлмайди ҳеч чоқ.*

**Ҳадис.** Жаноби Пайгамбаримиз (с.а.в.)нинг аҳли аёллари Умму Салама (р.а.) ривоят қиласидилар: «Ҳасан ёш бола эди, ҳазрати Расулуллоҳнинг косаларидаги сувни ичиб қўйди. Расули акрам савол қиласидилар:

- Менинг косамдаги сувни ким ичди?
- Ҳасан ичди, – деб жавоб қилинди. Шунда рисолатпаноҳ жанобимиз:

– Ҳасан қанча сув ичган бўлса, барчаси илм бўлсин,  
– деб дуо қилдилар».

Киши згаллаган илм ёки ҳунар ҳеч маҳал унга зарар келтирган эмас. «Билимдонга бало йўқ», деб бежиз айтмаганлар. Илмсизлик ва ҳунарсизликнинг хорлик келтириши ҳақида ҳаётда миллионларча мисоллар мавжуд.

Донишманд дебдики: «Мен илм топа олмаган одам нима топганини, илм топган одам эса нима йўқотганини билсан эди...» Илм олишда диққат қилиш лозим бўлган жиҳат: **бу дунёда билмасликдангина эмас, нотўғри биалишдан ҳам ҳазар қилемоқ шарт**. Зотан, бу барча ёмонликларнинг аввал боши ҳисобланади.

Ота-оналар орасида бир тоифаси борки, улар фарзандлари то коллежни (ёки лицейни) тугатгунларича уларнинг илм олишга муносабатлари билан қизиқмайдилар. Ўқишини тутатиш арафасида уни бирон олий ўқув юртига киритиш ҳаракатини бошлайдилар. «Фарзанд азиздир», деган ҳикматга амал қилиб пулларини аямайдилар. Мазкур ҳикматнинг «одоби ундан-да азиз», деган иккинчи қисмини унутадилар. Одоб факат илм орқали камолга етажагини ўйлаб кўрмайдилар. Фарзандни бирон жойга ўқишига беришдан аввал келажакда қанчалик моддий манфаат бўлишини ҳисоб қиласидилар. Камдан-кам ота-оналар «Фарзандимни халқقا, Ватанга яхши хизмат қилиши учун ўқитиш им керак», деган аҳдда бўладилар. Бу ўринда мен шундай ота-оналарни эмас, балки ақл ва зеҳнга суюнмай, пул эвазига олий ўқув юртига кириб ўқищдан қувонувчи фарзандларни маломат қиласидилар.

Сўфи Оллоҳёр ҳазратларининг бу ҳикматлари эҳтимол уларга ибрат бўлар:

*Замона аҳли аксар толиби қадр,  
Бўлай деб садри мажлис, қон қилур садр.*

Дейилмоқчики, бу замондаги илм истагувчиларнинг илм ҳосил қилишдан (яъни илм олмоқликдан) мақсадлари халқ ичидаги ҳурмату обрў топишдир. Бундай мақсад билан охират мажлисининг тўрида ўтиromoққа улар қандай қилиб мұяссар бўлсинлар?

Албатта, бундай ният билан охират мартабасини топиб бўлмайди. Дейдилар: «Фарзандимни шарқшунослик институтида ўқитмоқчиман». Сўрайсиз: «Нечун?» Жавоб берарларки: «Хориж мамлакатларига бориб ишласа, кўпроқ пул топиб келади». Дейдилар: «Фарзандимни ҳуқуқшуносликка ўқитмоқчиман». Сўрайсиз: «Нечун?» Жавоб берарларки: «Бу соҳада пул топиб, бойимоқ осондир». Демасларки: «Фарзандими Ватанга яхши хизмат қилиши учун ўқитгум, фарзандим халққа яхши хизмат қилиш учун илм олсин, сўнг илмига амал қилиб элнинг дуосига етишин...»

Навоий ҳазратлари бу хусусда шундай деганлар: «Илм ўрганмоқ – эътиқодни мустаҳкамламоқ учундир. Аммо бойлик ортириш учун эмас. Саховатсиз бой ёғинсиз буулутга ўхшайди. Илмига амал қилмаган олим устига китоб ортилган эшакка ўхшайди.

*Ҳаммол нафис раҳт ила гар урса қадам,  
Йўқ нафъ анга гайри музд бир, икки дираам».*

Маъноси: ҳаммол қимматбаҳо юқ ташиса ҳам, унга бир, икки дирҳамли иш ҳақидан бўлак фойда йўқ.

Илмли одамни олтинга, билимсизни эса сариқ чакага қиёслайдилар ва дейдиларки:

*Илм агар дилга урап – ёринг эрур,  
Урса танга, шубҳасиз, моринг эрур.*

Агар илмни чин дил ва ихлос билан холисаниллоҳ эгалласанг, бутун ҳаётинг даврида оғирингни енгил қилиб юрувчи йўлдошинг бўлади. Агар дунё бойлигига етишмоқ мақсадида илм олсанг, эгаллаган илминг

илон бўлиб, танангга чирмашади ва умринг бўйи сени азоблайди.

Юқорида зикр этилган бир неча салбий ҳолатларга учраб турганимиз учун ҳам, айтадиганларимиз так-рор бўлса-да, мазкур мавзуни четлаб ўта олмаймиз.

Илм эгаллаш инсоний бурч, юксак масъулиятдир. Илм Аллоҳни таниш, ўзликни англаш, дунёни идрок этишнинг муҳим воситасидир. Шунингдек, давлат қудрати ва мамлакат тараққиёти асосида ҳам илм ётади.

Суюкли пайғамбаримиз (с.а.в.) дейдилар: «Ким илм ўрганиш учун йўлга отланса, Аллоҳ Таоло унга жаннат йўлини осонлаштиради. Малаклар илм толибининг амалидан хушнуд бўлганларидан унга қанотларини ёзадилар. Ердаги ва самодаги барча мавжудотлар ва ҳатто балиқлар унинг гунохларини кечишини сўраб, Аллоҳдан унга афв тилайдилар. Олимнинг обиддан устунлиги мисоли тўлин Ой нурининг бошқа юлдузлар нуридан устунлиги кабидир. Шубҳасиз, олимлар – пайғамбарларнинг ворисларидир. Пайғамбарлар ўзларидан кейин на бир динор, на бир дирҳам қолдирдилар. Ким илм олса, ўзига жуда улуғ бир улуш олган бўлур».

Яна бир ўринда бу ҳадис ривоят қилинади: «Бир соат илм ўрганиш бир кечалик ибодатдан яхши, бир кунлик дарс эса уч ой тутилган нафл рўзадан афзалдир». Мазкур шарафли ҳадисни тўғри англамоқ лозим: бунда нафл ибодатлар инкор этилаётгани йўқ, балки улардан ҳосил бўлажак савоб билан илм олмоқлиқдан ҳосил бўлувчи савоблар миқдори қиёсланяпти.

Муҳтарам Пайғамбаримиз (с.а.в.) илм олаётib ё илм бергаётib вафот этган кишини шаҳид, деганларким, бунинг ҳикматини англаб етсак, рўпарамиздаги кўп тўсиқларни енгигб ўта оламиз.

Илм – инсонийлик тожидир. Инсон илм билан шараф топади. Мол-мулк эса жоҳилнинг гуурланадиган матоҳидир. Илм одамни юксалтириб, ундан ёдгорлик қолдиради. «Садақатул жория» деб аталмиш гўзал амал

мавжудким, илм ҳам шу доирага киради. Илм туфайли қолдирилган, одамларга манфаат берадиган ёдгорлик шу олимнинг вафотидан кейин ҳам номаи аъмолига ёзилиб турадиган савоб ёмғирини ёғдириб туради.

«Гулистон»да шайх Саъдий ҳазратлари бир ҳикоятни баён қиласидилар.

**Ҳикоят.** «Миср вилоятида икки амирзода бор эди. Бири илм ўрганди ва бири мол жамъ этти. Охируламр, бири алломаи аср бўлди ва бири Азизи Миср бўлди. Сўнгроқ ул бириким, мол жамъ этмиш эрди, илм ўргангонга ҳақорат кўзи билан қараб, деди: «Мен салтанатга етушдим, сен ҳануз бурунги масконатда турмишсен». Бу деди: «Эй биродар, Ҳақ Таолонинг бу неъмати шукрин ҳаргиз адo қила олмасменким, пайғамбарлар меросин топмишмен ва сен фираъви ва Хомоннинг меросин топмишсен, яъни Миср мамлакатига подшоҳ бўлмишсен».

Маснавий:

Эрурмен нотавон ул наевъким мўр,  
Эмасмен нишсан ондокки занбур.  
Мунинг шукрин нечун қилгум мани зор,  
Ки эрмасмен қавийю мардумозор.

Маъноси: мен ниш санчиб озор берувчи арилардан эмасман, мен чумоли каби беозорманким, нечун бунинг шукронасин қилмай?

Мақсадлари фақат бойлик бўлганлар унутмасинларким, Сулаймон (алайҳиссалом)га илм, мол ва мулкдан биттасини танлаш таклиф қилинганда ул зот илмни танладилар. Сўнг унинг сабабидан молга ҳам, мулкка ҳам эга бўлдилар.

Шоирнинг бу сатрларига диққат қилайлик:

Илм ҳам боқийдир, ҳам абадий у,  
Илмдан бошқаси саватдаги сув.

*Илмсиз киши нима? Ҳайвон эрур,  
Жонсиз тана, бир нақшисиз айвон эрур.*

Исломнинг асосларидан бўлган намоз, рўза, ҳаж, закот одам балоғат ёшига етгандан сўнг фарзга айланади. Бироқ илм олиш муддати бешикдан то лаҳадга қадар, деб белгиланган. Яъни, она қорнидан туғилганидан то лаҳадга қадар бўлган давр мобайнода бани Одам илм олмоққа мажбур. Қуръони Каримнинг 752 жойида «илм» калимасининг зикр этилиши бу мажбуриятни бажармоқ ғоят зарур эканини таъкидлайди. Қудсий ҳадисда Аллоҳ таборак ва таоло марҳамат қиласадиким: «Эй одам боласи! Билғилки, саломатлик – бирликда, ихлос – тақвода, художўйлик – тавбада, **ибодат – илмда** ва бойлик – қаноатдадир». Демак, илм олмоққа зеҳни етарли бўла туриб бу фарз амалига эътиборсиз юрган одам бурчини бажармаётган экан. Бу хусусда «Қутадфу билиг»да ажиб ҳикмат бор:

*«Билиг ўрган ашну топугқа ўкуш,  
Билигсиз топуг осги булмоз улуш».*

Дейилмоқчики, ибодатдан бурун илм ўрган. Билмасдан ибодат қиласдан билан савоб тегмас.

*Билигсиз топуг қиласишиндан кўрў,  
Билиглиг ўюмииш муёни ўрў.*

Дейилмоқчики, илмсизлик билан ибодат қиласдан кўра, илм билан ухлаганинг савоби кўпdir.

Унутмайликки, ҳаётнинг чегараси бор, илмнинг эса чегараси йўқ.

**Ривоят.** Бадр урушида асирга олинган мушрикларни нима қилиш масаласи кўрилганда баъзилар уларни ўлдириб юборишни айтдилар. Аммо асиirlарни маълум маблағ тўлаш ҳисобига қариндошлирига бериб юбориш таклифи маъқулланди. Айрим асиirlар

камбағал, уларни сотиб олувчи қариндошлари ҳам йүқ зди. Шунда Расууллоқ (с.а.в.) болаларга илм ўргатиши ни озод бўлишларининг шарти этиб қўйдилар.

Одамлар икки тоифада: билувчилар, яъни илм олганлар ва билловчилар, яъни илм олмай жоҳил бўлиб қолганлар. Билим олганларни илмларига қараб даражаларга ажратиш мумкин. Илмни ўрганишни бошлаган-у берилган зеҳн ва идрок неъматига хиёнат қилиб, дангасалиги, сабрсизлиги ёки лоқайдилиги туфайли давом эттиргмаган. Буларни чала билими десак, ранжиш масин. Идроки ва имконияти кўтарганича ўқиб ўрганган, аммо илмни тўла қамровда эгаллай олмаганларни ўртacha билими деймиз. Юқори даража, мукаммал илмли олимларнинг мавқеи ҳар томонлама баланд. Бу хусусда Аллоҳ ўз қаломида «Биладиган зотлар билан билмайдиган кимсалар баробар бўлурми?» («Зумар» сураси) деб марҳамат қиласиди. Албатта, улар тенг эмаслар. Ўзингиз мулоҳаза қилиб кўринг-чи: тилсиз ва қулоқсиз одам билан саломат одам tengmi? Тилсиз ва қулоқсиз одам имо ишоралар билан соғ одам вазифасини бажариши мумкин. Лекин илмсиз одам илмли кишининг вазифасини ҳеч қачон бажара олмайди.

Буқрот ҳаким айтганларидек: «Агар киши ўзи мукаммал эгалламаган илм ҳақида гапирмаса, одамлар орасида тушунмовчилик ва тортишув юз бермайди. Жангу жадал олови сўнади».

Шу ўринда бир масалага ойдинлик киритишига ҳаракат қилиб кўрайлик: илм олишга даъват этувчи оявлар ёки ҳадисларни айрим биродарларимиз фақат диний илм олишга хос деб шарҳдамоқчи бўладилар. Уларнинг бу фикрлари тўғри эмас. Чунки дунёвий илмларга эга бўлмаган миллат асоратда қолади. Шунинг учун ҳам Расууллоқ (с.а.в.) «Илм олиш учун ҳатто Чин мамлакатига ҳам боринглар», деганлар. Хитойда ислом дини илми мутлақо йўқ эди-ку? Бутпарастлар мамлакатига бориб фақат дунёвий илмларни ўрганиш мумкин бўлганлиги ҳақиқат эмасми?

Аслида илмни диний ва дунёвий деб иккига ажратиш түгри эмас. Зеро, бу ажратиш насроний динининг меваси. Бу дин тарихида «инквизиция» (лотинчада «таъқиб» маъносини англатади) деган жаҳолат ва зулм даври бўлган. Католиклар оламида XIII асрда бошланниб, то XIX асрга қадар давом этган бу ҳаракатдан асл мақсад насроний эътиқодига зид бўлган таълимотларга қарши курашиш эди. Бу даврда неча ўн минглаб одамлар гулханда ёқилди. Булар орасида жодугарликда айбланган олимлар ҳам кўп эди. Ислом динида бундай жаҳолат бўлмаган, аксинча, барча илмларни олиш рағбатлантирилган. Дунё фанининг шарқда гуллаган, бекиёс даражада ривожланган даври айнан ислом тарихи билан боғлиқ. Хоразмий, Беруний, Фарғоний, Форобий, Ибн Сино каби илм даҳоларининг фаолиятларини ёдга олсак, фикримизга далил бўлар. Ҳам дунёвий, ҳам ухровий илмни биргаликда олиб борилганига Амир Темур ҳазратларининг ҳаётлари ҳам мисол бўла олади. Ул зот «ҳофизул Куръон» бўлганлар. Куръон, ҳадис, тавҳид, тафсир, фиқҳ, тасаввуф илми билан бир қаторда тарих, фалсафа, жуғрофия, иқтисод, ҳарб, санъат, меъморликни яхши билганларни тарихдан маълум. Ўзингиз айтинг: жуғрофияни билмай туриб жаҳонгир бўлмоқдик мумкинми эди?

Беҳбудий миллат келажаги ҳақида қайғуриб фикр юритар эканлар, «дунё турмоқ учун дунёвий фан ва илм лозимdir. Замона илми ва фанидан бебаҳра миллат бошқаларга поймол бўлур», деб таъкидлаган эдилар. Бу фикрнинг нақадар түгри эканини англаш учун тарихга бир назар ташлаш кифоя. Шарқ мамлакатларининг қудрат топиши фақат илм билан бўлди. Бу мамлакатларни хорланиши, ўзга мамлакатларга қул бўлишлари эса илмнинг таназзулга юз тутиши, бошқачароқ айтсан, жаҳолат туфайли бўлди. Ҳа, ғоят кучли мамлакатларни илмсизлик барбод этган. Илмдан юз ўгирган мамлакатлар ўзга мамлакатларга қул бўлишдан аввал ўз жоҳилликларига қул бўлган эдилар. Зеро,

Сүкрот ҳаким демишларки, «фақат бир эзгулик бор – билим ва фақат бир ёмонлик бор – жаҳолат». Нажот эса бир – Бухорий ҳазратлари ёзғанларида, «**дунёда илмдан бошқа најот йўқ ва бўлмагай**». Қай миллат олам аро улуғликни истабди, Юсуф Ҳожиб ҳазратларининг ўтилларига амал қиласин: «**Ўқув қайда бўлса, улуғлик бўлар, билим қайда бўлса, буюклик бўлар**». Дунё неча минг йиллардан бери илмсиз одамнинг улуғланганини кўргани йўқ.

«Қутадгу билиг»да шундай ҳикматли сатрлар бор:

*Билиг бирла ёзлур қомуг турс тугун,  
Билиг бирла уқуши уқ тирилгил ўгун.  
Билиг ишқа тумтқил тақий тил кўпу,  
Тақий ўгранутур усанма бу кун.*

Дейилмоқчики: ҳар бир қийин ишлар илм билан ҳал қилинур. Шунинг учун ақдли бўл, илмли бўл. Ақл билан яша. Илмни тўғри тил билан ишлат. Яна бир тарафдан ўрганишини қўйма.

Илмнинг ҳамма турини эгаллашга барча ҳам қодир эмас. Чунки одамлардаги зеҳн даражалари ҳар хил. Шунинг учун дунёвий илмларни эгаллаш фарзи кифоя саналади. Мисол учун, бир одам математиканинг ғоят оғир масалаларини осонгина ҳал қилиб бера олса, бошқа одам бу формуласларни идрок қила олмайди. Бошқа бир одамнинг лаёқати кимёда, яна бошқаси-ники табобатда...

**Умидимиз юлдуздари**, ўқиш жараёнида сизни бир нарса қийнайди. Барчанинг бир даражада илм ололмаслиги ҳақиқат. Лекин катталар бу ҳолатни кўпинча тан олмайдиларки, сизнинг паришонлигингиш шундан. Бу ҳолатдан менинг ҳам кўнглим оғрийди. Кўпгина оиласларда фарзанд бечора ўз зеҳнига муносибини эмас, балки ота-онаси истагига мос илмни эгаллашга мажбур. Шу илмга унинг иқтидори борми, йўқми ўйлаб ҳам кўрилмайди. «Фалончининг ўғли

физик бўлибди, менинг ўғлимнинг ундан нима ками бор, у ҳам физик олим бўлади!» деб чиранадилар ёки «фалончининг қизи уч ойда инглизчани ўрганиб бийрон-бийрон гапирадиган бўлибди, сен дангасасан, ҳали тўртта гапни эплаб гапиролмайсан!» деб уришадилар. Оқибатда боланинг умрини совурадилар.

Ўрни келганда олдинги суҳбатимизда бошлаб қўйган гапимни давом эттирай.

Бу дунёда яшаб, илмга рағбат этмаган кишини ҳаммомга кириб, ювинмай чиқсан нодонга ўхшатишади. Шукрким, илм истовчи ёшлар кўп. Аммо улар орасида ҳаммомга ғоят кўп миқдорда пул тўлаб кирганлари ҳолда, ювинмай юриш учун яна қўшимча ҳақ тўловчилар ҳам бор. Демоқчиманки, ота ёки она, амаки ёки тоға фарзанди ёки жиянининг ўн икки йил ўқигани билан билимсиз эканини, илм олмоққа рағбати ёки идроки йўқ эканини билса-да, пул, ўз номи билан айтсак, **пора** эвазига юқори ўқув даргоҳига киритадилар. Бу билан кифояланишса, олам гулистон эди. Афсус шундаки, ўша бола, илмга чанқоқ, аммо пули бўлмагани туфайли ўқишга кира олмаган зеҳн эгасининг ўрнини эгаллаб турган ўша думбул, барibir илм олмайди. Тўрт-беш йил мобайнинда биттагина дафтарни дастмоя қилиб кўтаради-ю бориб-келаверади. Имтиҳон чоғларида эса отасининг чўнтаги яна кавланади. Бундан айрим муаллимлар ҳам манфаатдорлар. Ўша «айрим муаллимлар» илм истагидаги идрокли бола ўрнига дангаса ва нодоннинг ўқишга кириб қолганидан қайғурмайдилар. Жамият тақдири майли, ҳатто ўз фанларининг келажагини ўйламайдилар. Жамиятга хиёнат қиласидилар, фанга хиёнат қиласидилар. Илмсиз болага диплом берилиши туфайли жамиятнинг озор чекиши уларни ташвишга солмайди. Пора бериб ўқишга киргандарни икки тоифага ажратиши мумкин: биринчиси, юқорида айтганимиздек битта дафтарни кўтариб олиб ўқишга бориб келувчи такасалтанглар. Иккинчи тоифа булардан ҳам ўтиб ту-

шади. Бу тоифа бирон виждонсиз муаллимни топиб, унга синов дафтарчасини бериб қўяди, вассалом! Ўзи ўқишихонага қадам босмайди. Синов дафтарчасига эса баҳолар қўйилаверилади. Оқибатда бу ноинсоф диплом ишини ҳам аъло баҳога «ҳимоя қилди». Бундайларга ёшларнинг ўзлари «зачеткаси ўқиди» (синов дафтарчаси ўқиди) деб, таъриф берадилар.

**Умидимиз юлдузлари**, сиз бу тенгдошларингизни яхши биласиз. Кўнглингиз ғашланади. Лекин бирон чора кўриш имконияти ҳозир сизда йўқ. Бу ҳолатларни кўриб, «ҳаётда адолат йўқ экан» деган бадбин хуносага ҳам келиб қоласиз. Сиз шу бадбиналикдан эҳтиёт бўлинг. Тўгри, адолатсизликлар бор, лекин у узоқ йиллар давом этмаслиги керак. Сиз улғайтанингизда бу адолатсизликларга барҳам бериш имконига эга бўласиз. Кўпроқ шу ҳақда ўйланг. Ота-оналарингиз замонидаги хатоларни қайтармаслик чорасини кўришга ҳозирдан тайёрланинг. Адолатсизликни кўрганда «менга нима!» деб кўл силтаб қўйиш, лоқайд бўлиш касаллигига ҳозирдан чалиниб қолманг.

Кейинги йилларда хорижга бориб ўқишига интилиш кучайди. Бу ҳаракатни бутунлай инкор этмаганимиз ҳолда деймизки, хорижда олинадиган илмни ўз юртимизда ҳам эгаллашимиз мумкин. Чunksи ҳам ухровий, ҳам дунёвий илмларда етук олимларимиз борки, баъзи соҳаларни хорижликлар келиб биздан ўрганишса арзиди. Бу борада фақат бир масала ҳал қилинса бас: ўргатувчига ҳам, ўрганувчига ҳам хориждаги шарт-шароитларни муҳайё қилиб берилса кифоя. Олдимиздан оқувчи сувни қадрласак, ўзимизга фойдадир (Биласизки, кейинги йиларда жумҳуриятимизда дунёнинг йирик дорулғунунлари Вейсмейстер, Турин, Сингапур университетлари, Россиянинг иқтисод ва геология соҳасидаги олий ўқув юртлари ўз бўлимларини очганлар). Бизнингча, гап **қаерда ўқишида эмас, қандай ўқишида!** Илмни ўрганишга чин ихлос билан киришиш керак. Ишига ихлоссиз киришган уни охи-

рига етказа олмайди. Кейинги йилларда хорижга борган **айрим** ёшларимизнинг асл мақсадлари илм олиш бўлмаганини кўрдик. Таъбир жоиз бўлса, ўша **айрим** ёшларимиз илм толиби сифатида эмас, томошаталаб сайёҳ мақомида ўйнаб-кулиб бориб келишди. Илмга эмас, сайру томошаларга ихлос қўйишди. Яъники, хориж ҳаммомига бориб, ювинмай қайтиб келишди. Номлари улуғ: чет элда ўқиб келган! Аммо супраси қуруқ – бошда илм йўқ, бирон-бир ишни эплолмайди. Илм танбал ва ишёқмасларга насиб этмайдики, бу ҳам сизу бизни ўйлантириши лозим бўлган бир масъала-дир.

Айтишларича, бир одам арабча ўрганишни ҳавас қилиб, илмли дўстларидан биридин олтин тахта устига бир неча арабча сўзларни ёзиб беришни сўрайди. Дўст илтимосни бажаради. У одам эса араб сўзлари ёзилган олтин тахтани уйига олиб боради ва унга ҳар замон – ҳар замонда бир қараб қўйиб, ниҳоят «арабчани жуда яхши билиб олдим», деган қарорга келади-ю мажлисда арабча сўзламоқчи бўлиб, миси чиқади. Мажлис аҳлидан бири унинг илмсизлигини фош этиб, кўпчилик олдида уялтиради. У жоҳил одам эса: «Мендан хато топа олмайсан, сен ёғоч тахтага ёзиб ўргангансан. Мен ўрганган олтин тахтага шундай ёзилган», деб разабланади.

Илмли бўлиш инсонга ўз ҳурматини оширмоқ ва иззатини сақламоқ учун ҳам керакдир. Илм бошқаларга ўргатиш учунгина қўлга киритилса, одамнинг ўзи ундан бирон наф кўрмаса, у сувидан барча фойдаланадиган, лекин ўзи бебаҳра булоқقا ўхшаб қолади. Икки нарсадан: илм ва мол-дунёдан одам аввал ўзи фойдаланиб, сўнг бошқаларга улашиб бериши керак, дейдилар. Аммо мазкур фикрни бу шарафли ҳадис зидди деб тушунмаслик керак. Шарафли ҳадислардан бирида зикр этилишига кўра, агар ерни одамга қиёсласак, ёмғир илмдир. Ёмғирдан ернинг ўзи ҳам манфаат кўради, тўяди ва шунинг эвазига бағрида

экинлар ўстиради, мева беради. Баъзи ерларда сув тўпланади, кўл бўлади. Бу сувдан одамлар, жониворлар ичадилар. Айрим ерларга ёмғир ёққанининг фойдаси йўқ, сингиб кетаверади, гиёҳ унмайди. Ернинг ёмғир сувига тўйиши, сўнг мева бериши, бағрида тўпланган сувдан бошқаларнинг баҳраманд бўлиши илмга амал қилмоқдикка бир ишора. «Ер тўйса – эл тўяди», деган мақолга кўра, агар ер тўймаса, унинг бағрида униб-ўсувчи ўсимликлар мева ҳам бермайди.

Илмга интилган киши энг яхши инсондир. Илмдан юз ўгиришни эса инсонийликдан юз ўгириш деб билмоқ керак. Киши «Эртага нима бўларкинман?», деб ғам чекмаслиги учун кунини илм билан нурлантириши зарур бўлади. Чунки илм уни адаштирмайди, хайрли оқибат келтиргувчи йўлларга етаклайди. Танлаган йўлининг тўғри эканини киши қандай англайди? Агар илм топгани сайин кимсанинг кибри ўла борса, демак, у тўғри йўлда. Қуёш зулматни кувгани каби, илм нури одамдаги ботил ишончларни кетказдими, демак, унинг қаршисида шараф дарвозалари очилибди. Ботидан юз ўтирган одам илмни илм денгизидан идишига сикқанича олаверади. Ҳамма нарсани йўқдан бор қилганинг англашган ва билган одам оқибатда энг катта илмга эришган бўлади. Саҳрода адашган сайёҳга кўқдаги юлдузлар, ҳаётда адашгандарга эса олимлар йўл кўрсатадилар. Илмни ўрганишга киришмоқдан аввал ҳидоят йўлидаги устозга ихлос билан боғланиш керак. Таъкид этамизки, илмга ва устозга ихлоссиз боғланган кимса ишни охирига етказа олмайди. Шунингдек, мағрур ва нопок олимлардан илм олганлар ҳам мақсадга етолмайди. Замонасининг энг аъло олими саналса-да, ахлоқан бузук, жамоатга, жамиятга қўшилмайдиган инсонлардан ҳар доим узокроқ юриш ва сақданиш лозим. Зеро, бундай кишилардан кўп заарлар келиши мумкин. Олимларда учрайдиган ҳар қандай иллат бошқаларнидан кўра зааралироқдир. Олимлардаги ёмон хулқ юқумли хасталик

сингари ғоят хатарлидир. Унинг яхши инсонларга тез ўтиб қолиш хавфи мавжуд.

Илмига амал қиуувчи олим – олам нуридир. Инсонлар шу нурга интиладилар. Тоғларга чиққанда киши роҳатлангани каби илмга рағбат қилган ақл эгаси олимларнинг ёнига борганда ажиди бир ҳузур топади. Илмига амал қилмаган уйқусираган одам кабидир. Агар илм тилда қолаверса, қалб тирилмайди. Илмни оғзида қолдириб, ёмон амаллар қилганлар Куръони Каримда китоб юкланган эшакка ўхшатилган. Кимки илмига мувофиқ иш тутмабди, эшаклиқдан кутулмабди. Бошқача айтганда, бундай ҳолат берилган зеҳн, идрок, ақлни исроф этмоқликдир. Масалан, кибернетика илмини эгаллаган кимса, бозорда аёллар ичкўйлагини сотиб ўтиrsa, унга нима деймиз? Имом Фаззолий ҳазратлари илмига амал қилмаган олимни бошқаларни кийинтиргани ҳолда ўзи ялангоч қолган игнага ўхшатганлар. Илмига амал қилмаган кишининг жоҳил ва нодондан фарқи йўқ, дейишади.

Чунки «Илм билан амал – лафз ва маъно жиҳатидан бир-бирига мулоzим ва мувофиқдир. Чунки илмдан мақсад – амалдир.

*Илм, Навоий, сенга мақсуд бил,  
Эмдики илм ўлди, амал айлаги».*

Ҳазрат Навоий яна таъкид этарларким: «Илм ўқиб, унга амал қилмаган – ерни ҳайдаб, уруғ сепмаган ёки уруғ сепиб, ҳосилдан баҳра олмаганга ўхшайди».

Имом Аъзам (р.а.) бу хусусда «Чўлда адашганда кўп озуқадан кўра, адашмай тўғри юрилганда озигина озуқа қанчалик фойдали бўлса, илмга асосланган озигина амал ҳам жаҳолат или қилинган кўп амаллардан фойдалироқдир», деганлар.

Хожа Аҳмад Яссавий ҳазратларининг ҳикматларида ўқиймиз:

Амал қылса олимлар дину ойин ёруқи,  
Күрса бўлур аларни ранги-рўйи кўркини.  
Амал қылмай қол илмин, ўқуй билмай қолганлар,  
Орқасига кўтарур қирк эшакни юкини.  
Хожамен деб лоф урма, ушбу дунё бепоён,  
Биламен, деб айтма, сен, кўнгилдаги чиркини.

Саҳл Тустарий ҳазратлари таъкид этмишларким: «Олимлардан ташқари ҳамма ўликдир. Илмига амал қилювчилардан бошқа барча олимлар сархушдир. Ихлослилардан бошқа барча амал қилювчилар алдангандир». (Илмсизлар ўлик каби, дейилганда жисмнинг эмас, руҳнинг жонсизлиги назарда тутилганини англаб турибсиз, деган умиддамиз.)

Имом Фаззолий ҳазратларининг қуида баён этилгувчи ибратларини ҳар биримиз ёдда сақласак чакки бўлмайди.

**Ҳикоят.** «Ақдий ва шаръий илмларни ишғол қилган эдим. Жуда кўп талабаларим бор эди. Қарасам, турли эҳтиромларга ўралиб қолибман. Шунда илм олишдан мақсадимни тушунгандай бўлдим. Амалим Аллоҳ ризоси учун эмас, мақом савдоси ва шухрат орзуси йўлида экан. Билдимки, ҳалок бўлишим мұқаррар. Жарнинг ёқасига келиб қолибман. Ўз-ўзимга: «Қани, тезроқ ҳаракат қил. Умринг оз қолди. Ўрганган илмларинг ҳақиқатга айланмас экан, бу бир алданишdir. Энди вақтингни бўш ўтказишда давом этаверсанг, оқибатинг нима бўлади?», дедим.

Шу пайт ўзимда бир ўзгариш сездим. Дунё ва дунё савдоларидан қочиш билан дунё орзулари ва охират орзуси ўртасидаги ҳайрат водийсида олти ой жонсарак ҳолда қайфу ва кўзёшлари ичиди қолдим. Юрагим изтироб чекарди. Накадар ожиз эканлигимни тушуниб етдим. Ихтиёrimнинг қўлдан кетаётганига томошабин бўлиб турар эдим. Давосиз дардга, чорасиз хасталикка дучор бўлган киши каби Аллоҳга ёниб-ёлбордим, тазарру айтдим. Ниҳоят, «Намл» сурасида:

« ёки музтар-ночор одам дуо-илтижо қылган вақтіда (дуосини) ижобат қыладиган ва (унинг) мушкулини осон қыладиган...» дейилгани каби, Аллоҳ Таоло дуоларимни қабул айлаб, қалбимни уйғотди. Ичимдаги мол ва мақом орзуси йўқ бўлди. Ҳаммасидан юз ўтиридим.

Зикр, узлат, хилват, нафсни тийиш, риёзат ва ахлоқимни мукаммалаштириш билан машғул бўлдим. Илмал яқин билан билдимки, Аллоҳга етишганлар ва ҳидоят йўлида юрганлар тасаввуф аҳли бўлган буюклар экан. Энг гўзал сийрат ва ахлоқ уларда экан. Зеро, уларнинг зоҳирий ва ботиний ҳоллари пайғамбарлик нуридан олингандир. Ер юзида эса пайғамбарлик нуридан ҳам порлокроқ нур йўқдир».

Абдуллоҳ ибн Масъуд (р.а.) сўрадилар: «Эй Расулаллоҳ, охиратда сизнинг умматингиздан ёмонларнинг ёмонроғи ва азобининг кўпроғи қайси одам бўлади?» Ул саййид бул сўроққа шу он жавоб бермадилар. Сўрагувчи киши уч марта такрор сўраганларидан сўнг Пайғамбаримиз (с.а.в.) дедилар: «**Охиратда ёмонларнинг ёмонроғи – илмларидан фойда олмай, амал қиласалар пора учундир. Ҳалқ орасида нима ҳукм қиласалар пора учундир. Авомларнинг нафси ҳаволарига қараб юрган олимларга бериладиган азоблардан қаттиқроқ азоб ҳеч кимда бўлмас**».

Жавобнинг савол уч карра қайтариғанидан сўнг берилишига сабаб: Пайғамбаримизнинг (с.а.в.) олимлар ҳурматини сақлаб, уларни айблашга шошмаганларидадир. Аллоҳнинг ҳабиби он ҳазрат ўша мажлисда яна дедилар: «**Охиратда яхшиларнинг энг яхшироғи – яхши олимлардир. Улар билган илмлари билан ҳалқ орасида амри маъруф ва наҳий мункар қиласидилар. Юмшоқ сўзлар сўзлаб, фоснқлардан йироқ қочгувчи бўлурлар. Бойлару амалдорларнинг мажлисларига яқин йўламаслар. Ва буларга бойликлари учун тавозе қиласлар. Ҳукмлари учун пора олмайдилар. Масжид йўлидан**

қолмай, баңслар қылмайдылар. Ҳар қандайни замима ишлар бўлса, яхши олимлар барисидан йироқ бўладилар».

Оlam аҳлини тўғри йўлга бошловчи Пайғамбаримиз (с.а.в.) яна дедилар:

**«Дўзахда бир азобли қудуқ (чукурлик) бор. Ўша қаттиқ азобли қудуқни Аллоҳ Таодо «Жуббул жузи» («қайғу қудуги») деб атади. Ул қудуқ риёкор қорилар учундир. Булар шундайин олимларки, илм топиб, риёкорлик билан ҳалқ орасида ниятлари фақат обрў-эътибор топиш бўлган».**

Уламоларнинг тушунтиришларича, у қудуқ жаҳаннам ўргасида жойлашган. У чукурнинг ҳайбатию азоби кўплигидан жаҳаннамнинг ўзи Аллоҳ Таолога ҳар куни тўрт юз марта мадад сўраб сифинар экан.

Шайх Саъдийдан ўқиймиз:

«Икки киши беҳуда ранж кўрдилар ва бефойда саъй зухурга еткурдилар. Бири улким, кўп мол йигинди ва емади. Яна бири улким, кўб илм ўрганди ва амал қилмади. Маснавий:

*Илм аро гар ваҳиди давронсан,  
Амалинг бўлмас эрса нодонсан.  
Топмогунг дониш аҳли ичра ҳисоб,  
Бир эшаксен, сенга юқ ўлди китоб,  
Бўлмагай ҳаргиз ул эшакга хабар,  
Ўтун устида ё эрур дафтар.*

Илмни ўрганмак... дунё учун, неъматни емакфа васила ва равеш қилмоқ учун эрмастуур. Байт:

*Илм сотмоқга кимки юз ўрди,  
Жамъ этиб хирман ўтга куйдирди.*

Ҳикмат «Парҳезкор бўлмаган олим машъаладор бўлғон кўрдур. Ўзгани йўлга солур ва ўзи йўлдин қолур. Байт:

*Илмдин ҳар кишики олмади ком,  
Бир матоъ олмай этди зарни тамом».*

Эрон шоҳининг вазири Бузургмеҳрдан: «Илм афзалими ёки мол?» деб сўрашди. «Илм», деди вазир. Яна сўрадилар: «У ҳодда нега олимларни бойларнинг эшигига кўрамизу, бойларни олимлар эшигига кўрмаймиз?» Жавоб бўлдики: «Чунки олимлар молнинг фойдасини билади. Бойлар эса илмнинг фазлини билмайди». Ажиб ва доно жавоб! Олим билади. Бой бутун бойлигини сарфлаганда ҳам сотиб ололмайдиган илмнинг фазлини билмайди. Мана шу жиҳати билан бой, гарчи олимни ўзининг эшигига хизмат қилдирса ҳам, даражада олимдан анча паст туради.

Адабиёт дарслигида ўқиган бўлсангиз керак: Маҳмудхўжа Беҳбудийнинг «Падаркуш» саҳна асарларида ўғлиниг илм олишига рағбат кўрсатмаган бойнинг фожиаси кўрсатилган. Аммо уларда илм аҳли билан давлатманалар бир-бирларига зид қўйилмаган. «Бойларнинг ҳаммаси илмсиз бўлади», деган хулоса эса нотўғридир. Чунки ҳалол йўл билан топиладиган бойликка илмсиз эришиб бўлмайди. Бундан ташқари истеъоддли ёшларнинг илм олишлари учун ҳиммат қилган бойлар ўтмишда каммиди? Бугунги кунда ҳам шундай ҳиммат эгалари бор. Улар илм учун сарфланган маблағларига яраша эл ардоғига етишадилар.

Илм олмоқдик афзал, илмга амал қилмоқдик зарур экан. Илм ўргатувчи ҳақида нима деймиз?

Сайидимиз Муҳаммад алайҳиссалом бу хусусда: «Ким биронвга бир нарса ўргатса, ундан ўрганиб, амал қилган одам савобича савоб олади», деб марҳамат қилганлар. Яна таъкид этганларким: «Инсонларга яхшиликни ўргатиб, ўзини унугланган киши инсонларга ёруғлик таратиб, ўзини эритган мум кабидир».

*Киши икки турлуг киши отанур  
Бири ўргатигли, бири ўгранур.*

*Икидин нару борча йилқи сони,  
Тиласа мұни тұт, тиласа оны.*

«Кутадғу билиг»да таъкид этиляпти: инсонлар бири ўргатувчи яна бири ўрганувчи деб иккі турли бўлур. Бу иккисидин қолганини йилқи санаб, истасанг бу йўлни, истасанг у йўлни тут. Бу фикр сизга ёки тенгдошларингизнинг баъзиларига қўпол туюлиши эҳтимоли бор. Лекин холис ўйлаб кўрайлик, киши бир нарсани бошқаларга ўргатмаса, ўзи ўзгалардан ўрганмаса, унинг ҳайвондан нима фарқи қолади? Инсоннинг бошқа жонзотлардан фарқи айнан шунда эмасми?

**Умидимиз юддузлари**, сиз тугилиб, беш-олти кунлик бўлганингизда оналарингиз сизларни бешикка солдилар. Кеча ва кундуз тинмасдан ҳаракат қилиб, кўкрак сутлари ила парвариш қилдилар. Қачонки олти-етти ёшга етганингизда мактабга берадилар. Мактабда муаллимлар сизларни меҳрлари билан тарбия қилдилар. Шу боис мактабни «ilm бешиги», деб ҳам атайдилар. Бу бешикда сиз илм ва одоб ўрганиб, ақл ва фикрларингизни ўстирдингиз. Бола чоғингизда тан саломатлиги қанча зарур бўлса, ақдингиз ва фикрингизнинг саломатлиги ҳам мұхимdir. Чунки ақл ва фикрсиз тандан на ўзи учун, на бошқалар учун фойда бор. Шунга кўра, биринчи бешикка қараганда иккинчиси афзал кўринади. Биринчи бешикда сут ва таом бериб боққан она ва ота қанчалик азиз бўлса, иккинчисида илм ва одоб ўргатиб тарбия берган муаллим ундан ортиқ азиздир.

Тарихга шон-шараф берган буюк давлат арбоблари улуғ устозлар парваришида етишган эдилар. Бу устозлар ўз тарбиясидагилар қалбига масъулият ва марҳамат туйғулари жойлаштирганлар. Инсоният тарихида ўтган шоҳу султонларнинг сон-саноғи йўқ. Лекин уларнинг оз қисмигина кишилиқ хотирасида қолган. Тарих зарварақларида номлари нақш этилган шахслар ҳаётига разм солсак, уларнинг доно устозлар-

дан сабоқ олганларига гувоҳ бўламиз. Доно устоздан сабоқ олмоқ бир масала, бу сабоқда амал қилмоқ яна-да муҳимроқ масала. Амир Темур, Мирзо Улугбек, Мирзо Бобур ҳазратларининг устозларга кўргазган меҳр-илтифотлари бизга маълум. Мирзо Улугбек ёшлик чоғларида, гарчи шаҳзодадарга хос одат бўлма-са-да, устозлари Қозизодай Румий ҳазратларининг тўнлари этагини ўпган эканлар. Мирзо Бобур Самар-қандга лашкар тортиб келгандаридан Хўжа Аҳорор валий ҳазратларининг беҳуда қон тўқмаслик хусусида-ги ўғитларига амал қилиб, жанг қилмай изларига қайт-ганлар. Амир Темур ҳазратларининг хотираларида устозларнинг мартабаси хусусидаги ибратли гапларни ўқиймиз:

«Мени ёшлигимда ўқитган мулла Алибек деган ки-шинининг оғзида тиши йўқ бўлса ҳам, маҳалла бола-ларига Қуръон таълими бериб, хат ёзишни ўргатар эди. Мен етти ёшимда бу одамнинг мадрасасидан чиқиб, Шайх Шамсиддиннинг мактабхонасида ўқидим. Мен Кеш шаҳрини бино қилдираётган чоғимда у одамнинг вафот этиб кетганига хийла вақт ўтиб кетган эди. Ус-тозларимдан Шайх Шамсиддиндан қолган фарзанд-ларининг ҳаёт вазияти ёмон эмас бўлса ҳам, Мулло Алибекнинг фарзандларида қийинчлилк борлиги кўрунур эди. Бу аҳволни кўзда тутуб, устозим Мулло Алибекнинг фарзандларининг ҳар бирига бир дона-дан уй солиб бериш билан, уларни узилмас маош би-лан таъминлашни волийларимга таъкидлаб амр бер-ган эдим.

Шу мавзу устида Шом шаҳрида кўрушганим Ибн Холдун деган зотнинг бир ҳикматлик сўзи ҳамон ёдим-да эди. У одам бундоғ дер эди: «Аллоҳ Таоло инсонларга берган саломатлик неъматидан кейинги неъмати, улуғ одамлар билан дўст қилмоқ неъматидур. Чунки улуғ одамнинг дўстлиги орқасидаги кишилар, тилак ва орзуларига эришиб, халқ орасидаги ўрни ва ҳаша-мати ҳам юқорилайдур», деб эди. Бу ҳикматлик сўздан

ташқары ўз идрокимда шундай бир ғоя ҳукмфармо әдики, менга нисбатан ҳар қандай жиҳатдан дўстлиги зоҳир бўлган, озу кўп хизматлари сабоқ айтган зотларнинг ўзларигина эмас, авлодлари ҳам майшат тўғрисидан қийналар экан, бу менинг паст фитратлигимга далил бўлғай, деб тушунар эдим. Бу умумий кўз қараш орқасида ёлғиз Мулло Алибекнинг авлод афродларигина эмас, киндигим қони тўкилган, кўзим очилганда биринчи марта шу шаҳарни кўрган, мен билан бирга бу шаҳарда ҳаёт кечирган эркак-хотунларнинг барчасининг устозларим каби зиммамда ҳақлари бор эди. Буларнинг бир ҳамшаҳарлари дунёга ҳоким бўла туриб, буларнинг қийинчилик ичida яшамоғлари муносиб бўлмағай, деган фикрда илгаридан Кеш шаҳрининг бўлиб келган ўз қуввату лоёмутига ҳожатманд қадим ерлик кишилардан бўлмоғи шарти билан туғулган шаҳримда бирорта фақир одам бўлмаслиги учун доимий ойлик тайин қилдим. Бирор одам оила таъминотидан қийинчилик кўриб ғамлиқ бошини тиззасига қўймаслигининг тадбирини кўрдим».

Бу гапларни ўқиб ўйланиб қолдим: Амир Темурдан один ва кейинги йилларда оталаридан сўнг таҳтга ўтириб, саройдаги илм аҳдининг қадрига етмай, хорлаганлар ва оқибатда ўзлари хорланганларга шундай васият қилинмаганмикин? Қилингандир. Илм аҳдининг қадрига етган подшоҳ уларнинг келажагини ўйлаши табиий ҳолдир. Кўзлари хазинадаги олтин жилосидан кўр бўлган таҳт ворислари бу васиятни назар-писанд қилмаганлар. Натижада, тириклиқ чоғлари элнинг қарфишига қолдилар, ўлгач, номлари қора билан ёзилди...

Искандар Зулқарнайнинг (Александр Македонский) Арасту (Аристотель) исмли устози бор эди. У билан бемаслаҳат иш қилмасди. Устози саройга кириб келса, ўрнидан туриб, иззат билан кутиб оларди. Ҳатто уни ўз отасидан ҳам ортиқроқ кўрарди. Бир куни Ис-

кандар Зулқарнайдан: «Нечун Арастуни отангиздан ортиқ иззат қиласиз?», деб сүрадилар. Ул дедики: «Отам гүёки мени осмондан ерга туширди. Аммо устозим Арасту мени ердан осмонга кўтарди» (Яъни, отам мени дунёга келмоғимга сабаб бўлди. Устозим илм ва одоб ўргатиб, мартаба ва иззатимнинг ортмоғига сабаб бўлди).

**Ривоят.** Яна ҳукмдорлардан бири Султон Салим Мисрни забт этиб, Истанбулга қайтаётган эди. У қўшин олдида устозлари, мулоғимлари, шайхул-исломлар куршовида эди. Зафар машқлари чалингандада ибн Камолнинг оти ҳуркиб, сакради-ю Султоннинг сут каби оппоқ либосига лой сачради. Буни кўрган ибн Камол қўрқиб кетди. Бошқалар ҳам подшоҳнинг ғазабланишини кутдилар. Аммо Султон Салим дедики:

– Бу либосимни олиб, сақлаб қўйинг. Бу либос шундайлигича, лойи билан сақлансин!

Вазирлар бу буйруқ ҳикматини, сабабини сўраганларида Султон Салим шундай жавоб берди:

– Муҳтарам зот отининг оёғидан сачраган лой бизнинг шарафимиздир, у охиратда васиқаи баротимиз бўладир. Либосимизга теккан лойни кўриб, авлодимиз ҳам ибрат олсиналар, уламо отининг оёғидан сачраган лой бизнинг назаримизда қанчалик қадрли эканлигини дунё тургунча авлодимиз хотирласин.

Бу ҳикоятларга ҳазрат Навоийнинг бир ранж ила ҳарф ўргатган устознинг ҳақини дунё ганжи билан адо этиб бўлмайди, деган ҳикматлари илова этилса, узукка кўз кўйгандай бўлар.

Не афсуски, устозлар ҳақини адо этишни ўйламайдиганлар ҳам бор. Мактабларда устозларни ранжитувчи ўқувчиларни учратиб турамиз. Айрим ота-оналар фарзандлари олдида устозларни ҳақорат қилишдан ҳам тоймайдилар. Устозига меҳр ва ҳурмат кўрсатишни билмайдиган ва ўрганишни истамайдиган баҳтсиз талаба бир умр фақат ўзигагина меҳрибон ва фақат ўзинигина ҳурмат қилувчи худбин бўлиб қолади. Сах-

ро тиконини экиб, гул оламан, деган одам ақлли одам эмасдир. Ўзига илм-ирфон ўргатувчи устозининг қадрини билмаган одам Ватан, миллат учун фойдали бир одам бўла олмайди.

Шу ҳикоятлар баҳонасида икки мазмун англатувчи бир мақолга изоҳ бермоқ зарурати туғилди. Устозларнинг мавқеи ҳақида гап кетганда айримлар бу мақолни «Устоз **отангдан улуг**», тарзида, бошқалар эса «Устоз **отангдек улуг**» шаклида баён қиласидар. Бунга сиз нима дейсиз? Қайси бири тўғри? Фарзанд учун одамлар орасида отанинг мавқеидан баланд зот йўқ. Лекин ота ўрнида кўриб ҳурмат қилинадиганлар бор. Демак, устоз **отадек улуг** экан. Лекин масаланинг бошқа томони ҳам бор: ота фарзандини боқишига, тарбия қилишга мажбур. Лекин устоз айнан шу фарзандга илм беришга мажбур эмас. Агар «бу болани ўқитмайман», деса айбли саналмайди. Шу боис ҳам унинг отага нисбатан улуглиги мавжуд. Ҳазрат Али (р.а.) «Менга бир ҳарф ўргатган кишининг хизматкори бўлишга тайёрман», деганлар.

**Умидимиз юлдузлари**, бугун сиз шогирдсиз, орадан беш-үн ийл ўтиб сиз ҳам устозлик мартабасига етасиз. Шунда унутмангки, устознинг шогирдга биринчи галда ўргатадиган хулқи – камтарлик бўлиши шарт. Бу хулқни шогирдга сингдиришда ўз хулқи билан на муна бўлмоғи талаб этилади. Чунки манман, кибрли устознинг шогирдини камтаринлик шоҳсупасига кўтартганини ҳали тарих кўрган эмас. Манман олимнинг ҳамкасларга ёмонлик қилиши бир нохушлик, энг асосий нохушлик – у ўз кибри туфайли илмнинг керакли чўққисини забт этиб бўлдим, деб ўйлайди ва ўсишдан тўхтайди. Манман олим юқорига қарамайди, ўз оёғи остидан кўз узмайди. Шунинг учун илмдаги юқори чўққиларни кўрмайди. Афсуски, бундайлар кам эмас. «Мадрасада ўқиганим кифоя, илмим битта масjidни тебратиб туришга этиб ортади», дейдиганлар ёки «диссертацияни бир амаллаб ёқлаб олдим, энди

умримнинг охиригача дам оламан», деб адашувчилар ҳам бор. Буларга қуидаги ҳикоятни эслатамиз.

**Ҳикоят.** Эрон шоҳи ҳузурига Румдан бир элчи келди. Шоҳ вазири Бузургмекринг донолигини элчига маълум қилиб қўйиш мақсадида:

«Эй Бузургмекр, дунёда нимаики бўлса, сен ҳаммасини биласан, а?», деб сўради. Шоҳ вазиридан «Ҳа, биламан», деган жавоб кутган эди. Аммо вазири «Билмайман», деб жавоб қилди.

Элчининг олдида мулзам бўлган шоҳ газабланиб сўради:

«Ҳамма нарсани ким билади?»

«Ҳамма нарсани ҳамма билади, аммо ҳамма ҳали онасидан туғилган эмас», деб жавоб берди доно вазир.

Яна бир доно вазирдан савол сўрадилар. «Билмайман», деб жавоб берди у. Яна сўрадилар, яна шу жавоб: «Билмайман». Шунда ажабланиб дедилар: «Шоҳ сизни доно вазир деб катта миқдорда ҳақ тўлайдилар-у билмайман дейишга уялмайсизми?»

Доно вазир деди: «Подшоҳ менга билганларим учун ҳақ тўлайди. Агар билмаганларим учун ҳам тўласа, етти иқлимнинг хазинаси етмаган бўларди». Бу доно жавобларда камтарликнинг гўзал кўриниши мавжуд.

Устозлик ва шогирдлик бобида кишининг ёши аҳамиятли эмас. Илм олиш муддати умрини сўнгтига қадар экан, фарзанди ҳатто набираси тенги устоздан ҳам илм олишга тўғри келади. Катталар аввалига болаларига илм ўргатадилар. Сўнгра ўзлари улардан ўрганишга ҳожат сезадилар. Кимки буни хоҳдамас экан, ўз давридан орқада қолади. Чунки фан янгиликларини ёшлар кузатиб борадилар ва тез эгаллайдилар. Ўз ташвишларига ўралашиб юрувчи катталар эса бу янгиликларни вақтида сезмайдилар ёки сезсалар ҳам тан олгилари келмайди. Шу боис ҳам фанда ёш олимлар билан катталар орасида тез-тез зиддият ва ихтилофлар чиқиб туради. Илм олишдан тўхтаб, қотиб қолган,

ёшлардан ўрганишни истамаган катта олимлар фан тараққиётiga салбий таъсир кўрсатадилар.

Ҳазрати Умар (р.а.) илмни ёшликда эгалаш керак деб билганлар. Чунки ёш улғайгач, киши ёшлар билан бирга илм олишга уяла бошлади. Айниқса, бирон мансаб эгаси кўл остидаги ёшлар билан бирга ўтириб илм эгаллашдан ор қиласди. Илм ёшликда эгалланса онгга муҳрланиб қолади. Ҳазрат Умар «ёшлар билан илм олишга уялсанг ўқимай қўя қол», демоқчи эмаслар, балки шундай ноўрин ҳолатлар учраб қолишидан огохлантиromoқчилар.

Бир донишманддан сўрабдилар:

– Қандай қилиб илмнинг энг юқори чўққисига чиқдингиз?

Донишманд деди:

– Билмаган, тушуммаган нарсамни олимдан ҳам, оддий кишидан ҳам, каттадан ҳам, кичикдан ҳам сўрадим. Бу тўғрида уялмадим, номус қилмадим. Ўзимни юқори тутиб, мутакаббир бўлмадим.

Шу олимнинг ҳаёти барчамиз учун ибратдир. Чунки илм сўрашдан истиҳола қилинмайди, балки илмсиз юришдан уялиш керак бўлади.

*Уялма маърифатни ўрганурдин,  
Танур жойинг бўлур қолсанг танурдин.*

«Саботул ожизийн»даги бу байтнинг мазмуни будир: оқил киши илмни ўрганишдан уялиб ўтирайди. Накадар қари бўлса ҳам, ўзидан кичиклардан ва катталардан сўраб ўрганмоққа қасд қиласди. Зоро, киши орланиб, илмни ўрганмай қолса, оқибатда дўзахга борур. (Байтда зикр этилган биринчи «танур»да «тандир», «ўчоқ», маъносида, яъни дўзах ўчоги назарда тутилади. Иккинчи «танур» танимоқ, яъни билмоқ маъносида келади.)

Ҳазрат Навоий ёзганлар: «Билмаганни сўраб ўрганган олим, орланиб сўрамаган ўзига золим. Оз-оз ўрга-

ниб доно бўлур, қатра-қатра йигилиб, дарё бўлур. Ўрганишдан қочган – дангаса, ўрганишдан қочиши учун юзига важ-баҳона эшигини очган – ишёқмас. Захмат чекиб илм ўрганган – донишманд.

*Илмдин орий улуснинг жоҳили худномаси,  
Ўрганурга жидду жаҳд этган жаҳон алломаси».*

Маъноси: Илмдан четда қолган одам ҳалқ орасидағи қайсар, жоҳилдир. Ўрганишга қаттиқ киришган эса жаҳон алломасидир.

Илмни эгаллаш қай пайтда афзал, деган муаммога донишмандлар турлича жавоб берганлар. Абдуллоҳ ибн Масъуд илмни фурсат бўлганда ўрганавериш керак, чунки илм зарур бўлган пайтда фурсат топилмайди, деб таъкидлаганлар. Кўпгина манбаларда илмни ёшлиқда эгаллашга даъват этилади. Буни «**илмнинг асосларини** ёшлиқда эгаллаб олишга ҳаракат қилмоқлик даркор», маъносида англасак дуруст бўлади ва бу бизларни катта ёшга етганда илм олишдан тўхтаб қолиш касалидан қутқариб қолади.

Умар Ҳайёмда шундай рубоий бор:

*Акнун ки гул-и саъодатат пур бораст,  
Даст-и ту зи жом-и май чиро бакораст.  
Май хўр ки замона душмане гаддораст,  
Дарёфтани рўз-и чунин душвораст.*

Рубоийнинг луғавий мазмуни: ҳозир саодатнинг гули серҳосил пайтда нега қўлинг май жоми билан машғул эмас. Май ичиб қол, чунки замона ўта бевафо душмандир. Бугунгидай кунни топиш қийиндири.

Мазкур рубоийни шарҳлашдан аввал бир эслатмага эҳтиёж сезилди. Шеъриятда истиора, яъни бадиий ўжшатма бўлади. Шунга кўра рубоийдаги, «май» сўзи ичимлик ароқ эмас, балки «ҳақиқат маърифати» маъносини англатади. Бадиий адабиётдаги бу услубни

яхши англаш сизларни адашишлардан асрагани туфайли мавзуга мурожаат қилишни лозим топдик.

Демак, мумтоз адабиётда учровчи «май» ва «жом» сўзларини тўғридан-тўғри тушунмаслик керак. Устоз Алибек Рустамий юқорида зикр этилмиш рубоийнинг асл маъносини бундай тушунтирадилар: куч-куватга тўлган, саодат гулидан мўл ҳосил олишинг мумкин бўлган ҳозирги навқирон пайтингда ўзингни ўзинг ичкилик билан заҳарламасдан ва бошқа беҳуда ишлар билан машғул бўлмасдан иродга кўлини ишга солгину кўнгил жомини маърифат майи билан тўлдир, кишини бадбахт қиласиган ичкиликни эмас, саодатга мушарраф этадиган маърифат майини ҳозир имкон борида ичиб қол. Чунки замона ҳозирги ёшлигингдан, куч-куватинг ва имкониятингдан ва охири жонингдан ҳам сени жудо қиласиган ғаддор душмандир. У сени қаритиб, турли дардларга мубтало қилгандага бундай кунларни тополмайсан ва бу дунёдан ўқинчу надоматлар билан ўтасан.

Илмдан баҳраманд бўлиш кишига беадад ҳузур ва лаззат бағищлайди. Ҳақиқий маърифатга эришган одамдан нафақат дўстлари осойишта, балки душманлари ҳам тинч ҳаёт кечирадилар, дейдилар. Чунки маърифатли одамнинг ўй-хаёли илм билан банд бўлади, бировга душманлик қилишни ўйламайди. Мирзо Бедил ҳазратларининг «Кимки ҳаёт шамини илм нури билан ёқса, ҳаёти асрлар бўйи сўнмайди», деган ҳикматларини тарих улуғ алломалар ҳаёти мисолида тасдиқ этади. Мавзуни давом эттириш учун Ҳофиз Шерозийдан бир байт ўқиймиз:

*Аё айтуҳа-с-соқий, адир каъсан ва новилҳо,  
Ки ишқ аввал намуд осон, vale ўфтод мушкилҳо.*

Луғавий маъноси: қани эй Соқий, бир косани айлантириб уни менга ҳам етказ. Чунки ишқ аввал осон кўриниб, кейин қийинчиликлар юз берди.

Байтга яширинган маъно: соқийдан мурод – маърифат тарқатувчи. Косадан мақсад – маърифат. Ишқэсса маърифат ишқидир. Шунга кўра байтни бундай тушунамиз: эй маърифат ошиқларининг Устози! Менга маърифат идроки аввал осондек кўринган эди. Аммо бунинг кўпгина қийинчилклари чиқиб, менинг унга бўлган ишқимни сусайтира бошлади. Шунинг учун сен даврангга йифилган шогирдларингни, жумладан, мени маърифат сирларидан бир озгина огоҳ қилиб, совиётган кўнглимни қиздир.

*Гул даврида ич боданиким, оқил эмастур,  
Ҳар кимки, бу кун дунёда ҳушёр топилса.*

«Гул даври»дан мурод – умр баҳори. Яъни кишининг илм ўрганадиган ёшлик даври. Бода, яъни майдан мурод маърифатдир. Бу байтни «баҳорни ичкиликтозлик қилиб, кўнгилни айнитиб, бошингни оғритиб ўтказ», деб англамоқ нодонликдир. Байтнинг асл мазмуни будир: умрдан яхши ҳосил олиш учун унинг гул давридагидек гуллайдиган, ҳосилга замин тайёрлайдиган ёшлик даврида ҳаром ичкиликтозликни эмас, маърифат бодасини ич. Кимки бу дунёда маст қиалувчи ичкиликтозлик туфайли эс-хушини йўқотса, ҳунар ўрганиб, илм олиб, ҳақиқат сирларини билишга интилиб, камолот ҳосил этишга ҳаракат қиласа, уни ақлли киши деб ҳисоблаб бўлмайди.

Бобур мирзода бир байт бор:

*Баҳор айёмидур догои йигитликнинг авонидур,  
Кетур соқий, шароби нобким, ишрат замонидур.*

Агар бузуқ шеърият нуқтаи назаридан тушунсак, йигитлик чоғида айш-ишрат қилиб ол, деган маънони уқамиз. Ҳолбуки, Бобур мирзо бундай ишратларга қарши бўлганлар ва ул зотнинг май ичишни таъзиқлаш ҳақидаги фармонлари тарихдан маълумдир. Маз-

кур байтда шоир йигитликни баҳор айёмига қиёслаб,  
бу фаслда маърифатга даъват этяпти.

*Боши билан шўнгигб кирмаса ҳар дам,  
Сув остидан дурни топарми одам?*

Ҳамма гап ана шу дурни топишда. Афсус шуки, биз дурни севамиз, аммо уни топиш учун шўнгишдан эринамиз. «Тоққа чиқмасанг дўлона қайдা, жон куйдирмасанг жонона қайдা», деган мақол илм олишга ҳам тааллуқлидир.

Дунёда илм турлари кўп, барчасини бараварига эгаллаш мумкин эмас, дедик, ҳаммасини эгаллайман, деб интилувчи кимса оқибатда ҳаракатларини шамолга совуриши мумкин. Чунки ортиқча билағонликни фазилат деб ўйлаш хатодир. Билимнинг миқдори эмас, сифати зарурроқ деган нуқтаи назардан қарасак, фойдали нарсаларни билганимизга нисбатан бефойда нарсаларни кўпроқ билишимиз аниқ бўлиб қолади. Одам егани билан эмас, ҳазм бўлгани билан яшайди. Бу ақлга нисбатан ҳам тааллуқлидир. Хоҳламай ютилган таом, азобга айланганидек, иштиёқсиз илм билан шугуланиш хотирани суст қилиб қўяди, нокерак нарсалар билан шу қадар тиқишириб ташлайдики, оқибатда у қабул қилаётганларини сингдиромай қолади.

*Ёниб келганда меҳнат шамъи, э ёр,  
Ёниб, туттма ҳаво бодига зинҳор.*

«Кутадғу билиг»да айтилмоқчики, кўп машаққатлар билан ҳосил қилган илмингни нафс орзуларига сарф айлама, дўстим.

Ҳар нарсанинг зидди: оқнинг қораси, яхшининг ёмони бўлганидек, илмнинг муқобилида «жоҳиллик» деган иллат борки, у ёш ақлларни заҳарлашга ҳамиша шай бўлиб туради.

## **Не эрур бу жаҳолат?**

Бироннинг айбини ёки қусурини айтадиган бўлсак, «ақлсиз», «тентак», «эси йўқ» ёки дабдурустдан «аҳмоқ» деб қўя қоламиз. «Жоҳил» деган иборани камдан-кам ҳолларда тилга оламиз. Орамизда жоҳил камми? Жоҳил ким ўзи? Жоҳилликдан бесаодатроқ яна нима бор?

**Умидимиз юлдузлари**, энди шу ҳақда гаплашиб олиш фурсати етди.

Инсонлар бошига тушадиган кулфат ва зулмнинг асосий боиси жаҳолатdir. Кулфат ва зулмдан халос бўлишнинг ягона давоси эса – илм. Жаҳолат ҳомийлари инсониятнинг энг ашаддий душманлари ҳисобланадилар.

Тилимиздаги «жаҳолат», «жоҳиллик» атамалари нодонликни ва бу нодонликни түғдирувчи билимсизликни англаатади. Ёмонликнинг уч манбаи борлигини айтадилар: шайтон, нафс ва жоҳиллик. Ҳар қандай ёмон хулқнинг бошида нафс ва шайтон туради. Жаҳолатнинг турлари кўп, улардан учтасини алоҳида таъкид этиш керакки, қолганлари шу учтасидан баҳра олади:

- умуман ҳеч нарса билмаслик;
- ҳамма билган нарсаларни жуда ёмон билиш;
- лозим бўлмаган нарсаларни билиш.

Жаҳолат – ҳақиқатдан бехабарликдир. Жоҳилни таълим-тарбия кўрмаган, ҳеч ерда ўқимаган, дипломсиз одам, деган маънода тушунмаслик керак. Мөҳиятни билмаслик – жоҳилликнинг асли ҳисобланади. Шунинг учун олимликнинг юқори погоналарига даъво қиувлчилар орасида ҳам жоҳилликни учратиб қолиш мумкин. Бунга сабаб: илмнинг саёзлиги, ҳикматларни билмаслик ёки фаҳм этмаслик, ижтимоий, ахлоқий маданият танқислигидир. Жаҳолат одамни дунёга бефарқ қилиб қўяди, бепарволик эса секинаста, аммо чекиниш билмай саратон (рак) ўсмасидек улгаяверади. Шунинг учун ақл эгаси жаҳолатга тўқнаш келгани ҳамон чарчоқ ва дам олиш нималигини бил-

май унга қарши ҳужум қилиши керак. Зарба кетидан зарба беришни тұхтатмаслиги зарур. Бу жараён умр бўйи давом этадики, буни эплай олмаган кимсанинг ҳаёти паришонликда ўтади.

Хожа Аҳмад Яссавий ҳазратлари илм ўрганиш билан шуғулланмайдиган, илмдан йироқ кишиларни «нодон» деб атайдилар. Жоҳилликлари аниқ бўлгани сабабли ҳам улар нодондирлар.

*Аввал-охир хўблар кетти, қолдим ёлгиз,  
Нодонлардин эшиштмадим бир яхши сўз.  
Доно кетти, нодон қолди, едим афсус,  
Йўлни топмай, ҳайрон бўлуб қолдим ман.*

Инсон тарбиясида, аввало, жоҳилликни бартараф этишга алоҳида аҳамият берилади. Дунёга нима учун келганини билмаган, ҳатто сўрамаган, айниқса, бу хусусда тинглашни истамаган киши энг хавфли жоҳилдир. Аввалги суҳбатимиздан сизга маълум бўлдики, ҳаётда фақат билиш кифоя эмас, билганига амал қилиш лозим. Фақатгина билиб амал қиласи ҳам кифоя эмас, амалларни фақат холис тарзда қилиш зарур. Жоҳилнинг биламан, дегани кўрнинг кўраман, дейишига ўхшайди. Ўзининг илмига, мартабасига мағрур бўлиб, кеккайиб кетиш жоҳилликнинг бир хилидир. Ҳақиқатни инкор этиш жоҳилликдир.

Бирон амални яхши деб ҳисоблаб, бу йўлда бардавом бўлиши оқибатида инсонда ўша амалга мувофиқ хулқ шаклланади, мустаҳкамланади. Шунга кўра, Имом Ғаззолий ҳазратлари одамларни тўрт тоифага бўлганлар:

1. Фоғил инсонлар ҳақ билан ботилнинг, чиройли билан хунукнинг фарқига бормайдилар. Улар фитратан барча эътиқоддан холи. Лаззатларга ҳаддан ташқари тобе бўлиб қолганлари учун улар биронта истакларини ҳам тўла қондира олишмайди. (Яъни, бир лаззатни қўйиб, ундан яхшироғига чопади, кейин ундан

ҳам яхшироғини истайди... Шу тарзда биронта истагини ҳам мукаммал амалга оширолмайди.) Бу тоифадаги инсон муолажани, яъни тарбияни тез қабул қиласди. Фақатгина у бир муаллимга, бир муршидга муҳтож. Қалбида уйгониб, уни файратлантирадиган бир химматга муҳтож. Шунда у тез орада хулқи гўзал инсонга айланади.

2. Жоҳил ва адашган инсонлар ёмоннинг нелигини биладилар, лекин яхши ишларга одатланмаганлари сабабли, қилаётган ёмон амаллари ўзларига чиройли бўлиб кўринади. Дунё истакларига қул бўлиш билан улар тўғриликдан юз ўтирган бўлсалар-да, амалларидаги қусурлардан хабардорлар. Бу тоифанинг тарбияси оғирроқ бўлгани учун уларга бир неча вазифалар юкланди. Аввало, улар бузуқликка одатланиш натижасида ичларида маҳкам ўрнашган жуда кўп иллатларни нафсларидан суфуриб олишлари шарт. Кейин яхшиликка ундайдиган сифатни қалбларига эмоқлари керак. Хуллас, енг шимариб, жидду жаҳд этилса, бу тоифа тарбияси риёзат учун кенг майдондир.

3. Жоҳил, адашган ва фосиқ кимсалар ёмон ахлоқни яхши ахлоқ, деб эътиқод қиласдилар. Уларнинг наздига бу ахлоқ ҳақ ва энг гўзал. Ундаги бу қараш боргани сари такомиллашади. Шунинг учун бу тоифадаги кишининг муолажаси мушкул, соғайишига деярли умид йўқ. Камдан-кам ҳолда у дардига даво топиши мумкин. Бу жиҳатларнинг барчаси залолатга кетиш имкониятини оширади.

4. Жоҳил, адашган, фосиқ ва ёвуз кимсалар нафақат бузуқ қарашда такомиллашадилар, балки улар ёмонликларини кўпайтиришни фазилат деб биладилар, бу билан фаҳрланадилар ва «бу ишлар қадримни оширади», деб ўйладидилар. Бу тоифадаги кишиларнинг аҳволи оғир. Улар ҳақида шундай дейилган: «Кексанни тарбияламоқ – машақкат, бўрини тарбияламоқ – уни азобламоқдир».

Жоҳиллар жамият ичидаги иллатдир. Улардан эҳтиёт бўлмоқ керак, уларга яқинлашган кишининг қалби хасталанади. Ўтмишда қанча жоҳиллар неча мамлакатларни ва юртларни фалокатга дучор қиласмадилар. Сир эмаским, Наполеон ёки Гитлер каби жоҳиллар ҳозир ҳам Ер юзида урчиб, кўпайиб ётибди. Турли мамлакатлардаги сайловларда улар миллионлаб овоз оладилар. Жоҳилнинг раҳбар бўлишини истовчиларнинг ўзлари жоҳилми ёки сайлаётган одамларининг жоҳил эканини билмайдиларми? Бу ҳам кишилик учун бир муаммодир. Ҳар ҳолда бир ариқдаги тоза сувни бошқа ариқдан оқиб келиб, унга қўшилган кир сувлар булгагани каби покиза инсонларни ҳам жоҳиллар тўғри йўлдан оздирив, кирлатадилар.

Жамиятнинг ярасини фақат олимлар тушунадилар. Аниқлаган ташхисларига қараб даволар топадилар. Жоҳиллар эса баттар яралаб қўядилар. «Қош қўяман, деб кўз чиқариш», «Дард устига чипқон», дейилган мақоллар шундай жоҳилларнинг ҳаракатига қараб юзага келган.

«Нисо» сурасида марҳамат қилинади: «Жаҳолат-ла ёмонлик қилиб қўйиб, сўнгра тезда тавба қиласидандарни тавбаси Аллоҳнинг зиммасидадир. Аллоҳ ана ўшаларнинг тавбасини қабул қиласди. Ва Аллоҳ билувчи ва ҳикматли зотдир». Демак, йўлдан адашиб, гуноҳ ишларни қилиб юрганлар «биз қиласиганимизни қилиб қўйдик, энди кеч бўлди, тавбамиздан фойда борми, тушар еримиз аниқ-ку?», деган тушкун ўйга бормасликлари керак экан. Улар хатоларини қанчалик тез тушунсалар, жоҳилликларидан қанчалик тезроқ қутулсалар, ўзларига шунчалик яхши бўлади.

Исломдан аввалги даврлар «жоҳилият замони» деб юритилади. Ҳолбуки, у замонларда илмилар, шоирлар кўп бўлган. Аммо улар Ҳақ билан ботилини ажратадилар. Пайғамбаримиз (с.а.в.) ўқиш ва ёзиши билмасдилар, аммо Аллоҳнинг суюкли ҳабиби мақомига етдилар. Дунёвий илмлар нуқтаи назаридан қара-

сак, Мирзо Улугбекнинг суюкли шогирди Али Қушчи ҳам хизматкорликдан олимлик шоҳсупасига кўтарилиган эди.

Агар бир киши аниқ фанлар соҳасида олим дараҷасига етса-ю, аммо ўзининг инсоний вазифаларини билмаса, жоҳил бўлса, биринчи галда ўзига, кейин фанга ҳам зарар.

Мавлоно Румийда бир ҳикмат баёни бор.

**Ҳикоят.** Кўнгилни айнитувчи ёқимсиз исларга одатланган чўчқабоқар атторлик дўконига кириб, димоғига атиrlар ҳиди урилди-ю ҳушини йўқотиб, ерга ийқилди. Атторлар шошиб қолиб, уни тезроқ ҳушига келтириш учун турли атиrlарни ҳидлата бошладилар. Чўчқабоқар бундан баттар ҳолга келаверди. Охири атторлар чорасиз қолдилар. Чўчқабоқар ўлар даражага келди. Уни таниғанлардан бири уйига хабар бергани югурди. Чўчқабоқарнинг укаси воқеани дарров англали. Чўчқанинг тезагидан бир сиқим олди-ю најжот бергани шошилди. У: «Акамнинг димоғига ёмон ҳидлар сингиб кетган. Касалининг давоси ҳам шу ҳиддадир», деб чўчқа тезагини унинг бурнига тутди. Шунда ўлик каби ётган чўчқабоқар дарров ҳушига келди. Буни кўрганлар йигит акасига қандай афсун ўқиди экан, деб ажабландилар. Лекин сир чўчқа тезагида эканини билмадилар.

Мавлононинг ҳикматларида гўзал ибрат бор. Молдунёни севган киши бойлик тўғрисида бирор нарса айтилган пайтда ухлаётган бўлса ҳам дарров уйғонади. Ҳатто ухлаётган ит ҳам бир нарса тарақласа кўзини очиб қўяди-ю уйқусини давом эттираверади. Лекин эгаси секингина чаппилатиб овқат ейишни бошласа, уйқудан уйғониб, сергак равишда унга тикилиб тураверади. Жоҳил ҳам чўчқабоқарга ўхшайди. Мушк ҳиди каби гўзал илмий мажлисларда ҳушидан кетиб, рафлат уйқусида ухлайверади. Жоҳиллар сұҳбат бошласалар, кўзлари мошдай очилади. Чўчқа тезагидан ҳушига келган чўчқабоқарнинг бошқаларга зарари

йўқ. Жоҳиллар сұхбатидан уйғонган жоҳилдан эса кўрқулик.

Туякушнинг ғалати одати бор: бирон хавфни сезса, бошини қумга тиқиб тураверади. Баъзи одамларда сал бошқачароқ одат мавжуд: туяқуш хавфдан қўрқаётган бўлса, булар ҳақиқатни қўрмаслик учун бошларини гўё қум орасига тиқиб яшайверадилар. Атрофга қарамайдилар, келажакни тасаввур қила олмайдилар. Донолар насиҳатининг ҳақиқатга эришиш йўли эканини, ундан баҳра олиш зарурлигини англашни истамайдилар. Энг ёмони – жоҳилларни туфайли яқинлашаётган хатарни сезмайдилар.

Одам боласи яхши тарбия кўрмай ўсар экан, жаҳолат ботқоғига ботаётганини ўзи ҳам сезмай қолади: аввало, билмаган кишини камситади; бир киши билмагани учун исёнда экан, жоҳил эса билиб туриб гуноҳ қилади, демак, билмаган киши узрлироқ. Олимларни тан олмайди. Ҳолбуки, олимлар у билмаган нарсаларни биладилар, у нимани билади?! Ёши улуғларни менсимайди. Ахир уларнинг ҳаёт тажрибаси кўп, уларга қандай тенг бўлсин?! Ёшларни ҳақир санайди. Ҳолбуки, ўзи ёшлардан олдинроқ гуноҳга шўнғиган, маъсиятга ботган.

Жоҳиллик аломатлари яна нималарда кўринади:

- ўз нафсига қул бўлиш;
- худа-бехудага сўзлайвериш;
- бекорга аччиқланиш;
- эҳсонни ўз жойида қилмаслик;
- ҳаммага, айниқса синалмаган одамга ишонавериш;
- дўстни душмандан фарқ қилмаслик;
- сирини ҳар кимга айтавериш;
- ақдсиз, иймонсиз одамларнинг маслаҳатларига қулоқ солиш;
- бефойда сўзларни кўп сўзлаш ва лойиқ бўлмаган одамларга (айниқса, ношаръий ишларига) ёрдамлашиш.

«Агар жоҳиллигим намоён бўлмасин, десанг, ўзгалирни эътибор билан тингла» дейилган доно гапга мавлоно Сайфи Саройининг «Гулистони бит туркий» асарларидаги бу ҳикмат қувват беради: «Ҳакимлардан бири айтмиш эканки, ҳеч ким ўзича ўз жоҳиллигига иқорор бўлмайди. Аммо ул одамнинг жоҳиллиги шундан маълум бўлиб қоладики, агар бир киши сўз бошласа, унинг сўзи тамом бўлмасдан туриб, ўша жоҳил ўртага тушиб сўзлай бошлайди. Бу эса жоҳиллик – жаҳл аломатидир. Ҳикматдан маълум бўладики, сұхбат чогида сўзловчининг сўзларига диққат билан, сабр ва тоқатли бўлиб қулоқ солмоқ керак экан. Чунки ҳар кимнинг сўзида ҳам ўrnak олса бўладиган фикр бўлиб, ундан фойдаланиш мақсаддага мувофиқдир.

Байт:

*Ҳар жоҳилдин ҳалқ бўлса норизо,  
Ул бўлур юз минг балога мубтало.*

Ҳар бир одам, ёшидан қатъи назар, юриш-туришига, гап-сўзларига, яхши-ёмон ишларига диққат қилисин-чи, саналган жоҳиллик белгиларидан ўзида ҳам бормикин? Давра сұхбатларида ўзини қандай тутади? Кимдадир жоҳиллик белгиларининг ҳаммаси бордир. Кимдадир битта ёки иккитаси мавжуддир. Атрофдагиларнинг у ёки бу кишига «жоҳил» деган сифат беришлари учун шу битта ёки иккитаси кифоя қиласди. Хонадонларимизга ҳам қараб қўяйлик: жоҳил отонанинг хонадони бамисоли уруш ўчори эмасми? Бу ҳибсхонада туғилган, тарбия топган боланинг ҳаётдаги аҳволи не бўлар экан? Бугун дунёни разолатга, зулмга тортаётган жоҳиллар шундай уруш ўчорида таваллуд топмадиларми экан?

Нуқсонли кишигина ўзини комил ҳисоблайди. Ўзнуқсонини исбот қила олган киши эса ҳақиқий комил саналади. Камолотга эришганлар ўз камолотлари

ҳақида мақтамайдилар, аксинча, бу ҳолат жоҳилларда мавжуд. Бундай кишилар ўзларини олим деб атаганлари билан аслида жоҳилдирлар. Ўз камолоти билан мақтаниш жаҳолатдан ўзга нарса эмас. Такрор айтаман: кимки ўзини комил деб ҳисоблар экан, у, албатта, нуқсонлидир. Ана шу нуқсон унга камолотга етишиш учун йўл бермайди. Зеро, қуёш ҳам туш пайтида ўзини баркамол кўриб, энг юксак нуқтага кўтарилидим, деб ўйлади, аммо шу ондаёқ унга завол юзланади – у пастга қараб бота бошлайди. Негаки, унинг чиндан ҳам камолоти бор эди. Аммо уни кўрган заҳотиёқ заволга юз тутди. Ўзини комил деб кўраётган киши гўё ёмон одамнинг ўзини яхши кишига нисбат этганидек бир гап. Бундайларни тузатиш осон эмас. Чунки уларнинг қасри кибр ва гуурдан қад кўтаргандир. Бундайлар билан баҳслashiшининг фойдаси ҳам йўқ. Жоҳил билан тортишиб ўтирган олим ҳурмат кутмасин. **Бирор жоҳил одам сўзлайвериб, олимни сукут эттиrsa, таажжуб қилмаслик дозим, чунки тош гавҳарни синдира олади.** Жоҳил киши сукут билан жоҳиллигини яширсайди, ўртacha ақлли одам ҳисобланган бўларди. Лекин жоҳиллик билан сукут иккиси бир одамда жам бўлолмас экан.

Афлотунга дедилар:

- Кечаги зиёфатда Фалончи сизни мақтади.
- Буни эшигтан Афлотун бошларини қуий солиб, фикру хаёл уммонига ғарқ бўлибдилар.
- Эй Ҳаким, мен нима дедимки, бунчалик фикру андишага берилдингиз?

Афлотун дедилар:

- Мени сен айтган сўзлар ўйга толдиргани йўқ. Мен қилган ишларимни ўйлаб ўтирибман: қанақа жоҳилона иш қилган эканманки, бу қилмиш им у жоҳилга ёқиб тушибди ва у мени мақтаб юрибди? Бирор аҳмоқлик қилмассанг, ҳеч бир аҳмоқ сени мақтамайди ва кўкларга кўтармайди.

Луқмони ҳакимдан сўрадилар:

– Ҳикматли сўзларингиз, одоб-ахлоққа доир ваъз-насиҳатларингиз билан кўпларни яхши йўлга солдингиз, насиҳатларингиз кор қилмай ўзининг ёмон феълатворини ташлай олмаган киши ҳам борми?

Луқмони ҳаким жавоб бердилар:

– Бор. У – жоҳил, бадфеъл одам. Уни шу ярамас хулқдан қайтаришга ҳар қанча уринсам ҳам фойдасиз бўлиб чиқди, тузатишдан ожиз бўлдим.

**Ривоят.** Бир шаҳардаги олим, фозил қози вафот этиб, унинг ҳурмати юзасидан ўғли қозилик мансабига тайин қилинди. Ўғил бағоят жоҳил ва нодон эди. Янги қозининг жоҳиллигидан уялган қариндош-уруглари унга илм ўргатиш, адабли, тарбияли қилиш учун бир муаллимни тайин этдилар. Бир куни тил қоидала-ри дарсида муаллим мисол келтирди:

– Ўғлим, мана бу гапга дикқат қилинг: «Аҳмад Маҳмудни урди», деган жумладаги қайси сўз эга, қайси бири кесим?

Бу савонни эшитиб қози разабланиб кетибди:

– Вой, Аҳмад нима учун Маҳмудни уради? Нега шу пайтгача ҳеч ким менга хабар қилмайди? Бечора Маҳмуд калтак еб индамай кетаверадими?

Муаллим бу жоҳилнинг сўзларидан кулишни ҳам кулмасликни ҳам билолмай, ажбланганича тушунтирмоқчи бўлди:

– Масала сиз ўйлагандай эмас, бу ерда урган, урилган киши йўқ, фақат мазкур жумладан эга ва кесими-ни топиш учун келтирилган бир мисолдир.

– Бекор айтибсиз! Ҳозир одам юбориб, Аҳмадни топтириб келтираман-да, унга жазо бераман. Ўзингиз «Аҳмад Маҳмудни урди», деб гувоҳдик бериб турибсиз-ку? Энди нега сўзингиздан қайтяпсиз?

– Тушунсангиз-чи, «урди» сўзи ҳақиқий эмас...

– Нима? Ҳақиқий эмас, дейсизми? Сиз Аҳмаддан пора олганга ўхшайсиз, унинг томонини олиб, айбини беркитмоқчисиз. Мен қозилигим вақтида бундай зулмга, бундай бевошликларга йўл қўймайман! – деб

муаллимни зинданбанд қилишга, Аҳмад деган киши-  
ни эса топтириб келишга буюрди.

Воқеадан хабардор бўлган жоҳил қозининг қарин-  
дош-урувлари етиб келиб, минг мashaққат билан  
ҳақиқий ҳолатни англатиб, муаллимни озод этдилар.

Байт:

*Жаҳлдан одамга кўп қайгу-алам етар,  
Жоҳил одам сұхбатидан алҳазар, минг алҳазар.*

«Ақлли одамларнинг душманлиги жоҳил одамлар-  
нинг дўстлигидан кўра яхшироқdir. Жаҳолат баша-  
рият фикри учун қоронғу бир кечава ҳар турли ра-  
зилликларнинг онасидир», дейдилар.

**Умидимиз юлдузлари**, сиз бир маҳалла ёки  
қишлоқ ичидаги гап-сўзлар билангина ўралашиб қол-  
магансиз. Дунёда қандай воқеалар содир бўлаётга-  
нини кузатяпсиз. Айрим воқеаларга тушуняпсиз, баъ-  
зиларидан нафратланяпсиз, баъзиларига эса тушун-  
май қийналяпсиз. Дунё аҳволига бефарқ бўлмасли-  
гингиз яхши фазилат. Бугунги кунда XXI асрдаги  
мавжуд барча жамиятлар ҳақиқий жоҳилият даври-  
ни бошларидан кечирмоқдалар деган фикрга қўши-  
ласизми? Ҳа, фан-техника юксак даражада. Аммо  
асримиз инсони умидсиз, изтиробли, ғамгин. Уруш-  
лар, янги турдаги мустамлакачилик сиёсаллари, ваҳ-  
шийликлар, зулму зўравонликлар, фаҳшнинг кенг  
тарқалиши, жиноятларнинг ва жиноят турларининг  
кўплиги ва шафқатсизлиги, ўз жонига қасд қилиш-  
лар, давоси йўқ хасталиклар... Бу иллатлар қайси  
мамлакатда йўқ. Қайси ривожланган мамлакат «биз-  
да жаҳолат йўқ», деб мақтана олади? Энди қарай-  
лик-чи, инсоният азалдан соғиниб келган ҳузур-ҳало-  
ват, тенглик ва биродарлик, инсоф ва тавфиқ, раҳму  
шафқат, ўзаро муҳаббат қаерда, қачон ва қандай  
топилади? Жаҳолат, ақл ва туйғулар мажруҳлиги  
ҳозирги пайтда ахлоқий иллатга айланмоқдаки, дунё

оқиллари бундан ташвишланмоқдалар ва зулмат аро нур изламоқдалар.

Фан-техника ривожини тилга олдик. Бундай тарақ-қиётга етишиш ечими оғир масала эмас. Агар бир мамлакатда фан ва техника пароканда ақволга тушиб қолған бўлса, бир неча юз ёки бир неча минг иктидорли илм эгаларининг саъй-ҳаракатлари билан бу тубанликдан кўтарилиш мумкин. Лекин мамлакат маънавияти тубанликка юз тутган бўлса, жаҳолат ботқоғига бўғзига қадар ботган бўлса, бир неча минг олимнинг ҳаракати кифоя қилмайди. Бу ботқоқликдан якка ёлғиз чиқиш ҳам қийин. Барча бараварига ҳаракат қилиши шарт.

Жаҳолатни турли разилликлар онаси, дедик. Жаҳолатнинг суюмли фарзандларидан бири -- мутаассиблик (фанатизм)дир. Мутаассиблик илмсизлик булоғидан сув ичади. Қаердаки аниқ илм бўлмаса, у жойда фаразлар ҳукм суради, ҳар ўн фаразнинг тўққизтаси эса хато бўлиши мумкин. Мутаассиблик аввало дин кушандасидир, сўнгра эса жамият жигаридаги куртдир. Мутаассиблик фақат динга хос тушунча эмас. Дунёни ташвишга солиб турган футбол фанатлари, рок фанатлари каби бевошликлар шулар жумласидандир. Мутаассиблик деганда кўпчиликнинг кўз ўнгига фақат Ислом дини келади. Уруш майдонларида ўзини портлатадиганлар келади. Ҳолбуки, Фаластинда биринчи бўлиб ўзини портлатган араб қизи насоро динига мансуб бўлган. Бугунги кунда бошқа динларда ҳам мутаассиблик авж оляптики, Токио метросидаги заҳарланиш фожиаси фикримизга далил бўлади. Кенг миқёсдаги жаҳолатга қарши онгли равишда кураш мутаассиблик илдизини қирқа олади. Мутаассиблик ҳамма замонларда турли жамиятларни ларзага солиб келганини эътиборга олсак, бу курашнинг узлуксиз давом этиши шартлиги аён бўлади.

Жаҳолатнинг яна бошқа фарзандлари ҳам барча динларда туғилиб турибди. Барча динларни янгидан

янги пайдо бўлаётган турли оқимлар силласини қуриятти. Дингдаги ҳар қандай оқим – жаҳолатдир. Чунки одамларнинг турли оқим ёки гуруҳларга бўлинниб олиб, низода юришларини Аллоҳ таъқиқлайди. Аллоҳ бандаларини иттифоқликда умр кечиришларини истайди. Диннинг асосий вазифаси одамларни Аллоҳнинг паноҳи остига жамлаш. Низо, зиддиятлар шайтон паноҳида гуллаб-яшнайди.

Отангиз узоқ сафарга кетса-да, у ердан туриб сизга хат ёзил юборса, айрим ишларни буюрса, насиҳат қилиса, ёмонликлардан қайтишни таъқидлаб турса. Сўнг сафардан қайтиб юзма-юз бўлганида буюрган вазифаларнинг бажарилган ёки бажарилмаганини сўраганда десангизки:

– Отажон, хатингизни ўқидим. Айрим жойларини (ёки ҳаммасини) ёдлаб ҳам олдим, лекин буюрган ишларингизни бажармадим.

Шундай дейишингиз отангизга ёқармикин? Шунга кўра Куръони Каримни ёдлаш билан ҳам вазифа бажарилмайди. Унга ҳам амал керак. Тўлиқ амал қилиш учун эса Куръонни тушуниш шарт. Адашишлар ана шу тушунмаслиқдан ёки чала тушунишдан келиб чиқади.

Бу суҳбатимизни ўқиб, атрофимиз жоҳиллардан иборат экан, деган тушкун хаёлга борманг. Атрофимизда, шукрим, ақл эгалари – оқиллар кўп. Сизнинг вазифангиз оқилларга яқинлашиш, уларнинг илми, хулуқидан баҳраманд бўлиш, улар бошлиған йўлдан юриш.

### **Ақд ва оқил**

Донишманд дебдиким: «Ақдинг билан қара, кўз хоиндор, қалбинг билан эшиш, қулоқ ёлғончидир! Фикр ақднинг қўзгусидир».

Ақд билан иш кўрувчи одамни «ақдли» деб шарафлаймиз. Бунинг муқобилидагини баъзан «аҳмоқ», баъ-

зан юмшоқроқ тарзда «ақлсиз» ёки «эси паст» ёки «эси йўқ» деб қўяшимиз. Аҳмоқ билан ақлсизнинг (эси паст, эси йўқнинг) мавқеи бирми? Йўқ. Ақлсиз, эси паст, эси йўқ – одамнинг табиий камчилиги. Айб ҳам, гуноҳ ҳам эмас. У табиатан ақлсиз яралган. Одамнинг жисмоний куввати турлича бўлганидек, ақл қуввати ҳам ҳар хилдир. Агар бир одам ақлсизлиги туфайли бирон айб иш қиласа, айтайлик бирорни сўкса, унинг бу иши узрли. Агар ақди бутун бўла туриб айнан шу ишни қиласа, уни «аҳмоқ» деймиз.

Қуръони Каримда икки хил аҳмоқлик хусусида сўз юритилган. Уларнинг биринчиси коғир ва мушриклар тоифаси бўлиб, Аллоҳ Таоло улар ҳақида «Бақара» сурасида: «Улар кар, соқов, кўрдирлар. Демак, тушунмайдилар», деб; «Ёсин»да эса «...улар иймон келтирмаслар. Дарҳақиқат, биз уларнинг бўйинларига то ияклирагача етадиган кишанларни уриб қўйдик, бас, улар кўра олмаслар», деб марҳамат қилган. Улар аслида кар эмаслар, қулоқлари яхши эшитади, аммо Ҳақ сўзларни эшитмагандай юрадилар. Соқов эмаслар, аслида тиллари бурро, аммо калимаи шаҳодатни айтмай яшайдилар. Кўзлари очиқ, аммо ҳидоят йўлини кўра туриб, ўзларини кўрмаганга оладилар. Булар жоҳилият замони вакиллари Абу Жаҳл, Абу Лаҳаб, Муғира ибн Валид каби кимсалар. Уларнинг қалблари муҳрли бўлгани учун ҳам ҳидоятга ета олмадилар. Улар ҳақиқатни кўра туриб, била туриб: «Ҳаққа ишонсанк, хотинларимиз олдида масхара бўламиз», ёки «пайғамбарлик аслида бизларга берилиши керак эди, чунки бизларнинг мол-мулкимиз ва бола-чақамиз янада кўпdir», деган ақлсиз ва мантиқсиз сўзларни сўзлайвердилар. Улар ўз қабилаларидан чиққан Инсоннинг Ҳақ пайғамбар эканликларини билганлари ҳолда, аҳмоқликлари туфайли инкор этувчи ўжарликларидан қайтмаганлар.

Қуръони Каримда зикр қилинган иккинчи тоифа аҳмоқлар эса ўзларини foят ақдли деб биладиган ки-

шилардир. Дунёвий орзулар уларни ғафлатта етаклагани учун күzlари ҳақиқатни күрмайды. Бундай кишиларнинг фақат айримлари бирон-бир фалокатта учраганларида гина күzlари қисман очилиши мумкин.

Мавлоно Жалолиддин Румий аҳмоқлар ҳақида шундай деган эканлар: «Аҳмоқлардан қочингки, Исо алайхиссалом улардан қочгани каби. Аҳмоқлар билан сұхбат қилиш натижасида неча марта қонлар түкилгандир».

Үрни келганды Исо алайхиссаломнинг аҳмоқдан қочишлари баёни билан танишсак.

Марямининг ўғли Исо худди арслон қувалаган каби тоғ томонга югуриб борар эдилар. Күчадан ўтаётган одамлардан бири унинг орқасидан югурди ва деди:

– Нима бўлди сизга? Хуркитилган қуш каби учеб бормоқдасиз?

Исо алайхиссалом шу қадар тез чопар эдиларки, шошилгандаридан бу одамнинг саволига жавоб берса олмадилар. Ул зотнинг бу тарзда югуришларидан баттар ҳайратта тушган одам, ниҳоят яқинлашди ва яна сўради:

– Ё Ружуллоҳ! Аллоҳ ризоси учун бир он тўхтанг ва ҳолингиздан бизга хабар беринг? Кимдан ва нима учун қочмоқдасиз? Ахир орқангиздан қувлаётган арслон ҳам, душман ҳам, кўрқадиган бошқа бирон нарса ҳам йўқ-ку?

Бунга жавобан Исо алайхиссалом дедилар:

– Бир аҳмоқдан қочмоқдаман, аҳмоқдан! Ўзимни у билан сұхбатлашишдан кутқаряпман. Мендан узоқроқ турки, ўзимни кутқарай.

Бояги киши яна сўради:

– Duolari билан кўрларга ва карларга шифо берувчи Исо сиз эмасми?

– Ҳа, мен ўша масиҳман, – дедилар Ружуллоҳ.

– Маънавий сирларнинг тилсимини билган ва шунинг учун ҳам «Ружуллоҳ» номини олган маънавий зот Сиз эмасми? Ахир сиз дуо қилганда ўлганлар ҳам худ-

ди ўлжасини тутган арслон каби қабрдан сакраб чи-  
қарди-ку?

Бунга жавобан Ҳазрати Исо дедилар:

– Ҳа, ўликларни тирилтирган менман.

– Эй Исо! Лойдан қүш ясаб, уларга жон бағишилаган  
Сиз эмасми?

– Ҳа, менман, – дедилар Исои Рухуллоҳ.

– Эй тоза руҳ! Ўзингиз истаган нарсага қодир бўла  
туриб, яна кимдан қўрқиб қочмоқдасиз?

Исо алайҳиссалом яна жавоб қилдилар:

– Аввало руҳни ва сўнгра вужудни яратган Жаноби  
Ҳаққа ва унинг сифатларига қасам ичаманки, сен айт-  
ган бу дуони, яъни исми Аъзамни кар ва кўрларга  
қилган эдим. Улар тузалдилар. Сўнг бу дуони баланд  
чўққили тоққа қилган эдим, дуонинг кучидан ўртаси-  
дан ажралиб кетди. Сўнгра ўлик бир жасаднинг қар-  
шисида ўқиган эдим, маййит тирилди. Ҳеч бир нар-  
саси бўлмаган фақирга ўқиган эдим, бой-бадавлат  
бўлди. Лекин бу дуони аҳмоқ бир қалбга минг дафъа  
шафқат ва марҳамат ила ўқисам ҳам ҳеч фойда бер-  
мади. Бу аҳмоқ қоратош каби қаттиқ туриб олди ва  
қора феълидан асло воз кечмади. Оҳак тўкилган қум  
каби ундан бир ўт ҳам ўсиб чиқмади.

Бу сўзларни эшитган у одамнинг қизиқиши янада  
ортиб Ҳазрати Исодан сўради:

– Исми Аъзам бу қадар киши ва нарсаларга таъсир  
қилиб, фойда бергани ҳолда нега аҳмоқликка таъсир  
қилмади? Ҳолбуки, қолганлар ҳам хаста эдилар. Улар-  
нинг даво топиб, аҳмоқнинг эса даво топмаслиги са-  
баби ва ҳикмати недир?

Саволга Рухуллоҳ бундай жавоб бердилар:

– Эй инсон! Билгилки, аҳмоқлик иллати Худонинг  
қаҳридир. Қолганлари эса қаҳри илоҳийга дуч келма-  
ган хасталиклардир. Бало ҳам хасталикдир, лекин у  
ҳам мубталосидан шифо топади. Аҳмоқликка келади-  
ган бўлсак, бу «Хатамаллоҳу ала қулубиҳим ва ала  
самъиҳим ва ала абсориҳим ғишаватун» ояти билан

қаҳри Худодирки, аксарият ҳолларда бу хасталикдан бошқалар зарар күрадилар. Аҳмоқлик тамғаси Аллоҳнинг улар қалбига урган бир муҳридири. Уларнинг кўзларида ва қулоқларида пардалар бордир. Унга ҳеч кимса чора топа олмайди. Ягона чора – ундан қочмоқлиkdir.

Бу ҳикматни рамзий маънода тушунмоқ лозиммикин? Яъни: аҳмоқдан жисмонан эмас, руҳан қочмоқлик жоиз. Чунки жисмонан қочиб қутулиш мумкин эмас. Қайси даврага яқинлашманг, ақлилар орасида бир ёки бир неча аҳмоқ топилади. Аҳмоқлардан руҳан қочмоқлик – иймонни, виждонни, диёнатни уларнинг салбий таъсиридан эҳтиёт қилиш дегани бўлади. «Қозонга яқин юрсанг – қораси юқади», деганлари бежиз эмас. Қулоқлари ҳақиқатни тинглашдан, оғизлари ҳақиқатни севишдан завқ ололмайдиганлардан қочмоқ шарт экан. Чунки уларнинг руҳиятидаги касофат соғлом қалбга чўкиб, кишини абадий хасталикка дучор қилиши ҳеч гап эмас. Шу боис ҳам Исо алайҳиссалом ҳаворийларга: «Сизни қабул этмасалар ва сизни тингламасалар, кетингиз. Кетаётганингизда оёқдарингиз чангини қоқингиз», деганлар. Расулуллоҳ (с.а.в.) «**Оқил – дўстим, аҳмоқ – душманим**», деб марҳамат қилганлар. Аҳмоқдарнинг суҳбати қарғалар сингари бир ўлакса атрофига тўпланиш кабидирким, мажлислари фасоддир, суҳбатлари ғийбат, бўхтон, амалари эса қон тўқмоқлиkdir.

**Умидимиз юлдузлари!** Сизлар аҳли диллардан бўлишга интилинглар. Аҳли дилнинг мажлислари гул, суҳбатлари муҳаббатдир. Уларнинг амаллари яхшиликка йўғрилгандир. Инсонийликнинг улуғ фазилатини фақат шундайлар ёнидан топа оласиз. Оқилга йўлдош бўлиш, аҳмоқдан қочиш инсонни икки дунё саодатига эришитиражагини ҳеч қачон унутмасангиз бас.

Орифлардан бири ҳикматлар ва ибратлар кўргазмаси бўлган бу оламни ақлилар учун гўзаллик сайри-

дан, ақдисизлар учун эса ейиш ва шаҳватдан иборат-дир, деб таърифлаган. Мавлоно Румий «Маънавий маснавий» куллиётларида бундай ёзадилар (насрий маъноси):

«Кўнғиз гўнг титкилагани учун ҳам хушбўй ҳидлардан қочади. Унинг дориси кўнгил бузувчи ҳидлардир. Чунки шундай шароитга ўрганган, гўнг жону тани бўлиб қолган. Ақлли кишилар ҳам ақдисизларни тўғри йўлга солиш учун уларга ҳикматли сўзлар билан насиҳат қиласидилар, хушбўй ҳидлар билан тарбия қилмоқчи бўладилар. Кимга хушбўй ҳидли нарсалар ёрдам бермаса, демак, бундай одам бадбўйга ўргангандир. Сен ҳам яхшиликдан, нурдан насибангни ол. Бурнингни гўнгга тиқиб, кўнғизга айланиб қолма. **Инсон бўл, инсон!**»

«Ақл қувватининг мўътадиллиги тадбирнинг чиройли, зеҳнинг тиниқ, фикр-ўйларнинг тўғри ва ишончли бўлишини таъминлайди, амалларнинг ноzik, нафс одатларининг махфий жиҳатларини англашни ўргатади, – дейдилар ҳазрат И мом Фаззолий. – Ақлнинг ҳаддан ошиши макр-ҳийлага, фирибгарлигу айёрликка бошлайди. Агар ақл меъёрдан паст бўлса, бефаҳмлик, хом ғайрат, аҳмоқлик ва жунун пайдо қиласди. «Хом ғайрат» деганда дунё ва охират ишларидаги тажрибасизлик, яъни фойда-зарарни фарқлаш қувватининг заифлиги, назарда тутиляпти. Дарҳақиқат, инсоннинг тасаввур ва хаёл қилиш қуввати нечоғли соғлом бўлмасин, тажрибасизлиги туфайли баъзан касалга ўхшаб қолади. Аҳмоқлик ва жиннилик ўртасидаги фарқ шундаки, аҳмоқнинг мақсади тўғри, лекин уни амалга ошириш йўли нотўғри. Чунки аҳмоқ мақсадгага олиб борувчи йўл хусусида тўғри қарашга эга эмас. Жинни эса танлаш лозим бўлмаган нарсани танлайди. Аслида, жиннидаги танлов ихтиёрининг асоси бузуқ».

Ақлли, ақдисиз ва аҳмоқнинг фарқини билиб олгандай бўлдик. Энди ақл хусусида фаҳмимиз етганича

**ақлашайлык.** Дастрлаб «Калила ва Димна»га мурожаат қиласиз.

Инсонни бутун ҳайвонлардан юқори қўйган, уни дунёнинг бутун сирларидан воқиф этган тўрт нарса будир: ҳикмат, **ақд**, қаноат ва адолат. Илм таҳсил этмоқ, савод чиқармоқ ва ҳар нарсани атрофлича тушина билмоқ – ҳикматга; тадбир, сабр, назокат, марҳамат – ақлга; ҳаё, олижаноблик, ўзини қўлга олмоқ ва ўзининг ҳақ-хуқуқини билмоқ – қаноатга; тўғрилик, ваъдага вафо, эзгу ишлар қилмоқ ва яхши хосиятили бўлмоқ – адолатга тегишилдири. Бу сифатларнинг бариси бир одамда мужассам бўлса, дунёдаги энг буюк мавқе ҳам уни саросимага sola билмайди. Бундай одам атрофида ўзини қувонтирмайдиган нарсаларнинг борлигидан ғам емайди, ўзида мавжуд нарсалардан маҳрум бўлса, ранжимайди. Бошига фалокат келса, ўзини йўқотиб қўймайди. Ҳикмат – битмас, туганмас хазинадир. Харжлаганинг билан у камаймайди. Асраранинг билан унга нуқсон етмайди. Ҳикмат шундай либоски, кийганинг билан эскирмайди (Ниҳояси йўқроҳат ҳисобланмиш ҳикмат хусусида суҳбатимиз сўнгигида яна батафсилоқ сўз юритамиз).

Ақл эса саховат эшиклари ва саодат хазиналарининг калитидир. Фоний дунёнинг азобу уқубатларидан ҳолос бўлиш, боқий дунёнинг ноз-неъматларига этишиш ақл ва идрокка боғлиқдир. Инсонга ҳамиша ақли ҳукмронлик қилиши керак. Ақдини йўқотган куни ўзини фалокатга отган бўлади. Ақдиз бошнинг азобини эса вужуд тортади. Истеъдод, ақл-идрок икки хилдир: бири – табиий, онадан тугма бўлади; иккинчиси – касбий, яъни тажриба воситасида эришилади. Инсонларда бўлган табиий истеъдод ёғочдаги ёниш хусусиятига ўхшайди. Ёғочга ўт қўйилмаса ёнмайди. Шунга ўхшаш, табиий истеъдод ва ақл ҳам тажриба бўлмаса, ўзини кўрсата олмайди. Олимлар тажриба инсон ақл-идрокини камолга еказади, деганлар.

Бир одамни Пайғамбар (с.а.в.)га жуда күп мақтадилар. Уни ҳар мақташганида Расулуллоҳ (с.а.в.) «Үзи ақдими?», деб сўрар эдилар. Бошқа бир ҳадисда эса: «Ақдли киши нафсини ҳою ҳавасга бермаган, ўлимдан кейинги охират ҳаёти учун ҳозирланган кишидир», дейилади.

Инсон ақдли турли кўринишларда намоён бўлади:

- назокатли ва мулоийим муоммалада;
- ўзи ким эканлигини билиб, шунга риоя қилишда;
- ўз сирларини дўстга билдириш ёки билдиримасликни билишда, яъни ақдизнинг сири бўлмайди, ҳар нарсаси тилида туради;
- ўзининг ва бошқаларнинг сирини саклашда;
- тилини тийиб, ортиқча сўзламасликда;
- мажлисларда жим ўтиришни одат қилиб, сўралмаган нарсаларни айтмаслик, ва пушаймонлик келтирадиган сўзларни тилга олишдан сақланишда.

Ақдли одам қиласидан ишининг охири нима билан ва қандай тугашини олдиндан кўз ўнгига келтириши керак. Қаерга боражагини йўлга чиқишдан аввал билиши шарт. Акс ҳолда у йўлнинг ярмида сарсон бўлиб қолади. Фалокатдан бошқасига йўлиқмайди.

Аждодларининг ҳаётидан ибрат олиб, уларнинг тажрибасидан фойдаланган одам ақдли ҳисобланади. Ақдли одам бошқаларнинг хатосидан ҳам ибрат оладики, «Аҳмоқдан ақл ўрган», деб бекорга айтмаганлар. Мақонни тўғридан-тўғри тушунишга уринсак, ажабланамиз, чунки аҳмоқдан аҳмоқликни ўрганиш мумкин. Мақоннинг чуқур маъноси шундайки, аҳмоқнинг гапларини эшитиб, аҳмоқона ҳаракатлари туфайли эл олдида шармандали ҳолга тушишини кўриб, мулоҳаза юритиш ва у қилган аҳмоқликларни такрорламаслик керак. Ақл эгаси кўрганидан ибрат, эшитганидан сабоқ оладики, оқибатда ўтган хатоликлари учун фаяқат ҳасрат ва надомат чекавермай, аксинча, бу ишларни такрорламаслик чораларини кўради. Ҳазрат Навоий деганлар: «Ақдли одам эл хатосини кўриб, ху-

лоса чиқаради ва тўғри йўлни танлайди. Буни у хатосини бошқалар сезишидан ва юзига солишидан олдинроқ қиласди:

*Оқил чу кўрса элда хато ижтимоб этиб,  
Андин савоб йўл сари мойил қилур ўзин.  
Қўймас анинг хатосига эл айлаб эътиroz,  
Айтурга юзи ўтрусида саҳвининг сўзин.*

Маъноси: Оқил бошқаларда хато кўрса ўзини тортади. Ўзини тўғри йўл сари мойил қиласди. Унинг хатосига эл эътиroz билдириб, юзига қараб, айбини айтишга ўрин қолдирмайди.

Одам боласининг ўзбилармонлиги ақднинг заиф, кучизлигидан дарак беради. Ўзбилармон одам ҳамиша машаққатда яшайди. Зиёнли ҳар нарсада бир фойда ҳам бор, деб айтадилар. Энг яхшиси, бошқаларнинг кўрган зиёnlарини назарда тутиб, уларнинг фойдали тажрибаларидан истифода этишдир.

Афсуски, ҳаётда аксини кўриб турамиз. «Бирор томдан ташласа, сен ҳам ташлайсанми?», деган нақл бор. Кўриб турибмизки, бир одам аҳмоқлик қилиб томдан ташлади. Ўлмаган тақдирда ҳам лат еди, азоб чекди. Бошқа бир одам ҳеч қачон ўзини аҳмоқ санамайди-ю, бироқ ўша томдан бир ташлаб кўришга интилаверади, баъзан ташлаб кўриб, сўнг афсусланиб юради.

**Умидимиз юлдуздари**, сизнинг айрим дўстларингизда ҳам шундай иллат кўриниб қолади. Масалан, чекишининг зарарини ҳаммангиз биласиз. Аммо синфингизда бир йигитча танаффус чогида беркитиқча чекиб туради. Бу ишнинг яхши эмаслигини билса-да, яна бир-икки йигитча уларга қўшилишга ҳаракат қиласди. Баъзан қўшилади ҳам. Сигарет чекиши билан чекланишса бир нави, нашага ўтиб қолишса, ёмон, жуда ёмон! Гўё вақтингчалик ҳавас бўлган бу ҳаракат ёш умрни ҳалокатга олиб боришини ўзингиз ҳам, ёш

бўлишингизга қарамай, ҳаётда кўп учратиб турибсиз. Кўра туриб ўзларини бу иллатлардан нари тутган умидимиз юлдузларни биз шарафлаймиз. Энди бу мисолни ўзингиз ҳам кузатаётганинг катталарнинг ҳаётидан олсак.

Кўшнимиз ёки қариндошимиз дабдабали тўй қилди ва қулогига қадар қарзга ботди. Тўйдан кейинги роҳат ўрнига азобли қунлар бошланганини ўзимиз ҳам кўриб, ундан-да дабдабали тўйга ҳаракат қиласиз. Ундан кўпроқ қарз кўтарамиз. Бу қилмишимиздан «сен бир қаватли уй томидан ташласанг, мен тўққиз қаватли уй томидан ташлайман, абжагим чиққанини ҳамма кўрсинг», деган маъно чиқмайдими? Кимлардир бизларни бу нодонликдан тўхтатмоқчи ҳам бўлади, «аҳмоқлик қилма», деб танбеҳ берса биз унга «ўзинг аҳмоқсан», деб катта кетамиз. Ўзининг ниҳоятда ақдлилигига астойдил ишонган одам деярли ҳамиша ақди паст ёки бутунлай беақл одамлар тоифасига киришини билсак, эҳтимол бундай жавоб қилмасдик. Ҳазрат Умар (р.а.): «Ақдли инсон яхшиликни ёмонликдан ажратса оладиган одам эмас. Ҳақиқий ақд соҳиби иккита ёмон ишдан қайси бирининг зарари кўпроқ эканини билган одамdir», деган ҳикматларни унумасак ўзимизга фойдалидир.

Айрим пайтларда бир аҳмоқнинг аҳмоқона ишини бошқа аҳмоқ «ақдли иш қилибсан», деб мақтаётганига ҳам гувоҳ бўламиз.

– Фалончи бир йилдан бери қарзини қистаб келавериб, жонимга тегди. Бергани бир ярим минг доллар-у даъвоси осмонда. Кеча келганида бир оз кайф қилиб ўтирган эканман, разабим қўзиб, орқасига иккита тепиб, жағига бир мушт урувдим, қораси ўчди.

– Ақдли иш қилибсан, бунақа нокаслардан қарз сўраш керакмас.

Икки аҳмоқ учрашганида яхшилик туғилишини умид қилиш – хўроздан ҳар куни тухум кутиш билан

баравар. Бошқачароқ айтсак: икки аҳмоқнинг учрашувидан яхшилик ҳосил бўлишига учинчи аҳмоқгина ишониши мумкин. Агар қарздорнинг зулмини эшитган ошнаси:

– Дўстим, бир гуноҳ устига иккинчи гуноҳни ортирибсан. Дарҳол жабрдийданинг ҳузурига узр сўраб бор. Тез кунлар ичи қарзингни ҳам қайтару биродарлик ришталарини тиклаб ол!, – деб айтса, унинг ақли намоён бўлади. Бунаقا ҳолатларда ақл покиза қалбга кўшилса фазилатга айланади. Акс ҳолда, ақл фазилат эмас.

Бирон бир ҳиссиёт, хусусан, бойишга майл уйғонганида гоят эҳтиёт бўлмоқ даркор. Агар ақл бўлмаганида ҳиссиётлар одамнинг тинка мадорини қуритган бўларди. Бемаъни ҳиссиётларни жиловлаш учун ҳам одамга ақл берилган, шундай эмасми? Куч – ақлда. Ақлсиз бош – бамисоли шамсиз шамдон, дейдилар. Инсон жасадидаги ақл дараҳтга ўхшаркан. Даҳаҳт соғлом ва серҳосил бўлса, ундан самара умид қилиш мумкин. Унга пажмурдалик ва ҳазон етса, ўтин қилиб ёқищдан бошқа нарсага арзимайди.

**УМИДИМИЗ ЮЛДУЗЛАРИ!** Билурсизким, инсоннинг бошида кўз, қулоқ, оғиз, бурун каби қийматли аъзолар жойлашган. Лекин инсонийлик моҳияти гўзал кўз ёки бежирим қулоқ билан эмас, балки ақду заковат, маънавият ва қувваи ҳофиза билан юзага чиқади. Бу эса миядан ўрин олган бир жавҳар бўлиб, инсонга тақдим этилган буюк неъматdir. Миядаги кичкина бир иллат туфайли киши телбага айланади, ҳайвонлар қилмаган ишларни қиласди. Инсоният ҳануз бу сирнинг тагига етолгани йўқ.

Ҳазрат Навоий ақлни гавҳарга қиёслаганлар ва деганларки:

«Гавҳар балчиқقا тушгани билан қиймати камаймас. Эшакмунчоқ тожга таққан билан феруза ўрнини тутмас ва ҳеч ким унинг баҳоси пастлигини унумас.

Зөвөр била шакли хүб бўлмас,  
Ҳар қизки эрур йамон лиқолиг.  
Ҳар неча қоронгу бўлса ҳужра,  
Шамъ анда бўлур фузун зиёлиг.

Дейилмоқчики: агар қиз хунук бўлса, безак билан чирой топа олмайди. Ҳужра ҳар қанча қоронгу бўлса ҳам, шамнинг равшан нурини бўға олмайди, аксинча, қоронгу ҳужрада шамнинг нури қадрлироқ бўлади.

Инсонлар ақл билан мумтоздирлар. Ақл туфайли яхшилик ва ёмонликни идрок эта оламиз. Шунинг учун ижтиёrimизни хайрга сарф этиш – ақдимиз қўлидадир. Киши молсизликдан қашшоқ бўлса-да, ақддан бой бўлишга тинмай интилиши керак. Чунки мол билан бой бўлгандан ақлан бой бўлган афзалроқдир. Ақл билан мол тўпласа бўлади, мол билан ақл тўплаб бўлмайди.

**Ҳадис.** Расулуллоҳ (с.а.в.) бундай марҳамат қиласидилар:

– Сизлардан аввалги умматлардан уч кимсанинг: абрас, кал ва кўрнинг аҳволидан ҳикоя қилиб бераман. Аллоҳ Таоло имтиҳон қилиш учун уларнинг олдига бир малак юборди. Малак абрас касаллигига мубтало бўлиб, баданига оқ тушган одамнинг олдига келди-да, сўради:

– Дунёда жону дилинг билан нимани истайсан?  
– Бу хасталикдан қутулиб, танамга гўзаллик қайтишини, одамлар мени кўрганларида ирганмай, қувонадиган чирой соҳиби бўлишни истайман. Фоний дунёда бундан бўлак хоҳишим йўқ.

Малак бу одамнинг баданини силади ва абрас хасталигидан халос этиб, уни гўзал бир вужуд соҳиби қилиб қўйди-да:

– Энди сенга давлат бераман. Қандай молни яхши кўрасан? – деб сўради.

– Туяни яхши кўраман, – деди абрас.

Малак унга ўн ойлик урғочи таяни берди-да: «Бу таяни Аллоҳ сен учун баракали этсин», деб дуо қилгач, калнинг одига борди:

- Дунёда жону дилинг билан нимани истайсан?
- Бирдан бир умидим чиройли сочга эга бўлиш. Бунинг учун ҳеч нимамни аямайман, – деди кал.

Малак уни ҳам сийлади. Калнинг бошидан чиройли соч ўсиб чиқди.

- Энди сенга давлат бераман, нимани хоҳдайсан? – деб сўради малак.

– Сигирни яхши кўраман, бир сигирим бўлишни аллақачондан бери орзу қиласман, – деди кал.

Унга бир сигир берилди. Малак: «Бу соғин сигирни Аллоҳ сен учун баракали этсин», – деб дуо қилгач, хайрлашди-да, кўрнинг одига бориб сўради:

- Дунёда жону дилинг билан нимани истайсан?
- Энг орзу қиласним – кўзларимнинг кўришидир, – деди сўқир умид билан.

Малак уни ҳам даволади, кўзларини очгач:

- Сенга бойлик бераман, нимани яхши кўрасан? – деб сўради.

– Энг яхши кўрганим кўйдир. Кўй сурувларим бўлишини орзу қиласман.

Унга совлиқ берилди. Туя – бўталоқ, сигир – бузоқ туғиб берди, қўй қўзилади. Бу уч одам шунчалик бойиб кетдиларки, кўп вақт ўтмай учаласининг ҳам бир водийни тўлдирадиган туялари, сигирлари, қўйлари бўлди. Уларнинг ҳар бирлари бир водийга эга бўлиб, фароғатда яшаётган кезларда Малак яна Ерга туширилди. Абрас хасталигидаги бемор қиёфасига кирдида, бир пайтлар шу касалликдан азоб чеккан одамга рўпара бўлиб ўтингч билан деди:

– Эй бадавлат инсон! Мен бир ғарип мусо фирмани. Кўп юрдим. Менга Аллоҳ ризолиги учун бир тая бер, манзилимга етиб олай. Сенинг рангинг ва баданингни чиройли қиласми ҳақи менга кўмаклаш.

– Сенга берадиган нарсам қолмаган, ҳамма нарсаны бериб бўлганман, – деди абрас.

– Мен сени таниётганга ўхшайман. Сен ҳамма ҳазар қиласиган, одамлар ирганадиган абрас эмасмисан? Сен жуда камбағал эдинг. Аллоҳ сенга урғочи туже бериб, бадавлат қилмадими? – деди Малак.

– Йўқ, мен у одам эмасман. Бу мол менга отамдан, бобомдан қолган.

– Агар ёлғон сўзласанг, Аллоҳ сени аввалги ҳолингга келтириб қўяди. – Малак шундай деди-да, ундан нари кетиб, калнинг олдига борди. Абрасга айтган гапларни унга ҳам айтди, ёрдам сўради. Кал ҳам худди абрас каби рад жавобини берди. Малак унга ҳам «Агар ёлғон галирсанг, Аллоҳ сени аввалги ҳолингга қайтарсин», деди-да, кўрнинг олдига борди. Унга сўқир ҳолида рўпара бўлиб, ёлборди:

– Мен фақир, йўқсил одамман, йўлдан қолдим. Юртимга қайтишга имконим йўқ. Менга Аллоҳ ризоси учун ёрдам бер. Сенинг кўзларингни очган, равшан қилган, сенга давлат берган Жаноби Ҳакънинг ризоси учун менга битта қўй бер.

Аввал сўқир бўлган, Аллоҳнинг марҳамати билан кўзи очилиб, бойиб кетган одам тиланиб келган кишига қараб фоят ачиниб, дедики:

– Эй гариф йўлчи! Мен аввал худди сен каби кўр эдм. Аллоҳ кўзларимни равшан қилди. Мен фақир эдим, Аллоҳ менга бир совлиқ берди. Бундан давлат ортиридим. Аллоҳ ризоси учун битта эмас, истаганингча қўй ол.

Ақдини йўқотмаган бу одамга қараб Малак шундай хитоб қилди:

– Қўйларинг ҳам, барча давлатинг ҳам ўзингга буюрсин. Аллоҳ баракатини янада оширсин. Бу сизлар учун Аллоҳ томонидан бир имтиҳон эди. Танишларинг имтиҳонда панд еб, Аллоҳнинг ғазабига учрадилар...

Бу шарафли ҳадис ақд эгалари учун бекиёс ибрат дарсидир. Атрофимизга қарайллик-чи, қадим замон-

ларда яшаган ўша абрас ва калга ўжшаганларни ҳозир учратармикинмиз? Афсуски, учратамиз. Кимки улардан ёрдам сўраса, ақл ўргата бошлайдилар, ёрдам ўрнига насиҳатларни қалаштириб ташлайдилар. Не ғамки, бундай аҳмоқлар дунё бунёд этилганидан бери бор. Ҳаёт ҳикматини кўринг: ёмон феълиларнинг, яъни аҳмоқларнинг феъллари бир-бирига айнан ўхшайди.

Оқил киши ўз умрини озгина мол билан хуррам ва шодликда ўтказади. Нодон киши ҳисобсиз молу давлат билан доимо ғам-алам тортиб, саргардонлик билан кун кечиради. Барча нарсанинг кўнгилдагидек тугаши ақлга боғлиқ. Шунинг учун оқил киши барчадан улуф ва муҳтарамдир. Ақл – нафснинг зиндан, ҳою ҳавас эса оромгоҳи ҳисобланади. Ҳою ҳавас турли хил иштиёқ ва орзуларни нафс олдига тухфа қилиб олиб келади. Аммо бу беҳуда ҳавасларни **ақд** ман қилади. Демак, кишининг нафси ҳою ҳавасга мойил, ақлдан эса узоқдир. Шунинг учун оқил инсон нафс кўйига кирмай, ақл садосига қулоқ солади. Ишнинг оқибатини ўйладиди. Киши баҳт-саодатга нафс орқали эмас, балки ақл орқали эришажагини тарих беҳисоб тарзда исбот этганки, бу ҳам бизлар учун ибратдир. Алломаларнинг бу гўзал фикрига қулоқ тутинг.

Бадан – нафс ўлкаси ва шаҳридир. Қалб шу ўлканинг қоқ марказидир, қолган аъзолар унинг хизматкорлари, ботиний қувват эса ўлканинг ёритувчи фонысидир. Ақл – уни тўғри йўлга бошловчи вазир. Истак ва орзу хизматкорларнинг ризқини мувофиқлаштирувчи восита. Жаҳд ва ғазаб шу ўлканинг миршабларидир. Ғазаб инсонга тўғри йўлни кўрсатаётгандек туюладиган, аслида эса ёмонлик ва тузоқ ҳозирлаб қўйган қуладир. У аввал насиҳат қилиб туради, кейин ўлдиради. Қалбни оққўнгил вазирига қарши қайрайди. Ақлнинг олди қисмидаги ҳаё қўриқчи мисолдир. Ақл ўртасида эса фикрлаш қуввати мавжуд. Эслаб қолиш қуввати эса ақлнинг орқа қисмида жойлашган.

Тил таржимон, беш сезги аъзолари эса унинг жосуси ва хабарчилариидир. Уларнинг ҳар бирига муайян вазифа топширилган. Кўз ранглар оламида, қулоқ овозлар оламида, бошқа аъзолар ҳам тегишли вазифаларни бажаришади. Уларнинг ҳар бири ўзига хос хабар манбаидир. Улар ўзлари билган нарсани нафсга етказадиган эшикбон сингариidlар. Подшоҳ мартабасидаги қалб дуруст бўлса, қўл остидагилар ҳам дуруст, аксинча, бетавфиқ бўлса, қўл остидагилар ҳам шундай бўлади. Қалб кин, газаб, сабрсизлик, ҳирс, ортиқча орзу ва тақдирдан рози бўлмаслик каби ботиний хасталиклардан фориғ бўлсагина нажот топиб, ҳаловатга эришади.

Ақд бизни эҳтиросларимиз ва нуқсонларимиздан баланд тутибина қолмай, фазилатларимиз, истеъодд ва эзгуликларимиздан мақсадга мувофиқ фойдаланишда ёрдам беради. Зеро, ақлли бўлишнинг ўзи кифоя эмас, муҳими – бор ақлни ишлата билиш керак. Донолар орасида: «Айримларда ақл зўриқиши туфайли барбод бўлади. Аксарият инсонларда эса ишлатилмаганидан могорлаб кетади», деган гап ҳам бор. Ҳаётда чарчаш туфайли барбод бўлишни кам учратамиз, аксинча, ақлнинг могорлаб кетгани кўп учрайди. Баъзи одамларда ақл бутун умри давомида ташландиқ ер каби қаровсиз қолаверади. Ҳолбуки, ақд мулоҳаза юритиш, англаш хусусиятига, яъни сабаб ва оқибатни узвий боғлаш, «нима учун?» деган саволга жавоб бериш, тасодифларни аниқлаш, қонуниятларни очиш, кутилмаган ҳолатларнинг янги шароитларга мослигини белгилаш, воқеалар занжирининг боши ва ниҳоясини топиш қудратига эга. Шу туфайли инсон танасидаги соғлом ақл энг кичик вужудда жамулжам бўлган бемиқёс буюклик саналади.

**Ривоят.** Қадим замонда бир шаҳарда Қосим исмли меҳнаткаш одам яшарди. Кеча-кундуз ишлаб, меҳнати орқасидан бойлик ҳосил қилди, орттирган пулларини «бирон кунимга асқотар», деган умидда кўза-

чага жойлаб, бегона кўздан нари, деган мақсадда жар ёқасидаги чилонжийда дарахтининг остига кўмиб қўйди.

Орадан бир неча кун ўтгач, пулга муҳтоҷ бўлди-ю кўзачани олиш учун дарахт остини кавлади. Не мусибатки, кимдир кўзачани кавлаб олиб кетибди. Бундан Қосимнинг ёруғ куни тунга айланиб, боши гангиди. Унинг фозил бир биродари бор эди. Дарҳол унга учраб, арзи ҳол қилди. Фозил киши Қосим билан дарахт ёнига келди, ўйлади. Лекин, бирон тайин фикрга кела олмади. Бу онда уларга дарвишсифат бир одам, сўнг ёш бола яқинлашдилар. Воқеадан уларни ҳам боҳабар этдилар.

– Чилонжийданинг илдизи турли хасталикларга дори бўлгани учун шифо истагидаги кимдир кавлаб олган,  
– деди у киши. Унинг фикрини бола қувватлади:

– Табиблардан сўраш керак, қайси табиб кимга чилонжийда илдизидан дори тайёрлаб берган бўлса, дарахтнинг тагини кавлаётуб кўзачани топган ҳам ўша киши бўлади.

Қосим ҳам, унинг фозил дўсти ҳам йўловчи одам ва нотаниш боланинг ақл-фаросатларига таҳсинлар айтиб, табиблар ҳузурига бирма-бир бориб суриштиридилар. Табиблардан бири уларнинг муаммоларини тинглагач, дедики:

– Ҳожи Ҳайдар исмли хаста одамни муолажа қилмоқ учун чилонжийда илдизини топиб келтиришни буюриб эдим. У киши келтирди, мен дори тайёрлаб бердим. Иншаоллоҳ, дардига шифо топгай.

Табиб айтган манзил бўйича бориб, Ҳожи Ҳайдарни топдилар.

– Шифо илинжида чилонжийда илдизини кавлаб олмоқчи эдим, бир кўзача чиқди. Дарахт бирон боғ ичидаги бўлсайди, боғ эгасидан суриштирадим. Эгасиз жар ёқасида бўлгани учун, кўзачани уйга келтириб кўйдим. Аслида кўзачага тегмаслигим жоиз эди. Бироқ, ҳалол-ҳаромнинг фарқига бормайдиган бирор

одам қўлига тушиб қолса, эгаси чирқирамасин, деган мақсадда одим. Омонатга хиёнат қилиш ниятим йўқ!

Қосим кўзачанинг ҳажми, ранги ва ичидаги тангаларнинг миқдорини айтгач, Ҳожи Ҳайдар бойликни эгасига қайтарди. Қиссадан ҳисса шуки, ҳар қандай муаммо ақл ила ҳал қилинур.

Ҳар бир одамнинг оз бўлса-да, ўз ақли бўлгани яхши. Чунки Фирдавсий ёзганларидек:

*Ақлдан ғамгинлик, шодлик, ўқтамлик,  
Ақлдан борлигу йўқлигу камлик.*

Инсон дунёда ўз ақли билан яшамоқ учун тугилади. Ақл ўргатувчиси кўп бўлган ишдан фойда кам. Кимнингки ўз ақли йўқ экан, унга ҳамма одамларнинг бирваракай ақли ҳам наф беролмайди. Кўзи ожиз одам бу нуқсонини ёнидагилар ҳисобига тўлдиролмайди. Қаерда ақл етишмаса, у ерда ҳамма нарса етишмайди. Бу ўринда фақат ўз ақлига маҳлиё бўлиб, ўзбилармонлик билан кун кўришнинг ўз ақли билан яшашга интилишдан фарқлаб олиш керак. Яъни ҳар нарса меъёрида бўлиши афзал. Меъёрдан ошилса, биринчи ҳолатда мағрурлик ва кибр, иккинчисида эса танбаллик, лоқайдлик нишоналари кўринади.

«Кўр ҳассасини бир марта йўқотади», «Оғзи куйган қатиқни ҳам пуфлаб ичади» каби деган мақоллар маззини чақиши керак. Бу мақоллар ақлли одамларга нисбатан айтилган. Ҳар қандай одам ҳаёт йўлида озмикўпми, қоқилиб туради. Ақлли одамлар тубан ва ярамас муҳитга тушиб қолсалар, тезда ундан қутулишга ҳаракат қилишлари зарур. Муайян вазиятда ақлини йўқотмаган одам умуман ҳеч нарсани йўқотмайди. Кимки кўр-кўронга номаълум йўлга чиқса, халқнинг тўғри кетаётган йўлидан узоқлашади ва қанча кўп йўл юрса, шунча кўп адашади. Агар бир одамнинг кўзига тикан кирса ва бу тиканни чиқариб олмасдан уни аҳамиятсиз бир нарса ҳисоблаб, кўзини ишқай бош-

ласа, мутлақ күр бўлади. Ақлли одам кўпнинг раъи билан ҳисоблашиб, унга ишониши лозим. Шу билан бирга, ақл ва тажрибанинг сўзларига ҳам қулоқ солиши зарур. Ақлли одам ўзига раво кўрмаганини ўзгага ҳам раво кўрмаслиги шарт. Чунки ҳар бир ишнинг ўз мукофоти ва оқибати мавжуд. Ақл билан фалокатнинг олдини олган, саросимага тушмаган одам бундай пайтларда нажот топа олмайди. Бахтсизлик юз берганда одамга ақлдан бошқа ҳеч нарса ёрдам бера олмайди. Шу боис ҳам донолар: «Ақл барча эзгу ишларнинг асоси, саодат дарвозаларининг қалитидир», дейдилар. Бу хислат кимда бўлса, унга илм ва ҳилм фазилати қўшилса, у одам шаън-шавкатга, иззат ва ҳурматга сазовор бўлади. Қадим файласуфларидан Демокритнинг «Тана гўзаллигини, агар унинг заминида ақл ётмаса, ҳўқиз гўзаллигига ўхшатиш мумкин», деган фикрини эътиборсиз қолдирмаганимиз дуруст. Бу фикрни давом эттириб айтиш мумкинки: жасоратсиз ақл – аёлга хос хислат. Ақлсиз жасорат эса – ҳайвонга хос хислат. Баён этилмиш фикрларнинг тасдифини «Қутадфу билиг»да ҳам ўқиймиз:

*Билиглик уқушлуқ киши ул киши,  
Онингда нору борча йилқи туши.*

Маъноси будир: инсон дегани – илмли, ақлли кишиларга берилган номдир. Қолганлари йилқи сифатдир (яъни, ақлли, илмидан бошқасини йилқига қўшиб кўй, дейилмоқчи).

Ер юзида қанча инсон бўлса, ҳаммасида ўзига яраша ақл бор. Аммо барчанинг ҳаракати ҳам фақат инсонга хос гўзал ҳаракат эмас. Кимдир ўз ақли дараҷасида ҳўқиззга, кимдир оловга, кимдир ёғоч санамларга топинади. Кимдир пайғамбарни Худонинг ўғли, бошқаси императорни қуёшнинг ўғли, деб сифинади. Кимдир ақли туфайли шараф тожига эришади, яна

кимдир ақди ноқислиги туфайли ё гиёхванд бўлади ёки зинокорлигининг мукофоти сифатида «ОИТС» каби хасталикка чалиниб, дунёни шармандалик либосида тарк этади.

**Масал.** Эчки билан туя ҳамроҳликда борар эдилар. Рӯпараларидан дарё чиқиб, биринчи бўлиб туя сувга тушди.

– Дарё чуқур эмас экан, сув қорнимдан келяпти, сенам тушавер, – деди туя эчкига.

Эчки дарё томон юрмай, орқасига тисарилиб, дедики:

– Эй дўстим, дарё сен учун чуқурмасдир. Ҳар ҳолда қорин билан қориннинг фарқи бор. Сенинг қорнингдан келган сув мени кўмиб юборади-ку!

Ҳар ким ўз ақди ва қобилиятига қараб иш тутса, тўғри йўл танлаган бўлади. Акс ҳолда аввалроқ баён қилганим «сен ўзингни томдан ташлабсан, менинг сендан кам ерим борми, менам ташлайман!», деганлар каби ақл неъматидан йироқлашади.

Донолар ақлнинг мақбулини «ақди салим» деганлар. Ҳар ақл мақбул дейилмайди, мақбул эмаси ҳам мавжуд. Мақбул бўлмаганларини аввал баён қилганимдек «ақлсизлик» ёки «аҳмоқлик» дейишга одатланганимиз. Биз бир инсоннинг ҳаракатига «ақлсизлик» деб баҳо берамиз, аммо унинг ўзича, бу иши ақддандир. Инсон ўз ақли даражасида кўп нарсаларни ўйлаб тошиши мумкин. Кўп ишларни амалга ошириши ҳам мумкин. Аммо гап у амалга оширган ишнинг жамият учун маъқул ёки маъқул эмаслигига. Бошқача айтилса, ҳақиқатга мослигига ёки мос эмаслигига. Ақлнинг маҳсулотлари ҳақиқат тарозусида ўлчанади. Ақлли одам билан аҳмоқнинг фарқи шуки, ақлли доимо фикрларни фикрлаган, аммо кам галиради. Аҳмоқ эса доимо гапириб, ҳеч вақт ўйламайди. Ақллининг тили ҳамиша фикрининг измида. Аҳмоқда бўлса бунинг акси. Ақллининг тили – тафаккурнинг тилмочи, аҳмоқнинг тили эса гап ташувчи ва фийбатчидир.

Ўрни келганда кўп хонадонларнинг шўрини қури-  
таётган бир аҳмоқлик ҳақида ҳам гапириб ўтай.

**Умидимиз юддуздари**, маст қилувчи ичимликлар-  
ни ичиш ҳаром, яъни ман этилганини биласиз. Шукр-  
ким, бу иллатдан **ҳозирча** йироқсиз, илоҳим, «ёмон-  
ликлар онаси» деб сифатланган бу хасталикдан ҳами-  
ша йироқ бўлинг. «Ҳозирча» деганимнинг маъноси,  
буғунги ўсмиirlар яқин йилларда йигит ёшига етгач,  
аввал ота-оналаридан яширинча, кейин ошкора май-  
хўрлик қилаверадилар. Яна афсуски, катталарга ҳавас  
қилиб пивоми ё виноми ичувчи ўсмиirlар ҳам учраб  
турди. Илоҳим уларнинг бу касаллиги сиз ақди расо  
ёшларимизга юқмасин. Майхўрликнинг ақдни кетка-  
зувчи ёмон иллат эканини ҳамма билади. Ажабки, бу  
иллатдан ўзини иҳота этишни ўйламайди. Бу мавзу  
алоҳида мулоҳазага, таҳдил ва хуолосага мухтож бўлга-  
ни учун ҳозирча гапни мухтасар қилиб, асосий баҳс-  
ни «Ёмонликлар онаси» деб номланган сұхбатда бир-  
галикда давом эттирамиз.

Аҳмоқ одам асли иродасиз одамдир. Кимки аҳмоқ  
бўлса, уни бошқалар алдайди, ихтиёрини олади, эзib  
ишлатади. Фақат ақл соҳибигина чинакамига озод ва  
мустақилдир. Чунки ақл эрксизликка чидай олмайди.  
Зотан, қаерда ақл бўлса, қудрат ҳам ўша ердадир.  
Ақл ҳар қандай ёт таъсирлардан соҳибини ҳимоя қила-  
ди. Ақл ҳар қандай фитна устидан ғолиб бўлади. Ақл-  
нинг кучига ишонмаслик – ақлсизлик белгиси. Ақл-  
идрокдан маҳрум бўлган бош сувсиз чашмага, адаб-  
сиз, тарбиясиз йигит эса эгар-жабдуқсиз отга, шарм-  
ҳаёсиз жувон тузсиз таомга, илмига амал қилмаган  
олим хушбўй гули йўқ бўстонга ўхшайди. Донишманд-  
дан сўрадилар:

– Кишининг ақлли одам эканини унинг қайси иши-  
дан билиш мумкин?

Донишманд деди:

– Уч хислатнинг биридан билса бўлади: у юборган  
элчисига қараб, ё ёзган мактубига қараб, ёки юборган

совғасига қараб. Элчи – унинг ўзи демак; мактуби – унинг нутқи; совғаси эса – ҳимматидан дарак.

Комил ақлга эга бўлган киши ўзини паст мартабадан юқори мартабага кўтаради. Раъий-ақли кучсиз бўлган киши эса ўзини баланд мартабадан қуий ташлайди. Сукрот ҳаким вафотларидан оддин шогирдларига бундай насиҳат қилибдилар:

– Фароғат, шодлик кеч келиб, тез кетади, қайғу-алам тез келиб, анча узоққа чўзилади. Ҳар одамнинг иффат ва парҳезкорлиги бўлмаса, ҳар қанча зийрак ва доно кўринса ҳам, унинг ақли камолга етишган ҳисобланмайди. Шунга кўра, оқил ва камол иффатли, тав-фиқли бўлмоғи шарт. Қилган ёмонликлари, фисқу-фужурларини ҳар ерда мақтаб, гердайиб сўзлаб юрган одамдан узоқлашинг. Комил, ақлли одам бузук хаёлларни кўнглига келтирмайди, ақл-хуш қуввати билан уларни рад этади.

Ҳакимнинг бу ибратига қўшимча қилиб айтиш мумкинки, ақл ва ҳаёв ажралмас дўстдир. Бири йўқолса, иккинчисини топиб бўлмайди. Дунё дунё бўлиб яралганидан бери ҳали комил ақл эгасининг беҳаёлик қилганини, ёки аксинча, беҳаёв одамнинг комил ақл эгалари мартабасида эъзозланганини кўрган эмас.

**Ривоят.** Ҳазрати имом Абу Ҳанифа Куфий (қ.с.) тошлоқ йўлдан бораётган эдилар. Қаршиларидан бир хўқиз келаверди. Абу Ҳанифа йўлдан четландилар. Ҳамроҳлари дедилар-ки:

– Ё имом! Бу парҳез нимадандир?

Дедилар:

– Менинг ақдим бор, унинг эса шохи!

Луқмони Ҳаким дебдилар:

– Эй ўғил, одамлар сўзга устамонликлари билан мақтансалар, сен сукутинг билан мақтан. Ҳар нарсанинг далили бор: ақлнинг далили – фикр. Фикрнинг далили – сукутдир.

Ақл фойдаланилмагунича соҳибига фойда бермайди ва киши лайлак ҳолига тушади.

**Масад.** Дараҳт тепасига ин қурган кабутар тухум қўйиб, бола очган чоқда тулки келиб дағдага қилди:

– Полапонларингни ташламасанг, дараҳт тепасига чиқаман-да, ўзингни ҳам, болаларингни ҳам ейман.

Кабутар ўз жонидан қўрқиб, болаларини тулкига ташлади. Кейин яна тухум қўйиб, бола очди. Тулкининг ёмонлигидан қўрқиб ўтирганда лайлак учиб келиб паришонлиги сабабини сўради. Кабутар тулкининг дағдагаларини айтиб берди. Лайлак унинг нодонлигидан кулди-да, ақл ўргатди:

– Тулки яна келса, «Болаларимни ташламайман. Истасанг ўзинг дараҳтга чиқиб еявер, мен учиб кетаман, мени ея олмайсан», десанг аҳмоқлигича қолаверади.

Кабутар лайлак айтгандай қилди.

– Бу гапларни сенга ким ўргатди? – деб сўради тулки.

Кабутар ақл ўргатувчиси ким эканини айтгач, тулки лайлакни излаб кетди. Уни дарё қирғоғидан топиб, сўради:

– Эй лайлак, шамол ўнгдан эсса бошингни қандай сақлайсан?

– Бошимни чапга бураман, – деди лайлак донишмандлик билан.

– Шамол чапдан эсса нима қиласан? – деб сўради тулки ўзини гўлликка солиб.

– Бошимни ўнгга бураман ёки орқамни ўгираман,

– деди лайлак унинг нодонлигидан кулиб.

– Шамол орқадан эсиб қолса нима қиласан?

– Бошимни қанотларим орасига оламан.

– Йўғ-е, мени лақиллатяпсанми? Бошни қанотлар орасига олиш мумкин эканини билмас эканман. Агар алдамаётган бўлсанг, бир кўрсат-чи?

Лайлак бошини қанотлари орасига олди. Тулки пайтдан фойдаланиб, унга ташланди. Бир ҳамлада ўлдириб, қорнини обдан тўйғазиб олди-да, ерда сочилиб ётган патларга қараб деди:

– Эй лайлак! Кабутарга ақл ўргатишни билибсанку, нечун ўзингга ўргатмадинг?

Ақл әгалари олимлар, фозиллар ва тадбирли ҳунармандларнинг суҳбатларидан кўп-кўп баҳраманд бўлади. Донишмандлар суҳбати мушк-анбар демакдир. Шоир айтмоқчи:

*Ҳам тавозелик бўлиб, ҳам баодаб,  
Яхшиларнинг суҳбатин қилгил талаб!*

Ақл әгаси кўршапалак табиатли жоҳиллар билан улфатчиликдан қочади:

*Ёғ ичига тушса гар сув, нолалар қилгай чироз,  
Суҳбати ножинс бўлгай боиси озору доз.*

Донолар мажлисида, улуғлар суҳбатида ўзига муносиб жойда ўтириш ҳам донишмандликдан дарак беради. Ақл-идрок әгаси бошқаларнинг мартабаларини иззат қиласи. Девоналар каби андишасиз сўзлаш шармандаликдан нишон беради. Сабабсиз, ўринсиз кула бериш эса пушаймонлик билан натижаланади.

*Суҳбатга лойик эмас ҳар кимса ўринсиз кулса,  
Гар қавуш кулса, оёқдан бўладир шаксиз узоқ.*

Суҳбатимиз аввалида ҳикмат хусусида қисман тўхталган эдик. Якунида яна шу мавзуга қайтсан, чунки ақл ва ҳикматни айри-айри кўриш номаъкулдир.

Афлотун ҳаким дебдилар: «Баданинг қуввати – овқат, ақлнинг қуввати эса ҳикматли сўзлар, донолик ва донишмандликдир. Агар ақл шулардан маҳрум бўлиб қолса, овқатсизликдан бадан ҳалок бўлгани каби ҳалок бўлади».

Донишмандлар ҳикматни бундай таъриф қилиб ўтганлар:

Ҳикмат – ҳар бир ишда тўғрини хатодан ажратиш ёки бир нарса ҳақида энг тўғри ҳукмни топиб чиқа-

ришдир. Ҳикматни яхшироқ англаш учун мана бу бир неча фазилатларни билиш лозимдир.

• Зеҳн поклиги – исталган нарсани ўйлаб чиқаришда нафснинг хуружига бўйин эгмасликдир. Қадим адабиётда бу «Зеҳн сафоси» дейилиб, бир масала, жумбокънинг ечими ёки бир ишнинг натижасини қўйналмай осон ва тез ўйлаб топиш тушунилади («Зеҳн» – идророк, тезфаҳмлик, «сафо» эса поклик, тиниқлик, равшанлик маъноларини англатади).

• Зийраклик – ишнинг аввалидан охирига қадар зеҳннинг чақмоқ янглиғ тез ҳаракатидир.

• Гўзал тасаввур – бир нарсани англаб чиқаришда, унга дахли бўлмаган бошқа нарсани қориширмасдан яхши англаш қувватидир.

• Осонолик билан ўрганиш – ортиқ машаққатланмасдан исталган нарсани ўрганиш қувватидир.

• Ёдда сақдаш – ўқиб англанган нарсани эсдан чиқармасдан ёдга олишдир.

• Эсга тушириш – ёдга олинган нарсани исталган вақтда дарров эсга туширишдир.

Ахлоқ илми бўйича биз англайдиган ҳикмат шу салган хулқ ва фазилатлар билан топилади. Ҳикмат згаси бўлганлар «ҳаким» деб аталадилар.

Мисол тариқасида «Гулистан»да бу ҳикматни ўқиши мумкин:

«Бир киши Ануширвонга мундоқ хушхабар еткурдики, Худойи Таоло фалон душманингни жаҳондин кўтарди. Ануширвон анго деди: «Ҳеч эшитдингмуки, Худойи Таоло мени жаҳонда доимий қўйрму?»

Байт:

*Гар адув ўлса анго бўлмасмен асло шодмон,  
Ким ўзим доги жаҳонда қолмагумдир жавидон.*

Турли давра гурунгларида инсонга хос «тўрт фазилат» деган иборани эшитиб турдимиз. Суҳбатимиз аввалида «Калила ва Димна»дан мисол келтирганимиз-

да бу тўрт фазилат – ҳикмат, ақд, қаноат, адолат деб белгиланган эди. Қадим адабиётнинг бошқа манбаларида бу фазилат – ҳикмат, шиҷоат, иффат, адолат деб таҳдил қилинади. Одам боласига сув билан ҳаводай зарур бўлган бу тўрт фазилат баёнида қисман фарқ бўлса-да, мантиқан фикр ягонадир. Ҳикматга доир тушунчалар билан устоз Алибек Рустамий изоҳларидан фойдаланган тарзда танишсак.

Ҳикмат ҳам назарий, ҳам амалий қувватлардан иборат бўлиб, зако, зеҳн сафоси, ҳусни тааққул ва таҳаффуз деб аталган тўрт хислатни ўз ичига олади. Назарий қувватдан мурод – кишининг мавжудот ҳақиқатини англаб, ўз имконияти доирасида мутлақ борлиқни идрок этишидир. Ҳикматнинг амалий қуввати эса шахснинг ўз ахлоқини яхшилаши ва эзгу ишларга ўзини одатлантира олишидир.

«Зако» дейилганда ўтқир ақллилик, зийраклик, синчковлик тушунилади. Синчков, сезгир, ақлли кишиларни «закий» дейдилар. «Зако ҳайли» дейилганда зақоватли кишилар англашилади. Киши кўп ўқиши, билиши натижасида онги бойийди, сезгилар орқали билинадиган нарсалар ана шу билим ёрдамида мантиқан таҳдил этилиб, хуносалар чиқарилади. Бундай ҳолат илмда кўп учрайди. Масалан, Ибн Сино ҳазратлари ҳали заррабин (микроскоп) йўқ пайтида микроблар борлигини айнан зако туфайли кашф этганлар. У зот касалнинг тарқалиш жараёни ва ҳусусиятларини кузатиб, шу хуносага келганлар. Ёки лазер нурининг кашф этилиши ҳам шундай. Олимлар нур бир ерга тўпланса, кучли қувват ҳосил қилишини англаб, сўнг шу илмий тахмин асосида тажрибалар ўтказганлар.

«Ҳусни тааққул» деб тўғри фикр юритиб, хато ва янглишишлардан сақланишга, ақлни яхши томонга ишлатишга айтилади. Чунки ният бузилса, киши ақлини сунистеъмол қилиши мумкин. Бу ҳолда киши онгида хато, янглиш фикрлар пайдо бўлади. Мафкура бузилади, натижада киши ҳикматдан узоқлашиб,

йүлдан озади («Хусн» – гүзәл, «таақұл» – идрок, фикр юргизиш, яъни ақл билан иш юритмоқ демакдир).

«Таңаффуз» деганда күрган, билиб олган ва ўрганған нарсаларни яхши эслаб қолиб, керак бўлган пайтда тезда эсга келтириш тушунилади.

«Ҳикмат» сўзининг асл маъноларидан бири – донишмандлик, донолиkdir. Яна бир маъноси – яширин сабаб, сирдир. Яна бири – илми-маърифатdir. Яна бири – тадбирдир. Фалсафа илмини қадимда «Ҳикмат илми» деб ҳам атаганлар. Ҳикмати илоҳий – Аллоҳнинг хоҳиш-иродасини англатади. Ҳикмати шукуҳи – билим шуҳрати, машҳурлиги демак. Ҳикмату ақл – илм ва ақл деганидир. Ҳикмат суйи урмоқ – муолажа қилмоқдир.

Донишмандларни, илму ҳикмат соҳибларини қадимда «Ҳикматгард» ёки «Ҳикматжўй» деб атаганлар. Донишманд, файласуф, олим, ҳакимларни «Ҳикматмаоб», «Ҳикматпарат», «Ҳикматпеша», «Ҳикматсоз» деб ҳам шарафлаганлар. Билимдонларнинг суюнчиғи, ҳомийси – «Ҳикматпаноҳ» билимдонларнинг сезигири – «Ҳикматқиёс», дейилган. «Ҳикматобод» ҳикматга тўла маконни англатган.

Булар «ҳикмат» атамасига доир тушунчалар. Дунёда ҳикмат эшитган, эшитганидан тўлқинланиб, бошқага айтиб юрган одамлар кўп. Бу ҳам яхши фазилат. Аммо ҳикматга амал қилювчилар озким, афсусимиз айнан шунда.

Суҳбатимиздан аён бўляяптики, ақл-идрок ва ҳикмат эгалари – икки дунё саодати мукофоти билан тақдирланадиган бандалар экан. Мазкур суҳбатимиз поёнида сиз азиз умидимиз юлдузларининг саодатлилар сафларида бўлмогингизни истаб, дуо қилиб қоламан.

## **Донолик амал эзур**

Донишманд – ҳақиқатга ошиқ кишидир. Шунга кўра, ҳар бир ҳақиқатталаб одам маълум даражада донишманддир. Донолардан ўрганиш ва ўргангандан

нарсаларни бошқаларга ўргатиш хайрли амаллардан ҳисобланади. Одам боласи шу фазилат эгаси бўлишга интилиши керак.

**Умидимиз юлдуздари**, сизга ёки тенгдошингизга катталар танбех бера туриб, «нодон» деб айблаб ҳам қўйишади. Ёшларда нодонлик бор, деган гапни катталар бажонидил маъқуллашади. Лекин ёшларда донишмандлик бор, дейилса, бу ҳақиқатдан кўз юмиб оладилар. Ҳолбуки, ҳар бир ёшнинг донишмандлиги ўзига хос. Агар биринчи синф ўқувчиси олий математикага доир масалани ишлаб беролмаса, уни нодонликда айбламаймиз, беш яшар бола палов дамлай олмаса «ношуд» демаймиз-ку?! Худди шунга ўхшаб бугунги ўсмирлардан Афлотуннинг донолигини талаб қиласак, ўзимиз кулгига қоламиз. Азиз фарзандларимизнинг ўзларига хос донишмандликлари ҳам борки, буни кўра олишимиз ва бу фазилатни бойитишларига шароит ва имкон яратиб беришимиз керак. Ўсмир ёшларнинг донишмандлигига тарихдан мисоллар кўп. Суҳбатимиз аввалида баён этилажак воқеа Имом Шофиъий ҳазратларининг бола чоғларидаги доноликларини кўрсатади.

**Хикоят.** Бир кечча халифа аҳли аёли билан мунозара қиласар эди. Хотин аччик устида эрига бехос: «Эй дўзахи!» деб юборди. Шунда халифа: «Агар мен дўзахи бўлсан, сен талоқ бўлгувчисан», деди-ю икковлари бир-бирларидан ажралдилар.

Халифанинг жонига ўт тушиб, нидо қилди. Чунки у хотинини қаттиқ севар эди. Халифа уламоларга буюрдики, масалага фатво чиқаргайлар. Фуқаро ҳам, уламо ҳам жавобдан ожиз бўлгани учун таажжубда қолдилар. Ҳеч кимдан садо чиқмади. Айтдиларки: «Буни фақат Аллоҳ билгайки, халифа жаннатимиdir ё дўзахимиdir». Саройда масалага жавоб излаб тўпланганларининг еттинчи куни ҳазрати Имом Шофиъий (қуддиса сирруҳу) келдилар. У дамда ҳали бола ёшида эдилар. Бироқ, шунга қарамай, жавоб беражакларини

бидирдилар. Барча ҳайратда қолди. «Бола жинни шекилли, шундоқ кучли уламолар масала қаршисида ожиз бўлиб турганда бу нима дер эдики, халифа тингласа?» Халифа уларни лол қолдириб, Шофиъийга «Гапир!» деди. Бўлажак имом айтдилар:

– Мен сизга муҳтоҷманми ё сиз менга муҳтоҷмисиз?

– Алҳол, бу оламда мен сенга муҳтоҷдирман, – деди халифа.

– Сиз менга муҳтоҷ бўлсангиз, тахт поясини менга топширинг.

Халифа ўтирган еридан туриб, пастга тушди-да, Шофиъийни тахтга чиқарди.

– Аввал сиз менинг бир масаламга жавоб айтинг, – деди Шофиъий. – Сўнг мен сизнинг масалангизни ечаман.

– Сўрайвер, – деди халифа итоат билан.

– Сўрайман, аммо сиз фақат ва фақат тўғрисини айтасиз. Сиз бирон бир маъсийатга (гуноҳ ишга) қодир ҳолингизда, Аллоҳдан қўрқиб, ўша маъсийатни тарк этган пайтингиз бўлганми?

Бу савонни эшигтгач, халифанинг чеҳраси ёришида ва деди:

– Балли! Ёшлигимда бир аёлга бошим айланди. Хилватда учрашдим. Бироқ, Аллоҳдан қўрқиб, ўша гуноҳни тарк этдим. Аёлни қўйиб юбордим.

– Рост сўзладингизми?

– Валлоҳ, шундоқ!

– Мен ҳукм қилурманким, аёлингиз сиздан чиқмагайлар ва сиз ҳам жаннатидирсиз.

Олимларнинг барчалари бу ҳукмдан ажабланиб, фарёд кўтардилар. «Сен бу масалани қандай далил билан ҳукм қилдинг?», деб маломат ёғдирдилар.

Шофиъий: «Қуръони Каримга асосланиб ҳукм қилдим», дедилар-да, «Энди ким ҳаёти дунёдалик пайтида Қиёмат куни маҳшаргоҳда Парвардигорининг ҳузурида туриши ва у Зотга ҳисоб-китоб беришидан

қўрққан ва нафсини ҳавои ҳоҳишлардан қайтарган бўлса, у ҳолда фақат жаннатгина унинг учун жой бўлур», деган маънони англатувчи «Ван-Назиат» сурасидан икки ояти карима ўқидилар ва ҳукмни такрор этдилар:

– Энди халифа жаннатидир ва аҳли аёлларининг бошлари очиқ эмасdir.

Бу жавобни эшитган олимлар ҳайратларини яшира олмай: «Бу ёш бола бўла туриб, шунчалик мақомга етибди, улғайганида қанчалар бўлур!», дедилар. Халифа эса ёш олимни ғоят хуш кўриб, ўн минг қизил олтин берди. Доно бола эса бу олтинларнинг ҳаммасини мискинларга тарқатди.

Энди «Кутадгу билиг»нинг насрый баёнига назар ташлаймиз:

«Кунтуғди Элиг Ўгдулмишдан сўради:

– Киши онасидан доно бўлиб туғиладими ёки муайян бир ёшга етганидан кейин заковатли бўладими?

Ўгдулмиш унга жавоб айтди:

– Эй Элиг! Бу санъетнинг номи – билим ва уқувдир. Одамзот онасидан билимсиз туғилади. Аммо у билиб, ўрганиб, тўрга чиқади. Уқув ва зеҳн эса киши табиатида бўлади. Билим – кўп ўқиши ва ўрганиш маҳсулидир... Уқув-идрок киши миясига жо этилган. Бошнинг азизлиги шундан.

*Болам тутсин десанг донолик йўлин,*

*Кичикликдан тегиз билимга қўлин.*

Агар бола кичикликдан билим ўрганса, унинг ид-роқи ҳам яхши бўлади. Заковати ортади. Уқув-идрок киши учун кишандай гап. У ёмон ва ярамас ишларга яқин йўлатмайди. Уқувли тирикдир, уқувсиз – ўлик. Киши уйга, оддий эмас, қоронғу уйга ўхшайди. Уқув-идрок эса машъал каби унга нур сочади. Шу уйни ёритади. Яъни кишини равшанликка элтади. Тугун тутган ҳар бир иш у туфайли ечилади».

**Ривоят.** Муин ибн Зойид исмли ҳукмдор асирга олинган душманларидан уч юз кишининг барчасини қатл қилишга буюрди. Асиirlар орасидаги ёш бола ҳукмдорга илтижо қилди:

– Улуг ҳукмдор, мен фоят чанқадим. Буюринг, бир пиёлагина сув беришсин. Ташна ҳолимда ўлиб кетмай, раҳм қилинг.

Ҳукмдор амри билан болага сув бердилар. Аммо бола сувни ичмай яна дедики:

– Ҳукмдорим, менгина эмас, барча асиirlар ташнадирлар. Бу сувни ўзим ичиб, уларга бермасам, мурувватдан бўлмас. Агар берсам, ўзим ташналикада ўламан. Албатта, ҳаммамизни ўлдирасиз. Биздан маҳкаматингизни аямай буюринг, барча асиirlарга сув берсинлар.

Ҳукмдор боланинг бу илтимосини ҳам қондирди. Асиirlар сувларни ичиб бўлишгандан сўнг бола яна таъзим қилди:

– Марҳаматли ҳукмдорим, сувингизни ичгач, ҳаммамиз сизнинг меҳмонингизга айландик. Меҳмонни ўлдириш фазлу карам аҳлининг расми эмасdir, деганлар.

Муин ибн Зойид боланинг донолигига таҳсин айтиб, асиirlарга омонлик берган экан.

**Яна бир ривоят.** Подшоҳ ғазаб устида бир бегуноҳни ўлимга ҳукм қилди. Одил вазир ўртага тушиб, бечорани ҳимоясига сўз айтаман деганда подшоҳ унинг мақсадини англаб, гапини шарт бўлди-да:

– Қасам ичиб айтаманки, бу дамда сен нимани сўрасанг, сўраганингнинг аксини қилурман! – деб хитоб қилди.

Бу аҳдни эшигтан вазир таъзим қилиб, подшоҳнинг адолатига ҳамду сано айтди:

– Подшоҳим, бу онда айни одил ҳукм чиқардингиз. Бу одамни албатта ўлдиридинг.

Подшоҳ доно вазирининг бундай топқирлигидан қувониб, ўлим жазосини бекор қилган экан.

Демоқчимизки, кишидаги донолик бошқаларга хизмат қылсагина, донолик ҳисобланади. Чиройли сүзлар либосидаги сафсата донолик эмас!

Турли мавзулардаги суұбатларимизда ҳазрат Навоий асарларидан мисоллар келтирдик, келгусида ҳам бу анъянани давом эттиражакмиз. Алжол, донишманд шоирни дуо қилган ҳолда, ёшлик ҳаётларидан бир хикоятни баён қиласыз. «Аллоҳым, менга илм бердинг, энді амални ҳам бер!», деб Яратғанга илтижолар қилған инсоннинг ёшлик кезлари амаллари қандай бўлгани билан танишайлик.

**Ривоят.** Самарқанддаги таҳсили якунига етказиб Ҳиротта қайтаётган Алишер йўл азобида ҳориб-чарчаб бир тоқقا етиб келди. Сурув оралаб юрган қари чўпон яқинлашаётган меҳмонни кўриб, унга пешвоз чиқдию ҳожасининг ўғлини таниб, қувониб кетди. Алишер ҳам отасининг чўпонини бир кўришдаёқ таниди. Чўпон совлиқларни соғиб, йигитни меҳмон қилди.

Атрофда ўтлаб юрган беҳисоб қўйларга қараб Алишер:

– Бу қўйлар кимники? – деб сўради.  
– Ўғлим, бу қўйларнинг барчаси сизники, – деди чўпон. – Отангиз ҳаёт чоғларида икки юзта қўйни сизга атаб, боқиб беришни менга топширган эдилар. Ўша қўйлар ҳозир кўпайиб, етти юздан ошиб кетди. Отангизнинг омонатлари бўйнимда қарз бўлиб қолармикин, деган ташвишда эдим, шукрким, бу ташвишдан ҳам энди фориг бўлажакман.

Алишер бу кеча чўпонга меҳмон бўлди. Тонгда сурувнинг энг сара қўйларидан икки юзтасини ажратди-да, «Бу сизнинг хизмат ҳақингиз», деб унга берди. Қолганини шу яқин атрофдаги бозорга ҳайдатди. Жоноворлар семиз бўлгани учун харидорлар ўраб олиб, нархини сўрашди. Алишер нархни айтди-ю барчани ажаблантириб, бир шарт қўйди:

– Ҳусайн Бойқаронинг подшоҳ бўлгани суюнчисига мен бу қўйларни насияга бераман. Қўйнинг пулини

подшоҳ ўлган куни тўлайсизлар. Шу шартимга кўнган киши қўйларни етаклаб кетаверсин.

Қўйлар бир неча дақиқада талаш бўлиб кетди. Бу ҳодиса ўша куниёқ подшоҳга етказилди.

– Эй олампаноҳ! Бутун бир телба йигит бозорга беш юз қўйни ҳайдаб келиб, халқقا насияга тарқатди. «Ҳақини подшоҳ ўлган куни берасизлар», деб сизга ўлим тилади.

Бу хабардан дарғазаб бўлган подшоҳ телба йигитни ҳибсга олишни буюрди. Амр ижро этилиб, Алишерни саройга судраб келтирдилар. Шунда подшоҳ қарасаки, болаликдаги қадрдон дўсти занжирбанд қилинибди.

– Халқقا беш юз қўй тарқатиш эвазига менга ўлим тилашдан мурод не эди? – деб сўради подшоҳ.

– Подшоҳим, мен сира чакки иш қилганим йўқ. Нијатим ҳам хайрлидир. Сизнинг тахтга ўтиришингизни муборакбод этиш мақсадида қўйларни насияга тарқатдим. Аслида бепул бериб юборишим лозим эди. Лекин раиятда текин молдан ҳазар қиладиганлар борким, ҳадяни рад этарлар. Шунинг учун қўйларнинг пулини подшоҳ ўлган куни берасизлар, деб шарт қўйдим. Энди қўйларни олиб кетганларнинг барчаси «Ишқилиб, подшоҳ ўлмасин, узоқ умр кўрсин, ўлиб қолса қўйнинг пулини тўлашимиз керак бўлади», деб сизни туну кун дуо қилиб юрадилар.

Бу доноликдан қувонган Ҳусайн Бойқаро дўстини бағрига босди. Ана шу каби доноликлари учун ҳам орадан йиллар ўтиб шоир Алишер Навоий муршидлик мартабасига етади, подшоҳ Ҳусайн Бойқаро эса унга мурид бўлади.

Тилимиздаги айрим атамаларни маънодош сўзлар сифатида қўллашга ўрганиб қолганмиз. Шулардан бири – «ақлли» ва «доно» атамаси. Мехримизни қозонгани кишини баъзан «жуда ақлли-да!», деб алқаймиз, баъзида эса «жуда доно!» деб олқишлиймиз. «Жуда ақлли доно», дейдиган пайтимиз ҳам бўлади, Ҳўш,

«ақдлилик» ва «донолик» битта фазилатми? Бизнингча бундай эмас. Тұғри, ҳаётда ҳам ақдли, ҳам доно одамларни учратамиз. Лекин илмли, ақдли одамларнинг ҳаммаси ҳам доно бұлавермайды. Донолик турли диплому ва унвонлар билан белгиланмайды. Ҳаётда бир донишмандға дуч келгунча атрофимизда юзларча, балки мингларча олимларни учратамиз. Ўзини доно хисобловчиларга эса ундан-да күпроқ дуч келамиз. Бир маҳаллада гувоқ бўлиб эдим: профессор мартабасига етишган кишининг олий мактаб кўрмаган қўшниси бор. Бу кишининг болалиги ва ёшлиги оғир замонларга тұғри келиб, илм олиш орзусига етиша олмаган. Ота қасбини эгаллаб, умри темирчилик билан ўтган. Бироқ илмга интилишлари бир зум ҳам сўнмаган. Ҳамиша аҳди илм даврасига, суҳбатига интилиб яшаганлар. Улардан эшитганларига амал қилишни зарур деб билганлар. Маҳаллада кимки доно маслаҳатга муҳтож бўлиб қолса, шу кўчага бурилади, бироқ профессорникига эмас, темирчиникига киради. Демоқчиманки, донолик фақат илмга эмас, ҳаёт тажрибасига ҳам боғлиқ. Ҳаётда узоқ умр кўрганлар кўп, барчаларининг ўzlарига хос ҳаёт тажрибалари бор. Бироқ атрофдагилар уларни не учундир доно сана-майдилар. Нима учун, ўйлаб кўринг-чи? Инсон ҳаётда кўрган-кечирганларини фикр қилиши, яхши-ёмонга ажратиши, яхсисини кўпайтириб, ёмонидан қочиши зарур. Агар ҳаёт тажрибаси таҳдил ва холосадан бебаҳра бўлса, бу одамнинг ўзи ҳам доноликдан бебаҳра қолибди. Профессор ва темирчи акамизнинг фарқлари айнан шунда.

Агар ақд эгаси ақдлини, илм эгаси илмини зарур ишларга йўналтира олсагина уни «доно» деб аташ мумкин. Шу фикрга кўра, доноликни илм ва ақднинг амалдаги кўриниши деб белгиласак ҳам бўлади. Илмийроқ қилиб айтсак, донолик – ақд билан қўлга киритилган, кузатиш ва тажриба билан ҳаётга татбиқ этилган ҳақиқатлар йиғиндиси, фикрларнинг турмушга уй-

ғунашувидир. Донолик кўп билиш эмас. Одам боласи-нинг онги ҳеч қачон жами нарсаларни қамраб ололмайди. Донолик иложи борича кўп билиш бўлмай, балки қандай билимлар энг зарур, қандайлари озроқ ва яна қандайлари бир мунча зарурлигини билишдадир. Яъни донолик сирларидан яна бири – нималарга эътибор бермасликни билишда. Одам нима егани билан эмас, нимани ҳазм этса, ўша билан яшайди. Бу ҳолат тана сингари ақдга нисбатан ҳам ҳақли равишда бир хил таалуқидир. Ҳамма нарсани баравар билишга интилиш – ҳамма соҳада чаласавод бўлиб қолиш демакдир. Азим дарёни кўз олдингизга келтиринг: денгизга қўйиладиган жойда майда-майда ирмоқларга бўлингач сувнинг шиддати кетади ва қувватини йўқотади.

Афлотун ҳакимдан сўрадилар:

- Файласуф олимсиз. Айтинг-чи, шунча ўқиб, қандай натижага келдингиз?
- Фақат бир нарсани англадим, – деб жавоб қилдилар аллома, – ҳеч нарса билмас эканман.

Газзолий ҳазратлари демишларки: «Билганларим қаршисида билмаганларимни оёқ остига олсам эдим, бошим кўкларга етган бўлур эди». Азизлар, диққат қилингким, бу сўзлар шунчаки камтарлик ифодаси сифатида тилдан учмаган. Чинакам донишманд эгаллаган илмни атрофидагилар юксак, деб қадрласалар-да, унинг ўзига билими кам бўлиб туюлаверган ва илм олиш ҳаракатидан то сўнгги нафасига қадар тинмаган.

Шоир айтарки:

*Дононинг бир кунда қилган ишини,  
Нодон қилолмайди яшаб ёшини.  
Доно бир кунида минг йил яшайди,  
Нодон минг кунда ҳам йигмас ҳушини.*

Доно бирон нимани билмасликдан қўрқмайди. Иккиланиш, меҳнат заҳмати, изланишлардан чўчи-

майди. Фақат бир нарсадан – ўзи билмаган нарсанни биламан, деб таъкидлашдан қўрқади. Қадим файласуфларидан Цицерон айтади: «Сократ (Суқрот ҳаким)-нинг донолиги шунда эдики, билмаганини билдим, деб ўйламасди». Энг буюк олимлар ҳам ниҳоясиз илм қаршисида жуда ожиз экан, «барча нарсанни биламан», деб даъво қилувчи ёки ўйловчи айрим дўстларимиз уялмоқликлари керак. Ёки «мактабда тўққиз йил ўқидинг, шу билим сенга етарли», деб фарзандининг илм олишдаги йўлини тўсмоқчи бўлган ота-оналар кеинчалик шарманда бўлиб қолишилари мумкин.

Зарур нарсаларни билмаслик иллатдир. Бундай одамни ё жоҳил, ё ношуд санайдилар. Лекин бирон бир нарсанни билмаслик уят эмас. Чунки, айтганимиздай, ҳеч ким ҳамма нарсанни билмайди. Масалан, тиббиёт олими қурилиш муҳандислигини яхши билмаслиги учун изза қилинмайди. Аммо билмаган нарсасини биламан, деб мунофиқлик қиласа ҳам уят, ҳам зиён бўлади. Одамлар ниманидир билмаганлари учун эмас, балки ўзларини билимдон ва доно ҳисоблаганлари сабабли янглишадилар, адашадилар. Атрофга зийрак разм солинса, аслида англаш мушкул бўлган нарса йўқ. Шунчаки одам боласи билмаган муаммолар қалашиб ётибди. Ёмон, пойма-пой, узуқ-юлуқ, ҳатто янглиш билган гаплари эса ундан ҳам кўпроқ. Айнан шу янглиш маълумотлар одамни бутунлай билмайдиган нарсаларига қараганда кўпроқ жиловлайди ва чалғитади. Биз мана шу жиловга риоя қилмайдиган, чалғимайдиганларни доно деймиз.

Бир ўқимишли одам ўзини доно санарди, давраларда бировга гап бермасди. Айниқса, қишлоқца сафарга чиққудай бўлса, ундаги давраларда гапиравериб, одамларнинг эсини тескари қилиб юборарди. Гурунгда унинг учун тайин бир мавзу бўлмас эди. Гап бир-бирига уланса-уланмаса, «ҳар соҳадан бир шингил», дегандай, мавзуни мунажжимлик билан бошлаб, гинекология билан якунларди. «Даврадаги қариялар-

га гинекологиянинг нима дахли бор?» деган истиҳола миясига келмасди. Шундай давраларнинг бирига гувоҳ бўлиб эдим. Сафарга бирга чиққан олимлар «донолик»нинг бу намойишни сукут билан кузатдилар. Мезбонлар ҳам андиша юзасидан жим эдилар. Даврадагилардан бири «доно»нинг гапдан бўшашини кутмай, сўзини шарт бўлди-да:

– Ака, илмни ҳам сув қилиб ичиб юборган экансиз, омма, қойилмиз. Бизди қишлоқда шу пайтгача бунаقا олимнинг оёғи тегмаганиди. Сўраганнинг айби йўқ, ака, сиз самолётни ҳам ҳайдайверасизми?

Савол киноя оҳангida берилганиди. Лекин жавоб жиддий бўлди:

– Бунинг ҳеч қийин жойи йўқ. Зарур бўлиб қолса ҳайдайверамиз...

Бу нодонликка нима деймиз? Агар «йўқ, бу иш қўлимдан келмайди», деса осмон узилиб, ерга тушармиди? Ёки мезбонлар «самолёт бошқаришни билмас экансиз, уйимиздан чиқинг», дейишармиди? Кишининг доно бўлиб кўринишида маъно йўқ. Асл маъно чинакам доно бўлишда эканини ҳамма ҳам билавермайди шекилли, а? Доноликка хос ҳар ишнинг ўз натижаси бўлажагини, яъни: мулоимлик – улуғ мартаба, қаноат – роҳат, тавозе – эъзоз келтиришини билган, ва амал қилган одамлар нақадар баҳтлилар! **Донишмандиккниң чегараси мавжудлиги, қалтабинликкниң эса чегараси йўқдиги** мана шундай давраларда сезилиб қолади.

Афлотун ҳакимдан сўрадилар:

– Олиму донишманд одам оддий кишилардан нимаси билан фарқ қиласди?

Жавоб бердилар:

– Донишманд очиқ юзли, юмшоқ сўзли, тавозели бўлади. Бирор одамдан ўзи ҳақида бўлмагур сўз эшитса, ранжимайди. Мақташлар ва олқишлиарга учеб, ўзини юқори тутмайди, камтар бўлади.

Ха, камтарлык улуғ фазилатлардан бириким, ким уни менсимибди, одамлар назаридан тушибди, демак.

Бузургмеҳрдан сүрадилар:

- Инсон учун энг муҳим нарса нима?
- Тұғма зеҳн, – деб жавоб бердилар.
- Тұғма зеҳн бўлмаса-чи?
- У ҳолда одоб ва илм ўргансин.
- Ўрганолмаса-чи?
- Унда серилтифот ва сертавозе бўлсин. Бу ҳам одам боласининг зийнати.

- Бу ҳам қўлидан келмаса-чи?

- Унда бунақа тирикликтан ўлгани афзалроқ, ҳам одамлар ундан қутулади, ҳам ўзи ўзидан қутулади.

Бу ривоятни далил сифатида келтиришдан мурод «самолёт ҳайдашни биламан», деган биродаримизга «бу кунингдан ўлганинг яхшироқ», дейиш эмас. Кўп қатори унинг умрига ҳам барака берилсин ва донолик фазилатидан ҳам баҳраманд қилинсин. Бизларга эса бу каби ҳолатлардан ибрат олиб, донолик сари интилувчилар қаторида бўлиш насиб этсин.

**Ривоят.** Бир подшоҳнинг бош вазири ғоят доно, бироқ бошқа вазирларга нисбатан қорароқ ва хунукроқ эди. Бир куни доно вазир келса-ки, подшоҳ бошқалар билан ҳазиллашиб, кулишиб ўтирибди.

- Бугун сарой аҳди ғоят хушчақчақ кўринадир, бу шодумонлиқ муборак бўлгай, – деди бош вазир тавозе билан. Подшоҳ уни калака қилиб, роҳатланиб кулмоқчи бўлди-да:

- Булар қоп-қоралигинг ва хунуклигинг сабабини билмоқчилар, тушунириб бера оласанми? – деди.

Бош вазир бу масхарадан ранжиса-да, сиртига чиқармади, ҳилмлик ила сўз бошлади:

- Бу тушуниш унча мураккаб бўлмаган ҳолат-ку, шаҳриёрим. Маълумингизким, ўн саккиз минг олами ни яратган Ҳақ Таоло одамларни дунёга келтириб, рўпарасига тўрт нарсани: донолик, қудрат, чирой ва бойлик неъматларини қўяркан. Одам булардан иста-

ганини олиши мүмкін. Менинг бирдан бир орзуим до-  
нолик неъматини құлға киритиш эди. Аммо бу неъмат  
бошқаларига қарғанда жуда узокқа, етиб бориша  
мушкул бұлған осмонұпар чүққига құйилған экан. Мен  
чүққига етиб бормоқ учун ғоят машаққат чекдім.  
Донолик неъматини құлға киритиб, Яратғанга шукр-  
лар айтиб, изимга қайтсамки, қолған уч неъматни бо-  
шқалар илиб кетишибди. Шундай қилиб каминага на  
чиroy, на құдрат, на бойлік насиб этди. Хунуклигим  
хусусида билғанларим шу, қолғани ўзингизга аёндір,  
қазрат шаҳриәрим.

Подшоқ ўшанды баш вазирни калака қылганига  
пушаймон еган экан.

«Донолик ҳеч қачон табиатта зид нарсаны тақозо  
этмайды. Тафаккур буюк фазилатлардан биридір.  
Одамнинг донолиги – ҳақиқатни айтишда ва табиатта  
қулоқ солған ҳолда унга мувофик ҳаракат қилишда»,  
деб ҳисоблашади европалик олимлар. Бу фикрга  
қарши гап айтиш ниятимиз йўқ. Аммо европаликлар-  
нинг ўзида «Ҳамма нарса ўз номи билан аталиши ке-  
рак» дейилгувчи нақл ҳам бор. Мулла Жомий қазрат-  
ларининг «Оlamda ягона нурдан бошқа нарса йўқ.  
Фақат нур турли шакл ва кўринишлар билан кўрина-  
ди», дейилмиш ҳикматларини унутмаслик керак.

Үтган асрларда инсоният доноликнинг шу кўрини-  
шида кўп адашди. «Одам маймундан пайдо бўлған»,  
деган ғоя узоқ йиллар яшади ва ҳозир ҳам яшаб ту-  
рибди («Менинг аждодим тўнғиз эди», деган ғояни шиор  
қилса, бу шиор атрофида юзлаб, балки минг-ўн минг-  
лаб тўнғиззодалар бирлашсалар ажабланмаслик керак-  
микин). «Маймунзода»лардан кейин «Табиатни енга-  
миз!», «Табиатни измимизга бўйсундиримиз!» деган-  
лар пайдо бўлишди. Кейин «Ирсият йўқ нарса» дейди-  
ганлар илм аҳдини ғоят қийнадилар. Ажабким, улар-  
да ҳам илм бор эди, ақл бор эди, ўзларини доно ҳисоб-

лардилар. «Одамзотнинг яратувчиси Аллоҳдир», дейдиганларни «жоҳил», «бидъатчи», «хурофотчи» деб масхаралардилар. Булар битта ёки юзта бўлсалар ҳам, эътибор берилмаса бўларди. Улар жуда кўп эдилар, энг ачинарлиси, бу бемаъни foялар илмий давралар орасида қолиб кетмай, жамиятлар ва давлатларни бошқарувчи кучга айланган эди. Донолик кўринишидаги аҳмоқлик давлат даражасига чиққанда қандай фалокатлар юз беришини тарих аниқ кўрсатиб турибди. «Табиатни енгамиз!» деб чирангандарга табиат оғатлари инъом этилди. Афсус шуки, бу foяни ўйлаб топган, жамиятлар онгини заҳарлаган «доно»лар бу оламдан ўтиб кетишиди. Уларнинг аҳмоқона foялари туфайли юз бераётган табиат оғатларидан, турли-туман касалликлардан бугунги авлод азоб чекмоқда. Тошқинлар, довуллар, зилзилалар, цунамилар қадим замонларда ҳам бўлган, аммо ҳозиргидай оғатларни келтириб чиқармаган. Айниқса, кутилмаган касалликлар довули бу қадар бўлмаган. Аҳвол шундайки, заминнинг ҳаёти ёки мамоти масаласи энди чин донолар хуносасига муҳтождир. Бундай донолар кимлар? Бу донолар оломоннинг телба ҳоҳишига бўйин эгмайди, аксинча, унга ўзи йўл кўрсатади.

Юқоридаги фикрлар исботи ўлароқ қуидаги ҳикоятни келтирамиз.

**Ҳикоят.** Кўрлар маҳалласига фил адашиб келиб қолди. Кўрлардан бири филнинг оёғини ушлаб кўриб: «Ие, фил терак каби ҳайвон экан», деб хуоса ясади. Бошқа сўқир келиб жониворнинг хартумини ушладида: «Бекор айтибсан, фил теракка ўҳшамайди, у мўри кабидир», деди. Бу икков масала талашаётганида учинчиси келиб кўл узатган эди, филнинг қорнига тегди: «Икковинг ҳам тентаксаллар. Фил деворнинг айни ўзи!» деди. Яна бири келиб жониворнинг думини ушлагач уни супургига қиёс қилди, қулогини ушлаган қалқонга ўҳшатди. Бошқаси филнинг бесўнақай тишини ушлагач, шерикларидан кула бошлади: «Эй

күрлар! Эй аҳмоқлар! Ишонмасанғиз күринглар, фил қилич сингари бир ҳайвондир!»

Барча күрлар ўзлари ушлаб күрганларини ҳақиқат деб ҳисоблаганлари учун гап талашиб, бир-бирларини аҳмоққа чиқариб, ғавғо қила бошладилар. Уларни четдан кузатиб турған бир донишманд «Хеч бирларингиз ҳақиқатни тұлиқ топа олмадынгиз», деса ҳам қулоқ солмадилар.

Қиссадан ҳисса шуки, дунёдаги барча хатоликлар асл моҳиятни күра билмасликдадир. Ҳодисаларнинг асл моҳиятини билмаслик эса уларни ҳар ким ўз ақли ва тушунчаси билан ўлчашдан келиб чиқади. Бу дунёда күп кишилар мазкур ҳикоятта бўлгани каби бир нарса ҳақида турлича тушунчада бўладилар ва шу тушунчалари асосида фикр айтадилар. Уларнинг ҳар бири «фақат менгина ҳақиқатни биламан», деб севиниб, мамнун бўладилар ва донишмандлик шоҳсупасини даъво қиласидар. Бир оз аввал зикр этганимиз – «маймунзода»лар ва «тўнғиззода»лар шулар жумласидандир.

Дунёда энг катта саодат ҳақиқатни кўриш билан бошланади. Шундай вақтлар бўладики, инсон фосиқ бир кимсани одил деб ҳисоблайди. Нотўри назарияни тўғри назария деб қабул қиласидики, оқибатда ё жоҳиллик ё нодонлик ботқорига ботганини ўзи ҳам сезмай қолади.

Ҳар бир нарсанинг ҳақиқати унинг мазмунида эканини билмаган кимса маймун болалари ҳолига тушиб қолиши ҳеч гапмас.

**Масад.** Маймун энди пишаётган ёнгоқ меваларидан узуб чақди-да, мағзини болаларига келтирди. Маймунчалар ўзлари учун янгилик бўлган бу таомни маза қилиб еб олишгач, оналаридан сўрадилар:

- Бу ажойиб тотли емишнинг номи нима?
- Кузда пишадиган бу меванинг номи – ёнгоқ.
- Онажон, бизга у мева қаерда ўсишини кўрсатинг, ўзимиз бориб, тўйиб-тўйиб ейлик.

Маймун төг этагидаги ёнгоқзорни күрсатиши билан болалари қувнашганича югуриб кетишиди. Ёнгоқ дараҳтларига осилиб чиқишиб, ҳали унчалик етилмаган, паққа бўлмаган меваларни узиб, пўстини ажратмай, қобиғини чақмай оғизларига солғанларича чайнамоқчи бўлдилар. Пўстлоқнинг заҳарли аччиқ таъми оғизларини бемаза қилиб, меваларни газаб билан отдилар-да, изларига қайтиб, оналарига таъна қилдилар:

– Эй она! Биз сизни ғоят ғамхўр ва меҳрибон деб ўйлардик. Бизга у заҳарли мевани едиришдан мақсадингиз нима эди? Бизга бўлган ғаразингиз боисини тушунолмай қолдик?

– Болажонларим, сиз она қалбининг нечоғли меҳрга тўла эканини ҳис қила олмайсиз. Наҳот мен сизларга заҳарни раво кўрсам? Шундай демоқликдан уялмайсизларми? Энди менга айтинглар-чи, ҳов кўриниб турган дараҳтга чиқдингларми?

– Ҳа.

– Яшил пўстлоғлик мевани узиб тишладингларми?

– Ҳа.

– Сизлар ёнгоқ мевасини эмас, ташлаб юбориладиган аччиқ пўстлоғини емоқчи бўлгансизлар. Мен сизларга магзини чақиб бериб эдим. Сизлар гапимни охиригача эшитмай, бевошлиқ қилиб югуриб кетдинглар. Заҳар каби аччиқ пўстлоқ ичидан ширин ва фойдали мағиз бўлишини айтишга улгурмадим. Энди мени ғаразгўй душман, деб койияпсизлар. Диққат билан тингланглар: агар ишнинг ташқи кўринишга боқсангиз, мана шундай алданаверасиз. Нарсаларнинг ичida нима борлигига диққат қилсангиз, ҳақиқатни топиб, бол каби ейсизлар.

Мазкурдан уқиб олишимиз лозим бўлган маъно шуки, бу дунёда ғавғонинг боши кишиларнинг бирбирини яхши тушунмасликларидан бошланади. Кўп киши ҳақиқатни шу қиссадаги маймун болалари каби янгиш тушуниб, чин ҳақиқатни айтганларни мало-

мат қиладилар. Уларни душман санайдилар. Болшевиклар замонида, айниқса, Сталин зулми даврларида тарих бундай мисолларга күп дуч келди. Зулмкорлар бирон ишнинг моҳиятини чуқур билмасдан туриб, ҳақиқатга эришиш мумкин эмаслигини тан олмадилар. Доноларга қирон келтирилиши замираидан ана шу жоҳиллик ётади.

Инсон бошига бир мушкулот тушса, атрофидагилардан нажот излайди. Унинг хатоси ҳам шу ерда. Кимса нажотнинг қаердан эканлигини билиши керак. Энг доно маслаҳатни қаердан олишини ҳам билиши шарт. Ўйлаб кўрайлик-чи, нима учун аzon чақириғида «Нажотга келинглар!» деб хитоб қилинади? Фоний дунёдаги энг доно одамлар ҳам бирон масала ечишда фақат ўз онгларига, билимларига суюнмайдилар. Уларнинг онглари ва билимлари масаланинг ечими қайда эканини тўғри кўрсатиб беради, холос. Асрлар оралаб бизга қадар етиб келган бу муқаддас битиклар файласуфликни ихтиёр қилганлар учун кенг бир фазо, ақл учун кенг машқ майдони ва унутилмас хотира, маъносига тушунадиганлар учун ажойиб бир ибрат хазинасидир.

**Ҳикоят.** Бир куни подшоҳ доно вазири билан сұхбатлаша туриб «Сенинг пири муршидинг борми?», деб сўради. Вазир пирга қўл бермаган эди. Подшоҳнинг нима мақсадда бу савонни беришидан ажабланди-да, «Устозим бор», деб жавоб қилди. «Устозинг ким? Нима учун у ҳақда сира гапирмайсан?» «Устозим тарки дунё қилган зоҳиддирлар. Тоғда яшайдилар. Яқин кунларда шаҳримизга келишлари хабари бор», деди вазир. «Устозинг келса, уни менинг ҳузуримга чорла», деб амр қилди подшоҳ.

Подшоҳдан вазифа олган вазир ўтин бозорига борди-да, дарвешхўй бир одамни учратиб, уйига олиб келди. Қорнини тўйғизгач, муддаога кўчди:

– Сенга бир вазифа юклайман, айтганимдай бажарсанг, сўраганингни бераман.

Ўтинчи: «Вазири аъзам пул бермаган тақдирда ҳам амрини бажаришга мажбурман. Баҳонада ўн танга ишлаб ола қолмайманми», деб ўйлади. Вазир унга вазифани тушунтириди:

– Мен берган кийимларни кийиб, қўлингга тасбеҳни олиб, хонақоҳда қимир этмай ўтирасан. Сенинг ёнингга турли одамлар келади. Ҳатто подшоҳ ҳам келиши мумкин. Сени гапга солсалар ҳам чурқ этмайсан. Атрофга қарамайсан. Сенга ҳадялар беришлиари мумкин. Ҳатто бўйинг баробар олтин берсалар ҳам, қарамайсан. Олтинни бир кесак деб билиб жим ўтираверасан. Агар айтганимни қилмасанг, бошинг кетади, шуни унутма.

Дарвеш либосидаги ўтинчини хонақоҳга кузатиб қўйган вазир саройга бориб, устозининг шаҳарга қадам ранжида қилганини айтди.

– Ҳозироқ ҳузуримга чорла, – деб буюрди подшоҳ.

– Давлатпеноҳ, зоҳид аҳли ҳеч қачон чорловга жавобан саройга келмаслар. Расм шулким, улар зиёрат қилинмоқлари даркор. Яна бир узр борким, менинг бирга бормогим дуруст эмас. Сизнинг зиёратингиз хусусида сўзлаганимда, устоз менинг бирга бормогими ни ман этдилар. Агар истасангиз, сарой аҳли ҳамроҳлигида бормонгиз мумкин.

Подшоҳ сарой аъёнлари ҳамроҳлигида хонақоҳга борди. Дарвеш либосидаги ўтинчи одамлар шарпасини эшитса ҳам тасбеҳ ўтирганича қимир этмай ўтираверди. Подшоҳ унинг ёнига яқинлашиб салом берди. Алик олинмади. «Зикр билан банд бўлиб эшитмади», деб ўйлаган подшоҳ унинг ёнига ўтириб, гапга солмоқчи бўлди:

– Сиз вазиримнинг устози экансиз, исмингизни айтинг.

Жавоб бўлмади. Дарвеш либосидаги ўтинчи киприк қоқмай ўтираверди.

– Мен подшоҳман. Тилагингиз бўлса, айтинг.

Яна жавоб бўлмади.

– Менга бир қаранг, дуо қилинг, – деб олтин тангалар түкди.

Тангаларнинг овозидан ўтингчининг юраги хаприқиб кетса-да, қимирласа боши кесилажагини эслаб, киприк қоқмай ўтираверди. Илтимоси ҳам жавобсиз қолган подшоҳ эса аччиқданди. «Устози қип-қизил аҳмоқнинг ўзи-ку», деб изига қайтди-да, вазирни чорлади. Норозилигини бирданига ифода этмай вазирни донолик билан қармоққа илинтирмоқчи бўлди.

– Сенинг ҳар балога ақлинг етади. Қани айт-чи, бир аҳмоққа рўпара бўлиб қолсанг нима қилган бўлардинг?

– Доноларнинг ҳикматига амал қиласдим.

– Донолар нима деганлар?

– Аҳмоққа дуч келсанг, сукут қил, деганлар.

Бу жавобдан сўнг подшоҳнинг қандай аҳволга тушганини тасаввур қиласверинг.

Энди узоқ мозийдан яқин ўтмишга қайтайлик.

Ўтган асрнинг саксонинчи йилларида Москва шаҳрида бўлиб ўтган фантаст адиллар анжуманида кўнгилсиз воқеага гувоҳ бўлиб эдим. Мажлисни фантастика соҳасида дунё таниган, ҳалол ва холислиги билан эъзоз топган ёзувчи бошқариб бораётган эди. Мажлис фантастика соҳасидаги китобларнинг савијасини муҳокама қилаётган эди. Сўз талаб қилиб минбарга чиқсан адиллардан бири мавзу четда қолиб, мажлисни бошқараётган ҳурматли ёзувчининг йўқ айбларини санаб, номини балчиққа булай бошлади. Мажлис аҳли янграётган сўзларнинг туҳмат ва ифво эканини англаб турарди. Нотиқнинг саёз асаллар муаллифи, иқтидорсиз адиллардан эканлиги ҳам барчага аён эди. Мажлис раиси «Ит ҳуарар – карвон ўтар», ҳикматига амал қиласа, олам гулистон эди. Аммо у шу ўринда ўзининг донолигига хиёнат қилди – нодоннинг қармоғига илинди-ю у билан олиша бошлади. Ўзининг эътиборига яраша иш қилмади. Оқибатда юрак хасталиги хуруж қилиб, касалхонага олиб ке-

тилди. Мажлисдаги мажбурий танаффусдан кейин яна ўша аблаҳ сўз талаб қилиб олиб, «Мен янгишибман, ҳурматли ёзувчидан узр сўрайман», деди. Мажлисда унинг ҳамфирлари, истеъоддисиз адиллар ҳам бор эди. Мажлис раисини жойидан усталик билан олиб ташлагани учун унинг «донолигига» таҳсинлар ўқишиди. Дарҳақиқат, усталик қилинган эди. Аммо замирида зулм мавжудлиги учун бу тадбир доноликка йўйилмайди. Мажлис раиси йўлдан олиб ташлангани билан атрофда бошқа ақл эгалари бор эди ва анжуман қобилиятсизлар йўриғида давом этмади, улар муддаоларига ета олмадилар, асалари қаттиқ танқид остига олинди.

Бу воқеани эслашдан мақсад шуки, зиёлилар иштирокидаги кўпгина анжуманларда жоҳиллар шу тарзда доноларга хужум қиласидилар, уларни обрўсизлантиришга уринадилар. Улар мажлисдаги асосий масала бўйича доноларга тўғридан-тўғри хужум қилмайдилар. Чалкаш йўллардан фойдаланадилар. Айтайлик, қўёш физикаси келажагига бағишлиланган анжуманда қўёшга ҳам, физикага ҳам алоқасиз гаплар билан фозилларга тош ота бошлайдилар. Мақсад – уларни чалғитиш, кераксиз баҳсга тортиш. Уларнинг иши бу латифани эслатади: бое эгаси ўғрини тутиб сўрадики: «Нега ўғирлик қилдинг?» Узр сўраши лозим бўлган ўғри дағдага қиласидики: «Хотинингга нега атлас лозим олиб бермадинг?»

Доноларнинг жоҳиллар ҳужумига сукут билан жавоб бермоқдикларини ҳар қандай ҳолатда ҳам чекинишлари шарт, деб тушунмаслик керак. Агар шундай қилинаверилса дунё янада баттар остин-устин бўлиб кетарди. Агар жоҳилнинг жоҳиллигига қарши тура олмаса, доно доно бўлармиди? Гап шундаки, маълум даврада жоҳил қўзгаётган кераксиз масалага эътиборсиз қараш керак. Бошқа ҳолатларда ҳақиқат ҳимоясидан чарчамаслик талаб этилади. Москвадаги воқеада ҳурматли ёзувчи «сиз айтиётган масалалар мажлис

мавзуига алоқасиз, шу боис буни алоҳида гаплашсак», деса кифоя эди.

Жоҳил одам жоҳиллиги туфайли кўпинча ўзини ўзи фош қилиб қўяди. Худди қуидаги ривоятдаги каби.

**Ривоят.** Акрам исмли доно одам даладан шаҳардаги уйига қайтаётиб, булоқ бошида тўхтаб, отдан тушди. Отни дарахтга боғлагач, хуржунни очиб, тамадди қила бошлаган дамда бир киши булоқ яқинида тўхтади-да, байталини Акрамнинг оти ёнига боғламоқчи бўлди.

– Ҳой биродар, отимнинг феъли ёмон, отингизни бошқа дарахтга боғлай қолинг. Яна тепиб ўлдириб қўймасин, – деди Акрам.

У киши ўзини карликка солиб, байталини ўша дарахтга боғлади-да, индамай келиб, Акрамнинг ёнига ўтирди-ю таклифни ҳам кутмай дастурхонга қўл чўзди. Акрам:

– Мен билан саломлашмай туриб, ёнимга ўтирасиз, ижозат сўрамай таомга қўл узатсиз, бу нима қилганингиз? – деса ҳам индамай овқатни тушираверди. Акрам «Бу одам гунг-соқов экан, озгина телбалиги ҳам борга ўхшайди», деб ўйлаб, унга бошқа галирмади.

Бир маҳал Акрамнинг оти безовталаниб байталини бир тепган эди, қорни ёрилиб ўлди. Ўзини гунг-соқов қилиб кўрсатаётган одам отининг ўлганини кўрди-ю дод-фарёд кўтарди. «Отимни тўлаб берасан», деб талаб қила бошлади. Акрам:

– Ҳой нобакор, ўзингни телбасифат қилиб кўрсатаётган эдинг, энди тилинг чиқдими? Отингни бошқа дарахтга боғла, демабмидим сенга? Менга даъво қилма, ўзингдан кўр, – деди-ю отига миниб, уйига равона бўлди. У одам ғавғосини бас қилмай, эргашиб келаверди. Акрам шаҳарга етиб, уйига кириб кетгач, қозихонага югурди. Қози унинг арзини эшитиб, Акрамни чақиртириб келди-да, нима воқеа юз берганини сўради. Акрам ўзини кар ва соқовликка солиб, унинг саволига жавоб бермади. Қози «Бу одам кар ва

соқов экан, уни айблай олмайман», деб ҳукм чиқарғач, даъвогар яна дод-фарёд солди.

– Бу муттаҳам ёлғондан ўзини кар ва соқов қилиб кўрсатяпти, – деди у ғазаб билан. – Мен байталимни миниб, даладан қайтаётсан, бу одам булоқ ёнида ўтирган экан. Байталимни унинг оти ёнига боғлаётганимда «Отим тепонгич, сен бошқа ерга боғла», деган одам соқов бўладими? Мен атай ўзимни гунг-соқов кўрсатиб, овқатидан еяётганимда ҳам «Бу нима қилганинг?» деб танбеҳ берганини ҳам унутдимикин?

Бу гапдан кейин Акрам қулимсираб, тилга кирди:

– Қози жаноблари, ўзимни кар-соқов қилиб кўрсатишмдан мақсад – бу нобакорнинг ўзини ҳузурингизда айбига иқрор қилдириш эди. Агар шу ҳақиқатни мен айтсан, у шубҳасиз тонар эди.

Қози Акрамнинг донолигига тан бериб, тилидан илинган муттаҳамни ҳайдаб чиқарди.

**Яна бир ривоят.** Сарой аҳлидан бири бегуноҳ бўлса-да, амир Аайс вазирининг дилгирлиги ва фарзига қулоқ тутиб, уни ўлимга ҳукм қилди. Банда амирнинг ҳузурида бошини ерга қўйиб дедики:

Байт:

*Сен раво кўрсанг ҳар ишиниким, писанд ўлгай манга,  
Хўжа не ҳукм этса йўқдур бандага чуну чаро.*

– Аммо мен неча умрдин бери бу хонадоннинг неъматпарвардасидурмен. Ложарам, менинг қоним учун Қиёматда уқубат домига гирифтор бўлмоғингизни раво кўрмасмен. Агар мени қатл этмак истасангиз, шариат ҳукми билан ўлтуринг.

Амир сўради:

– Бу маҳал шариат ҳукми била ўлтурмак нечук бўйур?

Банда жавоб қилди:

– Рухсат беринг, мен аввал вазирингизни ўлтурай, ондин сўнг буюрингким, мени онинг қасоси учун

ўлтурсиналар. Токим мени ноҳақдик била ўлтурмамиш бўлмағайсиз.

Амир бу гапдан хандон бўлди ва вазирига қараб сўради:

– На маслаҳат берурсан?

Банданинг илтимосидан ҳуши учган вазир деди:

– Улуғ амири, бу ҳаромзодани Худо учун озод қилинг, то мени бир балога гирифтор этмасин, недин-ким, гуноҳ мендадур ва ҳакимларнинг бу сўзига амал қилмадимким, дебдурлар:

Қитъа:

*Кулух андоз ила чун бошлидинг жанг,  
Бошингни жаҳл тоши бирла ёрдинг.  
Чу ўқ отдинг боқиб душман юзига,  
Ҳазар қилгилки, омоч узра бординг.*

Доно одамнинг жоҳил ёки маст киши билан олишувини қуидаги воқеага ўхшатсак бўлар.

**Воқеа.** Бир одамнинг оёғини ит тишлаб олди. Шундай қаттиқ қопдики, оёқдан қон оқиб, азоб бера бошлиди. Оғриқ кучайиб, бечора кечаси билан ухлай олмади. Отасининг дард чекаётганини кўрган қизча соддадиллик билан деди:

– Отажон ит қопганда нега индамай турдингиз? Сизнинг ҳам ўткир тишларингиз бор-ку? Сиз ҳам тишлаб-тишлаб, бурдалаб ташласангиз бўлмасмиди?

Отаси қизининг бу гапидан кулимсираб, унга шундай тушунтириди:

– Эй кўзимнинг нури, орзуим чечаги, кўнглимнинг овунчори қизалогим! Менинг ҳам ўткир тишларим бор. Лекин пок тишимни унинг нопок танасига уришим тўғри иш бўлмайди. Агар мен ҳам тишласам, мен билан ит орасида қандай фарқ қолади?

Одамларни икки тоифага: «Маъно аҳли» ва «суврат аҳли»га ажратиш мумкин. «Суврат аҳли» деб ҳар бир нарсанинг ташқи кўринишига қараб, унга юзаки

муносабатда бўладиган кишиларга, «маъно аҳди» деб эса нарса ва ҳодисаларнинг сабаби, натижа ва оқибатларини ўйлаб, оқилона муносабатда бўладиган шахсларга айтилади. Масалан, нонга бўладиган муносабатни оладиган бўлсак, суврат аҳдига мансуб киши унинг бозордаги ёки дўкондаги нархига қараб бир неча сўмлик арzon нарса деб ўйлайди ва уни увол ҳамда исроф қилишдан тортинмайди. Агар шу бир неча сўмлик нон уч-тўрт кун топилмаса, қандай аҳволга тушишини, айни чоғда, дунё аро неча миллионлаб кишиларнинг қорни нонга тўймай нобуд бўлаётганини хаёлига ҳам келтирмайди. Маъно аҳдига мансуб киши эса ўша бир неча сўмлик нон вужудга келиши учун талаб этиладиган меҳнатни ҳис этади. Аввали деҳқонларнинг хизмати, буғдойни туйиб, унга айлантириб берувчи ишчилар меҳнати, янги навлар устида заҳмат чекаётган олимлар меҳнати, новвойлар меҳнатидан ташқари табиий омиллар – ер-сув, ҳавонинг ҳам иштироки борлигини ҳисобга олади. Энг муҳими – шу нон Аллоҳнинг неъмати эканини билади ва Унга шукроналар қиласди.

Донолик фазилатини ёшликда эгаллаган дуруст. Бу фазилат умр ўтгани сайин тажриба ҳисобига бойиб бораверади. Жоҳиллик ва нодонликни афзал билгандар эса аксинча, янада баттар ёмонлашиб бораверадилар.

Бир донишманд ёшлигига жоҳиллиги билан танилган қора Яқуб исмли одамни қидириб юрган эди. Излагани унга рўпара бўлиб:

– Қора Яқуб менман. Лекин ёшим улғайиб, соч-соқолим оқарди. Энди «оқ Яқуб» дессангиз ҳам бўлаверади, – деди.

Донишманд қўлини қора Яқубнинг кўксига қўйиб:  
– Биродар, қорани оқقا айлантириш қалбнинг иши. Соч-соқол оқаришининг бунга сира дахли йўқдур, – деди.

Бир кишининг донолиги туфайли энг оғир мушку-  
лотлар ҳам ечилади. Ақд ва донолик кишининг ўзини  
ва атрофидагиларни турли балолардан асрайди. Та-  
рихда Ҳажжож ибн Юсуф ас-Сақафий исмли зот  
ўтган. Бу киши юқори мартабаларда хизмат қилган,  
хусусан Ироқ волийиси бўлган. Эллик тўрт йил умр  
кўрган бу одам тариҳда «Ҳажжожи золим» номи би-  
лан қолган. У «Кескин иродали ҳукуматнинг жуда оз  
кишига зарари тегади, лекин заиф ҳукуматнинг за-  
рари ҳаммага тегади», деган ақидани маъқул кўргани  
учун, айрим маълумотларга қараганда 120 минг одам-  
ни ўлимга ҳукм қилган, неча юз минг одамни, ҳатто  
аёлларни зинданбанд этган. Бу одам ҳақида кўп ри-  
воятлар мавжуд. Каминани ажаблантирган нарса  
шуки, мазкур ривоятларнинг аксариятида золимлиги  
зикр этилгани ҳолда унинг доноликни қадрлагани ҳам  
баён этилган. Яъни доноликнинг зулмни енга олиши  
таъкидланган. Шулардан бири билан танишсак.

**Ривоят.** Ҳажжожи золим бир аёлнинг акаси, эри  
ва ўғлини ҳибсга олиб, ўлимга ҳукм қилди. Аёл арзга  
келиди.

– Бу уч кишидан фақат биттасини афв этаман. Ях-  
шилаб ўйлаб кўриб, айт: қайси бирининг озод бўли-  
шини истайсан? – деди Ҳажжож.

– Эримни ўлдирсангиз, кейин эр топилади, юртда  
эркаклар кўп. Ўғил ҳам туғилади. Аммо ака топилмай-  
ди, чунки онам менга бошқа ака туғиб бермайди, –  
деди аёл.

Аёлнинг бу доно жавоби Ҳажжожи золимга таъсир  
этди:

– Ҳаммасини афв этдим. Сен мендан биттасини ке-  
чиришимни сўрадинг. Донолигинг ва тўғри сўзлигинг  
учун учовлари ҳам озодлар!

Донолик ҳақида сўз юритиб, нодонлик иллатини  
кўрмагандан ўтиб кетсак, инсофдан эмас, фикримиз  
ҳам чала қолади.

## **Нодоналигин тан олмас нодон**

- Денгизга ўт тушса, балиқлар нима қилишади?
  - Даражтга чиқиб жон сақлашади.
  - Аҳмоқ, балиқ ҳўкизмидики, дараҳтга чиқса?
- Икки нодоннинг бу сұхбати тўқилган латифами ёки ҳәётда ҳам шунақаларга учраб туранизми? Ўрни келганда нодонлар ҳолига ибрат назари билан қараб қўйсак фойдадан холи бўлмас.

«Нодондан қанчалик узоқ бўлсанг, бошинг шунчалик саломат бўлади», дейдилар. Кўпчилик орасидан нодонни қандай ажратиб оламиз? Пешонасига ёзиб қўйилмаса, қулоқ- бурни барчаники каби бўлса, ҳатто зоҳирий гўзаллиги билан кишини мафтун этса? Энг қисқа жавоб – дононинг акси нодондир. Айтишга осон, бироқ, дўстлар, қариндошлар, ҳамкаслар орасида нодони ким эканини аниқлаш мушкул. Нодонларча гапириб юборишдан, нодонларча бир иш қилиб қўйишдан ҳеч биримиз муҳофазаланмаганмиз. Нодонларча қилигимиз учун бирор танбеҳ бермаса-да, узоқ вақтта қадар ўзимизни ўзимиз айблаймиз. «Нахот шу ишнинг нодонликдан эканига ўзимнинг ақдим етмади?», деб ич-этимизни еб юрамиз. Агар бу нодонлигимиздан бирор жабрланган бўлса, узр сўраймиз. Агар шундай қилсак, нодонлик ботқоғига ботиш бизга хавф солмайди. Бунинг акси бўлишдан Худо асрасин. Нодон одам ўзидағи айбларни кўра олмайди-ю бошқаларнинг камчиликларини кўради. Аввал ўзидағи айбларни кўриб, шуларни тузатишга киришса, нодон бўлмас эди.

*Айбина нодон бутунлай билмагай,  
Ўзгаларнинг айбидан айрилмагай.*

Ҳеч қайси нодон нодонлигини тан олмайди. Ҳолбуки, хатоларни тузатмаслик – чинакам хатодир. Баъзан кўнглимизга ёқмаган одамни ҳам нодонлар тои-

фасига киритиб қўя қоламизким, бу асли ўзимизнинг нодонлигимизни кўрсатиб қўяди.

Билмаганни «билимадим», деб тан олишнинг доноликдан эканини айтдим. Бунинг акси – билмаган нарсасини «билиман», деб исбот қилишга тиришиши эса нодонлиқдир. Билмаслигини тан олган доно ўзини ҳам, бошқа бировни ҳам ҳалокатдан сақлаб қолади. Нодон эса... Нодон табибининг аҳволидан хабар топганимисиз?

**Ривоят.** Бир шаҳарда тажрибали, беморга тўғри ва фойдали маслаҳат берадиган, ақлли, хизрнафас табиб яшар эди. Ҳакимнинг ўзига ҳам бир дард илашиб, қўзи нурини йўқотди. Бундан фойдаланган лаёқатсиз бир нодон табиб ном чиқаришни умид қилди.

Шу мамлакат подшоҳи қизини акасининг ўғлига узатган эди. Ҳомиладор қизининг ой-куни яқинлашганда оғир бетоб бўлиб қолди. Подшоҳ тажрибали, аммо қўзи ожиз табибни чақиртириб келди. Табиб қизни кўриб, дарҳол ташхис қўйди. Унга «замаҳрон» дорисидан бир мисқолини тоза мушк ва долчинга қўшиб ичиришни тавсия қилди. Подшоҳ «Дорини ўзинг тайёрлаб, ўзинг ичир», деб буюрди. Табиб ожизлиги туфайли бу ишни қилолмаслигини айтиб, узр сўради. Шу атрофда турган нодон табибга жон кирди. Ўзини кўрсатиш, подшоҳ марҳаматига эришиши учун қулай фурсат келди, деб ўйлаб: «Бу менинг ишим, қизингизни мен даволайман», деди. Подшоҳ унга ишониб, дориворлар сақланадиган хонага йўллади. Илмсиз ва нодон одам бу соҳада ҳеч нима билмаса-да, ишга кириши: заҳар солинган идишдан заҳарни олди, бошқа идишлардан бошқа дориворларни таваккалига олиб, аралаштириди-ю олиб чиқиб, ҳомиладор маликага ичирди. Подшоҳнинг қизи дорини ичган заҳоти жон таслим қилди. Фазабланган подшоҳ дорининг қолганини нодоннинг ўзига ичирди. Табибликни биламан деб даъво қилган нодоннинг аъзойи бадани кўкариб кетиб, қийнала-қийнала ўлди.

Ривоятдан мурод шуки: бирон масаладан хабардор бўлмаган ҳолда сўз айтганинг, билмаган ишига киришганнинг аҳволи шундай бўлади. («Билдим», дедим – тутилдим, «бilmадим», дедим – қутулдим», деган мақолни кўпчилик билса керак. Мақол аслан тушунилса, фазилатга эмас, иллатга ундаиди. Яъни «сиз бирон ишни билсангиз ҳам шу вазифани бажармаслик учун «бilmайман», деб қўя қолинг», дейилмоқчи. Яъни бироннинг ҳожатини чиқариб, савоб олишдан қайтармоқчи. Бу ёлғонга киради. Ёлғон эса гуноҳдир. Лекин мақолни «биладиганимни «бильдим», деб, шу ишга тутилиб қолдим, билмайдиганимни «бilmайман», деб гуноҳдан қутулиб қолдим», деб ҳам тушунишимиз мумкиндири. Бироқ, шундай маъно қидириб, ўзимизни ўзимиз алдамай қўя қолайлик. Мақол ҳамиша биринчи маънода қўлланилади.)

Хожа Аҳмад Яссавий ҳазратлари «Дуо қилинг, нодонларнинг юзин кўрмай», деб хитоб қилганлар. Фосиқ – ахлоқсиз одам барча миллатда ҳам нодон саналади. Бундай одамлар, айниқса, дили пок кишилар даврасида янада нодонроқ кўринадилар. Фисқ аҳли доирасидаги нодон барча соҳада ёмон. Хусусан, тақводорликда – руҳоний қиёфасида жуда ҳам ёмон. Бойлар орасидаги нодоннинг нима дейиши, тилла пашшанинг эса нима ейиши ҳаммага маълум. Яссавий ҳазратлари шундай нодонлардан паноҳ тилаяптилар.

Қадим ҳукмдорлардан бири машҳур бир алломага қозилик мансабини бермоқчи бўлди. Аллома унинг бу таклифини қабул қилмади. Ҳукмдор бундан ғазабланниб, уни жазолашни ихтиёр этди. Адабини бериб қўйишнинг кўп турларини ўйлади. Тан жазоси бермоқликни раво кўрмай, зинданбанд қилишни буюрди. Ўша куниёқ номи чиққан бир нодонни ҳам ҳисбга олдириб, аллома ўтирган зинданга ташлади. Орадан уч кун ўтмай, аллома дод-фарёд қила бошлади. Ҳукмдор уни зиндандан чиқартириб, қандай ҳодиса юз

берганини билиб турса ҳам «нима арзинг бор?», деб сўради. Аллома кўзларига ёш олиб ялинди:

– Ҳукмдорим, таклифингизни бажони дил қабул қиулурменким, мени бу нодон суҳбатидан қутқарсан-гиз басдир.

Ҳукмдор ўзининг доно тадбиридан қувониб, алломани қозиликка тайин этди.

Алломанинг фарёдига нима сабаб бўлиб эди? Маълумки, ақлли одам кераксиз вақтда билганини сўзлашдан тортинаади. Нодон эса нима сўзлаётганини ўзи ҳам тушунмайди. Яхшиликка йўйиш мумкин бўлган сўзни ёмонликка йўйиб кишини гаранг қила-ди. Ўзи билмаган ёки тушунмаган нарсани ё муқад-дас деб сифина бошлайди, ё қуфр санаб, тиш-тирно-ги билан рад этади.

Навоий ҳазратлари ривоятдаги алломани жонидан тўйдирган бу тоифа ҳақида бир оз аччиқ, аммо тўғри таъриф берганлар:

«Нодон – эшак, балки эшакдан ҳам баттар. Эшакка нимани юкласанг кўтаради. Қаёққа ҳайдасанг, ўша ёққа боради. Унда ақл-фаросат даъвоси йўқ. Бермананг – оч, берсанг – тўқ. Бу бир бечорадир – юк ташувчи, ўтин-чўп ташувчи, балки галла ҳам ташувчи. Но-дон бу сифатлардан холи, зоти билим либосидан маҳ-рум. Нодоннинг иши такаббурлик, кеккайиш, хаёли-да юз хил беҳуда ташвиш. Нодоннинг барча бемаъни иши ўзига маъкул. Барча ёмон феъли ўзига мақбул. Унинг кўнглида одамларга юз хил озор бериш хаёли. У жоҳиллигидан ҳалққа минг зарар етказишни ўйлайди. Эшак ҳанграшидан қулоққа озордир, бундан бўлак не айби бордир? Эшак тегирмондан уйингта ун келтиради; уни пишириш учун даладан ўтин келтиради. Эшакнинг меҳнатлари миннатсиз, унинг азоблари кул-фатсиз. Нодонни эшак, десанг ранжийди, ғазабланади. Эшакка эса яхши-ёмон барибир.

Байт:

*Бирида мунча ҳунар, ул бирида мунча уюб,  
Қайсининг хўб эканин аҳли хирад билгай хўб».*

Яъни, эшак билан нодоннинг бирида ҳунар мавжуд, иккинчисининг айби кўп. Қайси бирининг яхшироқ эканини ақл эгаларининг ўзлари яхши биладилар.

Нодонликнинг дастлабки белгиларидан бири – ўзи тушунмаган гапга ҳам аралашавериши беҳуда ўқ узган овчига ўхшаб қолади. Нодонга «товуқмия» деб ҳам сифат берарларким, боиси: нодон қандай бемаъни гапларни айтмайди, товуқ қандай нажосатларни титмайди.

**Ривоят.** Подшоҳ доно вазири билан сұхбатлашиб ўлтирас эди.

– Кеча қариндошларингникига меҳмонга борибсан, қани, бир бошдан айт-чи, сени улар қандай иззат қилдилар? – деб сўради подшоҳ.

Вазир сўзни кутиб олиш маросимидан бошлади. Сўнг дастурхон устидаги неъматларни таърифлади. Сўнг таомларни. Ҳар таърифдан сўнг подшоҳ: «Кейин-чи, кейин нима ейилди?» деб сўрайверди. Вазирнинг ҳикояси якунланмай туриб, подшоҳни зарур юмуш билан йўқлаб қолдилар. Орадан бир неча кун ўтгач, подшоҳ вазирининг хотирасини синамоқчи бўлиб тўсатдан:

– Кейин-чи, кейин нима ейилди? – деб сўраб қолди.

Вазир мутглақо эсанкирамай, хотиржам равища ҳикоясини узилган жойидан давом этди:

– Кейин гал ясмиқ қайласига келди.

Подшоҳ вазирининг донолигидан қувониб, унга қимматбаҳо узук ҳадя этди. Буни кўриб турган бошқа аъёнларнинг юрагига ўт тушди. Ҳар бири «Подшоҳимиз ясмиқ қайласини егилари келиб қолибди», деган хаёлда уйларига шошилиб, шу таомни тайёрлатдилар-да, эртасига саройга келтирдилар.

– Бу нима? – деб ажабланди подшоҳ ажабланиб.

– Сизнинг кўнглингиз тусаётган тансиқ таом – ясмиқ қайласи, – деб жавоб бердилар.

Подшоҳ разабланди, чунки у ясмиқ қайласини ёқтириласди. Кейин уларнинг муддаоларини англаб, дедики:

– Доно вазиримга ўткир хотираси учун ҳадя бериб эдим, ясмиқ қайласи учун эмас!

Нодонликлари учун жазо тайин этилди: ҳар бирлари ўзлари келтирган қайлани бўкиб қолгуналарича едилар ва йигирма беш даррадан ҳам бенасиб қолмадилар.

Луқмони Ҳаким ўз ўғилларига бундай насиҳат қилганлар:

– Ўғлим, нодон ва жоҳил киши сен билан бирор ма-  
сала устида баҳслашиб қолса, сен унга мулоимимлик  
билан жавоб бер. Агар у сенинг жавобингдан қаноат-  
ланмай, жаҳли чиқа бошласа, сўзингни яна қайтариб  
айтма. У билан олишиб ўтирма, сукут қил.

*Сўзинг наф этмаса, қилма иода,  
Бўйлур айтган саринг жаҳли зиёда.*

**Яна бир ривоят.** Бир нодон одам Хотам Тойга кўп жабру жафо етказди. Оғзига келган ҳар бир ярамас сўзни айтишдан тортинмади. Ақдли кишининг нодон билан олишиб туриши дуруст бўлмагани учун Хотам Той ҳам у билан олишмасдан, сукут этиб турдилар. У киши чарчаб, сўздан тўхтагандан кейин Хотам Той дедиларки:

– Яна айтадиган ҳақоратли сўзларинг борми? Бўлса, менинг ёнимда айтиб битир. «Ақлсиз, нодон одам адабсизлик қилса, у билан олишмай, адабсизлигини кечиришдан ўзга чора йўқдир», деганлар. Шунга кўра, мен ҳамма ҳақоратли сўзларингга жавоб қайтармай, сукут қилдим. Сени афв этдим. Менинг одамларим орасида ўзингга ўхшаш паст табиатли, ақлсиз, нодон одамлар ҳам бор. Агар улар ёнида мени ҳақорат қил-

гудай бўлсанг, сенинг худди ўзлари каби нодон эканингни билмаганлари сабабли ҳужум қилишиб, таъқиқ этишимга қарамай, сенга озор етказарлар. Шунинг учун ҳам барча ҳақоратли сўзларингни ўзимга айтиб битира қол.

Шоир айтмоқчи:

*Ҳайвонни ҳайвон деб билмоқлик даркор,  
Одамлар ичида ҳайвонсифат бор.  
Ақли ҳеч бўлмаган нодон дўстингдан,  
Қамчилаб урсанг-да, итинг вафодор.*

Ота-боболаримиз битикларида ўзини доно санаган нодондан сақданмоқдик кўп-кўп таъкид этилган. Мана шундай кишиларга қараб хирадманд аҳли деганки: «Нодон киши ўлса, ажабланмаслик керак, аслида унинг тириклик чоғи ҳам ўлимдан фарқланмайди».

Анушервони Одилнинг лочини богичини узиб учди-ю, бир кампирнинг ҳовлисига кўнди. Кампир уни ушлаб олди-да, «Бояқиш оч қолганга ўхшайди», деб ўйлаб, лочиннинг олдига бир ҳовуч дон сепди. Гўштхўр қуш донга қараб ҳам қўймади. Кампир:

– Бояқиш тумшуғини тош-пошга уриб қийшайтириб олибди. Шунинг учун дон ея олмаяпти. Эгри жойини кесиб тўғирлаб қўйишим керак экан, – деб ўйлаб, лочиннинг тумшуғини кесди. Кейин тирноқларига қўзи тушиб ачинди:

– Бечорагина, тирноқлари ўсиб кетгани учун юришга қийналаётган экан-да, – деб қушнинг тирноқларини битта-битта суғуриб ташлади. Лочиннинг ўлимига шу азобларнинг ўзи кифоя қилди.

Анушервоннинг одамлари лочинни қидира-қидира, уни кампирнинг уйидан ўлик ҳолда топдилар. Анушервон лочинининг ўлимидан қайғурди. Вазирларидан бири унинг дардини енгиллаштириш мақсадида «Кампирга жазо бериш керак. Шу нодонлиги учун унинг барча тирноқларини суғуриб ташлаш лозим»,

деб маслаҳат берди. Бошқа вазирлари томонидан ўзгачароқ жазо таклиф қилинди. Одил Анушервон вазирларининг сўзларига илтифот қилмай айтди:

– Кампирга жазо бериш тўғри эмас. Жазоласак, зулм дарвозаларини очиб, адолатсизлик қилган бўламиз. Чунки кампирда ҳеч бир айб йўқ. Лочин ўз қадрини поймол қилиб, кампирдан гўё ёрдам талаб қилгандай унинг уйига учиб тушди. Нодон кампир лочиннинг қадр-қимматини қаердан билсин? У лочинга ачиниб, ўз ақл, тушунчасига мувофиқ ёрдам кўрсатмоқчи бўлди. Фақат унинг ёрдами «қош қўяман, деб кўз чиқарди» ҳикматига мувофиқ қушнинг ҳалокатига сабаб бўлди. Бу воқеадан барчамиз ибрат олмогимиз шарт. Ҳар бир киши ўз қадрдонини ташлаб, қадр-қиммати нима эканини тушунмаган одам олдига бориб, унга ўз ихтиёрини ташласа, ўзининг ҳалокатига сабабчи бўлади, лочиннинг ҳолига тушади.

Шукрки, дунёда нодонларнинг пайини қирқиб тураладиган ақл эталари бор.

«Нодонга ҳар гапни айтманг, у сўз ташувчиdir, – дейдилар ҳазрат Навоий, – Кўп гаплари пойма-пойdir, ёлғонdir. Оз гапи – гўё насиҳат; асли гапирмагани маслаҳат. Унинг мақсади одамларнинг айбини фош қилмоқ. Ўзига ишончни расво қилса, шу хилда ўзининг ҳам айбини ошкор қилган бўлади».

Яна дейдиларки: «Нодон дўстни дўст сонига киритма; ақл шамини унинг бехуда афсонаси ели билан ў chirma... Ақдли душмандан фойда имконияти бор. Лекин нодон дўстдан зарар имкони кўпроқ».

Вир савдогар подшоҳга тўртта қорабайир от совға қилди. Совға подшоҳга маъқул келиб, «Бундай отлардан яна борми?» деб сўради. «Бор, фақат бу ерда эмас, ўз шахримдадир. Юз минг олтин берсангиз, ҳайдаб келаман», деди савдогар. Подшоҳ ўйлаб ҳам ўтирумай, пулни беришга амр қилди.

Орадан ўн кун ўтиб, вазирига «Пойтахтдаги нодонлар рўйхатини ёзиб чиқ», деб буюрди. Вазир ўша за-

ҳоти ишга киришиб, рўйхатнинг бошига подшоҳнинг номини ёзди. Бундан подшоҳ газабланган эди, доно вазир тушунтириди:

– Давлатпаноҳ, ўзингиз ўйлаб кўринг: савдогарнинг ким эканлигини, қаердан келганини аниқ билмай туриб, ҳали йўқ отлар учун юз минг олтин бериб юбориш доноликданмидир?

– Хўп, яхши, – деди ночор қолган подшоҳ, – эртанидин ўша савдогар отларни ҳайдаб келса, нима қиласан?

– Агар ўша савдогар отларни ҳайдаб келса, сизнинг номингизни ўчираман-у нодонлар рўйхатининг биринчи қаторига ўшанинг номини ёзиб қўяман.

Ҳаётда «Шу ошнамга ишонган эдим, оёғимдан чалди» ёки «шу биродаримнинг галига кириб маломатга қолдим», деган шикоятларни эшишиб юрамиз. Унумайликки, нодон ўтитида хато бўлиши муқаррар, душман насиҳатида алдов бўлиши шубҳасиздир. Одам боласи унисидан алданмаслик ва бунисига ўзини алдатмаслик чораларини кўриб юрса, кейин афсусланмайди. Ишнинг оқибатини, нима бўлишини билиш – оқилликдан, аммо келадиган фалокатга чора изламай, қайfu чекиб ўтириш – нодонликдан далолат берадики, қўйидаги ривоят шул ҳақдадир.

**Ривоят.** Кашмир вилоятида бир подшоҳ бўлиб, хазиналарини тоглар кўтара олмас ва лашкарлари ҳисобини билиб бўлмас эди. У комронлик туғини зарнигор фалакка тикиб, адолат ва раиятпарварлик овозасини машриқу мағрибга етказган эди.

Бу подшоҳнинг бир ажабтовур маймуни бор бўлиб, баъзи оғатлар вақтида суюниб қолгани боис унга шоҳона парваришлар қиласар эди. Маймун ҳам юксак ихлос билан шоҳга маҳрамлик қиласар, кечалари қўлига қилич олиб, унинг бош томонида ўтириб чиқар, тонг отгунига қадар ухламай, ўз хизматлари риштасини узмай келар эди.

Иттифоқо, бир зийрак ўгри билди. Вилоятта ризқ излаб келиб қолди. Ўлжа илинжида маҳалларни айланыб, пайт пойлаб, вазиятни ўрганиб юрганида бетажриба ва нодон ўгри билан танишиб қолди. Мусофири ўгри янги дўстидан маслаҳат сўради:

– Қайси маҳаллага бориб, кимнинг уйини тешсак экан?

– Шу маҳалла раисининг отхонасида бир семиз эшак бор, – деди нодон ўгри. – Раис уни жуда яхши кўриб парвариш қиласди. Икки қули ҳамиша шу эшак атрофига парвона. Аввал ана шу эшакни ўғирлайлик. Кейин Чорсудаги шишагарлик дўкони томини тешиб, шишаларни шу эшакка ортиб жўнаймиз.

Мусофири ўгри бу таклифнинг бемаънилигини фаҳмласа-да, ўйлаб кўришга ваъда қилди. Шу онда кутилмагандан қаршиларидан миршаб чиқиб қолди. Доно ўгри зийраклик қилиб, ўзини панага олди. Нодон ўгри эса ушланди.

– Сен кимсан, бемаҳалда бу ерда нима қилиб юрибсан, қаерга кетяпсан? – деб сўради миршаб ундан.

– Мен ўғриман. Раиснинг эшагини ўғирлаб, шишалар дўконининг томини тешиб, шишаларини эшакка юклаб, уйимга олиб кетишга жазм қилиб эдим. Сиз халақит бердингиз.

Нодоннинг гапини эшигтан миршаб кулди:

– Офарин! Ўғриларнинг шунақаси ҳам бўлар экан-а! Бир неча посбон қўриқлаб турадиган эшакни деб ўзини бало домига отган, бир тангага арзимайдиган шишаларни деб ўзини хатар йўлига соглан ўрини энди кўришим. Агар шунча ҳаракатни подшо хазинасини ўмариш учун сарфлаганингда оқибати бошқачароқ бўлармиди? Шу ишни эпласанг, ҳеч бўлмаганда замона аҳли қошида мағур бўлиб қолардинг.

Миршаб шундай дегач, нодон ўгрининг кўлларини боғлаб, зиндан сари судраб кетди. Доно ўгри эса нодон дўстининг ишидан ибрат олиб, огоҳ бўлиб, миршаб сўзларидан холоса ясад ўзига дедики: «Бу ўгри

менга нодон дўст эди. Миршаб эса – зийрак душман. Нодон дўст мени аниқ ҳалокат сари солди, бу душман сўзларига кўра ҳазинага борилса, кўп йиллик умидим рўёбга чиқади». Шундай қилиб у подшоҳ қасри атрофини ўрганиб чиққач, лаҳм қазий бошлади. Тош кесиб, лаҳм заҳматини кесди. Ниҳоят, ўғри шоҳ ётогидан бош кўтарди. Қараса, подшоҳ заррин ўринда ухлаб ётибди. Ҳамма ёққа гиламлару шойи атласлар тўшалган. Атроф жавоҳири қимматбаҳо тошлар билан безалган. Қимматбаҳо шамдондаги шамлар равшан ёниб турибди. Парвоналар эса камбағаллар кўнглидек номуродлик шуъласига ўзни уриб ётибди. Қилич яланғочлаган бир маймун эса шоҳнинг бош томонида сергак турибди. Ўғри унга ажабланиб қараб, ўйланди: «Бу савил бундай даражага қандай тарзда эришди экан? Шахриёрнинг жонини қўриқлаш нечук унга топширилди экан? Шоҳу миллат тақдирига дахлдор бу ўткир қилич унинг қўлига қаердан тушди экан?» Ўғри хаёл денгизига чўмиб, саросима билан атрофни нazzора қиласр эди. Ногоҳ бир неча чумоли шоҳ сийнасига ўрмалаб кела бошлади. Шоҳ безовталаниб, уйқусираб кафти билан кўкрагини силади. Маймун бу ҳаракатдан зийракланиб қарасаки, бир неча чумоли хукмдорини безовта қиляпти. Фазабдан унинг кўзлари чақнаб кетди:

«Маҳобатидан юлдузлар ҳам бедор бўлган мендек зийрак посбон турганда, бу бир неча заиф чумолиларга мундоғ густоҳликни ким қўйибди?!»

Шундай қилиб, ҳамият жоҳиляйтни ҳаракатга келтирди. У қиличини даст кўтариб, шоҳ сийнасида эркин ўрмалаётган чумолиларни чопиб ташламоқчи бўлди. Ана шунда ўғри наъра тортди:

– Эй нобакор жавонмард, тўхта, ҳозир олам биноси устунини йиқитасан!

Шундай деди-ю югуриб келиб, маймуннинг қилич кўтарган қўлинини ушлади. Бу наърадан шоҳ ҳам уй-

ғонди. Икковининг ҳолатини кўриб, ажабланиб, ўғридан «Сен кимсан?» деб сўради.

– Сиз олийҳазратга душмани дононурман, – деб жавоб қилди ўғри. – Бу ерга мол талабида келиб эдим. Агар бир лаҳза гафлатда қолсам, бу меҳрибон, лекин нодон дўстингиз ҳамма ёқни қонга тўлдирап эди.

Шоҳ воқеа тафсилотини эшитиб, беҳад ташаккурлар билан дедиким:

– Ҳа, азалий иноят сабаб, ўғри посбон ва душман меҳрибон бўлиши ҳеч гап эмас экан.

Шоҳ ўғрига навозишлар кўрсатиб, ўзининг яқин мулозими этиб тайинлади. Маймунни эса занжирбанд эттириди.

Қарангки, нияти ёмон ўғри донишмандлик либосини кийгани учун мол-давлат, шон-шавкат тожини бошига қўйдилар. Маҳрами асрору, меҳрибон маймун нодон бўлгани учун ундан эъзоз либосини ечиб олдилар.

Байт:

*Ҳасми доноқи, оғати жондур,  
Яхшироқ дўстдинки, нодондур.*

Ҳар бир инсон қудрати ва истеъоди кўтарадиган ишга қўл урмоги керак. Ўз ақл-идроқи ва кучига қараб иш тутмаган киши эл орасида кулгу бўлиб қолади. Бу ҳақдаги ҳикоятга диққат қилинг.

**Ҳикоят.** Бир бургут қўзичоқقا ҳамла қилиб, чанглади-ю уни даст кўтариб учиб кетди. Буни кузатиб турган қарғанинг ҳаваси жўш уриб, бургутга тақлид қилмоқчи бўлди ва ўтлаб юрган қўйга чанг солди. Бироқ панжалари қўйнинг юнгига илашиб қолиб, қанча уринмасин, чиқара олмади. Оқибатда чўпон етиб келди-ю уни тутиб олиб, болаларига ўйин қилиб берди. Болалар қарғани кўришиб: «Бу қушнинг оти нима?» деб сўрашди. Чўпон: «Бунинг оти «қарға» эди. Бироқ, бундан салгина олдин у ўзини бургут деб та-

саввур қылди. Мана энди у ўзининг ким эканлигини билиб турган бўлса керак!» деб жавоб берди.

Мулойим ва тадбир билан қилиш мумкин бўлган бир юмушни қўполлик ва тадбирсизлик билан бажариш нодонлик эканини билмайдиганлар ҳам бор. Бундайларни, айниқса, қўпчилик иштирокидаги маросимларда тез-тез учратиб қоламиз. Қаттиқ-қаттиқ гапириб, кулаверадиган, хизмат қилиб юрган ёшларга ҳуда-бехуда танбеҳ бераверадиган кимсалар борларки, шу одатлари билан кўпнинг назарига тушишни истайдилар. Улар чиндан ҳам эътиборда бўладилар, фақат ўзлари истаган мақомда эмас, балки нодонлик кўринишида бўладиларки, бундан сақланишларини истардик. Маросимда хизмат қилиб юрган ёшларнинг бири зийрак бўлса, иккинчиси табиатан эътиборсизроқ бўлиши, бири кўпчиликка тез аралашиб кетса, иккинчиси одамовироқ бўлиши, кўпчилик орасида хизмат қилиб юришдан тортиниши мумкин. Шундай пайтда баланд овозда «Ҳой, хода ютганмисан, қимирласанг-чи тезроқ!» ёки «Гап сотиб, ош егани келганмисан ё хизмат қилганими?» деган гап ҳам, «Барака топинглар, яхши ҳам сизлар бор экансизлар, қани тезроқ бўла қолайлик» дегани ҳам бир оғиздан чиқади. Шу оғиздан қандай гап чиқиши тилни бошқарувчи ақдга боғлиқ.

Олдинги суҳбатимизда киши ҳамиша кимнингдир маслаҳатига муҳтож эканини айтиб эдим. Яна шу мавзуга қайтишни ихтиёр қилдим, чунки ҳаётда нодон маслаҳатчига дуч келиб, азобимиз беш баттар бўладиган ҳолатлар ҳам учраб турадики, худди бу ривоятдаги оқибат каби.

**Масал.** Бир ўрмондаги каклик ризқ излаб узоқроқ кетиб эди, уясини ёввойи товуқ эгаллаб олди. Каклик келиб, уйни бўшатишни талаб қилди. Товуқ дедики:

- Ҳозир бу уй меники. Агар сеники бўлса, исбот қил.
- Менинг қозидан ҳужжатим бор, – деди каклик.

– Унда бир одилни топиб, унга мурожаат қилиши-миз керак, – деди товук.

– Шу яқин атрофда кечаю кундуз ибодат билан бўлувчи бир мўмин мушук бор. Ундан зиёда одироқ қозини топа олмаймиз. Фақат угина сўзимизни дикқат билан тинглаб, одилона ҳукм чиқариб беради.

Таклиф маъқул бўлиб, мушук ҳузурига бордилар. Мушукнинг кўзи уларга тушди-ю, лабини иштача билан ялаб қўйди. Лекин сир бой бермай, ибодат қилгандай тош каби қотиб бир оз ўтириди. «Ибодати» якун топгач, икки нодонга ўтирилди. Шунда каклик назоқат билан сўз бошлаб, орадаги низонинг сабабини баён қилди. Мушук дъявларни эшитгач, шундай деди:

– Менга қариллик таъсир қилиб, танимда қувват қолмаган, кўзларим нурсизланиб, қулоқларим оғирлашган. Яқинроқ келинглар-да, баландроқ гапиринглар, токи сўзларингизни яхшироқ эшитиб, одилона ҳукм чиқарай. Лекин бундан олдин сизларга бир маслаҳат берай, дикқат билан тинглаб, сўзларимга амал қилсангиз, икковингиз ҳам бахтга эришасизлар.

Мушук шу қадар тилёғламалик билан ширин сўзлар эдики, каклик билан товук унга маҳдиё бўлишиб, яқинлашиб қолганларини ҳам сезмай қолдилар.

Мушук эса... бир салчишда икковини ҳам тутди-ю еди...

*Кўз очиб юмгунча ўтади даерон,  
Ўтган кун қайтмайди бу шундай замон.  
Нодонлар бир-бирин асло кўролмас,  
Одамзот одамни йиқитар ҳамон...*

**Умидимиз юлдузлари**, шоирнинг шу тўртлиги билан бу мавзудаги суҳбатимиз ҳам охирлади. Мазкур суҳбатдан сўнг ўзингизда нодонликнинг бир учқунини сезиб қолсангиз-у дарров ўчира олсангиз, муддаомиз шудир. Суҳбатларимизни ўқиётганингизда айрим ҳикматлар, фикрлар, ҳатто мавзулар сизга

такрорланаётгандай туюлиши мумкин. Бунинг учун каминани эзмаликда айбламанг. Гап шундаки, одамдаги фазилатлар ва иллатлар алоҳида-алоҳида яшамайди. Бир-бирига чамбарчас боғланган, бу мавзудаги фикрлар эса бир-бирини давом эттиради, тўлдиради. Китобхон асарни ўқиётганида турли ҳолатларда бўлади. Баъзан ҳар бир сатрни дикқат билан ўқийди. Ўқиганидан олган маънолари ўзининг тарбиясида асқотади. Баъзан эса паришонлик туфайлими, юзаки ўқиб, айрим фикрлар, ҳикматлар маъносига эътиборсиз ўтиб кетади. Сал туриб, паришонлиги тарқаганда, китобнинг кейинги саҳифаларида ўшандай фикр ва ҳикматга дуч келганда энди дикқат билан ўқийди, маъно олади. Масалан, ақл ҳақида ўтмиш донишмандлари баён қилган юзлаб ҳикматлари бор. Мавзу бир, баён усули эса турлича. Шунга кўра, ўқувчининг қабул қилиши ҳам ҳар хил бўлади. Бизга мерос бўлиб келган ҳикматларнинг сизга осон тушунарли бўладиганларини танлаб олдик. Йиллар ўтиб, ёшингиз улғайгани сайин бошқа китоблардан баҳраманд бўлиб, ҳикмат хазинангизни бойитиб боришингизга умид қилиб, суҳбатимизни яна давом эттирамиз.

### **Ялқовлик меваси**

Бир ялқов иккинчисига дебди:

- Фил бўлгим келяпти: хартуми билан овқатни олиб, шошилмай ейди.

Хартумини қаёққа узатса ҳам етади.

- Бўлмайди, - деди иккинчи ялқов, - илон бўлган яхши. Илон ётганича овқат еяверади...

Биз – катталар сиз – азиз ёшлардан норози бўлганимизда сизларни кўпроқ дангасаликда айблаймиз, тўғрими? «Бунча ялқовсан!» деган гапни уйда ҳам, ўқишда ҳам эшитавериб, кўнглингиз оғриши ҳам ҳақиқат.

- Үглим (кам ҳолларда қыз тилга олинади, энг күп норозилик келинларга нисбатан бўлади) ялқов, уйқу-чи, кун ёйилгунича ётади;
- Үглим эгилиб ишламайди;
- Келиним идишларни чала ювади...

Азизлар, бунаканги даъволарни ҳар биримиз деярли ҳар куни эшиштамиш, шундай эмасми? Айниқса, қайнона-келин можароларининг асосини шундай даъволар ташкил этади. Энг яхши қайнона ҳам энг яхши келинидан қусур қидирса, шу соҳада, албатта, топади. Келин шамоллаб ётиб қолса ҳам, қайнонага ялқовликни яширувчи ниқоб бўлиб туюлиши эҳтимоли бор. Фақат чаққон кelingning қайнона қўнглига йўл топа олиши мумкин. Эринчоқ, ғайратсиз келинлар эса бу борада ўзларини қайта тарбиялашлари лозим бўлади. Гап фақат ота ва онага ёки қайнонага яхши кўринишда эмас. Оддий ҳақиқат шуки, ялқов қурувчи қандай бино қуриши мумкин? Ялқов ёшлар кўркам оила саройини қандай қурадилар? Таъбир жоиз бўлса, ялқов, ишёқмаслар икки фарзанд орттирадилар: зорлик ва бадбахтлик. Эринчоқлик дунёдаги мавжуд ҳамма нарсанинг душманидир. Танбаллик, ғайратсизлик, журъатсизлик, камбағаллик каби балоларнинг ҳаммаси эринчоқликдан келиб чиқади. Кайковуснинг: «Ялқовлик – тани ишдан чиқаришдир. Мажбур этиш билан ўз танингни итоатли қилдир ва уни мақсадга мувофиқ қилиб бўйсунишни ўргат» деган ҳикматини Муҳаммад Заҳирий Самарқандийнинг бу фикри қувватлайди: «Модомики, бегамлик ва ношудлик кўрсатилар экан, қулай фурсат кўлдан бериб қўйилади. Вақт ўтганидан кейин афсусланиш бемаъни ва бефойдадир».

**Латифа.** Икки ялқов ётган жойга ўт тушди. Ўринларидан туриб қочишга ҳам эриндилар. Олов тили оёқларига етганида бири «Э Худо!» деб зорланиб қўйди. Иккинчиси шундай дейишшга ҳам эриниб, шеригидан илтимос қилди: «Мен учун ҳам «Худо» деб қўйгин...»

Бу латифалардаги воқеаларни ҳаётда учратмай-мизми? Бундан баттарларига ҳам дуч келамиз. Афусски, айрим ардоқли ёшларимиз замон ялқов одамларнинг беомон душмани эканини етарли тушунмайдилар. Танбаллик ва фаоллик икки йўлдир, унинг бири эл нафратига дучор қилади, иккинчиси эл ҳурматига сазовор этади. Набий муҳтарам дедилар: «Танбаллик, дангасалик қалбни тош қотиради, қаттиқ қилади, қорайтиради». «Камбағаллик айб эмас», деган мақол бор. Агар бу камбағаллик дангасалик оқибатида бўлса, фоят улуғ айбдир. Мирзо Бедил ҳазратлари ёзадилар: «Ишсизлик хирмонидан бошоқ териб юрганлар, яъни ялқовликлари, дангасаликлари туфайли тиланиб юрганлар, албатта, хўрлик чекдилар. Булар тиришмоқликдан кечгани, дангасаликлари кучайгани сайин хирслари ортиб, ҳасадлари тобора ўса борадир».

**«Лисон ут-тайр»дан бир ҳикоят.** «Халқ орасида бир ишёқмас, танбал киши бор эди. Одамлар унинг бегайратлигидан ҳайрон қолар эдилар. У одамлардан туртки, шапалоқ ер, бунинг эвазига улардан бир бурда нон ёки таом олиб, кун кўрарди. Кишилар уни қувиб юборсалар ҳам у ҳеч қаерга кетмай, ўзининг ёмон қилиқларини тарк этмасди. У тортадиган жафоларига ўзича маълум бир нарх тўғрилаб қўйган ҳам эди. Қайси бир киши уни бир тепса ёки урса, у ўша кишидан бунинг ҳақини талаб қилиб олар, қўлига тушган нарсани дарҳол оғзига солар эди.

Кунлардан бир куни кимдир унинг қўлига озгина нон бериб, эвазига шундай мушт туширдики, натижада танбал ер тишлаб қолди. Гарчанд у шапалоқлар еб, қорнини тўйғазиб юрган бўлса-да, бир мушт билан энди қайта ўрнидан турмайдиган бўлди...»

Фақат ўз ҳузур-ҳаловатини ўйлаш, ялқовлик – муваффақият қувватини кесувчи бир касалликдир. Ҳа, бу касаллик танбалликнинг ҳосилидир. Хасталикнинг оқибати нима бўлиши эса маълум: агар ўхшатиш қўйпол туюлмаса – танбаллик ўлимнинг бир туридир.

Инсон бу ўлым туфайли ҳамма нарсани йўқотади. Ялқовлик – эркисизликдир. Киши инсонларга юк бўлган куни эркини йўқотади. Инсоннинг саодатдан маҳрум бўлиб, маъюс яшashi шу ялқовлик, ғайратсизлик натижасидир. Ҳақиқат шуки, ҳали ҳеч ким муваффакият нарвонига қўlinи чўнтағига суқиб чиқмаган. Танбаллик ҳеч бир одамга фазилат эмас, лекин олим ва илм толиби дангасалик қилса янада хунук.

Одамлари танбал, дангаса бўлган, илму фан ривожланмаган, қонун топталган юрт сира ривож топмайди. Халқи ўзгаларга қарам бўлади, душманлар бу юртни истаганларича талайдилар, топтайдилар. Натижада халқ улкан моддий ва маънавий зарап кўради. Фақат Ватани эмас, жонидан ҳам маҳрум бўлади. Роҳати, тинчлиги, эрки, ҳурмати, осойишталиги бир тийинга ҳам арзимас бўлади. Шу боис Мунаввар қори ҳазратлари юз йил муқаддам деганлар:

*Жаннат каби гўзал юрting  
йиглаб, сендан иш кутадир.  
Сенда кўргач ишсизликни,  
ҳасрат чекиб, қон ютадир.  
Тур ўрнингдан, оч кўзингни,  
Айт ёвингга сўнг сўзингни.  
Ёвинг кимдир, биласанми –  
нодонликдир, ялқовликдир,  
Ёвга қарши курашмаслик –  
қўрқоқликдир, анқовликдир.  
Иш қиличин, тур, қўлга ол!  
Ёвга қарши чиндан қўзгол!*

Англагандирсиз, киши энг аввал ўзининг вужуди руҳини бошқараётган душмани – ялқовлигини енгизши шарт экан. Жисмоний меҳнатдан қочиш кўп ёшларга хос одат бўлиб қолди. Баъзан ҳашарга чиқарилган ўсмирларни, ёшларни кўраман: қўл учида ишлашади, эгилгилари келмайди. Бирон соат ишлаб, му-

аллимларининг кўзларини шамгалат қилиб, қочиб қолиш пайида бўладилар. Мен «ҳашарга чиққан» эмас, «чиқарилган» деб ёздим. Ўзлари яшайдиган кўча, маҳалла, шаҳарни озода сақлашга ҳисса қўшишни онгли ва ихтиёрий равишда амалга оширмайдилар. Мен мана шунга афсусланаман. Бугунги кунда шаҳарлик ёшлар кўлларини совуқ сувга урмайдиган бўлиб ўсяптилар. Қишлоқда туғилиб ўсганлар орасида ҳам ялқовлар кўп учраяпти. Улар қишлоқдаги меҳнатдан қочиб, шаҳардаги енгил ҳаётга учяптилар. Учяптилару, лекин «қанотлари куйиб» яна изларига қайтяптилар. Бу ҳам афсусли ҳол.

Азизлар, мени тўғри тушунинг, мақсадим сиз – ёшларни ёмонлаш эмас. Замон одамларни ялқовлаштириб қўйяпти. Электр ва автоматлаштириш деган нарсалар жисмоний меҳнатни сиқиб чиқаряпти. Бугунги қизларимиз, келинларимиз кўлларини қавартириб ишлашлари шарт эмас. Ошпичоқда қийма чопмайдилар, кир ювадиган машина, чангютгич, музлатгич-у микротўлқинли иситгич ва яна шунга ўхшаш ўнлаб мосламалар хизматларида. Ҳатто телевизорни (ҳатто чироқни!) ёқиб-ўчириш учун ўриндан туриш шартмас – диванда ёнбошлиб, тутмалар босилаверилади. Шунаقا шароит бўлгач, одам дангасалик ҳовузыга чўкмай яна нима қилсин?

Жисмоний меҳнат бир масала, ақлий ялқовлик, яъни маънавий танбаллик янада оғирроқ масаладир. Ёшларнинг илм олишга эринишлари жамият учун ҳам зарарлидир. Агар дарё суви денгизга қуилиб туриласа, ҳар қандай катталиктаги денгиз ҳам қурийди. Бекорчи ва ишёқмас – иродасиз одамдир. Агар одам фикрлашда дангаса бўлса, жаҳолатга ботиши, гуноҳи ортиши шубҳасизdir. Олимлар сафи ёшлар ҳисобига тўлиб турмаса, мамлакат инқирозга юз тутади. Айrim ёшларнинг билим олишга ялқовлик қилишларига сабаб – ота-оналарининг ҳамёнлари ёки юқори марта-бали танишлари экани ҳақида қисман сўз айтган эдик.

Пул эвазига ёки таниш ёрдамида имтиҳондан ўтиши-ни билган йигит ёки қыз бошини оғритиб китоб ўқир-канми, дарс тайёрлар эканми? Ўша пулдор ёки мартабали ота ва оналар фарзандларининг бу касалини биладилар. Касалликнинг олдини олиш ёки муолажа қилиш чорасини кўрмай, аксинча, рағбатлантириб турар эканлар, кимни айблашимиз керак бўлади? Ялқов фарзандними ё рағбатлантирувчи отани ва она-ними? Эртага бу ялқовликнинг аччиқ ва заҳарли месасидан қайси бирлари кўпроқ зарар кўрадилар?

Тилимизда «боқиманда» деган атама бор. Ўзи ишламай, ота-онасининг бошига ўтириб олиб яшовчи ялқовлар шундай аталади. Болалар ва илм толиблари «боқиманда» доирасига кирмайдилар. Лекин бола ўсмир ёшига етгач, ўзини ўзи эплаш тадбирларини ўргана бориши шарт. Албатта, фарзандини боқиш ота-онага малол келмайди. Лекин ота ҳам, она ҳам бир куни дунёдан ўтади. Улар ўтгандан кейин боқиманда боланинг аҳволи не кечади?

Бир киши дўстига ҳасрат қилди: «Ўғлимнинг боласи яқинда иккита бўлади. Лекин ҳалигача оиласини боқишини ўйламайди, ҳатто ҳовлининг ишларига эгилмайди». Дўсти уни овутди: «Ҳозир сизга эркалик қиляпти. Ўғлингиз ақдли йигит, кейин эплаб кетади». Боқимандаликка ўрганиб қолган бу ўғил отаси вафот этганидан кейин ҳаётда ўз ўрнини топа олармикин? Рўзгорини эплаб кетиши осон бўлармикин?

**Масад.** Бир бойнинг икки кўплаги бор эди. Бирини уйни қўриқлашга, иккинчисини овга ўргатган эди. Бой уйга кириши билан уйни қўриқлашга ўргатган кўплаги думини ликиллатиб унга пешвоз чиқарди. Бой уни эркалаторди. Овдан олиб келган ўлжалари билан сийларди. Бунга овчи итнинг жаҳли чиқарди. Бир куни у уй кўплагига деди:

– Менга қара! Бу ўлжанинг кетидан юурган, сувдан олиб чиқсан менман-ку? Сен эса мен тутган ўлжани уялмасдан еяпсан-а!

– Менга нима учун даъво қиласан, – деди уй кўппаги. – Сен бу арзингни хўжайинга айт. Мени тайёр овқатга ўргатган у эмасми?

Қиссадан ҳисса шуки, болаларни танбал қиладиган ҳам, ишчанлика ўргатадиган ҳам ота ва она! Шундай экан, уларнинг ўзлари фарзандларига ўрнак бўлишлари, танбалликдан қочиш ҳусусида бетўхтов равишида насиҳатлар қилишлари, ҳамиша яхшиликка, меҳнатсеварликка бошлашлари зарур. Болаларини ҳунар ўрганишга қизиқтириш, билимли бўлишга ундаш зиммаларида бурч эканини унутмасликлари керак. Танбалликнинг охири надомат эканини унутиб, болаларини дангаса, тайёр ейишга ўргатган оталар ва оналар, шубҳасиз, фарзандларига энг катта ёмонлик қилган, ҳатто уларни ўлимга маҳкум этган бўладилар.

Лаббай, «жуда-а оширвордингиз», демоқчимисиз? «Танбаллик орни ўлдиради», деган ҳикматга кўра, ялқов ва беор одамни тирик мурда деб аташ мумкиндири? Танбаллик ёмон ахлоқни вужудга келтиради. Ёшлар орасида учраб турган кўпгина жиноятлар айни танбаллик оқибатида юзага чиқяпти. Меҳнатсеварлик яхши хулқни юзага чиқаради. Интилган ёмонликдан кутулади, танбаллик ёмонликка яқинлаштиради.

Шундай тарбия қилиш лозимки, токи фарзанд тайёр ошдан эмас, меҳнат билан топилган луқмадан роҳатлансин. Фақат ўз оиласигина эмас, балки мамлакатнинг порлоқ келажаги меҳнатсевар инсонларга боғлиқ эканини, текинтомоқнинг эса мамлакатга, ҳалқقا зараркунанда эканини тушуниб етсин. Файратли одам инсониятга хизмат қилишини, файратсиз танбал эса инсониятга юқ эканини ҳам англасин. Меҳнатсевар инсон фақир бўлса ҳам доимо ҳурматда, танбал одам бой бўлса ҳам, доимо беобрў эканини билган фарзанд камол топади. «Наф келтирувчи киши ўғилдан ҳам яхши бўлиши мумкин. Беҳуда ишлар билан банд бўладиган ўғил эса ёвдан ҳам ёмон» деган ҳикмат бекорга айтилмагандир.

**Ривоят.** Бир одамнинг битта оти ва икки ити бор эди. Итлар оч қолишиб, зорланиб ўтиришганида от: «Нега бунча қайгули кўринасиз?» деб улардан ҳол сўради. Итлар отга маъюс боққанларича ҳасратларини бошладилар:

– Аҳволимиз чатоқ, очлик туфайли ўлар ҳолга келдик. Хўжайнимиз бизга яхши илтифот қилмайди, берган сарқитига қорнимиз тўймайди. Овқат талабида ёнига яқинлашамиз десак, болалари тепиб ҳайдашади. Бундан алам қилиб, тоқقا чиқиб кетган эдик. Йўлда ҳаво айниб, селга дуч келдик. Мана, титраб-қақшаб, аввалгидан ҳам баттар ҳолда жойимизга қайтдик. Бахтсиз эканмиз, энди зорланишдан бўлак иложимиз қолмади.

От уларнинг сўзларини тинглагач, деди:

– Э дўстларим! Иzzат ва саодатни фақат баҳт-толедан кутиб, ишламасдан ялқовланиб ётиш аҳмоқликдир. Сизлар кунда бир эринибгина ҳуриб қўйиш билан чекланмай, менга ўхшаб ишлаганингизда эди, хўжайнимиз мени яхши тўйдиргани каби сизларни ҳам сийлаган бўларди. Ҳеч ишламай, ялқов бўлиб ётиш ва ўтган-кетганга акиллашнинг фойдаси йўқ. Дунё иши – меҳнат уйидир.

Масаллар ва ривоятларда бекорга жоноворлар ҳаётига мурожаат қилинмайди. Қаранг, уй ҳайвонларини одамлар боқадилар. Жоноворлар инсон марҳаматига муҳтожлар, чунки улар оғилхонада ёки катақда бандилар. Далага чиқарилсалар, барчалари ўз емишларини топиб еяверадилар. Лекин юқорида тилга олганим «боқиманда»лар-чи?

Ҳайвонот боғида туғилиб, улғайган йўлбарс ўрмонга қўйиб юборилса, ов қилолмай оч қолиб, ўлиши мумкин экан. «Боқиманда»лар шундай аҳволга тушмасмикинлар? Тушадилар! Бунақаларни ҳаётда учратиб турибмиз. Улар баён қилинган ривоятларда оталарининг мулкини совурган нодонлар каби кун кечирадилар. Ҳаётлари нолиш билан ўтади. Баъзилар ўзларини

ўзлари имтиҳон қилиб: «Мен ҳеч нима қила олмайман, кўлимдан ҳеч нима келмайди», деган фикрда ўзларига ишонмаган ҳолда юрадилар. Бу хато тушунчадир. Одам шундай яралганки, у бекор туролмайди. Одамнинг онги бекорчиликни қабул қила олмайди, тутғён кўтаради. Одам айни бекорчиликдан ҳалок бўлади. «Ҳалок бўлишни» ҳам рамзий, ҳам айни маънода тушувавериш керак.

Ялқовларни «онадан шундай туғилган», деб айбласак инсофдан бўлмас. Бу туғма касаллик эмас, уни келтириб чиқарадиган турли омиллар бор. Шуларнинг энг асосийси – кишидаги ироданинг сустлиги. Ялқовликдан қутулмоқчи бўлган одам, аввало, иродасига ҳукм ўтказа оладиган бўлиши керак. «Мен керакли ишни қила оламан, менинг ишимни кутяптилар, мен фойда келтиряпман!» деб ўзини ўзи ишонтириши шарт. «Файрати бор одамни эр дегил, файрати йўқни қаро ер дегил». «Қаро ер» – дунёда хор бўлиш демак. Хор бўлмаслик учун ялқовликдан файрат сари ўтиш зарурлигини ҳар бир ёш йигит ва қиз тушуниб олишлари лозим.

Меҳнатни севмайдиган одам ҳар бузуқликни қилишга тайёрdir. Меҳнатнинг кишига баҳт-саодат келтиришига ҳеч ким шубҳа қилмайди. Ялқовлик, бекорчиликнинг эса фалокат гирдобига ташлашини ҳамма ҳам ўйлаб кўравермайди. Шундайларга бу ривоят ибрат бўлар, деган умиддаман.

**Яна бир ривоят.** Балиқчи тутган балиқларини уйига олиб келар экан, бир золим йўлтўсар овини тортиб олди, балиқчининг инсоф ҳақидаги илтижоларига қулоқ солмай, уни дўппослади. Ночор қолган балиқчи Худога зорланди: «Э Раббим! Мени заиф, у ноинсофни эса кучли қилиб яратибсан, қара, у менга зулм қилди. Махлуқотингдан бирини энди унга рўпара кил, токи бутун олам ундан ибрат олсин. Э Раббим, Ўзингга сиғинаман ва Ўзингдан најот кутаман, Сен ҳар нарсага қодирсан!»

Текинтомоқ йўлтўсар балиқларни пишириб еяётган пайтда томогига қилтаноқ тиқилди. Нафас ололмай қолди. Табибларга югуриб, даво топмади. Доно табиблардан бири уни тавба қилишга даъват этди. Золим Аллоҳ Таолога ёлбориб, қилган гуноҳларига тавба қидди. Кечаси тушида: «Балиқчининг ҳақини берасан, кейин хасталикдан қутуласан», деган нидони эшитди. Уйғонди-ю, балиқчини қидириб топди. Ҳақини берди, узр сўради. Ана шундан сўнг шифо топди.

Меҳнатсиз нон тишлайдиган одам бу ривоятни уннутмаса яхши бўларди. Бугун бўлмаса эртага, эртага бўлмаса кунлар ёки ойлар ўтиб текинтомоқлиги учун жавоб беришига тўғри келиб қолади. Жазо муддати келишини кутмай яхшилик томон ўзгаргани аълороқ эмасми? Саъй-ҳаракат инсонга шод-хуррамлик инъом этади. Ялқовлик, ишёқмаслик эса маъюслик, умидсизликка туширади, жондан бездиради ва бир қанча кулфату машаққатларга гирифтор қиласди. Шу сабабларга кўра, донолар ёшларга житобан дедиларки: «Ғайрат ва матонат билан ишланг, меҳнатни севинг, саъй-ҳаракатни қўлдан берманг, ялқовлик, бекорчилик иллатидан ҳазар қилинг. Вужудингизнинг ҳузур-ҳаловатини меҳнат таъмин қиласди». Асрлардан бери янграб келаётган бу хитобга кўшимча қилиш шартмикин?

Пайғамбаримиз алайҳиссалом: «Оlamda энг ёмон нарса – бекорчиликдир», деганлар. Ҳалқимизда «Бекорчидан Худо безор», «Бекор ўтиргунча бекор ишла», деган ҳикматлар ҳам бор. Ҳаракат қилмаган киши танбал бўлиб қолишини айтдим. Танбал киши эса бекорчи гаплар билан машғул бўлади. Чунки бекор юриш – иллатларнинг онаси, фурбатларнинг маконидир. Бекорчи гаплардан эса турли миш-мишлар, ифволар туғилади. Миш-мишлар тарқалган жойда эса дўст – душманга, душман эса думи босиб олинган илонга айланади. Донолар дедиларки: «Эркакнинг бекорчилиги – ғафлат, аёлнинг бекорчилиги – шаҳват».

**Азиз умидимиз юлдуздары**, сиз бу ҳикматлар-нинг мағзини чаққунингизча, мен катталар, айниқса, қайноналар қулогига бир гапни секин айтиб қўяй:

Ардоқли қайнона жонлар, ҳаётда кўриб турибсиз, келинларнинг бири серфайрат бўлса, иккинчиси имиллаб ҳаракат қиласди. Балки файратлисининг иши чалароқдир, имиллагани эса ишни пухта қилиши мумкин. Сизга униси ҳам, буниси ҳам ёқмайди, тўғрими? Лекин иккови ҳам касаллик эмас. Секин ҳаракат қиласдиган келинни ялқовликда айблаб, туртқилайверсангиз, ўчакишиб, ростданам дангасаликни касб қилиб олади. Шунинг учун ҳар икки ҳолда ҳам уларни ширин сўзларингиз билан йўлга солинг. Тез ҳаракат қиласдиган келинни батартиб ишлашга ўргатиш осонроқ. Лекин имиллайдиганини тезлатишингиз қийинроқ бўлади. Демак, бу борада сиздан сабр талаб қилинади.

Баъзи хонадонлар икки ёки уч-тўрт келин тушириш баҳтига мұяссар бўлганлар. Келинлар ўзаро иттифоқликда яшаётган бўлсалар, бу қайнонанинг хизмати ва шу хайрли хизмати эвазига эришган саодати. Айрим қайноналар атайин эмас, ўzlари билмаган ҳолда келинлар орасидаги яхши муносабатни бузиб қўядилар. Бир келиннинг хизматини иккинчисига таққослаб, «Фалончи овсинингизга ўхшаб чаққон-чаққон ҳаракат қиласангиз бўлмайдими?», деб қўядилар. Бунақа гапни кўпчилик орасида ҳам айтиб юборадилар. Фақат келинлар эмас, куёвлар ҳам бир-бирига таққосланса, камситилган томоннинг кўнгли оғрийди. «Хизматни чаққон келин қиласверсин», деб ўчакиша бошлийди. Келиннинг хизматига баҳо беришда, чаққонликка ўргатишда бирордан ўrnак олишга даъват этмай, «Жон қизим, дард кўрманг, онангиз барака топсинлар, ҳамма ишларингиз ажойиб, фақат тезроқ бажарсангиз, ўзингизга ҳам яхши...» деганга ўхаш ширин гаплар билан тарбия қиласангиз, муддаога этишингиз шубҳасиз. Келинга хонадондаги барчанинг

бири олиб, бири қўйиб иш ўргатавериши ҳам яхши эмас. Ақл ўргатувчиси кўп бўлган ишдан фойда чиқмайди.

**Умиднимиз юлдуздари**, дангасалик иллатидан кутулишга даъват қилганим ҳолда яна бир масалага диккәтингизни тортсам: ҳар қандай иш ўз вақтида ва ўз ўрнида қилиниши керак. Қишида тунука том бўялмайди, шундай эмасми? Фунча баҳорнинг илиқ нафасига алданиб бемаврид кулгани учун совуқ ел уни поралаб кетгани каби беҳуда ва бемаврид бошланган иш оқибати яхши бўлмайди. Ҳеч бир иш ғайрат ва шижоатсиз бўлмайди, аммо жойида ишлатилмаган ғайрат ва жасоратдан маъно йўқ. «Ақл ва тажрибаси ҳали етарли даражада ўсмаган ва жисмоний қуввати кам бўлган одам бир ишга киришиб, ҳаддидан ошса, натижада паришон ҳолга тушади», деган эдилар мавлоно Румий.

Ялқовлик иллатининг муқобилида «ғайрат» ва «шижоат» деб аталувчи гўзал фазилатлар бор. Бу фазилатнинг ярми назокатдан, ярми садоқатдан иборат, дейилса ҳам бўлади.

Шижоат ҳавфли вазиятларда кишини тўғри йўл ва асл мақсаддан чекинишга йўл қўймайдиган куч бўлиб, олти хислатни ўзига жамлайди:

1. «Кибр-и нафс». Яъни, руҳий улуғворлик бўлиб, бу хислат туфайли киши улуг ишларни амалга ошираётганда роҳат ёки машаққатларга парво қилмайди. Масалан, урушда икки йўл мавжуд: бири – қаҳрамонлик йўли, бунда жон хатари мавжуд; иккинчиси – хиёнат йўли, бунда жон ҳаловати бор. Руҳан заиф киши жон ҳузур-ҳаловатини танлайди. Аммо бу нарса вақтинчаликдир ва бу йўлнинг охир-оқибати хорлиқдир. Тарихда бунга мисол кўп.

2. «Улувв-и ҳиммат» – кишининг инсонга хос камолот йўлида ғов бўладиган ҳар қандай қийинчиликка эътибор бермай эзгуликка интилишидир («улув» – энг олий). Бунга илм олишда лозим бўлган шижоатни ми-

сол қилиб олишимиз мумкин. Маълумки, шиҷоатсиз киши илм ололмайди.

3. «Ҳилм» – ҳар қанча қазаб қўзгайдиган иш содир бўлганда ҳам ўзини босиб, мулоҳимлик кўрсатишдан иборат.

4. «Тавозу» – ўзгаларга, айниқса мартаба ва фазилатда ўзидан қуийи бўлганларга нисбатан ўзини улуғ ҳисобламасликдир.

5. «Ҳамият» – ўз халқининг ва ўзга элларнинг урфу одатларини ҳурмат қилиш, жамиятнинг қонун-қоидаларига риоя қилиш, оиласининг, дўстларининг шарафини сақлашдан иборат (яъни, ор-номус сақлаш ва уни ҳимоя қилиш).

6. «Риққат» – луғавий маъноси – нозиклик. Кишининг ўз жинсига, яъни жони бор ҳамма нарсага раҳмдил ва шафқатли бўлиши, ўзгаларнинг дарду аламларини, қийин аҳволини ҳисобга олиб, шунга яраша, лекин изтиробга тушмасдан амал қилишидир.

Йўқчилик файратли, шиҷоатли, ишчан одамнинг эшигидан мўралайди-ю, ичкарига кира олмайди. Киши бир ишга киришган чоғда оғирликлар юз берса, мақсади манзилига етишмоқ йўлида меҳнат ва машакқатлар чекса ноумидлик кўчасига қадам қўйишдан ўзини тишишга куч топа олиши керак. Бунинг учун талаб этиладиган шиҷоат ва матонатга эга бўлсагина оёғини тўғри ва қаттиқ қўйиш билан бу мушкул йўлни босиб ўта олади.

Англадикки, шиҷоат ва матонат инсонга ҳар ишда муваффақият бахш этади. Шиҷоат – ботирлик, мардлик билан ишга киришиш, матонат эса бардошлилик, мустаҳкам ва қатъий иродали, деган сўздир. Бу хислатларга эга бўлган киши бахту саодатга эришади. Имом Фаззолий ҳазратлари бундай ёзганлар: «Шиҷоат билан хулқланган инсон олийҳиммат, мард, жасур, довюрак, мулоҳазали, нафси синиқ, сабр-тоқатли, ҳалим, босиқ, салобатли, мулоҳим бўлади. Аммо шиҷоатнинг ҳаддан ошиши ўзни тута билмаслик, ўйла-

масдан иш қилиш каби оқибатларга олиб келади. Натижада киши бир нафасда мақтанчоқ, димоғдор, ғазабнок, такаббур, иззатталаб, шұхратпастаға айланиб қолади. Шижаат меъёридан кам бұлса, унинг ўрнини хорлик ва хүрлик, доимий безовталиқ, құрқоқлик, ҳақни бой бериш, майдалашиш әгалладай».

Меҳнатдан қочиш хору зорлик билан натижаланар экан, муроду мақсад хазиналари меҳнат күприги үстидадир. Кишини ҳаётдаги мушкүлліклардан фақат тадбир ва меҳнат қутқаради.

**Ривоят.** Бир деҳқон ўлими олдиdan болаларини йириб деди:

— Болаларим! Бу дунё фонийдир, ҳар бир тирик жон ўлади. Мен ҳам ўляпман. Сизга васиятим шуки, даламизга бир хазина күмиб күйғанман, вафотимдан сұнг уни қидириб топинглар. Далани ҳеч қачон сотманглар.

Фарзандлар оталари жанозасини ўтказишигач, далага отландилар. Хазинани қидириб, далани кавлаб чиқдилар. Лекин ҳеч нарса топмадилар. Жуда маъюсландилар. Кейин далани текислаб, бүгдей үруғи сепдилар. Ер мүл ҳосил берди. Болалар бүгдейни сотишиб, олтиналарни ўзаро бұлишдилар. Шундагина оталарининг васиятларидаги хазина ҳақыдаги гапнинг маъносини англадилар. «Хазина күмиб күйдім» деган гапи замирига — далага яхшилаб ишлов берсангиз, барака топасиз, хазинага меҳнат орқали эришилади, деган ҳикмат яширинган экан. Худди донишманд шоир Фирдавсий айтганларидай:

*Меҳнат тағидағадыр, эй оқыл, ҳар ганж,  
Ганж топмас ҳеч кимса тортмас эрса ранж.*

Бу ҳикоят ҳар бир киши учун бир сабоқдир. Дунёда пешона тери билан ишлаб топилған нондай қадрли хазина йўқ. Меҳнат билан топилған луқма энг тотли луқмадир. Шундай экан, ҳар одамнинг ўзи бир хази-

на. Унинг меҳнат қилиб топган иони эса энг ширин, энг тотли луқмасидир. Дангаса бажараётган ишидан меҳнатсевар дехқончалик роҳат топа олмайди, мамнун ҳам бўла олмайди. Зеро, ишчи ишлаб иштаҳаси очилади, луқмаси ҳам ширин бўлади. Табобат ходимлари берган маъдумотларга кўра, ишчи ва дехқонлар жамиятнинг жисмонан энг соғлом одамлари экан.

Ҳа, меҳнатга ўргангандан одам саодатга эришади. Чунки меҳнат билан банд одамнинг ёмонлик қилишга вақти қолмайди. Меҳнатни севиш, гайрат ва матонат билан ишлашнинг учта ширин меваси бор: тан саломатлиги, кўнгил роҳати, ақл ва зеҳннинг ортиши. Меҳнат инсонни уч балодан асрайди: юрак сиқилишидан, ахлоқий бузукликдан, муҳтожликдан. Меҳнат меҳмон бўлмаган ер ҳеч қачон баҳт-саодат ўрни бўла олмайди. Инсон меҳнатдан тўхтаса, камолотдан ҳам тўхтайди. Чунки камолот саройининг пойдевори ҳам, девори ҳам меҳнатдир. Меҳнат ҳосили билан яшаган инсон ўз эркига ҳоким, юлғичлик билан бойлик тўплаган хасис эса ўз иқболига золим. Ҳикмат аҳди айтганидек, вужудимиз – ерники, шарафли ишларимиз – элники! «Инсоннинг тилак ва ҳоҳишлиари меҳнат туфайлигина амалга оширилиши мумкин, – деб ёзганлар Беруний ҳазратлари. – Шон-шавкатга, мартабага меҳнатсиз эришган киши ҳурматга лойиқми? Юқори мартабага меҳнатсиз эришган киши маълум бир муддат ичидан роҳат ва фароғатда яшайди, яхши кийинади. Аммо у улуғлик либосидан маҳрум, ялангоч кимсадир». Яхши номни меҳнат билан ортириш керак, яхши ном чиройли сўзлар учун, ваъдалар учун берилмайди. Балки меҳнат натижаси учун, меҳнатга астойдил қўйилган меҳр учун берилади.

Бир нарсага дикқат қилиш керак: ҳаром луқма то-паётган ҳам меҳнат қиласиди. Лекин унинг меҳнати жамиятга наф бермагани, аксинча, бошқа бировларга зарар келтиргани учун савобдан маҳрумдир. Буни хайрли меҳнат доирасига киритиши ножоиздир. Аса-

лари, қовоқари ҳам, итпашша ҳам мөхнат қиласы.  
Лекин бу мөхнатларнинг натижаси қандай?

Куввати ва тоқати етмаган ишга киришиб, ўзига заҳмат ва машаққатни юклаш ҳам түғри эмас. Ўзига ва халқа манфаати тегмайдиган ишлар билан машғул бўлиб, умрни зое кетказишдан сақданиш керак. Ҳар бир ишга самимий дўстларнинг иттифоқи ва маслаҳатлари билан киришилгани маъқул. Киши кучи етадиган ишга майл қилмай, номуносиб ишга қадам қўйса, оқибатда уддасидан чиқа олмай, пушаймон ейди.

*Кимки енгиллик қилиб гар чекса тиг,  
Тишлагай бармогин, айтгай: «Во, дариг!»*

Эътиқодли кишилар яхши-ёмон, осон-қийин, пуллик-пулсиз ишларда ҳам бирдай ўз ишларини севиб-севиб бажарадилар ва истиқомат қилаётган жойларию, ишларидан мамнун бўлаверадилар. Ҳатто иссиқсовуқ муҳит, тог-адир бўлсин, турган жойларига рози бўлиб, қилаётган ишларида саботли бўладилар.

Биздаги «мөхнат» атамасини туркманлар «захмат» дейдилар. Бизда «захмат» «қийинчилик, машаққат» маъносида қўлланилади. «Мөхнат – заҳмат» деганимизда, тил қоидасига кўра, маънодош сўз – такрор отлар назарда тутилмайди. Балки мөхнат қилиш жараенида дуч келинадиган қийинчиликлар назарда тутилади. Дунёда осон иш йўқ. «Осон» ёки «қийин» дейишимиз нисбий тушунча. Шаҳар шароитида улгайган келин учун тонгда туриб кафтдек ҳовлини супуриб кўйиш дунёдаги энг машаққатли иш бўлиб кўринини мумкин. Лекин қуёшдан олдинроқ уйғониб сигир соғган, самоворга ўт қалаган, қайнота-қайнонасининг таҳоратига илиқ сув тайёрлаб берган, тандирни қизитиб, нонуштага нон ёпган, кейин далага чиқиб, қуёш ботгунига қадар тинмаган, уйга қайтиб овқат пиширган, кир ювган жувон учун ҳовли супуриш арзимаган

иш экани табиий. Кўп қаватли уйларда яшаб, жисмоний меҳнатга кўниумаган эрка қизларимиз каттароқ ҳовлига келин бўлиб тушишса қийналадилар ва нолий бошлайдилар. Шундай эркатойларга айтадиганим: нолишдан фойда йўқ. Астойдил ишлашни ўрганишга киришинг. Бу масалада ўғил эркатойларнинг аҳволи nochорроқ бўлади. Йигит киши чиниққан, ғайратали бўлиши керак. Ғайратсиз, заиф йигитлар ҳаёт йўлиниг ҳар қадамида қоқилаверадилар. Салгина қийинчиликка дуч келсалар қизлардан батттар йиғлаш ҳолига тушадилар. Бу – уят, шундай эмасми?

Фарзанд тарбияси ҳақида сўз кетганда кўпчилик бу борада асосий эътиборни меҳнатга қаратиш тарафдори. Менингча, энг маъқул йўл шудир. Меҳнат барча замонларда ва барча жамиятларда буюк ҳуқуқ, буюк зарурат ҳисобланган. Маданият юксаклиги меҳнатга бўлган муҳаббатга боғланади. Ўзгачароқ таъбир билан айтсам, маданият қанчалик юксак бўлса, меҳнат шунчалар юксак қадрланади. Чунки меҳнат ҳамиша инсон ҳаёти ва маданиятининг асосини ташкил этган. Донишманд айтмоқчи, агар ҳаёт кемаси меҳнат лангариға суюнмаса, ҳамма шамоллару довулларга дош беролмайди.

Бундай таърифларни кўпчилик билади. Аммо бу ҳақиқатларни болалар онгига қандай сингдириш керак? Шиорлар биланми ё аниқ ҳаракатлар биланми?

Дикқат қиласайлик, дунёда тирик жон борки, ҳаммаси ҳаракатда, ҳаммаси меҳнат билан банд. Лекин инсон билан бошқа тирик жонлар меҳнати орасида «ОНГ», «ВИЖДОН», «ҲАДОДЛИК» деган тушунчалар бор. Шундай экан, биз инсонга хос тушунчалар асосидаги меҳнатни, фақат ўзига эмас, жамиятга ҳам наф келтирадиган меҳнатни назарда тутишимиз керак.

Ҳиндларнинг оламаро машҳур адаби Рабинранат Тҳакур меҳнатни маданиятининг бир кўриниши ҳисоблайди. У 1935 йили ёзган эди: «*Бир куни талабалар билан сайр-ҳаво қилиб юрганимизда, йўлда бир жуфт*

хўқиз қўшилган аравага дуч келдик; арава лойга ти-  
қилиб қолган экан. Мен билан бирга кетаётган та-  
лабалар ёрдамлашиб, аравани қуруқ жойга чиқариб  
қўйишди. Шантиникетонга келган қандайдир бир  
киши юк кўтаришига хизматкор топа олмаган экан.  
Талабаларимиздан бири ўйлаб ўтирмасдан, унинг  
юкини елкасига олиб, айтган жойига элтиб берди.  
Талабалар шундай тарбия олган эдиларки, бирор  
жойдан келган одамга ёрдам кўрсатиш ва уларнинг  
хизматида бўлишини ўз вазифалари деб билардилар.  
Яқинда улар Шантиникетон йўлини қуришида ишла-  
дилар, ҳамма ўнқур-чўнқурларни тўлдириб текис-  
ладилар. Бу ишларнинг ҳаммасини улар ўзларидаги  
**ички рағбат** таъсири остида бажардилар. Улар  
китобга ҳам, адабиётга ҳам қарамасдан, **ҳақиқий**  
**маданият нимани талаб қилса**, шуни идрок  
қилиб олдилар. Бир вақтлар мен бу талабаларнинг  
барчасини, номларини ҳам яхши билардим. Орадан  
кўп йиллар ўтди, улар ҳар томонга тарқаб кетиши-  
ди. Умид қиласманки, улар ҳали ҳам бошқа кишилар-  
га шундай меҳр-муҳаббат билан қараётгандир,  
**ҳасад деган нарсани ва бошқаларнинг ютуғига**  
**кўз олайтиришни билмаслар** ва ҳамиша заифлар-  
га ёрдам қўлини чўзарлар. Олижаноб кишининг қан-  
дай бўлишини билишларига ва олижаноб кишилар  
қандай бўлса, улар ҳам шундай иш тутишларига  
ишончим комил.

Адибнинг мақоласидаги «ички рағбат» ва «ҳақиқий  
маданият нимани талаб қилса», «ҳасад деган нарсани  
ва бошқаларнинг ютуғига кўз олайтиришни билмас-  
лар» деган сўзларга алоҳида эътибор беришингизни  
истардим.

Ҳалол меҳнатга муҳаббати бўлмаган одам тўғри  
йўлни йўқотиб қўяди. Оқибатда барчаси ҳалокат жа-  
рига борувчи турли сўқмоқларга дуч келади: бири  
ҳамиша норозилик ҳиссига тўла бўлади ва шу ҳис  
билан яшайди. Бири зерикиш, қониқмаслик ботқоғи,

яна бири ўз-ўзини аста-секинлик билан маҳв этишдан иборат бўлади. Бу йўллардаги боланинг онги, нафси молникidan фарқланмай қолади. Агар «Ҳалол ва онгли меҳнат – ҳаёт асоси», деган шиордан келиб чиқсанак, бошқа йўлларни танлаган ўсмири тириклайнин ўлиб бораверади.

Ҳалол меҳнатнинг афзаллигини фарзанд онгига сингдиришда атроф-муҳитнинг салбий таъсирини ҳисобга олмасак бўлмас. Жамият «бой» ва «камбағал» деган тоифаларга бўлинган паллада боланинг дунёни англashi анча мураккаб кечади. Боланинг оиласи ҳалол меҳнат билан кун кўради. Ота-онаси ҳамиша иш билан банд. Шубҳасизки, фарзандининг ҳузурида баъзи баъзида бўлса-да, нолиб қўйишади. Уларнинг қўшниси эса бадавлат. Ҳамиша иш билан эмас, майшат билан банд. Бола бу фарқни кўзи билан кўриб турибди. Унда «яхши яшаш учун ҳалол меҳнат қилиш шарт эмас», деган тушунча шаклана бораверади. Ҳалол меҳнат билан кун кўрувчи ота-онаси унинг кундан-кун ортиб бораётган талабарини қондира олмайди. Ҳалолликдан нарида юрувчи ота-она эса фарзандини ошириб-тошириб таъминлаб қўйган. Ана энди боладан сўраб кўрайлик-чи, қай бири афзал экан.

Бу ўринда бадавлат оиланинг фарзанди онгидаги тушунчани ҳам назардан соқит қиласлик керак. У ҳам ҳалол меҳнат ҳақида кўп эшитади. Қўшниси мисолида бу ҳалол меҳнат туфайли қандай яшаш мумкинлигини кўради. Шу ўринда амалдаги кўриниш билан назария тўқнашади ва амалдаги кўриниш болалар онгига ҳукмронлик қилиб олади. Биждон, ҳалоллик – олий даражадаги фазилат экани ҳақида гапларни улар ҳазм қила олмайдилар. Шайх Сайдийнинг:

*«Есам арпа нонини меҳнат билан,  
Шириндир бирвларнинг оқ нонидан» –*

байтларини бу тоифа болаларга сингдириш осон кечмайды. Хаёлан бир тажриба қилиб күрайлик: бир неча тенгдошларингизнинг рўпарасига иккита нон қўяйлик-да, биттасига оғирроқ меҳнат билан етишасиз, иккинчиси учун меҳнат шарт эмас, денг-чи, қанчаси меҳнат билан олинувчи нонни танлар экан?

Меҳнат тарбиясини боланинг суюги қотгач бошлаш керак, дегувчилар янгишадилар. Бола эмаклаганда ёки хонтахтани ушлаб юра бошлаганида билибми-бilmайми, бу тарбия бошлаб юборилади. «Пиёлани олиб бер», «Қошиқни узатиб юбор», дейиш меҳнат тарбиясининг дебочасидир. Шу ўринда гўдакнинг ҳаракатини кузатайлик: у ҳали «меҳнат – ички эҳтиёж самараси», деган тушунчадан йироқ. Лекин сиз айтган пиёлани узатиб юборгач, уни мақтаб, эркалаб қўйсангиз, у шодланади ва иккинчи, учинчи пиёлани ҳам узата бошлайди.

Демак, меҳнат учун рағбатлантириш лозим экан. Ўша гўдак буйруқни бажармади – пиёлани узатмади, шундда ота ёки она уни меҳнатга ўргатиш учун зўрлай бошлайди. Пиёлани мажбурлаб ушлатади, узатишга ҳам зўрлайди. Йўқ, азизлар, буни меҳнат тарбияси доирасига киритишимиз қийин. Меҳнатга зўрлаш болада меҳнатга нисбатан нафрат қўйиши мумкин.

Меҳнат тарбияси шаҳарга нисбатан қишлоқда осонроқ ҳал этилади, деб ўйлайман. Айнан қишлоқда меҳнатга мажбуrlаш усули кучлироқ. Бола истаса-истамаса отаси ёки онаси қанотида меҳнат қилишга мажбур. Айрим болаларда меҳнат мажбурияти мавжуд, меҳнатга севги эса заиф бўлади. Шундайлар шаҳар шароити билан танишгач, қишлоққа қайтишни истамай қолади. Россиядаги қишлоқларнинг бўшаб қолишини айнан шу билан изоҳлаш мумкин. Тўғри, бизда у даражада эмас, аммо шундай ҳоллар мавжудлигини инкор этмаслигимиз ҳам керак.

Ўзингизга маълум, шаҳарда, айниқса, кўп қаватли уйларда яшовчиларни меҳнатга жалб этиш анча қийин.

Бу уйларда яшовчи тенгдошларингизнинг асосий иши, аввалроқ айтганимдай, кунда бир марта нон дўконига бориб келиш, ҳафтада бир марта икки челак ахлатни олиб чиқиб тўкиш. Бу иш ҳам зўр мashaққат билан бажарилади. Катта ака ўртсанчага буюради, ўртсанча эса кичигига. Униси «Ҳадеб мен қилавераманми...» деб нолийди, оқибатда ғавғодан безиган ота ёки она бу ишни ўзи бажариб қўя қолади.

Бу уйларда яшовчи болаларни атрофни тозалаш учун ҳашарга жалб этиш ҳам қийин. Ота-онаси зўрлаб чиқарса ҳам қўл учиди ишлайди. Ҳовлини тозалашни ўзлари учун паст иш деб биладилар. Шунинг учун ҳам кўпгина уйларнинг атрофи ахлатхонани эслатади. Кўчани супуриб қўйишнинг улуғ савоб эканини вақтида фарзанди онгига сингдирмаган ота-она энди боласининг ишёқмаслигидан нолимаса ҳам бўлади. Агар бола 16–18 ёшигача ҳалол меҳнаттга ўргатилмас экан, демак, унда «интизом» деган фазилат шаклланмайди. Бу фарзанд иродасиз, танбал, ҳавоиي бўлиб қолади. Ҳаётга қизиқиши ҳам заиф бўлади. Айнан шу тоифа болалар ароқҳўр ва гиёҳвандлар чангалига осон тушадилар.

Айрим ота-оналар фарзандларини биронта ҳунар эгасига шогирдликка берадилар. Тўғри, жамиятда болаларни оғир меҳнаттга жалб этиш мумкин эмас. Корхоналар бу талабга амал қилишни баъзан меъеридан ошириб юборишади. Ўсмир бажарадиган юмуш мавжудлигига қарамай, уларни яқинлаштиришмайди. Ҳунарманд усталар эса аксинча. Сувоқчими, кулолми, дурадгорми – болаларни ёnlарига оладилар. Болаликдан устанинг ёнида юрганларнинг ҳам кўзи пишади, ҳам қўли ўрганади. Оқибатда улар моҳир уста бўлиб этишадилар. Энг муҳими – бекорчиликдан санғимайдилар. Меҳнатсеварликнинг хайрли экани ҳақида юзта насиҳатдан кўра шу усул дуруст эмасмикин?

Тўғри, усталар ҳам ҳар хил бўлади. Ҳаммаси ҳам бегона болага ҳунарини очиқ кўнгил ва қунт билан

ўргатавермайди. Устанинг қанотига кирган ўсмирлар-нинг барчаси ҳам тұғри ва ҳалол йұлга киравермайди. Юқорида зикр этилган алдов ёки айёрлик билан ҳунардан бүйин товлашга интиладилар. Бу ўринда яна ота-она ва устанинг биргаликдаги тұғри муносабати мұхим. Афсуски, инсофли усталар күп эмас, бекорчи болаларнинг барчасини қанотларига олавермайдилар.

Халқ маориғи тизимида «Құшимча таълим марказ»лари мавжуд. Бу марказларда турлы ҳунарлар ўргатылади. Санъатта жалб этилади. Нақш, ганчкорлик, үймакорлик, дурадгорлик, чеварлик, тұқувчилик каби тұғараптарда болалар деярли тұла бўлади. Санъат турларига қизиқиш ҳам кучли. Лекин бу марказларга яқин атрофдаги мактаб ўқувчиларигина қатнайдилар. Узоқроқдаги мактабларнинг ўқувчиларини ота-оналари юборишмайди. Бориб-келишидан хавотирланишади. Ундан ташқари мазкур тұғараптарга асосан ўн уч – ўн түрт ёшгача бўлган болалар қатнайдилар. Ўсмир ёшидагилар учун эса шуғулланадиган юмуш яна йўқ. Демак, ўсмирларнинг бўш вақтлари тұлалигича ўзларига топширилган, деб ўйласак ҳам бўлар. Бўйсунмаслар тарбиясининг энг нозик, айни дамда хатарли нуқтаси ҳам шу ерда. Бўш вақтига ўзи хўжайинлик қилювчи болалар күп ҳолларда кўча ёки маҳалла зўравонлари таъсирига тушадилар ва бунинг оқибати нима бўлиши барчага мальум.

**Ривоят.** Бир темирчи тиним билмасдан кечаю кундуз ишлар эди. У баҳорнинг нафис гулларига бурканган водийларни, шаршараларни кўрмас эди. Бир куни дўсти келиб, баҳор гўзалликларини таъриф қила кетди. Шунда темирчи унга деди:

– Дўстим, гарчи бу дунёда жаннатдай гўзал жойлар кўп бўлса-да, лекин ишими чала қўйиб кетсан, ўша жаннатмакон жойлар гўзаллиги менга татимайди.

Бу ҳикоятни ёшлар қулоққа қўйиб олсалар арзиди. Чунки ишлаш саодатдир. Инсон қанча ишласа, бу булоқдан шунча ичиб, шифо топаверади. Ҳикмат аҳли-

нинг: «Пул йўқ, деб қайфурма, иш йўқ, деб қайфур», дейишлари бежиз эмас. Иш пайтида сайд қилмоқ эса ўзини ва жамиятни фалокатга тортиш демакдир. Иш вақти ва сайд вақтини белгилаб олган киши ҳаёт лаззатини тотади.

Дунёнинг тамали меҳнат асосига қурилган. Буни беҳуда деб билганлар залолатга, бу йўлдан юрганлар эса саодатга юз бурадилар. Меҳнат ҳаёт чироғига мой қуяди, тафаккур эса уни ёритади. Бу ҳикматни сиз азиз ёшларимиз унутмасангиз, ишларингиз ўнгидан келаверади: «Ишла болам, қарилик сендан «ёшлигинг қаерда эди?» деб сўрайди.

*Ўзингни меҳнат куни овутинг,  
Не гам келса даврондин, осон тутинг.*

Ҳазрат Навоийнинг бу байтларига осетин халқининг «Кўп ишловчи кўп яшайди», деган мақолини илова қиласман. Мақол оддий гапга ўхшайди, а? Яъни, кўп ишловчи жисмонан бақувват бўлади, ҳар турли хасталик уни осонлик билан енга олмайди. Мақолга яна бир маъно яширинган: кўп ишловчи одам ўзидан кўп яхшиликлар мерос қолдиради ва унинг номи ўлимидан кейин ҳам яшаб қолади. «Бу кашфиётни фалончи олим қилган», «Бу кўприкни фалончи уста қурган», «Бу безакни фалончи заргар ясаган», «Бу бўз ерларни фалончи дехқон обод қилган» каби. Оғир меҳнатнинг ширин мевалари мана шулар бўлади.

Ҳаётдан ҳамма лаззат топишни истайди. Лекин барча ҳам унга эриша олмайди. Нега? Ҳар қандай меҳнат ҳам ширин мева беравермайди. Нега? Русларда «Телба ақд оёққа дам бермайди», деган мақол бор. Ҳар бир иш ақд билан бажарилиши керак. Шошма-шошарлик, чалакам-чаттилик яхши натижка бермайди. Шунинг учун доно халқимиз «Етти ўлчаб, бир кес», дейди.

**Ривоят.** Султон Маҳмуднинг қирқ вазири ва бир севимли қули бор эди. Подшоҳ бу қулни қирқ вазири-

дан кўра устунроқ қўярди. Барча вазирларига тайин этган маошнинг тенг ярми микдорида қули Аёзга ҳам ҳақ тўларди. Шу боис барча вазирлар қулни ёмон кўрардилар. Уни сulton назаридан қолдиришга уринардилар. Бир куни ўнг қўл вазир:

– Олампаноҳ! Қулингиз Аёзни ҳаммамиздан устун кўришингизнинг боиси нима? – деб сўради.

Ақлли подшоҳ бу саволга сукут билан жавоб берди. «Унинг аъло фазилатини вақти келганда айтаман», деб кўйди ичида.

Кунларнинг бирида сulton вазирлари ҳамроҳлигида овга чиқди. Узоқда бир қора нуқта кўринди. Подшоҳ вазирларидан бирига бу нуқтанинг нима эканини аниқлаб келишни буюрди. Вазир отини елдириб ўша жойга бориб келди-да: «Олампаноҳ, кўзингизга кўринган бу нуқта бир карvon экан», – деб ҳисоб берди.

– Бу карvon қаердан келаётган экан? – деб сўради подшоҳ. Вазир буни сўрамаган эди, афсусланиб, бош эгди.

Подшоҳ буни билиб келиш учун иккинчи вазирни жўнатди. Вазир тезлик билан бориб қайтди-да: «Олампаноҳ, бу карvon Ҳиндистондан келаётган экан», деди. Подшоҳ «Ҳиндистоннинг қайси шаҳридан келаётган экан?» деб сўраганда вазир жавоб беролмай уялди. Подшоҳ буни аниқлаш учун учинчи вазирни жўнатди. Вазир карвоннинг Деҳли шаҳридан келаётганини билиб келди, лекин подшоҳнинг «Қаерга кетаётган экан?» деган саволига жавоб бера олмади. Буни аниқлаш учун тўртингчи вазир юборилди. У карвоннинг Ҳамадон шаҳри томон йўл олганини билиб келди-ю карвонда қандай юк борлигини айтиб бера олмади. Шунда бешинчи вазир карвонга бориб дори-дармон ва ипак матолар олиб кетилаётганини аниқлаб қайтди. Подшоҳ: «Карвон Деҳлидан қачон йўлга чиққан экан, бу ерда яна неча кун бўларкан?» деб сўрагач, вазир ер чизиб қолди. Шунда подшоҳнинг жаҳди чи-

қиб «Аёз қаерда?» деб бақирди. Хизматчилар югуриб бориб Аёзни бошлаб келишди.

– Аёз, ўғлим, отга мингин-да, анави қора нуқта нималигини билиб кел, – деди подшоҳ.

Қул таъзим қылгач, отга минди. Шамол каби учиб бориб келди-да деди:

– Олампаноҳим! У кўрганингиз қора нуқта бир карвондир. Ипак матолар ва дори-дармонларни юклаган бу карвон фалон куни Ҳиндистоннинг Дехди шахридан йўлга чиқиб, Ҳамадонга йўл олибди. Карвон уч кун бу ерда қолар экан. Фалончи сарбоннинг ҳимоясида уч кундан кейин Ҳамадон сари йўлини давом этар экан.

Шу тариқа қирқ вазир қирқ марта бориб билиб келган гапларни Аёзнинг бир ўзи бир марта боришида билиб қайтди. Шунда подшоҳ вазирларига қараб:

– Аёзни нима учун қадрлашимни энди билдиларингми? – деб танбех берди.

Румий ҳазратларининг «Маснавий»ларида баён этилган бу қиссада жуда муҳим ибрат дарси бор. Ҳамма ҳам ишлайди. Лекин диққат билан ишлайдиганлар кам топилади. Инсон диққат қиласагина бирор масаланинг асл моҳиятидан хабардор бўлади. Мана шу қиссада Аёзнинг қирқ вазирдан устунлиги масаланинг руҳи ва ва моҳиятини тўла англаб олиши туфайлидир. Ҳаётда муваффақиятга эришишнинг энг муҳим сирларидан бири ҳам айнан шунда, яъни топширилган, бажариладиган ишнинг моҳиятини яхши тушуниб етишда. Бирон ишни бошлаб юбориш осон. Аммо ишни охиригача етказиб, натижка ҳосил этиш ҳар кимнинг ҳам қўлидан келавермайди.

*Чу дехқон чекмаса жавру жафосин,  
Емишларнинг киши кўрмас вафосин.*

Киши эгаллаган яхши фазилатлари учун ҳаётда оладиган мукофотлари кўп. Масалан, салом берса, ўша

зашоти алик олинади. Айрим яхши хулқлари учун бериладиган мукофотга маълум муддатдан кейин эришади. Лекин меҳнаткашлагининг мукофоти узоқ куттирмайди.

Ҳар қандай меҳнатнинг зийнати ҳунар эканини барчамиз биламиз. «Ҳунар қўлингдаги тилла узукдан ҳам аъло эканини унутма», деганлар ҳикмат аҳли. Бир ҳаким ўғилларига бундай панд берур эдики: «Э жон фарзандларим, ҳунар ўрганинглар, нединки, мулк ва молга эътиимод йўқдир. Сийм ва зар хатар маҳалидидир – ё ўгри барчасини бирдин олур ва ё ҳоким оз-оз олиб йўқ этар. Аммо ҳунар чашмаи равон ва давлати бепоёндурки, агар ҳунарманд одам давлатдин тушса, ҳеч фам ва алами йўқдур. Нединки, ҳунар унинг зотида улуғ давлатдир ва ҳар ергаки борса, соҳиби қадр бўлур ва мажлиснинг юқорисида ўлтурур ва ҳунарсиз киши гадойлик қилур ва ҳар жойгаки борса, бекадр ва безътибор бўлур. Байт:

*Ота меросини гар истасанг, ўрган ота илмин,  
Ки қолган мол отадин саҳл муддатда тамом ўлгай.*

Ҳорун ар-Рашидга тобе шаҳарлардан бирининг ҳукмдори шундай ҳикоя қилган:

– Отам ҳар вақт мени ҳунар ўрганишга тарғиб қилиб: «Ўғлим, ёшлигингни ғанимат билиб, ҳунар ўрган, мансаб ва давлатингга ишонма, бир кун буваринг қўлдан кетиши мумкин, бироқ ҳунар доимо сен билан бирга бўлади, сени ҳеч бир муҳтожликка туширмайди», деб насиҳат қиласардилар. Мен отамнинг насиҳатларини жону дилим билан қабул қилиб, ҳунар ўрганишга бел боғладим. Ҳунарлар орасида гилам тўқиши менга хуш ёқди. Энг моҳир гилам тўқувчига шогирд тушиб, бу ҳунарнинг нозик сир-асрорини пухта эгалладим.

Отамнинг вафотларидан кейин Ҳорун ар-Рашид шаҳарга мени ҳукмдор қилди. Орадан кўп ўтмай, икки йўлдошим билан Бағдод сари йўлга чиқдик. Бир

нече кун сафар ранжини тортиб пойтахтга доҳил бўлдик. Қорнимиз оч эди. Жуда зийнатланган ва озода бир емакхонага кирдик. Емакхона соҳиби бизни кўрган замони дарҳол ёнимизга келиб, ҳол-аҳвол сўрашиб, айтди:

– Сизлар бошқа шаҳардан келган обрўли кишиларга ўхшайсизлар, бозорда овқатланиш сизлар учун айбидир. Шу яқин орада бир озода жойимиз бор, сизларга ўша емакхонада таомланиш ярашади.

Биз унинг таклифини қабул қилдик. Хизматчиси бизни айтилган шинам уйга бошлаб борди-да: «Пича ўтира туринглар, ҳозир таом келтираман», деб эшикни беркитди. У кетиши билан биз ўтирган уй иккига ажралиб, барчамиз ертўлага тушиб кетдик. Ўзимизга келишга улгурмай туриб, уй яна асл ҳолига қайтди. Бир оздан кейин ертўла эшиги очилиб, пичоқ ушлаган икки хизматкор пайдо бўлди. Жонимиздан умидимизни уздик. Бизни йўлдан урган емакхона эгаси одамларни алдаб бу ерга келтиаркан-да, сўйиб, гўштини таомга солар экан. Шу топда бошимга бир фикр келиб дедимки:

– Биз моҳир гилам тўқувчилармиз, бизларни ўлдиришдан фойда кам. Бошлиғингизга чиқиб айтинг, керакли нарсаларни етказса, ажойиб гиламлар тўқиб беражакмиз.

Таклифим маъқул келиб, эртасигаёқ айтган нарсаларимни муҳайё қилишди. Шерикларим кичикроқ ҳажмдаги гилам тўқишиди, мен подшоҳга аталганини тўқишига киришдим. Иш ниҳоясига етгач, хўжайинга дедимки:

– Буни бозорга олиб чиқманг, бу гилам подшоҳ саройини безази керак. Ҳорун ар-Рашидга тортиқ қилсангиз, кўп фойда оласиз.

Хўжайинга бу таклиф хуш ёқди. Ўша куниёқ гилами кўтартириб, саройга равона бўлди. Ҳорун ар-Рашид гиламни қизиқиши билан кузатиб, бурчагига тикилиб қолибди. Мен бу бурчакка гулларга мослаб, ўз

муҳримни тўқиган эдим. Бизнинг Бағдод сари йўлга чиққанимиздан, сўнг изимиз йўқолганидан хабар топиб, нима қилишини билмаётган Ҳорун ар-Рашид бу муҳрни кўрибоқ бошимизга мусибат тушганини англабди-ю, емакхона хўжайинини ҳисбсга олиб, сўроққа тутибди. Хунар шарофатидан ўзимнинг ва йўлдошларимнинг жони омон қолди...

*Бўлса гариб айрилибон шахридин,  
Чекмагуси хорлиг аҳли хунар.  
Мамлакатидин агар ўлса жудо,  
Ёнгуси оч подшоҳи баҳру бор.*

Хунар доно билимдан афзал, дейдилар. Яъни, ҳар кимнинг ҳунари бўлмаса, у қуруқ девор билан teng. «Йигит кишига етмиш ҳунар оз», дейдилар. Бу мақол олимга ҳам, авомга ҳам таалуқдли. Биламизки, яхши олимларимиз орасида рўзгорга зарур ҳунарлардан ҳам бехабарлари бор. Айтайлик, битта михни эплаб қоқа олмайдиганлар ҳам бор, десам балки ишонмассиз. Балки «Олим одамга шу ҳунар шартми?», дерсиз. Бизнингча, ҳар бир одам касби ва илми даражасидан қатъи назар, айrim ҳунарларни ўрганиб олгани дуруст. Ота-оналар ҳам «болам ўқияпти», деб уни жисмоний меҳнатдан, хусусан, ҳунар эгаллашдан четламаганлари яхши.

Арасту ҳаким ёшлиари етмишга борганда чолғу чалишни ўрганибдилар. Шогирдлари: «Оппоқ сочингиз билан чолғу машқ қилгани уялмайсизми?», дейишса, жавоб қилибдиларки:

– Даврада ўтирган одамлар бу ҳунарни билганлари ҳолда, мен кўзимни мўлтиллатиб ўтирсам, ўшанда уят бўуур эди. Ҳар қандай илму ҳунардан хабардор бўлиш, уни ўзлаштириш йўлида тортиш мумкин бўлган барча азиятларни билиш одамнинг фазилатидир. Жоҳил кишигина бунинг маъносига тушунмайди ва фойдасини билмайди.

«Мулки Ажам тарихи» деган китобда бундай ҳикоя қилинади: «Эроннинг афсонавий подшоҳларидан Гуштасп Румга бориб, Қустантанияда манзил қурганида қўлида ҳеч вақоси йўқ экан. Бирордан бирон нима сўрашга иззат-нафси йўл бермабди. Гўдаклик чоғларида отасининг саройида бир темирчи бўлган экан. Гуштасп ўша темирчининг пичоқ, тиф ва узанги ясашига ҳаваси келиб, ҳар гал унинг олдига борганида темирчининг ҳунарини завқ билан томоша қиласкан. Қустантанияда пулсиз қолганида темирчиларнинг олдига бориб: «Менинг бу ҳунардан хабарим бор», дебди. Уни мардикор қилиб ёллашибди. Кунига қанча пул тушса, бир қисмини унга беришаркан. Шу тариқа муҳтоҷ бўлмай, ўз тириклигини ўтказибди. Вақти-ки келиб, ватанига қайтиб, тахтга ўтирганида: «Ҳамма мол-дунёсининг кўп ёки кам бўлишидан қатъи назар, фарзандларига касбу ҳунар ўргатсин, ҳунарли одам ҳеч қачон бирорга муҳтоҷ бўлмайди», деб фармони олий берибди.

Ҳунар туганмас ҳазина эканини таъкид этиб, ҳунарсиз инсоннинг доимо қўрқув, таҳлика ичидагашига дикқатингизни тортаман. Ҳа, дунёнинг та-наззули уни қўрқувга солади. Очлик қўрқувни уни ҳар доим чўчитади. У доимо ҳаёт ташвишларига асир бўлиб юради. Фақат ҳунар соҳибигина ҳар чоғ эркин, озодdir. Шу боис, ҳар киши эркин озод яшashi учун аниқ бир ҳунар соҳиби бўлиши лозим. Юқорида зикр этилган ҳикоятда катта ибрат бор. Инсон олим бўлиши баробарида бир ҳунар соҳиби ҳам бўлса, у мустақил ва ҳур бўлади. Акс ҳолда, у ҳатто илмини асирликка маҳкум қиласди.

Ҳазрати шайх Аҳмад Мағрибий (қ.с.)нинг тўрт ўғиллари бор эди. Тўрттогига ҳам ҳунар, касб-кор ўргатдилар ва сўраганларга айтдиларки: «Хунарни шунинг учун ўргатдимки, мендан кейин ўзларининг қўллари меҳнати нонини есиллар. Бориб: «Мен фалончининг ўғлимани!» деб сиддиқлар жигарини ёқмасинлар. Не-

чукким, Пайғамбаримиз (с.а.в.) марҳамат этгандар: «Қўлнинг меҳнати, пешонанг тери билан егин-у, динингни емагин» (Бу ерда «динни пулга сотмагин», деган маъно бор).

Айримлар илм оолмаганлар ҳунар эгаллашар, дейдилар. Бу жато фикр! Бу ҳунарни, ҳунар эгаларини камситишдири. Ҳунарга ҳам Худо берган қобилият зарур. Масалан, кибернетика профессорига ҳарчанд ўргатинг, заргарлик ҳунарини эгаллай олармикин?

Одамнинг баракали ва бадавлат бўлиши учун касбу ҳунардан қимматроқ мато йўқ ва улуғлик ҳамда саодат осмони учун эса қобилиятдан ёрқинроқ юлдуз йўқдир. Ҳунар суви билан сугорилмаган киши гўёки мева ва сояси йўқ қуруқ дарахтга ўхшайди. Ёки ҳид ва рангдан холи гулга монанддир. Дарҳақиқат, бу фирдавсмонанд гулшанинг райҳонлари ҳидидан димоғини муаттар қилган киши хилма-хил камёб, лаззатли неъматлардан баҳраманд бўлади. Бу неъматнинг ёқимли майидан бир журъа топмаган киши доимо баҳтсизлик ва ожизлик билан боши оғриб, хумор бўлиб юради. Кўп азоб ва укубатлар юкини елкасида кўтариб юришга мажбур бўлади. Билим ва ҳақиқат боғининг боғбонлари касбу ҳунарсиз кишиларни жамиятнинг разил ва пасткаш кишилари деб ҳисоблаганлар. Касбу камолсиз кишининг муҳаббати ҳеч бир дилдан жой топмайди ва ҳеч ким касбу ҳунарсиз кишига ёрдам қўлини чўzmайди.

Ким ўз қўлидан келадиган ишни ташлаб, қўлидан келмайдиган бир ишга ёпишса, албатта, муваффақиятсизликка учраб, расво бўлади. Кейинги пушаймони ёрдам бермайди. Дейдиларки, ҳунар ёддан чиқмасада, лекин нозик томонлари унтилади. Инсон ўз ишини яхшилаб ўрганиб, уни ҳеч қачон қўлдан бермаслиги керак. Бўлмағур хаёлларга берилиб, шоҳдан-шоҳга қўнмаслиги, ҳар қандай гулнинг гўзаллигига учавермаслиги керак.

Аввалги суҳбатларимизда илмни кераксиз жойларга сарф қилишнинг зарари ҳақида сўз юритгандик. Файрат-шижоатни ноўрин ишлатиш хусусида ҳам фикрлашдик. Шунинг давоми сифатида ҳунарни исроф қилишга доир бир ҳикоят билан танишсак.

**Ҳикоят.** Одатдан ташқари ажойиб ҳунар кўрсатишга қодир эканини даъво қилган бир кишини подшоҳ ҳузурига олиб келишди. У киши ёнидан бир кутича игна олди. Бир жуволдизни бир устунга қадади. Кейин сал нарига тисарилиб, игналарни жуволдиз кўзидан отиб чиқара бошлади. Ҳунарини кўрсатиб бўлгач, таъзим қилди. Подшоҳ бу ҳунари эвазига юз олтин бериб, орқасига юз қамчи уришни буюрди. Сарой аҳли бундан ажабланган эди, подшоҳ тушунтириди:

– Бу одам жуда зўр истеъдод ва қобилиятга эга, лекин уни фойдасиз ўринларга сарф қиласди. Ҳунарини тақдирлаб, юз олтин беришга, истеъдодини фойдасиз нарсаларга исроф қилгани учун юз қамчи уришга буюрдим, токи бундан кейин истеъдодини ҳалқ, юрт манфаати йўлида сарф этсин.

Ҳунар эгаларининг ҳалқ орасида баобрў экани айтилди. Лекин аҳли ҳунар орасида бир иллат борки, бундан кўз юмиб бўлмас. Ҳасад, ичқоралик, ифво... каби хасталиклар қобилияти ҳунар аҳдини кўп нохуш этади. Биз ҳасад ва тухмат қурбонлари – қамалган, отилган олимлар, ёзувчиларни кўп тилга оламиз. Ҳолбуки, бундай қирғинлар ҳунар аҳли орасида ҳам бўлган. Кўли гул заргарлар, наққошлар, ганчкорлар, мисгарлар таъқиб қилиндилар, қамалдилар, сургун қилиндилар, отилдилар...

«Калила ва Димна»да бу баён бор: «Ҳунар эгаларини ҳамиша истеъдодсиз ва бахил одамлар оёқости қиладилар, улар олчоқ ва разил одамларнинг нафрат ва ғазабига сабаб бўладилар. Истеъдодсиз, бахил ва олчоқ одамлар истеъдодли ва олижаноб одамлардан кўпdir, шунинг учун фийбат ва бўхтон билан яхшиларни ҳалок

этадилар. Хасис сахийни кўрса, жоҳил олим билан мажлисга тушса, аҳмоқ оқил билан сұхбат курса, юраклари сиқилиб, қонлари қайнаб кетади. Истеъдодсиз одамлар ҳунар эгаларини ерга уриб, уларни гуноҳкор қилиб кўрсатишга ҳаракат этадилар. Диёнатни жиноят қилиб кўрсатадилар, баҳт-саодат воситаси бўлган ҳунар ва истеъдодни баҳтсизлик василасига айлантирадилар». Неча минг йил аввал баён этилган бу ҳикматнинг долзарблиги ўтмиш жамиятда, айниқса, Сталин зулми йилларида аниқ кўрилди. Бу масалага эътиборни қаратишмидан мақсад, ҳунар эгаллаётган ёшлар йўлларида шундай ноҳушликларга учрасалар, чекинмасликлари керак. Кўпни кўрган устозлар шогирдларига бу ҳақда ҳам ўтит берсалар, ёшлар ҳасадгўйга дуч келганда довдираб қолмайдилар, туҳматчилардан қўрқиб ҳунарларини тарк этмайдилар. Эл-юрт миннатдорчилигига сазовор бўлиб, фарогатли умр кечирадилар.

**Азиз умидимиз юлдузлари**, сизнинг ҳам ҳар бир қилган ишингизга шундай таҳсину оғаринлар ёғилишини тилаб, кейинги мавзу билан танишишга таклиф этаман.

**УЧИНЧИ БЎЛИМ  
ТИЛИНГНИ АВАЙЛА – ОМОНДИР БОШИНГ**

**Инсонийлик гавҳари**

**УМИДИМИЗ ЮАЛДУЗЛАРИ**, «Тилингни сақла, бошинг омон қолади», «Тил бўлсайди ўз қалбининг сирдоши, кесилмасди тил эгасининг боши», деган мақолларни эшитган бўлсангиз керак? Бу мақолларни шунчаки эшитиб қўя қолганмисиз, ё магзини чақишга уринганмисиз? Бу мақоллардаги ҳикматни тасдиқ этувчи воқеаларни ҳаётда кўрганмисиз ё эшитганмисиз?

Дарахтни кессалар унинг илдизидан бир шохча кўкариб, унинг ўрнини босади. Танадаги қилич ва ўқ яраси ҳам битиб кетади. Лекин тил яраси ҳеч вақт тузалмайди. Қалбга санчилган сўз ўқини чиқариб бўлмайди. Бадан заҳардан, қалб ёмон сўздан ўлади. Чунки сўз қиличи темир шамширдан ҳам ўткирроқдир.

Қиличдан етган жароҳат тилдан етган жароҳатга қараганда енгилроқдир. Чунки қилич баданни, тил эса қалбни жароҳатлайди. Вужуд яхши таом билан жонланганидек, қалб ҳам яхши сўзлардан ором олади.

*Синса кўнгил шишиаси, тадбир билан бўлмас бутун,  
Устихон эрмаски, они рост қиласа мўмиё...*

**Масад.** Бир одам айиқ билан дўстлашиб, уни уйига бошлаб келди. Бу меҳмоннинг ташрифидан норози бўлган хотини: «Фу, шу сассиқ билан ошно тутиндингизми?», деб афтини бужмайтирди. Буни эшитиб ранжиган айиқ болтани олиб, дўстига узатди-да, илтижо қилди:

– Шу болта билан пешонамга бир ур!

Айиқ илтимосини қайтаравергач, дўст унинг пешонасига болта урди. Жонивор оғриқ азобидан ўкириб,

ўрмонга қараб югурди. Орадан ҳафталар ўтгач, у яна дўстига рўпара келиб, дедики:

– Қара, болтанинг изи битиб кетди, лекин хотининг тилидан учган сўз яralаган юрагимга даво тополмайман...

«Кимки кўнгилни қаттиқ сўз билан жароҳатлар экан, унга аччиқ тил заҳарли найзадек санчилади, – деганлар ҳазрат Навоий. – Кўнгилда тил найзасининг жароҳати битмас, у жароҳатга ҳеч нарса малҳамлик қилмас. Агар бир кўнгилда тил найзасининг жароҳати бордир, фақат яхши сўз ва ширин тил унга малҳам ва роҳатдир. Мулоим сўз – ваҳшнийларни улфатга айлантиради. Сеҳргар – оҳанг билан афсун ўқиб, илонни инидан чиқаради... Сўзда ҳар қандай яхшиликнинг имкони бор. Шунинг учун айтадиларки, «нафаснинг жони бор».

Сўз – туя бурнига ўхшаш, унга жилов солса бўлади. Ёхуд у туянинг бўйни кабидир, етовга юраверади. Демак, масала – уни қай томон етаклашда! Кишининг сўзи жонга роҳат бергувчи бўлмаса, сўзламаслик керак.

*Қилур қаттиқ тақаллум ўнг ишинг чап,  
Сўзинг тиклаб кўнгул бузгунча тик лаб.*

Сўфи Оллоҳёр ҳазратлари мазкур байтда гўёким устоз Навоий фикрларини давом эттирадилар: қаттиқ сўз бўлар ишингни бўлмас қилар. Нина қўлни санчиб азоблаганидек, қаттиқ сўз ҳам кўнгилларни санчиб, ярлайди. Аммо нина санчиғи битиб кетар, дил яраси битмас. Қаттиқ сўзинг дилни яраламаслиги учун ўша сўзни айтадиган лабингни ёпиқ тут, яъни кўнгилни бузгувчи сўзлар учмасидан оддин лабингни тикиб ташла.

Гўзал сўзлар фақат амалга оширилгандагина чиройли натижалар беради. Муолажа йўлини топган касал одам унга амал қилмаса, табобат илмини билгани мут-

лақо фойдасиздир. Ёмғир томчилари ерни жонлантиргани каби комил инсонларнинг сўзлари қўнгилларни жонлантиради. Қудсий ҳадисда марҳамат қилинадиким: «Эй Одам боласи! Агар сўзинг ялтироқ – майин бўлиб, амалинг қабиҳ бўлса, унда сен мунофиқларнинг мунофифисан». Кимки тилини яхшиликка ишлатса, қуролидан усталик билан фойдаланувчи овчи каби бўлади. Ўзи тушунмаган сўзга аралашаверадиган киши эса нуқул беҳуда ўқ узаверадиган ношуд овчига ўхшайди. Бир оғиз ширин сўз шундай қудратлики, у ўз жонига қасд қилмоқчи бўлиб турган кишини ҳётта қайтарадики, «яхши гап билан илон инидан чиқар, ёмон гап билан пичоқ қинидан чиқар», деб бежиз айтмаганлар. Яхши сўзларни сўзлашга одат қилмаган киши фалокатга учрайди. Ақлли одам ўз сўзига ҳоким бўлади. Уқув ва билимнинг тиљмочи (таржимони) – тиљдир. Кишига рўшнолик, яхшилик ва эзгуликлар оқил сўзламаклик ила келади. Шу боис ҳам демишларким: «Тил – арслон, мисоли ётар қафасда, эй тил эгаси, бошингни асрар!» Қадимдан қолган одобга доир қайси китобни варақдаманг, «Тилингни сақла, бошинг саломат бўлади», мазмунидаги насиҳатга дуч келасиз. Шундай бўлиши бежиз эмас, зотан, ўринсиз сўзламоқликнинг натижаси – пушаймонлик экани ҳақида тарихдан мисоллар излашга ҳожат йўқ. Ҳар биримиз ўз тилемиз туфайли неча-неча марта пушаймонлар етанимиз, шуни унутмасликнинг ўзи кифоя.

**Ҳикоят.** Подшоҳ тўрт олимни чорлаб, дебдики:

– Ҳар бирингиз биттадан шундай ҳикмат айтингизки, у тарбиянинг асоси бўлсин.

Биринчиси айтибди:

– Донишманд одамларга ярашадиган нарса – сўзламасликдир!

Иккинчиси дебди:

– Дунёда энг фойдали нарса шуки, инсон ўз ақли билан маслаҳатлашмасдан сўз бошламасин.

Учинчиси:

– Инсон учун энг хайрли нарса – ўйламасдан сўзла-  
масликдир.

Тўртингчиси айтиби:

– Инсон учун энг тинчи шуки, у ўзини толе ихтиё-  
рига топширсин.

Энди баён этилажак доно фикрлар ҳазрат Навоий-  
данки, англаб, амал қилган киши барака топқусидир.

«Сувнинг мазаси – муз билан, ошнинг мазаси – туз  
билин, одам яхшилиги – сўз билан. Сиҳат тиласонг –  
кўп ема, иззат истасонг – кўп дема. Яхшиларнинг хуна-  
ри – сўзида, бўзчиларнинг хунари – бўзида. Бефойда  
гапни кўп айтма, фойдали гапни эшитишдан ҳеч қайт-  
ма. Оз гапирган оз янгишади. Оз еган – оз касалланади.  
Очлик негизида ҳикмат бор, тўқдик тагида рафлат  
бор.

Ҳақнинг дўстлари – садоқат-покликнинг конидир,  
Ҳақ душманлари – ёлғончилардир. Тилнинг ихтиёри-  
ни қўлингда асрагил. Сўзингни эҳтиётлик билан сўзла.  
Вақтида айтиш керак бўлган сўзни асрара, айтиш  
керак бўлмаган гапнинг яқинига йўлама. Сўз борки,  
эшитувчининг танига жон кирғизади, сўз борки, га-  
пирувчининг бошини елга учиради. Тилинг билан ди-  
лингни бир тут; тили ва дили бир кишининг айтган сўзи  
– бут (яъни, айтган сўзига ишонса бўлади). Сўзни  
кўнгилда пишитмагунча тилга олма. Дилингда бор гап-  
нинг ҳаммасини тилингга келтирма. Гарчи тилни ти-  
йиш – дилга меҳнатдир, аммо сўзни ёйиш – бошга  
офатдир. Айтиш керак бўлган гапни унутма; айтмай-  
диган ерда ўзингни сўзамол тутма. Айттар сўзни айт,  
айтмас сўздан қайт.

*Киши чинда сўз деса зебо дурур,  
Неча мухтасар бўлса, авло дурур».*

Сўзлар – ўзликнинг ифодаси. Катта дарахтлар ки-  
чик уруғларда яширинганидек, кишининг асл кўри-  
ниши сўзларига яширинган бўлади. Тили бошқа, дили

бошқа мунофиқлар бир кунмас бир кун ўз сўзларидан илинадилар. Бугун уларнинг мунофиқликларини яширган ширин сўзлари эртага заҳарга айланиб, фош қиласди. Чунки заҳарнинг устини ширин қобиқ билан қоплашнинг фойдаси йўқ. Қобиқ емирилади, заҳар эса заҳарлигича қолади.

«Олдин ўйла, кейин сўйла» дейдилар. Чунки, ўйламай айтилган сўзлар қалбларни ўлдиради. Осмондан қор ҳам, дўл ҳам, ёмғир ҳам ёғади. Бу ёғинлардан экинзорлар ё яшнайди, ёки фалокатга учрайди. Инсон оғзидан чиққан сўзлар ҳам бамисоли қор, ёмғир, дўл кабидир. Улар кишиларга ё ҳаёт баришлайди, ё ўлдиради. Яъни, қор вақтида ёғса – ҳаёт манбаи, бевақт ёғса талафот.

Фойдасиз сўз – фойдасиз дори кабидир. Бошқачароқ айтилса – дорининг ҳам, сўзнинг ҳам ортиқчаси зааралидир. Сукут вақтида сукут сақдашни, сухбат пайтида сўзлашни билган киши баҳтиёр инсонлардан ҳисобланади. Маъносиз, пойма-пой сўзламоқдан кўра сукут қила билиш нодир фазилатдир. Зеро, сукут лозим бўлганда сукут сақлаган, сухбат лозим бўлганда сухбатлашишни билган инсонни буюклар сафига қўшарларки, вақтида сукут сақламак – оқил сўзламакнинг шартларидан биридир. Тушунмай, ўйламай гапирадиган киши сархуш кабидир. У нима деганини билмайди, ҳам ўзига, ҳам атрофидагиларга фалокат келтиради. Унутмаслигимиз шарт бўлган шарафли ҳадисларким: «Кимки омон юришни истаса, жим туришга ҳаракат қиласин». «Сукут сақламакликни ўзингга одат қилгил. Чунки сукут сақдашлик шайтонни ҳайдайди ва сени динингни сақлашингга ёрдам беради».

**Ҳикоят.** Хурросон ҳукмдори Ҳусайн Бойқаро илм толибларига сабоқ берастган доно вазири Алишер Навоийга яқинлашиб, кўрсаткич бармоғи билан бошини кўрсатди. Навоий ҳазратлари ҳам кўрсатгич бармоқлари билан тилларини кўрсатдилар. Ҳукмдор бу ишорадан бош чайқади-ю илм толиблари даврасига яқин-

лашмай, изига қайтди. Бу ҳолатни кузатиб турган шогирдлар устоздан имо-ишоранинг маъносини сўрадилар. Устоз бу жумбоқни ечишини уларнинг ўзларига ҳавола этдилар. Улар қанча ўйлашмасин, тайинли жавоб топа олишмади. Шунда жавобни устознинг ўзлари бердилар:

– Имо-ишорада мураккаб маъно яширинмаган. Жавоб жуда оддий: дўстим Ҳусайн мендан «Бошга балони нима келтиради?», – деб сўрадилар. Мен эсам унга «Тил», деб жавоб қилдим.

*Ҳар кимки чучук сўз элга изҳор айлар,  
Ҳар нечаки агёр дурур ёр айлар.  
Сўз қаттиги эл кўнглига озор айлар,  
Юмиши кўнгилларни гирифтор айлар.*

**Яна бир ҳикоят.** Султон Маҳмуд ва унинг вазири хожа Аҳмад Ҳасан Маймандийнинг даврида Абу Аҳмад Саҳл исмли бazzоз бўларди. У молдор, бадавлат, ўғли эса беақд, кazzоб эди. Шу ўғил султонга тегишли йигирма минг динорли бўёқни ўғирлаб, сотиб, майшат қилиб юрганида сири ошкор бўлди. Султон бўёқ пулини Абу Аҳмад Саҳдан ундириб олишга фармон берди. Вазир бazzозни ҳузурига чақиритирди ва деди:

– Сен султоннинг молини ўғирлаган ўғлинг учун жавоб беришинг керак. Сен қандай қилиб бу жиноятга йўл қўйдинг? Ё ҳеч ким билмайди, деб ўйладингми? Бу қилмишинг учун барча мол-мулкингни тортиб оламан!

– Султонимнинг умрлари узоқ бўлсин, – деди бazzоз таъзим билан. – Ўғлимнинг гуноҳини кечирсиналар. Маълумингизким, унинг исми Аҳмаддир. Кимнингки исми Аҳмад экан, у албатта, аҳмоқ бўлур. Нимаики ёмон иш қилган бўлса, аглаҳлиги ва бехирадлиги туфайли қилгандир. Бинобарин, уни жазолашдан кўра, гуноҳидан кечиш аълороқдир.

Вазир бу гапларни эшитиб, фоятда дарғазаб бўлди:

– Сен ўғлингдан ҳам баттар диёнатсизроқ экансан.

Сендек беандиша аҳмоққа лаънатлар бўлсин!

Баззоз вазирнинг ғазаблангани сабабини тушунмади. Ҳатто вазирнинг исми Аҳмад эканини ҳам фаҳм этмади. Бунинг ўрнига:

– Жаноб вазирнинг ғазабланишларидан маълум бўладирки, менинг ҳақимда бировдан ёмон сўз эшитган кўринадилар, – деди.

– Балли, сенинг **тилингдан** эшитдим, – деди вазир.

«Оғзига келганини демак – нодоннинг иши, одига келганин емак – ҳайвоннинг иши», деган ҳикматга мувофиқ баззоз жазосини олди.

Мазкур ҳикоятга бу ибратни хулоса қилсак ўринили бўлар:

Азизлардан бири деди:

– Бир ҳадис эшитганиманки, ўттиз йилдан бери ҳамон унга тўла амал қила олмайман.

– Ул қайси ҳадисдир? – деб сўрадилар. Жавоб бердилар:

– «Эрнинг мусулмонлигин кўркамлиги улдурки, фойдасиз нарсаларни сўзламагай», деган ҳадисдир.

Сўзлар мисоли ерга сочиғлан уруғ дони. Агар оғиздан чиққудай бўлса, уларни битталаб териб олиш мумкин эмас. Эл-юрт эшитганидан кейин уларни пардалаб бўлмайди. Ширин ва эзгу сўзлар оқиб турган зилол сувга ўхшайди. Зилол сув қаерга оқиб борса, у ердан анвойи чечаклар униб чиқади.

Кўпчиликка маълум ривоятга кўра, подшоҳнинг тушида барча тишлиари тўқилиб тушади. Аъёнлардан туш таъбирини сўраганида улар «Ҳамма қариндошларингиз ўлиб кетишар экан», деб балога қолишиади. Доно вазир эса «Сиз барча қариндошларингиздан кўпроқ умр кўрар экансиз», деб ҳадя олади. Ҳолбуки, ҳар иккала таъбирнинг маъноси бирдир.

Фузайл ибн Иёз дебдиларким: «Сўзини амалдан деб билганларнинг гали оздир. Ҳикматга фақат сукут ва

тафаккур билан ворис бўладилар. Сўзлашдан тақво этиш луқма ва таомдаги тақводан ортиқдир». Фикрдаги «тақво» сўзига дикқат қиласйлик: таомдаги тақвога гўзал равишда амал қилганлари ҳолда, тил тақвосига бепарво кишиларнинг эл орасида беобрў юришларига гувоҳ бўлмаймизми? Мазҳабимиз раиси И моми Аъзам ҳазратларининг муҳрларида мана бу сўзлар ёзилган экан: «Сўз айтсанг эзгу сўз айт, агар ундин сўзни айттолмасанг, тек тур». Шайх Саъдий айтганларки: «Нодонга хомушлиғдин яхши нима йўқдур, агар муни билса эрди, нодон бўлмас эрди. Қитъа:

*Фазлинг гар йўқ эса они билгил,  
Ки сўз айттурга очма ҳаргиз тил.  
Одамини тил этгуси расво,  
Очма оғзингни, бўлма бепарво.*

Аввалги суҳбатимизда Луқмони Ҳакимнинг насиҳатларини баён этиб эдик. Энди шу насиҳатнинг ўзгачароқ кўринишдаги баёни билан танишсак фойдан холи бўлмас: «Эй жоним ўғлим, бир нодон кимса одингга келиб, сўз сўраб, баҳслашмоқ истагида бўлса, жавобини юмшоқ ва ширин сўзлар билан бергил. Шоядки, ўша нодон жаҳолат мастилигидан ўзига келса. Ул нодонга сучуклик билан жавоб берган сўзинг фойда қилмаса, сўзингни такрор қилма. Зероки, такрор қилганинг сайин нодоннинг ўпкаси қабариб, жаҳолати ошар. Агар у жоҳил юмшоқ сўзни ҳам англамаса, унда тек турмоғинг афзалдир». «Бир одам билан бир масала устида сўзлашар экансиз, сўзингизни жанжалга бош бўладиган даражасига олиб борманг. Тилингизни тийинг» – Суқрот ҳакимнинг бу ҳикматлари Луқмони ҳаким насиҳатларининг давоми ўлароқ ибратлидир.

«Сукут сақламоқ»ни халқда «тилни тиймоқ» деб ҳам атайдилар. Тилни тиймоқнинг маъноси фақатгина жим турмоқ эмас. Маъно биз ўйлагандан кўра чукур-

роқдир. Яъниким, тилни тиймоқ – хоинлик, тұхмат, ёлғон, фийбат, чақымчилик, истеҳзо, бирөвни масхара қилиш, ёлғон қасам ичишдан тийилишdir. Шунингдек, Куръони Карим ўқилаёттанды, иқомат ва хутба вактида, ұжатхонада сүрашмоқ ва суҳбатлашмоқдан тийилишdirки, биз ҳаётда күпингча бунинг аксини күрамиз.

Кимнинг сукутта тоқати етмаса, сүфийлар ҳаётидан ибрат олсин. Чунки сүфийликнинг гүзәл ахлоқладидан бири айнан сукутда күринади. Устоз Қушайрий дейишиларича, сүфийлар гапиришда оғат, яъники зарар борлигини билгач, сукутни афзал күрганлар. Гапиришда нағснинг улуши, мактандықлик иллатларини намоён қилиш, чиройли гапириб, бошқалардан ўзини ажратиб күрсатышга майл каби таҳникалар борлиги учун ҳам улар шундай йўл тутишган.

«Тил бўлса ҳам, бўлмаса ҳам бошга бало», дегувчилар йўқ эмас, бор. Аммо ҳақиқат шуки, керак сўзнинг сўзланмоги шарт. Тўғри, ортиқча айтилган сўз киши кўнглига малодир. Аммо сўзламаслик ҳам дуруст эмас. Бу ҳолда «соқов» деган маломат юзага чиқиши мумкин. Ёйриқни ўртача тутган одам қут-икеболга эришади. Тилнинг зааридан кўрқиб юрлса, кўпгина фойдали фикрлар ҳам пинҳона қолиб кетиши мумкин. Ёмон ва яроқсиз сўзлар билимсиз одамнинг тилидангина чиқади. Шунинг учун ҳам билимсизларни ҳайвон қаторига қўшганларки, бу ҳақда аввалги суҳбатларимизда баён қилиб эдик.

Камгаплик – донолик йўлининг бошланиши. Сергап одам вайсақи бўлиб қолади. Унинг билим ўрганишга вақти етишмайди. Бироқ, киши сўзламас экан, унинг билимдон ёки билимсиз эканлиги ҳам маълум эмасда. Киши учун жуда керакли бўлган икки аъзо бор: бири – **тил**, иккинчиси – **юрак**. Тил – сўз учун, юрак – кўнгил эса шу сўздан лаззатланиш учун берилган. Шу туфайли тўғри, рост сўзни сўзлаш учун тилни тебратмоқ, яъни ҳаракатлантирмоқ керак. Эгри, яроқсиз

сўзларни ташқарига чиқаргандан кўра тилнинг ҳара-  
катсиз қолгани маъқул.

*Кишилар эзмаси ёвуздан ёмон,  
Ардоқли кишилар камган ҳар қачон.*

Фаридиддин Аттор «Кўп гапирадиганларнинг қалби  
касалдир», деганлар. Сергап одамнинг ақди тилида  
бўлади. У нима гапираётганини ўзи ҳам билмайди.  
Бошқалар ҳам унинг сўзларига аҳамият бермайдилар.  
Маҳмадана, валдировчи одам очиқ бир мактубга  
ўхшайди. Уни истаган одам ўқийверади. Қудсий  
ҳадисда марҳамат қилинадики: «Эй Одам фарзанди!  
Агар дилингда қаролик ва баданингда дангасалик ва  
ризқингда танглик бўлса, бас, билғилки, буларнинг  
сабаби **бехуда ва бемаъно** сўзларни кўп сўзлашинг-  
дандир, демак, бундан сақдан».

Баъзан даврадаги бир одамнинг гаплари маънили  
туюлиб, аввалига диққат билан эшитадилар. Агар  
нотиқ бу эътиборни суиистеъмол қиласа, гаплари қан-  
чалик маънили бўлмасин, давра зерика бошлайди.  
«Сўзга усталик нима?» деб сўралса, донолар «Қисқа  
сўзлаш, аммо гапнинг маъносини бузмаслик», деб жа-  
воб берадилар. Агар сўз қалбдан чиқиб келса, эшит-  
гувчининг қалбига дарров таъсир қиласи, аммо тил-  
дан содир бўлса, қулоқдан нарига ўтмайди. Гарчи нотиқнинг  
сўзини бўладиганлар бамисоли йўлтўсар,  
ҳаёсиз қароқчига қиёс этилса-да, сергап одамнинг ўзи  
давра аҳлини йўлтўсарга айланишларига мажбур  
қилиб қўяди. Ўзаро гап-сўз бошланади. Зийрак нотиқ  
даврадаги ўзгаришни сезиши, гапни дарҳол муҳтасар  
қилиши шарт. Акс ҳолда давра аҳлидан бетоқатроғи  
«Бўлди-е!» деб нотиқни бежурмат қилиб қўйиши ҳам  
мумкин.

Шайх Абу Бакр ибн Айюш (р.а.) деганларки: «Туп-  
роқ сувни тортиб қуритгани каби, кўп гапириш ҳам  
савобларни қуритади».

Камтар одамлар кўп гапиришдан қочадилар. Улар кўпроқ эшитмоқни истайдилар ва ёқтирадилар. Эшитмоқ – кишини бойитади, кўп гапирмоқ саёзлатади. Кўп гапирган кўп янглишади. Кўп еган – кўп йиқилади. Ҳақиқатким, кўп сўзга ёлғон, албатта, аралашади. Таъкидким, тан касалининг асоси кўп емоқdir, қалб касалининг сабаби – кўп демакдир. Кўп демак – сўзга мағурурлик, кўп емоқ – нафсга бандаликдир. Одам учун бу сифатлар кераксиз ва барчаси худпарастликка оиддир. «Кўп гапиравучи, кўп егувчи – дўзах ўтига ошиқиб кетувчи, – деб ёзадилар ҳазрат Навоий. – Сўзламоқча берилган, емоқча қул бўлган одам билим шарофатидан маҳрум бўлади.

*Кўп демак бирла бўлмагил нодон,  
Кўп емак бирла бўлмагил ҳайвон».*

Одам боласи илми даражасидан қатъи назар, кўп гапни ёқтирмайди, аниқроғи, ҳазм қила олмайди. Лекин ўзи кўп гапиришни ёқтиради, гапира-гапира сира чарчамайди. Шуниси ажабланарли!

Маҳмадона ва сафсатабоз шоирлардан бири Абдураҳмон Жомий ҳузурларига келиб мақтанди:

– Тушимда Хизр пайғамбар оғзимга муборак тупукларидан туфладилар.

Бу гапдан устоз бош чайқаб дедилар:

– Янглиш айтяпсан. Аслида Хизр пайғамбар сенинг бетингга тупурганлар, гапдан тинмай оғиз очиб турганинг учун тупуклари оғзингга ҳам тушган бўлиши эҳтимол.

Кайковус фарзандига хитобан шундай дейди:

«Киши сухандон, сухангўй (нотик) бўлиши керак. Эй фарзанд, сен сухангўй бўлғилу, аммо дуруғгўй (ёлғончи) бўлмагил. Ҳар сўзни андиша била бошлиғил, токи айтғон сўзингдин пушаймон бўлмагайсан. Андишани илгари тутмоқ ҳам бир нав кароматдир. Ҳеч сўзни эшитишдан дилтанг (ичи торлик) бўлмагил. Ул сўз

ишингга хоҳ ярасун, хоҳ ярамасун уни эшитгил, то юзингга сўз эшиги бекланмасун ва фойдаси фавт (йўқотиш) бўлмасун. Совуқ, сўзли бўлмагил. Совуқ, сўз бир тухумдир. Ундан душманлиғ ҳосил бўлур.

Эй фарзанд, агар ҳар нечаким сухандон бўлсанг, ўзингни билғондан кам тутғил, то сўзлаш вақтида нодон ва бебурд бўлиб қолмагайсен. Кўп билиб, оз сўзлағил ва кам билиб, кўп сўз демагил. Нима учунки, ақлсиз шундоқ киши бўладур – у кўп сўзлар. Дебдурларки, хомушлик саломатлик сабабидур, чунки кўп сўзлагувчи оқил киши бўлса ҳам, авом уни ақлсиз дерлар. Ақлсиз киши хомуш бўлса, уни оқил ҳисоблайдилар. Кўшиш (ҳаракат) қилким, халойик сени таъриф қилсунлар ва шундоқ сўз дегилким, у ишга ярасун, бекор ва зое кетмасун».

Кайковуснинг бу ўтитига яна бир донишманднинг насиҳатини боғласак, узукка кўз қўйгандек бўлур: «Фарзандларим, эшитган сўзларингизнинг энг гўзалини ёзиб олинг. Ёзган сўзларингизнинг энг гўзалини ёдланг. Ёдлаган сўзларингизнинг энг гўзалини сўзланг». Абу Бакр Сиддиқ (р.а)дан насиҳат: «Нимани гапирганингни, кимга гапирганингни ва қачон гапирганингни унутма!»

«Сўз – ҳақиқатнинг сояси ва парчасидир, – демишлилар мавлоно Румий, – модомики, соя ўзига тортар экан, у ҳолда ҳақиқат янада яхшироқ жазб этади. Сўз – баҳонадир. Бир инсонни бошқа бир инсонга тортган нарса сўз эмас, балки иккаловида мавжуд бўлган руҳий бирликдан бир парчадир».

Яъни, агар руҳий бирлик бўлса, суҳбат ширин бўлади. Ёки аксинча. Масалан, майхўрларни ҳам руҳий бирлик бирлаштиради. Уларнинг бемаъни суҳбатлари ҳам шу сабабли ўзларига ҳузурли туюлади. Ҳидланган ўлимтиклар устидан эсган шамол ҳар тарафга ёқимсиз ҳидлар тарқатади. Нафасларни бўғади. Ҳикматлар лаззатидан маҳрум фосиқларнинг суҳбатидан худди шундай бадбўй ҳид тарқалади. Улар ўзларининг

бузғунчилиги билан ичма-ич бўлиб кетганлар. Бузғунчиликларидан лаззат оладилар.

Оқил билан телба ўртасидаги бутун айирма шундаки, оқил одам доим фикрлагани фикрлаган, аммо кам гапиради. Телба-нодон одам эса доимо гапириб, ҳеч вакт ўйламайди. Оқил одамнинг тили ҳамиша фикрининг измида. Телба-нодонда эса бунинг акси. Оқил одамнинг тили тафаккурнинг тилмочи, телба-нодоннинг тили эса гап ташувчи ва фийбатчидир. Шу боис ҳам «Тинглашда биринчи, гапиришда эса охиргиси бўл», демишлар.

«Бир сўз айтмоқчи бўлсанг, маъносини ўйлаб кўр. Сўзламайдиган тақдирда зимманга масъулият қоладиган бўлсагина сўзла. Акс ҳолда овоз чиқарма», деб насиҳат қилганлар имом Фаззолий ҳазратлари. Шайх Саъдий баён этишларича, ҳиндистонлик донишмандлар Бузургмеҳр камолоти ҳақида сўзлаб, ул зотнинг гапирганаарида тўхтаб-тўхтаб, бир оз ўйлаб, сўнгра сўзда давом этишларини қусур ўрнида кўрдилар. Нединким, тингловчи кишининг мунтазир қилиб қўйишлирини айбли деб билдилар. Бузургмеҳр уларга бундай изоҳ бердилар:

– Бир нарса ҳақида сўзлагандан кейин «Бу номақбул гапни нега айтдим?», деб пушаймон қилишдан кўра, ўйлаб, андиша қилиб сўзлаш афзалadir.

Мазкур жавобдан «ўйламасдан тилга келган сўз зарардир ва илмдан бебаҳра сўзнинг қадри йўқдир», деган ҳикматни уқиши мумкин. Шарафли ҳадиски: «Мўминнинг тилидан фаришта сўзлайди. Кофирининг тилидан шайтон сўзлайди».

Бир киши донодан сўради:

– Фалон обид ҳақида на дея олурсанки, ўзгалар анинг изидан таъна қилиб, кўб сўз айтурлар.

Доно у обид билан сира суҳбат қурмаган эди, шу боис деди:

– Зоҳирида ҳеч айб кўрмасмен ва ботинида на айби борин билмасмен.

Яъни, ташқи кўринишида камчилик йўқ, аммо сўзларини тингламай туриб, унинг камоли ҳақида фикр билдириш амри маҳодтир.

Туғилган одам вақти-соати етгач, албатта, ўлади. Ундан ҳеч бир нишона қолмайди. Лекин унинг сўзлари оқил, эзгу бўлса, бошқалар юрагидан жой олиб улгурса, унинг номи мангу қолади. Инсон икки нарса туфайли қарилек нималигини билмайди: бири – хуш қилиқ, яна бири оқил сўзламаклик. Одамдан қоладигани ҳам оқил сўздир. Ҳамиша очиқ, самимий сўзловчи одам мардона яшаб, мардона ўлади.

Халқимиз фитратида латиф сўзламоқдикка интилиш бор. Латиф сўзлар барча давраларда қадрланади. Қўпол ифодадан барча нафратланади. Маълум бир ҳолатни ифодаловчи сўз қулоққа қўполроқ эшитилгани учун рамзлардан фойдаланилади. Масалан: «Фалончи ўлди» ёки «Фалончи ўлиб қолибди-да», дейилмайди. «Қайтиш қилди», «Омонатини топширди» ёки «Бандалик-да», дейилади. «Тугди» дейиш ҳам қўпол эшитилгани сабабли «кўзи ёриди» ёки эркалагансимон «кўзилади», деб ҳам қўйилади. Ҳар қандай хунук хабарни ҳам доно одам чиройли тарзда ифода этиб бериши мумкин. Бунинг учун одам айтадиган сўзининг маъносини яхши билиши керак. Сўзининг таъсирини аввал ўзи ҳис қилиши шарт. Кейинги йилларда бизда сўзни ҳис қиласмаслик, сўзни тушунмай ишлатиш анча кучайганга ўхшаяпти. Бу ҳолат чойхонадаги суҳбатларда учраса ранжимасак ҳам бўлар. Аммо матбуот, радио ва телевидениедаги ёш ҳамкасбларимиз фаолиятида тилга эътиборсизлик тез-тез учраяпти, бу ғоят ачинарлидир. Бир куни теле бошловчи кўрсатувлар режасини эълон қилгач, «маза қилиб ҳордиқ олинг», деса ажабланибман. Чунки «ҳордиқ» – «чарчоқ» демакдир ва ҳордиқ олинмайди, балки чиқарилади. Агар бошловчининг гапини «таржима қилсак», «кўрсатувларимизни томоша қилиб, маза қилиб чарчанг», деган маъно чиқади. Шунга ўхшаш «савод» ҳам олинмайди,

савод чиқарилади. Чунки «савод» – «қора» демакдир, яни «ұажар ул-асвад» – «қора тош» демакдир. Мұмтоз шеъриятда «күз қораси» «күз саводи» тарзыда ҳам құлланилади: «Күз саводин айлади кирпикларинг Парвезни, Не ажаб бұлса жамолинг шавқидин гулбез (гул хиди сочұвчи) күз». Қалби маърифатдан холи, қоронғулик асоратидаги одамни «саводхон» дейиш керак, биз эса нечундир билимлиарни назарда тутамиз. Аслида эса киши қалбидаги қоронғулик ҳайдаб чиқариліб, илм нури билан ёритилади. Яъни, савод ҳайдала-ди, чиқарилади, зиё эса олинади.

Шу каби хатоликлар күлкі, уларни бартараф қилиш ҳар бир зиёлининг бурчи ҳисобланиши баробарыда ёшлар ҳам бу масалани билишлари ва ечими-га эътиборни қараташлари жоиз. Катталар «лутфан» деган сўзни ишлатишни яхши кўрадилар. Таклифномаларга «тўйга лутфан таклиф этамиз», деб ёзилади. Ўзларича чиройли шаклда таклиф қилгандеклар. Сўзнинг маъносини билган одам эса бу таклифномадан ғашланиши мумкин. Чунки лутфан таклиф қилишимиз, «Асли сиз тўйимизга айтишга арзийдиган одамлардан эмассиз-ку, лекин бизнинг марҳаматимиз кенглиги туфайли истисно сифатида таклиф қиляпмиз», деган маънони англатади. Агар шу чиройли сўзни ўз ўрнига қўйиб «Тўйимизга лутфан ташриф буюинг», десак, гўзал маънони баён қилган бўламиз. Яъни, «Марҳаматингизни аямай, тўйимизга ташриф буюриб, бизларни қувонтиринг», деган бўламиз. Одамийлик талабидан қаралганда, мурожаат қилинаётган одамнинг ҳурматини адо этиш, мартабасини баландроқ қўйиш одати бор. Сиз катталарнинг муомаласида «тақсир» деган сўзни эшишиб турасиз. Бу «дўстим, сизнинг мартабангиз меникидан баландроқдир», деган маънодадир ва бу камтарлик белгисидир.

Кишининг киши томонидан ҳурматланиши тил – ширин сўз орқали бўлади. «Сен» ҳам, «сиз» ҳам бир оғиздан чиқади», дейдилар. Халқимиз «сиз»га одатлан-

ган. Шу боис ҳам Расулуллоҳ (с.а.в.) номларини тилга олганимизда эҳтиром билан сизлаймиз. Русларда, арабларда, туркларда ҳатто ота-оналарини ҳам сенсираш одати борки, шу боис ҳам Пайғамбаримизга (алайҳиссалом) нисбатан ҳам «сен» шакли қўлланилади ва бу уларда айб саналмайди. Бизда эса ҳурматсизлик ҳисобланади.

Ҳаётда барчани сенсирайдиганлар ҳам учраб туради. Гўё сизласа амал отидан тушиб қолгандай туюлса керак-да. Сенсираш бизда манманликни намойиш қиласди, холос. Водий томонларда гўзал одат бор – фарзандларини ҳам сизлайдилар. Тошкентда кишининг ўзи бўлмаса-да, сизлаб ҳурматланади. Масалан: «Аданг уйдами?» деб эмас, «Аданг уйдамилар?» деб сўралади. Жавоб ҳам шунга яраша: «Адам ишда» эмас, «Адам ишдалар». Фарзандларни оқил сўзлашга ўргатмоқдик айнан шу ҳолатдан бошланади. «Мактабда ўқитувчинг нима деди?» деб эмас, «Ўқитувчинг нима дедилар?» десак фарзандимизни чиройли тарбия қилган бўламиз. Чиройли ва оқил сўзловчиларнинг «ота-онасига раҳмат!» деб дуо қилиниши бежиз эмасдир. Оқил сўзламакни бола кўчада ёки мактабда эмас, дастлаб уйида ўрганади.

Сафарда эканимизда бир одамни кўрсатиб, унга таъриф бердилар. Ўша одам ҳеч кимни сизламас экан. Маълумки, «лар» қўшимчаси фақат сизлашни эмас, кўплик маъносини билдиради. «Ҳорманглар», десак асосан кўплик маъноси назарда тутилади. Ўша одам ҳурмат маъноси англашилиб қолмасин учун «ҳорманглар», демай «ҳамманг ҳорма!» дер экан.

Истанбулда чорраҳадаги ҳаракат тартибини назорат қилаётган полиснинг муомаласидан ғоят таъсирланган эдик. Биздагилардан фарқди ўлароқ, у ердаги полис автомашина ҳайдовчиларининг кўча ҳаракати қоидасини бузишини пойлаб турмай, йўловчиларга хизмат қиласи эканлар. Лозим бўлган онда автомашиналар ҳаракатини тўхтатиб, пиёдаларга йўл очар экан-

лар ва «ўтайлик» дер эканлар. Биз шу сўзга эътибор қилдик. «Ўтинглар!» ёки «ўтинг!» дейилса ҳам ҳурмат оҳанги сақланади. Лекин бу шаклда буйруқ оҳанги ҳам мавжуд. Шу оҳангдан қочиш учун лутфан «ўтайлик», дейишар экан.

**Умидимиз юлдуздари**, сиз атрофингизда бундан ўзгача ҳолатларга кўп гувоҳ бўлгансиз. Таққослаш дуруст бўлмаса-да, ибрат юзасидан ўзимиздаги аҳволга боқайлик: аввало милиционер биродаримизнинг пиёдаларга бундай хизмат қилганларини учратганимизча йўқ. Шундай хизмат қилган тақдирларида ҳам «Қани, тезроқ бўла қолларинг! Ҳой ота, намунча лалляясиз!» каби муомалаларга гувоҳ бўлармилик, валлоҳи аъзлам! Ҳар ҳодда автобус, троллейбусларда шунаقا муомалаларга кўнишиб қолганимиз. «Тушадиганлар олдинга ўтсин», «Кира ҳақини тўлаб қўйинглар»... Бунинг ўрнига «Барака топгувлар, кира ҳақини тўлашни унтиб яна гуноҳкор бўлиб қолмайлик», дейилса-чи? Ажаб! Ажаб! Йўловчи кира ҳақини тўлайди. Эҳтимол, ҳайдовчининг ширин сўзлиги учун кўшимича ҳақ тўлаши керакдир? Сўз шамол бўлса, ҳақоратли ёки кўпол сўз елевизак каби заарли эканини билсак-да, «елвизакка чидаймиз», деб ўзимизни ўзимиз қийнаб юрамиз.

**Умидимиз юлдуздари**, тил ҳақида фикр юритилганда сизга айтадиган танбехларимиз ҳам бор. Кўпгина тенгдошларингиз оғизларидан қандай бемаъни сўзлар учайдиганига эътибор бермайдилар. Мактабларда бўлганимизда ҳатто қизларнинг оғзидан «эй ҳариф», «козёл», «қулоққа лағмон илма», деган сўзларни эшитиб ранжиймиз. Бундан ташқари, чет сўзларни қўшиб гапириш касаллиги ҳам борки, айрим тенгдошларингиз бу касалликдан қутулишга ҳаракат қилмаётганга ўжшайди. Аслида бу касаллик сизларга биз – катталардан юқсан. Улгайганингизда сиз ҳам бу касалликни болаларингизга юқтирмасангиз яхши бўларди. Сизнинг тилингиздан «короче», «вабще», «почти», «звонит қил», «очкилик бола», «шими утюгланмаган», «чистий

ўзбекча» каби кўп-кўп сўзлар мустаҳкам ўрин олганлиги афсусли ҳолдир. Мен ёшлар билан ҳар учрашувда бу масалага уларнинг дикқатини қаратаман. Ҳатто фелъетон ҳам ёзган эдим. Оғзидан чиқаётган сўзларга эътибор бермайдиган нодон бола номидан ёзилган мактубни эътиборингизга ҳавола қиласман:

### **«Пажалиска»**

Каминани йўқдаб онда-сонда бўлса-да, мактуб келиб турадур. Телевидение идорасидаги муҳтарам муҳаррирларнинг илтифоти ва ҳиммати ила ўзбек тилига доир муммаммолар хусусида берилиши бир кўрсатувда иштирок этиб эдим. Не баҳтки, бул сухбат томошабин ўртоққа маъқул тушиб, у зоти муҳтарамнинг кичкинагина мактубига арзимиз. Ижозатлари ила мазкурни эътиборларига ҳавола этсам:

«Хўрматли окахонла, бугун байрам баҳонасида беш-олти огайни кампания бўлиб балдем қилиб ўтирувдук. Узбекский тил ҳақидаги передачани кўрдук. Ништэк гапларни этдиyla. Нўй, бир братан гапирганда қулоққа лапша осди. Ваабше қойил эмасмиза унга. Ҳозир ўзбек тили государствений тилга полний ўтган-ку? Ҳаммамиза чистий ўзбекча гаплашишимиза керакми, аbezательний керак. Ман бунаقا болтуналарни савсем ёқтиримийман. Ўша болтун братан «трамвайга ўтирудук», дейди. Бизани предкалагаримиза «трамвай» дейшишмаган, ўзбекчасига «кўнка» дейшишган. Ўзбекчани чересчур яхши билмасанг, нима қиласан гапириб, одамларни настроениясини бузиб. Пачти ҳаммамиза шу мнениядамиза. Ҳаммамиза патриот бўлишишимиза керак. Если ҳаммамиза все как один чистий ўзбекча гапиришга ўтмасак, минг старатса қиласи, ҳамма ишишимиза капейка бўлиб қолади. Ман ўзбек тилига тўст этдим. Ҳамма ўзбек тили учун бир рядда бўлиши керак, орада биттаям места свободна қолмасин, дедим. Ҳамма до дна ичди.

Силяям бизани паддержка қиласила, деб подписими-ни қўйдим. Ман Красний мост кварталидаги домда турраман. «Раджи золотой» десайла, ҳамма точна кўрсатиб беради. Оқ брюк билан позалоченний очки тақиб юраман. Билагимда циганкалардан олган браслетим ҳам бор. Бошпурт бўйича Ражабтилла Каримтиллаевичман. Гапимни яна битта добавкаси бор: сила билан отделна ўтириб, отдуши гаплашмоқчиман. Согласна бўласила, силага неудобна бўлмайди, деган мнениядаман. О, кейми?»

Дилни ўртаб юборгувчи бу мактубга жавобимиз тайин:

– Нима ҳам дердик, пажалиска деймиз-да...

**Умидимиз юлдузлари**, бу сатрларни ўқиб кўз олдингизга балки бирор дўстингиз келгандир. Сиз бундай ноқисликлардан холидирсиз. Сизга баракалла, деб, ўртоғингизни бу касалликдан қутулишига ёрдам берасиз, деган умид ила мавзуни давом эттирамиз.

**Ҳикоят**. Икки шоир одил подшоҳ Нўширавоннинг зиёфатида ҳозир бўлдилар. Бири баланд овозда байт ўқиди:

Яхшилигим қайтсин, десанг сен,  
Яхшилик қил, яхши ўй ўйла!

Навбат иккинчи шоирга келганда бу байтни ўқиди:

Ёмонлигим қайтмасин, десанг,  
Ёмон бўлма, ёмон ўй қилма!

Бу байтларни эшитган Нўширавон хушҳол бўлиб, биринчи байтни ўқиган шоирга минг дирҳам, иккинчисига эса беш юз дирҳам ҳадя бермоқликни амр этди. Шунда вазирлардан бири ажабланиб сўради:

– Эй одил амирим, уларнинг байтлари бир маънода бўлгани ҳолда не учун ҳар хил тухфа бердингиз?

Нўширавон шундай жавоб қилди:

– Рост, маъно бир. Бироқ, сўзда тафовут бор. Бирин-чининг сўзи бошдан-оёқ яхшилик ҳақида бўлди. Иккингчисиники эса кишига фақат ёмонликни эслатди.

**Яна бир ривоят.** Бошқа замонда ва бошқа мамлакатда шунга ўхшаш воқеа содир бўлган экан. Подшоҳ бир бегуноҳни ўлдирмакка амр этди. Ул бечора ноумидлик ҳолатида қабиқ сўзлар айтиб, подшоҳга дашном берди, андоқким, дебдурлар: «Ҳар кишиким жонидин кечар, кўнглидан ҳар на сўз бўлса, они кўрқмай изҳор этар». Подшоҳ у одамнинг дашномига тушунмай, вазирларидан «Ул на сўз айтурса?», деб сўради. Оқил вазир дедики:

– Эй подшоҳим, ул бечора айтурким: «Ҳар киши қаҳру фазабин ютиб, халқнинг гуноҳин ўтиб, эҳсон қилса, Ҳақ Таоло уни дўст тутар ва жами гуноҳидан ўтар».

Подшоҳга бу гап хуш келиб, айбланувчининг гуноҳидан ўтди, ўлим ҳукми бекор бўлди. Алҳол, яна бир ғофил вазир бор эдиким, оқил вазирга қараб деди:

– Подшоҳнинг сұҳбатида сандин ва мандин ёлғон сўз айтмоқ муносиб эмасдур. Бу киши подшоҳга дашном қилди. Сен бу сўзларингни ёлғон айтурсан!

Подшоҳга ғофилнинг сўзи нохуш келиб, ундан юз ўтириб деди:

– Сенинг бу рост сўзингдан унинг ул ёлғон сўзи манга хўб яхши кўринур, нединким, унинг бу сўзи амният ва маслаҳат биносига истеҳком берур ва сенинг сўзинг фасод ва шарорат турғузмоқни тақозо қилур. Андоқким, хирадмандлар айтубдурлар: «Маслаҳатомиз ёлғон сўз фитнангиз рост сўздин яхшироқдир».

Бу вазиятда подшоҳ «Ҳар бир сўзни ҳақиқат деб сўзлайвериш като, аммо ҳақ сўзни тинглаш ва унга амал қилиш – фарзdir», деган ҳикматга амал қилган эди.

Жўшон ҳазратларининг китобларида ажиб воқеа баёнини ўқиб хотирлаб қолган эдим.

Үн саккизинчи асрда леди Монтегу деган хоним Инглистан элчиси бўлмиш эрига ҳамроҳ бўлиб Истанбулга келади. Бу ерда кўрганларини мактублар тарзida ёзиб, китоб ҳолида чоп эттиради. Шу китобда ёзишича, у Фотима Султон деган хушсурат ва хушхулқ аёл билан танишади, уни ёқтириб қолади, гўзаллигидан ҳайратланади ва инглизларга хос сўзамоллик билан ҳазиллашади:

– Хоним афанди, сиз жуда гўзалсиз, шу қадар чиройлисизки, бу ерга келган-кетган хотинлар ҳуснингиздан ҳайратда. Агар Англияда бўлсангиз эди, эркаклар атрофингизда гирдикапалак бўлишарди.

Хоним афанди бу инглизча лутфдан бир чўчиб тушиди. Чунки инглиз завқи, хоҳиши, лутфи мусулмонникидан тамоман фарқ қиласди. Хоним афанди газабланади-ю, аммо начора, у леди меҳмони... Шу боис ғоят эҳтиёткорлик ва назокат билан шундай жавоб қайтаради:

– Сўзларингизга ишонмайман, инглиз эркаклари гўзаллик қадр-қимматини билганларида эди, сизни бу ерга зинҳор жўнатишмас эди.

Бу мулоқатдан қаттиқ таъсиранган инглиз хоним мактубида бундай ёзади:

«Азизим, бу нуктадонликка боқ! Бу зарофатга боқ! На қадар зарифлик! Нозиклик! На қадар зариф инсонлар!»

Ҳа, буни бир ўқ билан икки қуённи уриш деб атайдилар. Хоним афанди, аввало, меҳмоннинг гўзаллигини лутф билан эътироф этди ва инглиз эркакларининг аёлларга нисбатан муносабатлари аянчли ва шармандали эканини билдириди.

Ҳазрат Сўфи Оллоҳёрдан ўқиймиз:

*Мусулмон ўғлида бўлса сучук тил,  
Олиб келса бўлур бир қий била фил.*

**Маъноси:** Мусулмон боласи ширинсўз бўлса, филни ип билан йўлга солса бўлур, дейилмоқчи.

Инсон боласи ҳатто душманига ҳам ёмон сўз айт-масликка ҳаракат қилиши керак. Душманни ислоҳ этувчи сўз айтиш уни кўп балолардан асрайди.

*Сучук лафзи билан мўри хирадманд,  
Солур зўр аждаҳонинг оғзина банд.*

Дейилмоқчики, ширин сўз билан ақдли қумурсقا (чумоли) баҳайбат аждаҳонинг оғзига банд солади. Бундан мурод: кимсанинг ўзи заиф бўлса-да, яхши гапи билан улуғ мартаба эгаларига ўтиг тузогини солиб, тўғри йўлга йўллай олади.

*Мулойим тил билан беҳарбу безарб,  
Бирорни келтурурлар шарқдин гарб.*

Дейилмоқчики, мулойим сўз билан ҳеч бир уруш-талашсиз бирорни машриқдан мағрибга келтура олурлар.

*Бу эрлар олмайин бир игна қўлга,  
Солурлар неча гумроҳларни йўлга.*

Сучук тилли эрлар ҳеч бир уруш қуролини қўлга олмай, биргина юмшоқлик билан қанча йўлдан озганларни тўғри йўлга соладилар («игна» сўзи уруш қуроли маъносида келади).

*Сучук тилдир ажаб ганжи муаззам,  
Ато қилган билан ҳеч бўлмагай кам.*

Яъни: ширин сўз шундайин ажойиб хазинаки, сарф қилган билан камаймас, шу боис уни бошқалардан қизғаниб юрма.

*Дема ҳарфеки, бўлса бемаоний,  
Агар тил ҳарзе бўлса, сан тил они.*

Маъноси будир: агарчи гапирав экансан, сўзинг-нинг ақалли бир ҳарфи ҳам маъносиз бўлмасин. Мабодо тилинг ботил ва беҳуда сўзлар сўзлайверса, унда сен бундай тилни тишлаб ташласанг ҳам бўлади. («Ҳарза» – беҳуда, маъносиз вайсаш, демак. Китобнинг айрим нашрларида «агар **тил заҳарди** бўлса, тил они» деган шаклда ҳам ёзилган. Яъни, беҳуда вайсайверадиган тилни тилиб-тилиб ташла, дейилмоқчи.)

*Калиди ганжи маъноким, забондур,  
Анга бир нуқта тушса, кўп зиёндур.*

Дейилмоқчики, маънолар хазинасининг очқичи – тил. Қулфнинг ичига бирор майда нарса – чўп тушса ҳам зиён бўлади. Калит ишламай қолиши мумкин. Байтдаги «нуқта»дан мурод – араб ҳарфларида «забон» сўзидағи «б» нуқтаси ёнига яна бир нуқта тушиб қолса, маъно ўзгариб, бу сўз «зиён» деб ўқилиши мумкин.

**Ривоят.** Хитой, Ҳинд, Эрон ва Рум подшоҳдари бир ерга йифилиб: «Ҳар биримиз биттадан ҳикмат айтайликки, дунё тургунча турсин», дедилар.

Хитой шоҳи деди:

– Мен айтган сўзимни қайтариб олишдан кўра, сўзни оғиздан чиқармасликка ҳаракат қиласман.

Ҳинд шоҳи деди:

– Мен ўз фойдасини кўзлаб айтган сўзи зарар берган ва ўзини ҳалок қилган одамга ҳайрон қоламан.

Эрон шоҳи деди:

– Оғзимдан чиқмаган сўзим – қулимдир, айтганим эса – хожам.

Рум шоҳи деди:

– Мен айтмаган сўзимдан ҳеч вақт пушаймон бўлмаганман. Айтганимдан эса тез-тез пушаймон бўламан. Шоҳларнинг индамаслиги фойдасиз ва бе-

маъни сұхбатлардан кўра яхшидир. Инсон ҳар нарсадан кўпроқ ўз тили туфайли балога йўлиқади.

Ҳар киши Низомий Ганжавий ҳазратларининг бу насиҳатларига амал қиласа кам бўлмас:

*Олдин билиб олиб, кейин сўзлагил,  
Олтин топиб, сўнгра харжин кўзлагил.*

Оқил сўзламак фазилати ҳақида гапирганда сұхбатда ким аввал сўз бошлаши керак, сўрамоқ одоби қандай бўлиши керак, деган саволларни четлаб ўтиш мумкин эмас. Аввали шуки, катталар сўрамасдан туриб, ёшларнинг сўз бошлашлари одобсизлик саналади. Ишончли бўлмаган кишининг олдида айтар сўзни ўйлаб гапириш икки карра муҳимдир. Кимки бошқаларни ўз ҳузурига чорлар экан, сўзни шу чорлаган киши бошламоги жоиз. Сўрамасдан олдин сўз бошлаш инсоний одатларга зид бўлиб, оқиллар таърифига кўра, бу ҳайвонлар қаторидаги иш бўлур эди. Телба, тентак, ақли заиф бўлганларгина бошқаларнинг савол ва қизиқишлигини кутиб турмасдан гап бошлаб юбораверадилар. Шунинг учун улар кўп дакки эшитишади. Байт:

*Қора бошга ёвуз ёвдир қизил тил,  
Не-не бошни еди, яна егай, бил!*

**Латифа.** Бир гадо овқатланиб ўтирган кишилардан: «Нима еяпсизлар?», деб сўради. «Заҳар» деб жавоб бердилар. Шунда гадо бетакаллуф равишда таомга қўл узатиб дедики: «Заҳардан менга ҳам беринглар, сизлар ўлсангизлар, менга ҳаётнинг қизиги йўқ».

Ҳар куни ҳар биримиз ўнлаб, ҳатто ундан-да кўп савол-жавобларнинг гувоҳи бўламиз. Ўзимиз кимлардан-дир, ниманидир сўраймиз, кимларнингдир саволига эса жавоб қайтарамиз. Баъзан «Шунақа ҳам бемаъни савол бўладими?» деб ғашланамиз. Баъзан саволга яраша жавоб бўлганини ўзимиз ҳам сезмай қоламиз.

**Ривоят.** Бир одам вазири аъзамнинг уйини излаб юриб, унинг ўзига дуч келди. Танимагани учун:

– Вазири аъзамнинг уйлари қаерда? – деб сўради.

Вазири аъзам ўзининг уйини кўрсатиб қўйди-ю йўлида давом этаверди. Излаган одам унинг уйини топиб бориб, эшикни тақиллатди. «Хожамиз яқинги-нада чиқдилар», деган жавобни эшитиб, кечгача кутди. Кечки пайт вазири аъзам қайтгач, «Вазири аъзам сизмисиз? Ҳали ўз уйиниизни менга кўрсатиб кетавердингизми? Ахир мен сизни излаб келувдим-ку? Бир бечорани куттириш адолатданми?», деб ранжиди. Шунда вазири аъзам дедики:

– Биродар, сиз мендан «вазири аъзамнинг уйлари қаерда?», деб сўрадингиз. Сўроғингизга муносиб ра-вишда уйни кўрсатдим. Агар «Вазири аъзамни қаердан топаман?», деганингизда «Менман», деган бўлардим ва сиз кутиш азиятидан қутулар эдингиз. Сиз мендан эмас, тилингиздан шикоят қилганингиз дуруст.

Шу вазири аъзамга подшоҳ: «Пойтахтда нечта сўқир, нечта басир бор, аниқдаб беринг», деди. Шунда вазир уйига бориб йифма сўрини (каравот) хизматкорига кўтартириб, бозорга олиб борадиган серқатнов кўчага келтирди-да, бир қисмини йигиб, қолганини йифмоқчи бўлаётгандай ҳаракат қилиб турди. Шу пайт подшоҳ атьёнлари билан шу кўчадан ўтиб қолди. Аввал атьёнлар, сўнг подшоҳнинг ўзи «Нима қиляпсиз?» деб сўради. «Нима қилаётганимни ҳали кечки пайт айтаман», деди вазири аъзам. Улар кетгач, бошқалар ҳам қизиқиб сўрайверишли. Вазири аъзам хизматкорнинг қўлига бир дафтар бериб: «Нима қиляпсиз?», деб сўраганларни кўзи ожизлар саҳифасига, «Бу ерга нима учун сўри қўймоқчисиз?» деганларни кўзи очиқлар рўйхатига ёзмоқни буюрди. Кеч киргач, рўйхатни подшоҳга тақдим этди. Подшоҳ кўзи ожизлар рўйхатида ўзномини кўриб фазабланди. Вазири аъзам изоҳ бердики:

– Давлатпаноҳим, ҳали кўчада сўрини йиғаётганимда «Нима қиляпсиз?» деб сўрадингиз. Бошқалар ҳам

шундай деб сўрашди. Кишининг нима қилаётганини кўрмаган одамгина «нима қиляпсан?» деб сўраши мумкин. Шу боис сизни ҳам кўзи кўрмайдиганлар рўйхатига ёздирдим. Қаранг, бу рўйхат кўрадиганлар рўйхатига нисбатан анча узун.

Бу изоҳ подшоҳга маъқул келиб, вазирига ҳадя берди.

Суҳбатлашиб ўтирган одамнинг бири иккинчисидан баъзан «Мен боғдан келсам, сен тоғдан келасанга!» деб ранжийди. Айрим суҳбатлар Мавлоно Румий ҳикматларидағи воқеани эслатади.

**Ҳикоят.** Анчадан бери хаста ётган одамнинг бир кар маҳалладоши бор эди. Дўстлари унга «Хаста биродарингни шу пайтгача ҳам йўқламабсан-а?», деб танбеҳ бердилар. Бу гап карга таъсир қилиб, дарҳол зиёратга отланди. Йўлда бора туриб ўйланди:

– Мен карман, у эса хаста – ғоят паст овозда гали ради. Ҳеч нарсани эшитмасам, қандай гаплашаман?

Ўйлай-ўйлай «Беморнинг гапларини юздаги ифодадан билиб оламан, – деб қарор қилди. – Уйга киргач «Қандайсан?» деб сўрайман. У хазин табассум қиласди, шу жилмайиши «яхшиман», дегани бўлади. Шунда мен «Алҳамдулилаҳ, жуда ҳам хурсандман», дейман. Кейин «Нима ичиб, нима еяпсан?», деб сўрайман. Албатта «Шўрва» ёки «сут», деб бирон таомнинг номини айтади. Шунда мен «Ош бўлсин», деб дуо қиласман-да, «Қайси табиб қаравяпти?», деб сўрайман. «Фалончи табиб», деб биронтасининг номини билдиради. Мен «У табибининг ғоятда қўли енгил, яхши даволайди», деб кўнглини кўтараман», деган тайёргарлик билан bemornинг уйига кириб борди. Режаси бўйича «Қалайсиз, қўшнижон», – деб сўради. Бемор шукр ва сабр қилувчилярдан эмасди. Шу боис кар кутгандай «Худога шукр, яхшиман», дейиш ўрнига маҳзунлик билан:

– Касалим оғир, ўляпман, – деди. Кар бу гапни эшитмаса-да, юзидаги хазин табассумдан ўзича хулоса чиқариб, суҳбатини давом эттирди:

– Оҳ! Оҳ! Жуда хурсандман, Худога шукр!

Бемор бу одамнинг карлигини унутиб, гапидан разабланди. «Бу одам душманим экан-да, билмай юрган эканман», деб ўйланди. Кар эса давом этди:

– Нима еб, нима ичяпсиз?

– Заҳар еб, заҳар ичяпман, – деди bemор аччиқланниб.

– Ош бўлсин, – деди кар. – Қайси табиб келиб турибди?

– Азроил келиб-кетяпти.

– Оҳ, оҳ! Унинг қўли жуда енгил-да, яхши даволайди.

Шундай деб ўзича bemорнинг кўнглини кўтарган бўлиб, ўрнидан турди. Унинг душман эканига қатъий ишонган bemор эса разаб ўтида қовурилиб қолаверди.

Мавлавийнинг бу қиссалари кишилар ўртасидаги баъзи англашилмовчиликларни яққол кўрсатиб беради. Салкам саккиз аср илгари баён қилинмиш бу каби воқеа бугун айнан эмас, рамзий маънода ҳаётда кўп учрайди. Айримлар бу дунёнинг машаққатлари остидаги касал одамга ўхшайдилар. Баъзи одамлар эса илмдан, одоб-ахлоқ ва фазилатдан жуда узоқ бўлганлари туфайли нозик туйғуларни англамайдиган, ҳақиқатни тушуниб етмайдиган карга ўхшайдилар. Уларнинг ўзаро суҳбатлари, ҳатто меҳрибончиликлари ҳам ҳақиқий эмас. Бундай кишилар ҳар қандай гапни ўз тушунчасига кўра англаб, шунга қараб, бошиб-қалар билан дўст ёки душман бўладилар. Баён этилган воқеа сувратга эмас, сийратга қараб иш тутсанг тўғри бўлади, деган мазмундаги сабоқдир. Чунки яхши тушунмаган сўзлар ҳар икки томоннни ранжитади. Гапини яхши тушунтира олмаган киши охирида на-домат чекади.

Мавлавий ҳазратлари ташқи белгилар, сўзлар шаклига эътибор қиласлик, балки сўзнинг маъносига ва самимийлигига эътибор бериш лозимлигини кўп таъкидлайдилар. Кимнингдир сизга айтган сўзлари сод-

да, тўпори туюлиши ҳам мумкин. Лекин чиройли гапирган одамга нисбатан унинг муҳаббати сохта эмас, тами-ғаразга асосланмаган. У сизга садоқатли. Юракдан айтилган гаплар айтиувчининг садоқатини ифодалайди. Шу боис ҳам қалби пок кишиларнинг суҳбати барча учун ёқимли бўлади. Зеро, инсон қалби қанча тоза, саришта бўлса, илму ҳикмат унда шунча акс эта-ди. «Кўнгил – жавҳар, сўз эса – араз (ҳодиса)», – дейдилар Румий ҳазратлари. Агарчи киши фикрини сўз билан ифодаласа ҳам, лекин бу сўз кўнгилдан чиқдими ёки йўқми – муҳими шу! Сўз – қурол, мақсад эса кўнгил. Кўнгил ўртамаса, эҳтиросларга тўлишмаса, сўзда таъсир бўлмайди. Айниқса, бир гарифнинг кўнглини шод қиласидан сўз айтиш олтин хазинаси топишдан афзалроқдир. Чунки бу асл инсонийлик гав-ҳарини улашишдир.

Мухтасар сўз айтмоқнинг афзалигини таъкидла-ган ҳолда, бу мавзудаги суҳбатда қисқаликка эришолмаганим учун узр сўрайман. Донолардан ўқиб, ўрган-ганим анчагина эдики, уларнинг, баҳолиқудрат, бар-часини сиз азиз умидимиз юлдузлари билан баҳам кўрмоқни истадим, бирини баён этиб, бошқасини четда қолдиришга кўнглим бўлмади. Узримни қабул қилишингизга умид билдириб, кейинги мавзуга ўтаман. Аслида бу алоҳида мавзу эмас, балки ҳозирги суҳба-тимизнинг мантиқий давомидир.

### **Саломнинг жосияти**

*Саҳроларда иш беради бўлса хум,  
Соясидан баҳра олади гужум.  
Салом берииш бўлар гапнинг қалити,  
Эй яхшилар, ассалому алайкум.*

Пайғамбаримиз алайҳиссаломдан сўрадилар: «Қай-си амал энг яхши амалдир?» Жавоб бердилар: «Тани-ган ва танимаган одамингга таом ва салом бермогинг».

Салом бериш – суннат, алик олиш вожибdir. Салом ўзига хос дуо, ибодатdir.

**Умидимиз юлдуздари**, ёдингиздадир, эртакларда кўп ўқигансиз: даҳшатли аждаҳолар ёки алвастилар маконига келиб қолган қаҳрамонлар ёвузни кўриши ҳамон салом берадилар. Шунда аждаҳо нима дейди, эсингиздами? Ҳа, «Саломинг бўлмагандা икки ямлаб, бир ютардим», дейди. Бу нимани англатади? Салом дуоси ҳар қандай ёвузнинг кўнглини юмшатиш қурдатига эга. Ёдингизда бўлса, силаи раҳмга доир суҳбатимизда «Қариндошларни салом билан бўлса ҳам йўқланг», деган мазмундаги шарафли ҳадисни тилга олган эдик. Демак, совға-саломлар ўз йўлига, саломнинг қадри эса ўзгача. Расууллоҳ (с.а.в.) Анас ибн Моликка (р.а.) хитобан дедилар: «Эй ўғлим, уйингга ва қариндош-уругингникига борсанг, саломлаш, бу салом сенга ва оила аъзоларингга барака келтиради». Қариндошларимизнинг кутлуғ хонадонларига саломсиз кириб боргудай бўлсак, олиб борган қаймоқ-нонларимиз уларга татимайди. Ўша қаймоқ-нон ейилгач, адo бўлади. Салом туфайли қилинган дуо эса яшаб қолаверади. Хонадонга гўшт ёки қовун кўтариб кирмасак, «Нега гўштсиз қуруқ келдинг?», деб ранжишмайди. Остона ҳатлашимиз билан салом бермасак, оғринадилар. Эҳтимол, «Бу одобсизни, бу бесаломни ким тарбия қилган?», деб ғазабланишлари ҳам мумкин.

*Худойим берибди инсонга қалом,  
Бемаврид иш қилиб тортмагин алам.  
Яхши ҳам, ёмон ҳам шундан билинар,  
Ким бўлса олдидан ўтма бесалом...*

Буни ҳаммамиз биламиз, шунинг учун ҳам ота-она азиз фарзандининг ҳали тили чиқмаёқ, жажжи қўлчаларини кўксига қўйиб салом беришга ўргатади. Тилидан биринчи марта «ассалом!» деган тотли сўзни эшитганида беҳад қувонади.

Саломнинг шаклида, ташқи кўринишида ҳар бир миллатнинг ўзигагина хос томонлари бўлиши мумкин. Бизда ўнг қўлини чап кўксига қўйиб, тавозе билан саломлашишнинг гўзал одоби мавжуд. Шунга қарамай, айрим одамлар икки кафтларини киндиклари устига қўйиб, эгилиб салом берадилар. Уларнинг бу ҳолати саломга нисбатан рукуга ўхшаб кетади. Киноларда кўрганмиз, ҳукмдор ёки бошқа амалдорлар ҳузурида руку нима экан, саждага ҳам борадилар. Эмаклаб келиб, ҳукмдорнинг оёғи остига сажда қиласидилар. Мана шундан сақланиш керак. Салом бироннинг устунлигини, ўзининг эса пастдалигини таъкидлаш учун эмас. Бу одат қадим подшоҳларнинг ўзларини буюк деб ҳисоблаган даврларидан мерос бўлиб ўтиб келган бўлса, эҳтимол.

Саломнинг шакли турлича бўлгани билан мазмун-моҳияти бир. Саломлашишни бизга Яратган роббимизнинг Ўзи буюради. «Нисо» сурасида айтадики: «Қачонки сизга бир саломлашиш ила салом берилса, сиз ундан кўра яхшироқ алик олинг ёки худди ўзидек жавоб беринг». Солмон Форсий (р.а.)дан мазкур оятнинг амалдаги ҳолатини акс эттирувчи шарафли ҳадиски: «Бир одам Пайғамбаримиз (с.а.в.) ҳузурларига келиб:

– Ас-салому алайка, йа Расуллуроҳ! – деди.

Расуллуроҳ (с.а.в.) у одамга:

– Ва алайкас-салому ва роҳматуллоҳи, – дедилар.

Кейин бошқа бир одам келиб:

– Ас-салому алайка, йа Расуллуроҳи ва роҳматуллоҳи, – деди.

Расуллуроҳ (с.а.в.) унга:

– Ва алайкас-салому ва роҳматулиллаҳи ва барокатуху, – дедилар.

Сўнгра яна бир одам келиб салом берди:

– Ас-салому алайка, йа Расуллуроҳи ва роҳматулиллоҳи ва барокатуху.

Расуллуроҳ (с.а.в.) унга худди ўзидай жавоб қайтардилар:

– Ва алайкас-салому ва роҳматулиллоҳи ва барока-туху.

Шунда у одам мазкур жавобдан ажабланиб, деди:

– Эй Аллоҳнинг расули! Ҳузурингизга мендан олдинроқ фалончи ва фалончилар келиб салом бердилар. Сиз мендан кўра уларга яхшироқ жавоб қайтардингиз?

Шунда Пайғамбаримиз (с.а.в.) дедилар:

– Сен менга салом берганингда ошириб айтишим учун ҳеч нарсани қўймадинг. Аллоҳ: «Қачонки сизга бир саломлашиш ила салом берилса, сиз ундан кўра яхшироқ алик олинг ёки ўзидек жавоб беринг», деган. Сенга ўзидек жавоб бердим.

Абу Ҳурайра (р.а.) Расуллороҳ (с.а.в.)дан сўрадилар: «Йа Расулаллоҳ! Менга бир иш ҳақида хабар берингки, мен ўша ишни қилиб, жаннатга кирайин». **«Саломни ошкора қил**, очларга таом бер, силаи раҳм қил, тунда одамлар ухлаган пайтда қоим бўл. Сўнгра саломат ҳолда жаннатга киравер», – дедилар Пайғамбари-миз алайҳиссалом.

Мазкур ҳадисдаги **«Саломни ошкора қил»**, деган амалга дикқатимизни қаратайлик. Баъзан қайси бир биродаримизнинг имо-ишора билан салом бергани ёки бош иргаб алик олганига гувоҳ бўламиз. Бу чиройли одоб эмас.

Кўпинча давраларда салом бериш одоби ҳақида сўз кетса «Аввал ким салом бериши керак?» деган савол кўтарилади. Эр ва аёл рўпара келганда биринчи бўлиб аёл салом бериши керак. Бу билан аёл камситилаётгани йўқ. Агар эр салом берса, гўё аёлни гапга тортишга баҳона излагандай бўлади. Ўрнида айтиш лозимки, айрим мамлакатларда шаҳар ёки қишлоқларда аёллар билан кўл бериб кўришилмайди. Салом ва аликнинг ўзи билан кифояланишади.

Кўчада пиёда билан суворий (ҳозир машинадаги одам) учрашиб қолса, пиёдага машинада ўтирган одам салом беради. Чунки пиёда олдин салом берса, бу са-

ломдан мақсад замирида «Тұхтант», мени ҳам ола кетинг», деган тاما бўлиши мумкин. Бир киши кўпчилик орасига кирганда бир марта салом беради, ҳар бир одамга алоҳида-алоҳида салом бериши шарт эмас. Улардан бири алик олса кифоя. Агар ҳаммалари алик олишса савоб бўлади. Ўн киши ўтирган жойга тўрт киши кирса, бирлари салом берса бўлади, тўртовлари ҳам салом бериши афзалир, ўтирганларнинг ҳар бирлари алоҳида-алоҳида тўрт марта эмас, бир марта алик олсалар кифоя. Ўтирган ёки тик турган одамга юриб келган киши салом беради. Таомланаётган киши эса, аксинча, яқинлашган одамга салом беради. Чунки дастурхонга яқинлашашётган одам аввал салом берса, «овқатингга шерик қиласанми?» деган тاما яши-ринган бўлиши мумкин.

Ўтирган одамларга салом бериш масаласида яна бир баҳсли жой бор: айтайлик, чойхонада ўн одам шахматми ё нардими ўйнаб ўтирибди. Кириб келган одам одоб юзасидан уларга салом бериши керак. Лекин бу ҳолда салом бермагани маъқул. Чунки ўйинга банд одамлар алик олмасликлари ва бунинг оқибатида гуноҳкор бўлиб қолишлари мумкин. Кўпинча чойхонадаги ўйинчиларнинг бош иргаб алик олганларини кўрамизки, бу ҳам кишининг ғашини келтиради. Халқимиз одобига кўра каттами ё ёш болами салом бергач, алик олиниб, сиҳат-саломатлик, ҳол-аҳвол сўраплади. Бош иргаб алик олувчиларда бундай одоб йўқ. Бугун чойхонага бир юмуш билан кириб қолган ўсмир саломига шундай алик олинишини кўргач, эртага бош иргаб алик олган беодобни кўчада кўрса, салом бермай ўтиб кетса, ким айбор бўлади?

Кўчадаги ҳаракатни назорат қилувчи милиция ходимлари машинани тўхтатган онарида ўзларини танишитирдилар, ҳужжатни талаб қиласидилар-у ҳайдовчига салом беришни унугиб қўядилар. Эҳтимол, панжаларини чаккаларига олиб келишлари, русчасига айтганда «чест» беришларини салом ўрнига ўтади, деб

үйлашар. Йүк, бу ҳаракатлари салом ўрнига ўтмайди. Одоб юзасидан аввал салом бериб, бунинг эвазига алиқдан иборат хайрли дуо олганлари минг марта яхши. Агар кун давомида эллик одамни тўхтатиб салом берсалар, ўзлари эллик одамдан дуо олган бўладилар.

Савдо ходимлари ҳам бу ҳолатга эътибор беришлари шарт. Тижорат аҳли бошқа касб эгаларидан чиройли муомалалари билан ажралиб туришлари зарур. Баъзан дўконга кирсак, сотувчи (кўпроқ ёш сотувчи) шериги билан гаплашиб турган ёки кроссворд ечаётган бўлади. Кирган харидорга бир қараб қўяди-ю, «Сен келдингми ё ит келдими?» дегандай ўз юмуши билан банд бўлаверади. Айниқса, қизларда бундай беодоблик кўп учрайди. Агар сотувчи савдо билан банд бўлса ҳам, кириб келган харидорга салом берса, нур аланинурдир.

Биз бир даврага кирганимизда салом беришга одатланганмиз. Хайрлашар маҳалида «ассалому алайкум» дейиш хулқидан узоқроқмиз. Бу хулқни ҳам эгаллаб, хайрлашув саломини берсак, гўзал ва ёқимли бўлади. Қабристон ёнида ўтилаётганда, ичкарига кирилмаса ҳам салом берилади. Ўз уйимизга кираётганимизда ҳам хонадон аҳлига салом беришимиз керак. Айrim оиласарда эрталаб бир-бирларига салом бериш одати йўқлиги яхши одобдан эмас.

Бир ёш оила бузилиш даражасига етиб, маҳаллага арз билан чиқдилар. Бунаقا пайтларда қайноналар келиннинг кўп айбларини айтиб ташлашади. Менинг диққатимни қайнонанинг «келиним эрталаб салом бермайди. Қанча ўргатсан ҳам қулогига олмади», дейиши ажаблантирди. Шунда келиннинг онаси «Бир ҳовлида яшаб турса ҳам салом бераверадими? Бизнида бунаقا одат йўқ», деб изоҳ берди. Келинда саломлашиш одоби йўқлигига ким сабабчи экани шу изоҳдан кейин маълум бўлди.

**Умидимиз юлдузлари**, сиз уйда салом беришга ўргангансиз, ўқишига борганингизда устозларингизга

ҳам салом берасизлар, баракалла! Лекин тенгдошлар ингизга салом бермайсиз. Бир-бирингиз билан қўл бериб кўришасизлар-у, «қалайсан?» деб қўясизлар. Баъзиларнинг «салют!» ёки «привет!» деган одатлари ҳам борки, бу дуруст одоб эмас.

Хаммомда, ҳожатхонада салом берилмаслигини билсангиз керак. Кўп жойларда эрталаб уйғонгач, таҳорат қилинмагунча ёки то юз-қўл ювилмагунча салом берилмайди. Айрим жойларда эса бу одобга эътибор берилмайди. Уйқудан бош кўтарилиши билан кўринган одамга салом берилади. У одам эса ювуқсиз бўлса ҳам алик олаверади. Бу одатнинг қайси бири тўғри, деб баҳслалиш ортиқча. Албатта, салом дуоси покиза ҳолда қилингани маъқул. Лекин маҳалла ёки қишлоқ аҳли бунга одатланмаган бўлса-ю, сиз меҳмонга борганингизда ювиқсиз ҳолда салом бермаганингиздан ажабланишса, ўз одатингизни ҳилмлик ила тушунириб берганингиз яхши.

Куръон ўқилаётганда, номаҳрам хотинларга, намоз ўқиб турган одамга ҳам салом берилмайди.

Бизнинг одобимизга кўра, кичиклар катталарга салом берадилар. Лекин кичиклар баъзан болаликлирига бориб ё бирон нарсага чалриб, салом беришни унтишлари мумкин. Шунда катталар уларни дарров урушмай, салом берсалар, шунинг ўзи дакки ўрнида ўтади. Қўл бериб кўришища эса кичиклар аввал қўл узатишдан тийилишлари керак. Агар катта киши қўл узатса, эҳтиром юзасидан қўш қўллаб кўришмоқ афзал. Катта киши қўл узатмаса, салом беришнинг ўзи кифоя. Ҳол-аҳвол сўраш ҳам аввал каттадан лозим. Болалар, ёшлар салом беришганда биз – катта ёшлилар «Ваалайкум ассалом» дейишдан ташқари яна улар тушунадиган тилда «Баракалла!» ёки «Ота-онангга раҳмат!» ёки «Илоҳим баҳтли бўл!» деб қўшимча дуо қилиб, мақтаб кўйсак, унинг келажакда янада гўзал ахлоқ эгаси бўлиб етишишига ҳисса қўшган бўламиз. Қани эди, барча шу одатни ўзлаштирса! Кўчага чиққан

ўсмир-ёшлар уйга янада кўпроқ, олам-олам дуолар билан, таниган-танимаган ўнлаб одамларнинг хайрли тилаклари билан қайтган бўлардилар.

Салом бераётган одамнинг чеҳраси очиқ ва хурсанд бўлсин. Алик олувчининг кувончи юз-кўзларидан сезилиб туриши керак.

Телефон орқали саломлашиш ҳам ўзига яраша одобни талаб қиласди. Телефон жиринглаганда гўшакни кўтарган одам «Ассалому алайкум, лаббай», деса гўзал хулқ соҳиби эканини намоён этган бўлади. Ҳеч бўлмаса «лаббай» деса ҳам чиройли бўлади. Баъзан эшитиб, кўнгилни хира қиласдиган жавобларга диққат қиласдилек: «Ҳа, ким керак?» ёки «Алло, кимсиз, сизга ким керак?» Баъзилар эса русларга тақлид қилиб «Да!» деб қўйишади. Шундайлардан бири гўшакни кўтариб «Да, да!» деса қўнфироқ қиласи киши «Мен дадангиз эмас, поччангизман», деб пичинг қиласи экан. Ҳар ҳолда, инглизча «алло», русча «да»нинг ўрнига ўзимизнинг «лаббай» яхшироқ эшитилади. Дейлик, гўшакни кўтарилиб «лаббай!» дейилди. Шунда қўнфироқ қиласди албатта салом бериши, бу томон алик олгач, мулоқот бошланиши керак. Баъзан бунинг аксига гувоҳ бўламиз: «Алло, Гули борми?» ёки «Алло, Гулини чақириб беринг»... Баъзан эса ҳе йўқ, бе йўқ сўралади: «Бу ер қаердан?» ёки «Ким бу?» Шундай дейилгач, шубҳасиз «Сизга ким керак эди?» деган савол берилади. Ёки «Аввал қаерга қўнфироқ қиласётганингизни билиб, сўнг рақам теринг», деб жеркиб берилиши ҳам эҳтимол.

Телефон ҳақида гап кетганда, мавзудан салгина четга чиқсан-да, қўл телефонларидан фойдаланиш одобига тўхталиб ўтсак: ҳозир катта-ю кичикнинг қўлида телефон кўрамиз. Қаерда бўлса ҳам барадла овозда гаплашаверадилар. Бир куни хорижлик меҳмон билан ошхонада тамадди қилиб ўтирган эдик, ёнимиздаги сўрида ўтирган йигитлардан бири телефонда гаплаша бошлади. Меҳмон унга ажабланиб қараб-қараб қўйди. Йигит гапини мухтасар қилмади. Бун-

дан ғашланган мөхмөн ошхона ходимини чорлаб: «Бү укамизга айтинг, биз бунга таомланиш учун келгәнмиз, гаплары бўлса, идораларида гаплаш-синлар», деди. Ошхона ходими мижозини бэздириб қўйишдан чўчиб, уни инсофга чақирмади. Шунда мөхмөннинг ўзи танбеҳ берди. Хайриятки, йигит инсофли экан, айбини тушуниб, дарров узр сўради.

Бир куни тонг саҳардаги тўй ошида телефон жи-ринглади. Йигит бемалол гаплашаверди. Ҳатто «Хозир ошдаман», деб кекириб ҳам қўйди. Таассуф шундаки, йигит ўша гапларини уч соат кейин, ҳатто кечки пайт ҳам гаплашса бўлаверарди... Ана шундай ҳолатларда беодоб укаларимизга қўнгироқ қилиб: «Алло, фаросат борми?», дегимиз келади.

Асосий мавзуга қайтсак: биринчи бўлиб салом беришга «Кутадғу билиг»да яхши бир мисол бор. Зоҳид ва донишманд Ўзғурмиш подшоҳ Кунтуғди элиг ҳузурига келганида салом бермайди. Подшоҳ бундан ажабланади. Сабабини сўраганида донишманд дейди:

– Сенга атайлаб салом бермадим. Тўғри, салом бериш кишига соғлик, саломатлик тилашдир. Салом – соғликқа асос. У кишига эминлик, омонликдир.

*Омон берди эрга салом қилувчи,  
Саломатлик топди алик олувчи.  
Салом бўлди одам тинчига гаров,  
Соғлик олар салом билан қолувчи.*

Саломлашиш қоидасида улуғлар кичикка салом беришса, етук иш бўлади. Кичиклар камтарлик йўлини тутиб, улуғлар сўзини олса, ўзини улуғлик сари элтади.

Тасаввур қилингки, улғайган чоғингизда сиз бир идора раҳбари ҳузурига кирдингиз. Улуғлар одобидан ибрат олган раҳбар сизни салом бериб қарши олса, ишингиз битмаса ҳам бу хонадан кўнглингиз ёришиб чиқасиз. У билан қадрдонлардай сўрашасиз, ўртада-

ги суҳбат ҳам самимий бўлади. Агар тунд равища, ўтирган жойида саломингизга истар-истамас бош ирғаб алик олса-чи? Бу хонага кирганингизга пушаймон ейсиз. Ишингиз битса ҳам, кўнглингиз хира бўлиб чиқасиз. Бу раҳбарга иккинчи учрашмасликка онт ичасиз ва бундай кишиларга бу шарафли ҳадисни эслатгингиз келади: «Одамларнинг энг ожизи – дуога ожизлик қилган одам. Одамларнинг энг баҳили салом беришга баҳиллик қилган одамдир».

**Ҳикоят.** Ўзини хокисор олиб юрувчи, бойликни менсимовчи, доимо илм кетидан қувган киши бир олимнинг шуҳратини эштиб, зиёратига отланди. Кўлида ҳеч нарса бўлмагани учун йўл-йўлакай бир раҳон шохини олиб, тухфа сифатида олимнинг одига қўйди, ҳурматини баён қилиб, унинг қўлини ўпди. Олим унинг саломига алик олмади, лутфига эътибор ҳам бермади. Илм толибининг бундан дили оғриса-да, изига қайтмай, бир чеккага ўтиб, индамай ўтираверди. Олимнинг ҳаракатларини кузатиб ўзича деди: «Бу олим илмига мағурланиб кетибди. Бир оз ўтирай-чи, қани, нима гап бўлар экан, шунга қараб иш тутарман». Бу орада эшик очилиб, башанг кийинган бир киши кириб келди. Орқасидан эса тутун кўтарган хизматкори кўринди. Меҳмонни кўрган олим дик этиб ўрнидан турди, саломга алик олди, икки қўллаб сўрашиб, уни тўрга таклиф қилди. Хизматкор тутунни олимнинг қўлига тутқазди. Олим: «Хуш келибсиз, сизни кўришдан бағоят хурсандман», деб меҳмондорчиликнинг қоидасини ўрнига келтириб, зиёфатни бошлади. Зиёфатдан сўнг барча шогирдлари китобларини кўтариб, унинг атрофидан жой олишди. Олим билан бой орасида суҳбатни қизиқиб кузатаётган хокисор киши: «Бу олим беадаб киши экан, адабини бериш пайти келди», деган қарорда, ўрнидан туриб, олимнинг рўпарасига ўтиреди.

– Муҳтарам олим, бир мушкул масалани ечишга ёрдам берсангиз, – деди у одоб билан.

- Қандай масала, айт, – деди олим.
- Мавлоно, сиз бугун илму фазл даъво қилмоқда-сиз. Айтинг-чи, сизнинг фикрингизча, салом неча хил бўлади?
- Салом бир хил бўлади. Салом-алик қилиш барча кишиларга вожибдир, – деди олим.
- Китоблардан мен ҳам шундай маъно топганман. Лекин сизнинг ҳузурингизда салом икки хил экан. Сиз ўз гапингизга ўзингиз қарши чиқяпсиз.
- Бу бемаъни даъвони қаердан олдинг? – деб ғазаб-ланди олим.

– Сиз салом ва алиқда бой билан камбағал орасида фарқ бор, деб билар экансиз. Мен бир неча дақиқа илгари ҳузурингизга кириб, салом бердим. Қўлим бўшлигини кўриб, сиз алик олмадингиз. Кейин ёнингизда ўтирган бадавлат киши кириб келди. Хизматкорининг қўлидаги тугунни кўрдингиз-у, саломига алоҳида луфт билан алик олдингиз. Ўрнингиздан туриб, қаршиладингиз, ёнингиздан жой бердингиз. Шу ҳаракатингиз билан «Салом бир хил бўлади. Салом-алик қилиш барча кишиларга вожибдир», деган гапингизга ўзингиз қарши чиқдингиз. Муқаддас китобларда «Бирор сизга салом берса, унинг саломидан кўра яхшироқ қилиб алик олинг», дейилмаганми ахир! Сиз илмни бойлик топиш учунгина ўқиган экансиз. Биздек бечораларни шунинг учун ҳам хор тутдингиз!

Ўтирганлар илм толибининг гаплари ҳақ эканини тасдиқлаб, бош қимирлатдилар. Илм толиби бундан руҳданиб, гапини давом эттирди:

– Инсон учун меҳмон азиз. Мен уйингизга меҳмон сифатида келдим. Сиз эса инсонлар одатини ҳам поймол қиёдингиз. Меҳмонни ҳурматлаш ўрнига, саломига алик олишни ҳам лозим кўрмадингиз. Китобларда: «Кимки меҳмонни эъзозламаса, у одам эмас», дейилган. Яна бир ўринда: «Меҳмонга очиқ юз ва ширин сўз бўлиш савоби юз йиллик тоат-ибодат кабидир», дейилган. Сиз илмингизга мағурланиб, ён-атрофингизга

ҳар хил китобларни йифиб, бойлик тўплаш йўлига кирибсиз. Тўплаган китобларингиздаги илмга амал қиласангиз бундан нима наф?

Илм толибининг гапларини эшифтганлар унга оғарин айтдилар. Юзлари қизара бошлаган олим эса: «Эй биродар, нега менга ёпишиб оддинг? Ахир мен нима гуноҳ қилдим?» – деб гўдиранди.

– Сизни илмига амал қилмовчи десам, гапга ҳам тушунмас экансиз, – деди илм толиби. – Шунча гапим ва келтирган далилларим ҳам сизга таъсир қилмабди. Барча китобларда «Фақир ва бечора кишиларга кўмаклашинг, толиби илмларни ҳурмат қилинг», дейилган. Сиз бунинг аксини қилдингиз. Ёнингизда ўтирган бойни эъзозладингиз. Бизларни эса хор тутдингиз. Илм сиздек кишига ҳайфдир!

Бу гаплардан кейин олим хатосини тан олиб узр сўраган бўлса-да, илм толиби бундай кишидан илм ўрганишни номуносиб деб билиб изига қайтди...

Ҳар қандай ишқ-муҳаббат, меҳр-оқибат саломнинг тилла занжири билан боғланади. Суқрот ҳакимдан ибратки: «Дўстингга йўлиқдан вақтингда кулиб, очиқ юз билан кўриш. Яхши сўз билан унинг кўнглини кўтар. Дўстликнинг бошланиши мадҳ-сано биландир». Ҳа, дўстлар бир-бирлари билан «ассалому алайкум» деб сўрашишмаса, саломнинг нима қиймати қолади? Ҳар бир одам, ёшми-кattами, фарқи йўқ, саломнинг аҳволлар эшигини очувчи сеҳрли калит эканини унутмаслиги шарт.

«Салом»нинг маъноси «тинчлик» демак. Миллатимизнинг саломлашиш одати «Ассалому алайкум», дейиш биландир. Салом узилган жойда одамийлик узилади. «Ёсин» сурасида жаннатга кирувчиларнинг Парвардигор томонидан салом билан кутиб олиниши хушхабари бор. Бизнинг «ассалому алайкум» дейишимиз билан айрим турк биродарларимизнинг «гун айдин» (кунингиз хайрли бўлсин), айрим озарбайжон дўстларимизнинг «сабоҳингиз хайр» (тонгингиз хайрли

бўлсин), инглизларнинг «гўд монинг», русларнинг «доброе утро»си орасида катта фарқ бор. Буларнинг барчасига нисбатан «ассалому алайкум»нинг маъноси тे-ранроқдир. Чунки салом эътиқод билан ҳам боғлиқ. Бу сўз: «Бу дунёда ҳам, охиратда ҳам саломат бўлинг! Дарду мусибатларга йўлиқманг. Сиз охиратда ҳам салим (саломат) бўлинг, жаннатга киринг, Аллоҳ сизни «Дорус салом» бўлган жаннат аҳлидан қиласин: азобдан, ғамдан, қадардан йироқ бўлинг!» каби хайрли тилакларнинг маъноларини ўзида жамлайди. Хайрлашар чоғида фарбликларнинг «бай-бай», русларнинг «до свидание»си билан бизнинг «Аллоҳга топширдим!» ёки «Аллоҳ паноҳида асрасин!» орасида ҳам жуда катта фарқ бор. Биз Аллоҳга топширамиз. Бир киши билан ажралаётган пайтимиизда у кишининг муҳофазаси-омонлигини Аллоҳдан сўраймиз. Яъни, «Сизни Аллоҳга топширдим, сизни Аллоҳ асрасин», деб дуо қила-миз.

Бу дуоларимиз эриниш ёки билмаслик оқибатида чала бўлиб қолади. Нима учун шундайлигини аниқ билмайман. Эҳтимол, айрим ҳолларда русчадан таржима таъсир қилгандир? Масалан, таом еб ўтирган кишига қараб улар «Приятного аппетита» деб тилак тилашади. Бу ўринда улар «желаю» («тилайман») сўзи-ни тушириб қолдиришади. Биз бу тилакни айнан таржима қилиб «ёқимли иштаҳа» деб қўямиз. Диққат қилмаймизки, иштаҳанинг ёқимсизи бўлмайди. Иштаҳа ё бўлади, ё бўлмайди. Шунинг учун ҳам ота-боболаримиз бу ҳолда «ош бўлсин», деб қўйишган. «С праздником!» табриги ҳам шундай. Унда «Поздравляю» («табриклайман») табриги тушиб қолган. Юқорида зикр этганимиз «Желаю Вам доброго утро» – «Сизга кунингизнинг хайрли бўлмоғини тилайман», бўлиши керак. Гапдаги сўзларни қисқартириб ишлатишни хуш кўрувчи руслар хайрли тилакларини ҳам «думи юлинг-ган товуқ» ҳолига келтириб қўйганлар. Хусусан, «здравствуйте» – соғ бўлинг деганидир. Ҳарбийлари «здрав

желаю», деб тўлиқ айтадилар. Бу муаммони ҳал этиш рус тилшуносларининг ўзларига ҳавола. Биз қисқартиришни улардан ўрганмасак бас, деймизу ёмон одатларини такрорлаётганимизни сезмаймиз. Масалан, «раҳмат», «ташаккурлар» ёки «узр» деб қўйиш одатимиз бор. Булар ҳам «думи юлинган» тилаклардир. «Раҳмат» – Сизга «Аллоҳнинг раҳмати бўлсин!», (Русларнинг «спасибо»си ҳам «Спаси тебя Бог» – «Сени Худо асрасин», демакдир) «Ташаккуримни (ёки «узримни») қабул қилинг», деб тўлиқ айтишга эринамиз. «До свидание», «пока», деган тилакларни «Ҳозирча хайр», «Кўришгунча» ёки «Кўришгунча омон бўлинг», деймиз. Афсусли жойи шундаки, бундай чала тилакларни теле ёки радио бошловчилар тилидан кўп эшиитамиз. Қизиқ-да, кўришгунча омон бўлсак, ундан кейин-чи? Бунинг ўрнига «Ҳамиша омон бўлинг» ёки «Сизни ҳамиша Аллоҳ паноҳида сақласин», десак дуо мукаммал бўлади. Биз бирордан раҳмат эшиитганимизда русларга тақдид қилибми «не за что» – «арзимайди», дейишига ўрганиб қолганмиз. Бу сўзни икки хил маънода тушуниш мумкин. «Менинг қилган бу яхши ишим арзимаган бир иш» ёки «мен катта иш қилдиму айтаётган раҳматингиз бу хизматим олдида ҳеч гап эмас, арзимайди». Русларда бошقا жавоб ҳам бор: раҳмат айтилганда «пожалуйста» – «марҳамат», дейишади. Бирордан раҳмат эшиитганимизда «Аллоҳ рози бўлсин!» дейишига тилимиз бормаса, «марҳамат», деб қўя қолайлик. Бу сўз мағзизда «сиз менга яхшилик қилганингиз учун Аллоҳ сизга марҳамат қиласин», деган дуо маъноси жамлангандир.

Ёнимиздаги одам аксирганида «Соф бўлинг!» дейишига одатланиб қолганмиз. Бу ҳам русча «Будьте здоровы!» дейилювчи тилакнинг ўзбекча таржимасидир. Албатта, бу хайрли тилак. Аммо мусулмонларда бундан ҳам аълороқ одат бор. Аксирган одам ёнидагиларга эшиittiриб «Алҳамдуиллаҳ!» дейиши лозим. Чунки Одам алайҳиссаломга жон киргани ҳамон аксириб,

Аллоқ таборака ва таоло илҳомлантиргани сабабли шундай деганлар ва шу одоблари учун фаришталар ул зотни иззат қилганлар. Аксирган одам «Ал-ҳамдуиллах!» дегач, бу ҳамдни эшитганлар у кишига «Йарҳамукаллоҳ!» деб тилак билдиришлари лозим бўлади. Бунинг маъноси Аллоҳнинг раҳматини тилашдир. Бизда тирик одамга Аллоҳнинг раҳмати тиланса, ғалати қараб қўйишади, чунки «Аллоҳ раҳмат қиласин», дуосини, асосан, марҳумларга нисбатан айтиб ўрганиб қолганмиз. Ҳолбуки, тириклар ҳам Аллоҳнинг раҳматига муҳтожидирлар.

Баъзи бирвлар «Ассалому алайкум», деб тўлиқ айтишга эринибми, «салом» ёки «саломалайкум» ёки «сомайкум» тарзида ифода этадиларки, бу ғоят хунукдир ва товушларнинг бузилиши тескари маъно англатиб қўйиши мумкин. Масалан, «ас-сому алайкум» дейилса «сизга ўлим бўлсин!» деган маъно келиб чиқади.

Ҳазрати Ойиша онамиз (розийаллоҳу анҳо) айтадилар: «Расууллоҳ ҳузурларига яҳудийлар келиб: «Ас-сому алайкум», яъни «сизга ўлим бўлсин!» дейишиди. Шунда мен: «Ўлим ўзларингга бўлсин ва Аллоҳ Таолонинг лаънати ва ғазаби ҳам сизларга бўлсин!» деб уларни қарғадим. Шунда Расууллоҳ: «Ойиша! Қўй, ундей дема, оғир бўл, қаттиқ муомала қилишдан ва қарғашдан ўзингни сақла!» дедилар. Мен: «Ё Расуулаллоҳ, буларнинг гапини эшитмадингизми?», дедим. Расууллоҳ (с.а.в.) дедилар: «Сен ҳам менинг гапимни эшитмадингми? Мен уларга «ва алайкум», яъни «айтган гапларингиз ўзларингизга бўлсин!» дедим. Аллоҳ Таоло менинг уларга қилган дуои бадимни қабул қиласи. Аммо уларнинг менга қилган ёмон тилакларини қабул қилмайди».

Одамзот бир-бирини ҳамиша дуо қилиб юришга буюрилган. Ёмон дуодан, ўзгага ёмонлик тилашдан қайтарилганмиз. Пайғамбаримиз (с.а.в.) дуони ибодат деб сифатлаганлар. Абу Зарр Фифорий (р.а.) «Таом туз билан мазали бўлганидек, яхшилик ҳам дуо билан

ширин бўлади», деганлар. Хайрли дуо – бошқаларга ҳамиша яхшиликни раво кўриш. Кимнингдир дардан фориг бўлиб, шифо топишини, кимнингдир фарзанд кўриб шодланишини, яна кимнингдир ҳожатлари раво бўлишини, сафардагиларнинг йўллари бехатар бўлишини исташ. Бу истакларни банданинг ўзи амалга оширомайди ва шунинг учун Аллоҳ Таолога илтижо қилиб сўрайди. Дуо холис – фараз ва риёдан, тана ва миннатдан холи бўлмоғи шарт.

Одамлар бир-бирларини фақат хайрли дуо қилмоққа буюрилганлари баробарида «дуойи бад» – ёмон тилакдан қайтарилганлар. Дуойибад қилмоқ, яъни бирорвга Аллоҳ Таолодан ёмонлик согиниш одам фарзандига хос эмас. Дуойибад кўпинча қарғиши кўринишида бўлади. Баъзан қарғишларни эшитиб қоламиз: банда кўзларининг кўр ёки оёқ-кўлларининг шол бўлиб қолиши сўралади. Бу каби қарғишларда икки хил нодонлик мавжуд: агар банда айбор бўлса, унга қандай жазо беришни Яратганнинг Ўзи билади. Жазо тури банда томонидан белгиланмайди. Фараз қилайликки, қарғиши тегиб, ўша одам кўр бўлди. Хўш, бундан дуойибад қилган кимсага бирон наф борми? Фақат кўнгил қувончи бордир. Бу кўнгил қувончининг эгаси эса иблисдир.

Баъзилар ўзлари ёмон деб фараз қилувчи кишиларнинг ўлимини ҳам истайдилар. Аввало, ўлим дуо билан келмайди. Бу тақдир ёзуғидир. Хўш, ўша одам дунёни тарқ этса, дуойибад қилувчининг ҳаёти чиройлироқ бўлиб қоладими?

Ёмон ниятли дуодан кўра хайрли – яхши дуо қилмоқлик Одам фарзанди учун фойдалироқ эмасми? Ёмон деб ўйлаганимиз одамга инсоф, ҳидоят тиласакда, дуоларимиз изжобат бўлиб у киши яхшилик йўлига ўтса, фақат бизга эмас, жамиятга фойда-ку?

Бу масалада яна бир мулоҳаза бор: кимнингдир кўр ёки шол бўлишини ёки тезроқ ўлишини истовчи банданинг қалби қандай экан? Кир ва қора эмасмикин?

У ҳолда бошқа бир юраги қора уни дуойибад қилиб ўтирумaganмикин?

Не афсуски, айрим оиласарда доимий равишда дуойибадни эшишиб турамиз. Буни авом тилида «қарғиши» деймиз. Оналарнинг ўз фарзандларини қарғашлари янада ачинарли ҳолдир. «Жувонмарг бўлгур!», «Қўлгинанг синсин!», «Тилгинанг кесилсин!», «Қорнинг ёрилсин!» Албатта бу қарғишлар юрак қаъридан отилиб чиқмайди, тил учида, жаҳл натижаси ўлароқ айтилади. Бироқ, «яхши гапга ҳам, ёмонига ҳам фаришталар «омийн!» дейди». Дуоси ижобат бўлиб қолса, она додини кимга айтади? Агар «жувонмарг бўлгур» деган ибора «ёшлигингда ўлиб кет!» деган маънони англатишини билганларида эди, оналарнинг ҳеч бири бу сўзларни тилга олмаган бўлардилар.

Ташки гўзалликни кўз ила кўриб, баҳо бермоқдик мумкин. Ички гўзаллик, хусусан, ҳусн чиройига тил или ифода этилувчи салом ва дуо гувоҳлик беради. Шундай экан, тилимизни фақат салому ва ширин сўзлар қулига айлантириб кўя олсан қандай яхши! Афсуски, тилни кул қўлмоққа шайтон алайҳилаъна ҳам харидор. Шайтон тилни эгаллаб олса, қалбни маҳв этиши ҳам осон кечади. Тил мазах ва сўкишдан парҳез қилмадими, саломи қуруқ, дуоси ижобатсиз бўлиб қолиш эҳтимоли бор.

### **Ҳазилнинг таги зид**

Тилимизда «ҳазил», «эрмак», «калака», «мазах», «масхара» деган сўзлар мавжуд. Булар шунчаки маънодош сўзлар эмас, балки инсон зотини хунуклаштириб турдиган иллатларнинг номларидир. Яна «пичинг», «истехзо», «захарханда» деган тушунчалар мавжудки, булар ҳам чегарадан чиққан ҳолларда гуноҳга етакловчи иллатга айланади.

Бизнинг халқимиз хушчақчақ, ҳазил-мутойибани севади. Ҳатто маънодош сўзларни «ўйнатиб» ҳам қул-

ги уйготади. Самимий кулги одамшавандалик ва рұхий соғломликнинг белгиси. Бегараз кула олган одам яхши одам саналади. Атиргулга муаттар бүй қанчалик зарур бўлса, одамга ҳазил-мутойиба шунчалик зарур. Фақат нодонларгина кулмай яшайдилар, разиллар камдан-кам ҳолларда қувноқ бўладилар, деган до-нишманд ҳақ гапни айтган. Ҳатто айрим ўтмиш до-нишманлари «Фақат қувноқликкина нақд олтин баҳт, қолганининг бари – насия қоғоз. Кулмай ўлгандан кўра, бебаҳт бўлсанг ҳам кулган яхши», деб ҳазилга фоят юқори баҳо берганлар. Кулги яхшилиқдан бўлса дуруст. Беозор кулги руҳни соғломлаштиради. Аммо бу масалада меъёр деган ўлчов бор. Агар самимий, бегараз ҳолатда бошланган ҳазил ҳаддан ошдими, яъни чегарасидан чиқдими, фалокатга асос бўлиши ҳеч гапмас. Ҳатто узоқ йиллик дўстлар даврасида ҳам баъзан хафагарчилик юзага келади, баъзан эса иш муштлашиш, ҳатто пичоқбозликкача бориб етади. Бу нохуш ҳолатнинг илдизига эътибор берсак, оддий ҳазилга бориб тақалади.

Бу ҳақда ҳазрат Алишер Навоий ҳам танбеҳ бериб ўтганлар: «Ҳазил қиласверищдан ҳурматсизлик ортади. Ҳазилнинг охирин жанжалга олиб келади. Кўп ҳазиллашиш номус ва ҳаё пардасини чок этади. Адаб ва ҳурмат эгаларини бебурд ва беобрў қиласиди. Кўлингдан келганча таъзим ва адаб биносини йиқитма. Ҳаёва ҳурмат пардасидан чиқма».

Гап шундаки, ҳамма ҳам дўстига эплаб ҳазил қила олмайди. Одам ўзининг ҳазил-мутойибага қай дараҷада усталигини белгилаб олиши керак. Бугунги бир ҳазилга дўстлари кулишса, эртага худди шу гапга ғашлари келиши мумкин. Сабаб: ҳазилнинг сингиши учун кишининг кайфияти ҳам мұхим. Киши яхши кайфиятда бўлса, «ўтмас тешада йўнилган»дай тўмтоқ ҳазилга ҳам кулаверади. Кўнгли ғашланиб турган бўлса, но-зик қочиримдан ҳам ғазбланиб кетиши мумкин. Баъзилар раҳбарларининг беўхшов, тўмтоқ ҳазилларига

ҳам мириқиб куладилар. Бу – лаганбардорликнинг бир кўриниши.

Дўстлар даврасида яна бир нарсага эътибор берилмайди: йигирма ёки ўттиз йиллик улфатнинг шу давр ичида тинмай тақорланиб келадиган ўзаро ҳазилла-ри бўлади. Бу даврада ҳазил чегарадан чиқса ҳам, кимдир дўстининг ҳазилини малол олса ҳам сир бой бермай жилмайиб қўявериши мумкин. Лекин давра-да бегона меҳмон ўтиrsa, ўзаро самимий ҳазил ҳам оғир ботиб, ҳазил нишонига олинган дўст чидомлай қолиши мумкин. Қадрдан улфат қўпинчча ёшликни эслаб, ёшликдаги қилиқларидан кулади. Кимдир, қачондир маст бўлиб ариққа думалаб қолган, кимдир ёқаси кир кўйлакда юрган, кимнингдир қорнига чип-қон чиққандан хушидан кетиб қолган... Кулгига асос бўладиган воқеалар кўп. Лекин бу воқеалар фақат шу даврадагина кулги уйғотади, ташқаридан келган одам учун мутлақо қизиқарсиз, ҳатто бачканга туюлишини улфатдагилар фикр қилиб кўришлари керак. Ҳазиллашганда ҳам ақдни ишлатиб ҳазиллашиш шартлиги, одобли ва оқил одамларга нисбатан энг арзимас ҳазилни ҳам қилиш дуруст эмаслиги, шунинг баробарида ожиз ақдга ҳам ҳазил ўринсизлиги, бемаъни кулгидан ҳам бемаънироқ нарса йўқлиги ёдда тутилса янада яхши. Баъзан даврада иштирок этмаётган бир одам эсланиб, унга ё хунукроқ бир лақаб тақайдилар ёки бирон жисмоний камчилиги мисолида сўз ўйини қилиб, куладилар. Аввало, бу қилиқ гийбат ва масха-ра ҳисобланади. Ҳазил ниқобидаги шу масхарада ки-шининг чўлоқдигидан кулинса-ю ўша даврадаги ким-нингдир яқин одами шундай жисмоний камчиликка эга бўлса, у қандай аҳволга тушаркин, тасаввур этиб кўрайлик-чи?

«Қобуснома»дан ҳикматки: «Ҳазил айб бўлмаса ҳам, ҳазилдан эҳтиёт бўл. Ҳазил қилиш мумкин, аммо яра-мас сўз айтиш ёмон... Ҳазилни мастилик чоғида қилма, чунки ёмонлик ҳазилдан келиб чиқади. Эй фарзанд,

ўзингдан пастроқ одам билан ҳазиллаш, бўлмаса ҳазиллашма, чунки сенинг иззатинг кетмасин ёки тенгдошларинг билан ҳазил қил, чунки жавоб берсалар айб бўлмайди. Уят сўзларни айтма, ҳаддан ташқари ҳазил қилма, чунки одамни хор ва беқадр қиласди. Халқقا нима десанг шуни эшиласан, халққа нима қиссанг шуни кўрасан».

Ҳазил-мазахга ўрганган, оғизларидан беандаза сўзлар чиқаришга одатланган одамлар кейинроқ шу феъларидан дақки ейдилар. «Ҳазилнинг таги – зил», деган сўз бекорга айтилмаган. Ҳазилни ҳам туз каби меъёрида ишлатмоқ зарур. Ҳазиллашиб одобини эгаллаш осон эмас. Лекин ҳазилни тушуниш одоби ҳам мавжуд. Афсуски, ҳазилни барча бир хилда тушувермайди, ҳатто беозор кулгини малол олади. Шунинг учун ҳам:

*Ҳазиллашганда сен сақла одобни,  
Балки англамаслар сен айтган гапни.*

Кўпчиликнинг кулгиси иллатли нарсаларга кучли зарба бўлиб тушади. Танбехни ҳатто сўкишни кўтаришса кўтаришади-ю, аммо кулгига ҳамма ҳам чидайвермайди. Ҳеч бир кимса кулги бўлишни истамайди. Ҳатто бир улфатда ҳазилга нишон бўлаётган одамнинг ўғли тасодифан иштирок этаетган бўлса, отасига айтилаётган беозор ва бегараз бўлган гапларни масхара ўрнида қабул қилиб, разабланиши мумкин.

Ҳикмат аҳли ҳазилдан қочишни ҳақиқатдан қочиш каби баҳолаганлар. Ҳатто ҳазилни тушунмайдиган одамни нодон ҳисоблаб, гапларига жиноятчига ишонмагандай ишонмасликни тавсия этганлар. Беозор ҳазилни малол олиб, жанжал чиқарувчини халқда «жizzаки», деб атайдилар. Жizzакиликдан кутулиш қийин, шу боис бундай табиатли одамлар ҳазилкашлар даврасида узоқ ўтирганлари маъқул. Ҳазилга ҳазил билан жавоб қайтаришга лаёқати йўқ киши дав-

рани «гуллатишга» ҳисса құшиш мақсадида ё ёлғон түқишиңга киришиб кетади ё әзмалик билан баҳслаша бошлайди.

Бу каби ҳолатни кузата туриб улуғ адиб Бальзак-нинг «Майнавозчи ҳамиша енгилтабиат бўлади», деган хикмати тўғримикин, деб ўйлаб қоламан. Ахир Арас-ту ҳаким «истаган нарсадан кулгили жиҳат қидира-вериш одати маънавий қашшоқлик аломатидир», деб бежиз огоҳлантирганлар. Маънавий қашшоқликни минглаб одамлар хузурида кўз-кўз қиласвериш доно-лиқдан бўлмаса керак...

«Эрмак» – «ҳазил»дан кейинги босқич. Самимият че-гарасидан чиқишида, таъбир жоиз бўлса, «эрмак эша-ги»га минилади. Эшак бўлганда ҳам ажабтовур, бир доирада айланавериб кишининг асаб томирларини бир-бир узаверади. Сўнг бу «яғир» эшакда «калака» аталмиш бадбўй кўлмакка тушилади. Ўзгани калака қилғувчи нодонга бу кўлмак зилол сув каби туюлиб симираверади, роҳатланаверади. Заҳарланиши мум-кинилигини ўйламайди. Ҳажв йўналишидаги асарлари билан дунёга танилган европалик Сервантес бу ҳақда дейдики: «Сен одамларга танбеҳ беришинг мумкин-у, аммо ҳақоратлашга, калака қилишга ҳақинг йўқ. Чун-ки кўпчиликни кулдирган бўхтон, гарчи у ҳатто бир кишига чоҳ сифатида мўлжалланган тақдирда ҳам, бари бир ножӯя ва бемаънилиkdir». Калака кўпинча зеҳн етишмасликнинг аломати, у чинакам ҳазил етишмаган жойда пайдо бўлади.

«Калака» деган иллат кўлмагидан «мазах» балчигига ўтилади-ю... Балчиқда эшакнинг ағанаганини кўрган-мисиз? Бирорни мазах қилаётган одамни шу жониворга ўхшатсам, каминани айбситманг. Агар эшакнинг онги бўлганда эди, бу ўхшатишмидан у ҳам ранжирди: келиб-келиб мени шундай одамга ўхшатдингми, деб аразларди. На чора, ўзгаларни мазах қилишдан роҳатланувчи нодон бундан қўпполроқ ўхшатишга лойиқ бўлса-да, бунақасини топишга ақдим етмади.

Кайковус ўғлига хитобан дейдики: «Эй фарзанд, дебдиrlарки, мазах – ёмонликнинг муқаддимасидир. Мазах, яъни хонаки сўз билан кишига дахл этмоқдикдан хазар қил». Оддий аксириш ва шамоллашдан бошланган енгил касаллик вақтида даволанмагани туфайли оғир хасталикларга дучор қилгани каби, ҳазил чегарасини бузишга ўрганган одам охир-оқибат масхара ботқоғига ботадики, энди ундан қутулиш осон эмас. Аллоҳ Таоло бандаларини масхара қилмасликка буюргач, мазах ҳақида таъкид этади: «...ва ўзингизни ўзингиз мазах қилманг, бир-бирингизга лақаб қўйманг. Иймондан кейин фосиқлик билан номланиш (*яъни мўмин кишининг фосиқона ишлар билан ном чиқариши*) нақадар ёмон! Ва ким тавба қилмаса, бас, ўшалар золим кимсалардир» («Хужурот» сурасидан). Мазах бирон кишининг нуқсонларини тил билан зикр қилиб айблаш демакдир. Ким бирорни мазах қилса, аслида ўзини мазах қилган бўлади. Лақаб қўйиш орқали инсонни камситиши ҳам гуноҳ ҳисобланади.

Кимдир жоҳил ва нодонлиги туфайли бирон танишига, ҳатто дўстига лақаб қўяди. Ҳазил тариқасида айтилган лақаб кейинчалик бошқа нодонлар томонидан «илиб» олиниб, тамғага айланади. Айрим лақаблар ҳатто отадан болаларга «мерос» бўлиб қолади. Лакаб қўйиш қишлоқларда кенг тарқалган. Айниқса, ҳайвонларнинг номи билан аташ нодонлиги борки, бундан ҳазар қилинса яхши бўларди. Чунки кимнидир «мол» ёки «макиён» деб аташ ҳақоратнинг айни ўзидир. Қаранг-да, «лочин», «йўлбарс» ёки «бургут» деб лақаб қўйилмайди. Айнан кишини камситувчи номлар танланади. Ёки кишининг жисмоний камчилигини таъкид этувчи сифатлар қўйилади. Каминани соҳибқирон Амир Темурни баъзан ёзма адабиётларда ҳам «Темурланг» дейишлари ажаблантиради. «Ланг» – чўлоқ, оқсоқ деган маъно англатишини, «Темурланг» – «чўлоқ Темур» эканлигини кўпчилик билмайди, шекили-а?

Масхара бирордан шунчаки кулиш эмас, унинг эл аро шармандасини чиқаришдир. Расволик чодирига ўраб ташлашдир. Масхара ҳақоратнинг бир туридир. Шу боис Ҳазрат Сўфи Оллоҳёр танбех берурларки:

*Кел, эй нозир, мусулмон бўлса ҳар ёр,  
Назар қилма, ҳақорат бирла зинҳор.*

Дейилмоқчики: инсонларнинг юриш-туришини кузатгувчи инсон, мусулмон биродарингга зинҳор масхара кўзи билан қарама. Мусулмон боласини ҳақорат қилма.

Одатда ёмон хулқилар яхши хулқиларни масхара лашни севадилар. Шу боис, ким сизни масхараласа, жавоб қайтарманг, хушхулқ бўлинг-да, ундан разабланганингизни сездирманг. Шайтон васвасаси олдида ожиз қолиб, сиз кимнидир масхара қилдингиз. Агар масхараланган одам сизга жавоб қилмаса, билингки, у инсонийликда сиздан устун экан. Ҳазил-масхаралар кулиб туриб жонни суғуриб олишдир. «Билса – ҳазил, билмаса – чин» ёки «Ярми ҳазил, ярми чин», деганлари дай, кимса қалбидаги қораликни кулги билан пардалашга уринади. Буни биз пардаланган, яширин ҳақорат деб сифатласак, киши табиатида очиқ ҳақорат ҳам мавжуд. Кишига лаънат ўқимоқ, сўқмоқ разабнинг фарзандларидан ҳисобланиб, Одам боласининг ҳуснига доф тушириб туради.

Расулulloҳ (с.а.в.): «Кишиларга лаънат этувчи лар қиёмат куни шоҳид ҳам, шафоат қилувчи ҳам бўломмайдилар», деганлар (бундай кишилар Қиёмат куни қавм-қариндошлиари ва дўст-биродарларига шафоат қила олмайдилар). Ҳазрат Ойиша (р.а.) айтдилар: «Отам Абу Бакр Сиддик (р.а.) ўз қулларидан биттасига лаънат ўқидилар. Буни Расулulloҳ (с.а.в.) эшитиб: «Абу Бакр! Аллоҳ Таолога ишонувчилар билан бошқаларга лаънат ўқувчилар ҳақидаги гапларим қаерда қолди? Йўқ, бундай бўлмаслиги керак!», деб икки ё уч

марта тақрорладилар. Отам ўша куниёқ у қулни озод қылдилар-да, Расууллоҳ (с.а.в.)га бориб: «Мен иккинчи марта бундай қымайман», деб узр айтдилар. Күнгилни хира қылувчи воқеа содир бўлганида саҳобалар «Ё Расууллоҳ, мушриклар ҳақига дуойибад қилинг!» дейишганда, Аллохнинг элчиси (с.а.в.) **«Мен дуойибад қылувчи ёки лаънат этувчи эмас, бадки марҳамат қылувчи бўлиб юборилганиман»**, деганлари ҳар бир Одам боласи учун ибратдир. Чунки ҳар бир мусулмон фарзанди бир-бирига яхшилик қилиш учун яратилган. Бирони лаънатлаш дуойибаднинг бир тури ҳисблангани сабабли бу борада ҳам тиини эҳтиёт қилиш шарт.

Ҳаётимизда баъзан билиб, кўпроқ ҳолларда эса билмай, ҳатто яқинларимизни ҳам лаънатлаб қўянимиз. Масалан, бир оила бузилиш жари ёқасига келиб қолган. Эр томон хотин томонни, хотин томон эса эр томонни шунчаки айбламоқчи бўлади-ю, лекин тилига лаънат сўзлари аралашиб қолаётганини фаҳмламайди. «Менинг яхшилигимни билмасанг кўр бўласан», «Тирик етимлар кўзидан оққан ёшларнинг уволи тулади сени» каби гаплар гўё қалбларни овутгандай бўлади. Айблаш ва лаънат ўқиши билан оилани сақлаб қолиш сира мумкин эмас. Бунинг ўрнига юрак-юракдан: «Ё Аллоҳ, аввало ўзимга, сўнг хотинимга (ёки эримга ёки, куёвим ё келинимга) инсофу тавфиқ бер, орамиздаги меҳр-муҳаббатни зиёда қилиб бер...» деб хайрли дуо қиласа ижобат бўлиши аниқ.

Фазабланган пайтда «Падарингга лаънат!» деб юбориши одати кенг тарқалган. Эҳтимол, кимсани фазаблантирган одамнинг отаси тақводор мўмин кишидир. Буни билмай туриб унга лаънат ўқишимиз қандай бўларкин? «Ўғлини ёмон тарбиялаган, шунинг учун лаънатга лойик», деймизми? Кимса фазабланган онида ҳали ким ҳаку ким ноҳақлиги аниқ бўлмаслиги ҳам мумкин. Унга ноҳақлик содир этилгандай туюлди ва отани ўртага қўшиб лаънатлади.

Лаънатлашни дуойибаднинг бир тури, дедик. Шу билан бирга, лаънатлаш – сўкишнинг пардали кўри-ниши ҳамдир. Баъзи ҳолларда «онангни...» деб сўкишдан уялган ғазабнок одам «падарингга лаънат!» билан хуморидан чиқади. Киши дуойибаддан, лаънатлашдан ўзини тийиши қийин эмас, чунки ҳар кун ёки ҳар соатда бу иллатларга банди бўлмайди. Аммо ҳар кун, ҳар соатда эмас, ҳар дақиқада ҳам сўкувчилар бор. Бундайларни, айниқса, ўсмир-ёшлар орасида кўп учратамиз. Одам ёлғиз ҳолатида ҳам бирорни дуойибад қилиб, лаънатлайверади. Лекин сўконгич одам ошкора сўкмаса хумори босилмайди. Сўкишни ҳар жойда – бозорда ҳам, автобусда ҳам, турли идораларда ҳам эшитишимиз мумкин. Бозорда ҳаридор сўгади – сочувчи бўш келмайди, «қайтим» қайтаради. Автобусда бирор бехос туртди ё оёғини босиб олди. Эшитадигани – сўкиш! Уйда эр хотинни, ота фарзандларини, aka укаю сингилларини сўгади. Не додки, ота боласини, aka укаларини, ҳатто ука ака-опаларини «онангни...» деб сўкиб турса?! Шундай оиласлар борки, чой ичиб, нон ейиш қандай одатий ҳол бўлса, сўкиш ҳам улар учун худди шундай ҳол. Бундай хонадонда ярим кечада бирор уйғониб чой ичса, «тингчликми, нега чой ичяпсан?» дейишлари мумкин. Лекин тун ярмида сўкинса, эътибор ҳам берилмайди.

Сўкиш эшитиладиган жойдан ҳаё қочади. Ҳаё қочган хонадондан файз кетади, барака кўтарилади. Сўкиш – кучли томондан айтилади, демак, ўзига яраша куч ва мартабанинг қай даражада эканини кўрсатувчи омилдир. Жисмоний жиҳатдан кучсиз одам мушаклари ўйнаб турған бақувват одамни сўкмайди, мартабаси пастроқ киши хўжайинини сўкиб кўрсинчи? Хотин зулм ҳаддан ошган маҳалда эрни қарғаб юбориши мумкин, аммо сўкмайди. Сўкиш беҳаё, май-параст кўча хотинларига хос иллат.

Сўкишнинг ёмонлигини ҳамма билади, лекин ҳамма бу иллатдан қутулишни ўйламайди. Фарзандимиз ўн

икки – ўн беш ёшларида бирөвни сўкаётганини эши-тиб қолсак, ғазабланамиз, «бу ёмон одатни қаердан, кимдан ўрганди?!» деб бош қотирамиз. Лекин шу фар-зандимиз бир-икки ёшида, энди тили чиқаётган пай-тида «онангни (ёки «акангни») сўкиб қўй», деб ўргатга-нимизни унутиб юборамиз. Уч ёшли ўғилчамиз ёки набирамиз ширин тилчалари билан онасини сўкаёт-ганини эшитганимизда қувонамиз. Иллат қулбасининг пойдеворини ўзимиз тиклаб қўйиб, оқибатда «бу қора кулба қайдан пайдо бўлди?» деб гангид юрамиз. Болага сўкишни оналар ўргатмайдилар. Боланинг тили чиқмай туриб ҳам саломни ўргатадилар. Гўдакка са-ломни ўргатувчи отани кам учратамиз. Сўкишни ўрга-тuvчилар эса етиб-ортади.

Сўкиш ҳақида фикр юритилганда сўзнинг маъно-сига тушунмаслик оқибатида айтиладиган айрим ибо-раларни четлаб ўтолмайман ва бунинг учун аввалдан узр сўрайман. Турли жойларда, турли одамлар тили-дан «вой баччағар!», «вой даюс!» ёки «энагар», «қизиғар» деган сўзларни эшитиб қоламан. Ажабланарли томони шундаки, буларнинг барчаси эркалаш оҳан-гида айтилади. Ҳолбуки, тожик тилини биладиганлар учун бу оғир ҳақорат саналади. Агар шу сўзларни айт-туvчилар «баччағар» – боланг фоҳиша, «энагар» – онанг фоҳиша, «қизиғар» – қизинг фоҳиша, деган маъно анг-латишини билсалар, тилларини тийган бўлармидилар? «Даюс» эса эр учун оғир ҳақорат, ўз аёlinи бошқалар-дан қизғанмайдиган одам шундай аталади. Баъзилар русча сўкишларни тилдан қўймайдилар.

Ҳаётда биров сўкканда иккинчи томоннинг жим туриши ҳоллари кам учрайди. Сўкишга сўкиш билан жавоб қайтарилади ва оқибатда катта жанжаллар ке-либ чиқади. Айёз ибн Ҳаммор (р.а.) айтдилар: «Мен Расулуллоҳдан: «Ё Расулуллоҳ! Бир киши мени сўкса нима қиласай?» деб сўрадим. Расулуллоҳ (с.а.в.): «Бир-бирини сўкувчи икки кишининг иккаласи ҳам шай-тондир. Улар ёмон гапни гапиради ва ёлғон сўзлайди»,

дедилар. Албатта, кимдир онадан сүкса индамай эши-тиш анча оғир. Ҳарбий хизматда бўлган пайтимизда айнан шундан қийналардик. Рус аскарлар, ҳатто командирлар икки гапнинг бирида «онангни» деб туришарди. Бу сўкиш оҳанги разаб ва таҳдиддан холи эди. Яхши гапни гапираётганда ҳам шу сўкиш ишлатиларди. Лекин осиёликлар ва кавказликлар бунга чидай олишмасди. Кўп муштлашувлар «оналар эслаганидан» кейин бошланиб кетарди. Оқибатда сўккан эмас, мушт кўтарган жазоланаарди. Бир куни қисм командири осиёлик аскар йигитларни йигиб, узр сўраган, «онангни» дейилишида ғараз бўлмагани учун рус йигитлардан ранжимасликларини илтимос қилган эди. Бу сўкишни эшитиш ҳар қанча оғир бўлмасин, чидаган маъқул. Бу хусусда шарафли ҳадис:

- Кишининг ўз ота-онасини сўкиши катта гуноҳдир, – дедилар Расулулоҳ (с.а.в.).
- Ё Расулулоҳ, киши ўз ота-онасини ҳам сўқадими? – деб сўрадилар саҳобалар.

Аллоҳнинг элчиси дедилар:

- Киши бир одамни сўкканида сўкиш эшитган одам сўкканинг отасини ҳам, онасини ҳам сўқади, – дедилар.

Пайғамбаримиз (с.а.в.) ҳузурларида бир киши иккинчисини сўқди. Иккинчиси жавоб қайтармади. Бу вақтда Расулулоҳ (с.а.в.) ўтирган эдилар. Иккинчиси ҳам сўка бошлагач, ўринларидан туриб кетдилар. Саҳобалар:

- Ё Расулулоҳ, нима учун туриб кетдингиз? – деб сўрашганида Расулулоҳ (с.а.в.) дедилар:

– Фаришталар тургани учун мен ҳам турдим. Бу киши жим турган вақтда фаришталар аввалги сўкаётган кишига рад қилиб турган эдилар. Бу ҳам сўка бошлагани учун ўша фаришталар ўринларидан туриб кетдилар.

«Қобуснома»дан ҳикмат: «Иттифоқо, бирор киши билан уришсанг, оғзингта келган бузук сўз ва ҳақорат-

лар билан сўкма, шундай уришгилки, ярашмоққа жой қолсин ва бирданига бешарм, беҳаёлик қилма, чунки бундай иш безориларнинг одатидир. Одатнинг яхшилоги тавозели, кибрисиз бўлишдир».

Бир-бирларига ғазаб қилувчилар ўзларини босиб олишгач, сўкиш борасида қайси бирлари айблироқ эканини аниқлаштириш мақсадида масала талаша бошлайдилар. Бундайларга Пайғамбаримиз (с.а.в.)-нинг (алайҳиссалом) ажримларини эслатамиз: «Бир-бири билан сўкишувчи кишиларнинг айби сўкишни аввал бошлагани устига тушади, башарти иккинчиси сўкишни ҳаддан ошириб юбормаса». «Қутадғу билиг»-дан ҳикматким:

*Сени ким сўкар эрса ўггил они,  
Утун ул булур сен тузунлар сони.*

Дейилмоқчики: ҳар ким сени сўкса, сен уни мақта. Натижада сен адаблик, ул қўпол, жоҳил бўлур.

**Умидимиз юлдуздари**, «Катталарга ҳурмат, кичикларга иззат», деган мақол сиз учун оддий гапга ўхшайди, бироқ бу ҳикматнинг замираида улуғ бир ҳақиқат мавжуд: ҳалқнинг фасодга берилиши буюкларга ҳурмат, кичикларга муҳаббат кўрсатмасликдан бошланади. Юқорида зикр этилган иллатлар зоҳир бўлган онда орадан ҳурмат ҳам, муҳаббат ҳам кўтарилади. Буни ҳамиша ёдда тутишингиз талаб этилади.

### **Тўғрилик ҳақида**

Тўғрилик Мусо алайҳиссаломнинг ҳассалари кабидир. Эгрилик эса сеҳргарларнинг сеҳрига ўхшайди. Тўғрилик ўртага чиқиши билан уларнинг ҳаммасини ютади.

**Ҳикоят.** Ҳазрати шайх Аҳмад Мағрибий (қ.с.) дедилар:

– Онамдан мерос қолган бир уйни сотдим. Бадалини Каъба мужовирлариға улашмоқчи бўлдим. Баррияда кетаётган эдим, бир қароқчи араб рўпарамдан чиқди:

– Ниманг бор? – деб сўради.  
– Эллик тиллам бор, – дедим-да қўлига бердим. Санади-да, ўзимга қайтариб берди ва туясини чўктирди.

– Бу туяга мин, кетамиз, – деди.  
– Мени нима қиласан? – дедим.  
– Тўғрилигингни кўриб, кўнглим сени севди, – деди. Мен хоҳласам – хоҳламасам, туясига миндирди. Каъбага бордик. Биргаликда тоат ва риёзатга машгул бўлдик. Ўша одам қароқчилигини ташлаб, оқибатда Аллоҳ Таолонинг валийларидан бўлди.

Мазкур ҳикоятга «Гулистан»дан бир байт илова қилинса, узукка кўз қўйгандай бўлар:

*Ҳақни билган кимса айлар ростлиғ,  
Ростга йўқ камлику ҳам костлиғ.*

Тилимиздаги «ростлик» ва «тўғрилик» сўzlари айри-айри маъноларни англатмайди. Бу сўзларнинг зидди – «эгрилик» ва «ёлғон»дир. «Амин» сўзи ростгўйлиги учун ишончли кишига айланган фазилат эгаларига нисбатан айтилади. Расууллоҳ (с.а.в.) ҳали пайғамбар бўлмасларидан оддин шу ном билан иззатланганлар. Яна тўғри сўзи одамларга «Сиддиқ» деб сифат берадиларки, ҳазрат Абу Бакр (р.а.) бу ҳурматта эришганлар. «Эй иймон келтирсанлар! Аллоҳга тақво қилинглар ва тўғри сўз сўзланглар», деб буюрган Парвардигор, бу амрига итоат этган солиҳ бандаларини ана шундай иззатлар билан шарафлантиради. Бу хусусда Кудсий ҳадисда Аллоҳ Таоло марҳамат қилади: «Эй Одам фарзанди! Фазабли ва ҳурсанд ҳолларингда ҳам тўғри сўзлашинг мартаба ва даражангни менинг наздимда юқори қилади». Набий муҳтарам (с.а.в.) деди-

лар: «Рост гапириңглар, чунки ростгүйлик яхшилик-ларга бошлайды ва бу яхшиликлар эса жаннатга йўлладиди. Киши рост гапираверса, у Аллоҳ Таоло ҳузурида «жуда ростгүй», деб ёзилиб қолади». Яна дедилар: «Банданинг иймони мукаммал бўлмайди, токи унинг қалби тўғри бўлмагунча. Қалби тўғри бўлмайди, токи унинг тили тўғри бўлмагунча».

Инсондаги ажойиб хулқлардан бири ростлик – тўғриликдир. Тўғрилик одамдаги барча ишларнинг тартиб ва маромда кетишини таъминлайди. Тўғрилик издан чиқдими, демак, ҳамма ишларнинг тартиби бузилади. Хоҳ катта ва улуғ ишлар бўлсин, хоҳ кичкина ва арзимас амаллар бўлсин, агар дикқат кўзи билан қаралса, уларда тўғрилик йўқ экан, ҳаммаси хароб бўлади. Барча турдаги ишларнинг бари тўғрилик билан барқарор, шу ишларни амалга оширувчилар эса тўғрилик билан бардам ва устувордирлар. Ҳаётда одамнинг узоқ яшаши эмас, **тўғри яшамоги** муҳимроқ. Тўғриликка ишонмаган ақднинг ўткир бўлганидан фойда йўқ. Соатнинг ҳам югуриб кетиши эмас, тўғри юриши муҳимроқ. «Сен то қувватинг бор экан, доимо ростлик ва тўғрилик йўлини тут, – дейди дониш аҳди. – Шунда сен саодат чаманидан муддао гулини терасан. Ўқни қара, тўғри бўлгани учун юзи доим гулгун. Камон эгри бўлгани учун каноп билан боғланиб, банди қилингган».

*Тўғри гапнинг ҳеч бўлмайди душмани,  
Ёлғон сўзнинг кўп бўлади пушмони.  
Тўғри гапнинг тўрт томони йўл бўлар,  
Ёлғон сўзнинг айланаси кўл бўлар,  
Бошга бало охир бориб – тил бўлар.*

Ҳазрат Навоийдан ўгит: «Агар сўз гўзаллик зийнати билан безалмаган бўлса – унга чинлик безаги етарлидир. Ёлғончининг гапи қанчалик чиройли бўлса – шунчалик қабиҳдир. Чин сўз қанчалик бетакаллуф бўлма-

син, сўзловчи учун таассуф йўқдир. Гул либоси йиртиқ бўлса ҳам зиёнсиз, садаф хунук бўлса ҳам инжу учун нуқсонсиз».

*Сўзда Навоий не десанг, чин дегил,  
Рост наво нагмага таҳсин дегил.  
Ростдур улким, назари тўгридур,  
Ким илиги эгридур – ўгри эрур.*

**Умидимиз юлдузлари**, болалигинингизда эшиттагингиз, кейинчалик ўқиганингиз ҳикматларга бой эртаклар орасидаги «Эгри билан тўғри» чўпчаги ёдингиздадир? Шунга ўхшаган эртаклар, афсоналар фарзандтарбиясида ғоят муҳим аҳамиятга эга. Ажабланарлиси шуки, биз – катталар тарбия соҳасидаги ишларимизда бу каби эртакларга аҳамият бермай қўйганмиз. Ўтган асрнинг эллигинчи йилларида «Эгри билан тўғри» эртаги болалар театри саҳнасида ўйналарди. Ҳар қандай мушкулликда ҳам најкот тўғриликда экани, тўғри одамнинг бахтга эришиб, эгри одамнинг ваҳший ҳайвонларга емиш бўлиши болаларнинг онгига таъсир қиласарди. Нечундир бундай асарларга энди саҳнада ҳам, дарсликларда ҳам жой йўқ.

**Ривоят.** Халифа Ҳорун ар-Рашид янги сарой бино қилишни ихтиёр этди. Унинг истаги бўйича сарой ўртасига тўғри бир устун қўйиш зарурати туғилди. Халифанинг буйруғига кўра, шундай устунбоп ёғочни қидира-қидира Бағдодга яқин бир қишлоқдан топдилар. Устунбоп ёғоч Бағдодга келтирилганда Ҳорун ар-Рашид ёнига амалдорларини олиб, устун кўрмоқ мақсадида қурилиш майдонига келди. Амалдорлар орасида донишманд Баҳлул ҳам бор эди. У устунга яқин келиб, энгашди-да, нимадир деб пичирлади. Сўнг янада энгашиб, устунга қулоғини тутди.

Унинг бу қилиғидан барча таажжубланди. Халифа эса бу ҳаракатининг сабабини сўради. Донишманд бундай жавоб берди:

– Мен устундан: «Үзинг бир ёғоч бўлсанг-да, халифа жаноблари сенга пешвоз чиқиб, кўргани келдилар. Бундай иззат ва ҳурматга лойиқ бўлишинг сабаби не-дир?» – деб сўраган эдим, бундай жавоб қайтарди: «Мен эгри бўлмадим, тўппа-тўғри ўсдим, тўғрилигим туфайли шундай иззатга муносиб кўрилдим. Эгри бўлсам эдим, майдалаб, ўтин қилиб ёқиб юборардилар. Тўғри ўсганим учун мени экиб, парваришлаган кишининг хонадонини ҳам бойитдим».

Байт:

*Эгриликдан бўл йироқ, қил тўғриликни ихтиёр,  
Тўғри бўлсанг, эй ўғил, баҳту саодат сенга ёр.*

Ҳазрати шайхул машойих Жунайд Бағдодий (қ.с.а.) дедилар: «Содик улдурки, ўзига зиён етадиган жойда ҳам тўғри сўзлагай».

**Яна бир ривоят.** Тарихда золимлиги билан ном чиқарган Ҳажжож қўлига асир бўлиб тушган асиirlарга оғир жазони маъқул кўрди. Шунда асиirlар орасидаги бир киши унга:

– Эй амир, менга жазо берманг, сизга хайрли хизмат бор, – деди.

Ҳажжож бу гапдан ажабланиб, қандай хайрли хизмат қилганини сўради. У киши:

– Бир душманингиз сизни фийбат қилиб, «золим», деб таърифлай бошлаганида мен унга гапиришни ман этдим, – деди.

Ҳажжож бу гапнинг исботи учун гувоҳ талаб қилди. У кишининг рост гапини тасдиқлайдиган гувоҳ йўқ эди. Шунда у таваккалига асиirlар орасидаги одамни гувоҳ деб кўрсатди. У одам бу кишининг жазодан қутулиб қолишини истагани учун гувоҳликка ўтди-ю Ҳажжожнинг қаҳрига йўлиқди:

– Ўша даврада сен ҳам бор экансан, душманинг фийбатини тўхтатган бу кишига сен нима учун қўшилмадинг? – деди Ҳажжож.

– Мен сизни ашаддий душманим деб биламан. Шунинг учун у душманингизни сўздан тўхтатишни истамадим.

Бу гап Ҳажжожнинг ғазабини баттар қўзитган бўлса-да, рост сўзлагани туфайли уни жазодан озод қиалди.

Байт:

*Қолмагай тўғрилар иши пинҳон,  
Қилмагай тўғри сўз кишига зиён.*

Мазкур ҳикоятдаги бир ҳолат озгина баҳс уйғотиши мумкин. Яъни, гувоҳ ёлғон гапирди-ю, лекин жазодан озод этилди. Аввало, у одамнинг ёлғон гувоҳлигида бир жонни сақдаб қолиш хайрли нияти бор. Иккинчидан, у гувоҳлиги учун эмас, золимга бўлган муносабатини яширгагани учун афв этилди. Учинчидан, ҳар қандай ростни айтавериш ҳам фазилат санаалмайди:

*Хирадманد чин сўздин ўзга демас,  
Вале бори чин ҳам дегулик эмас.*

Ақаба ибн Аби Муаъитнинг қизи Умми Кулсум (розиаллоҳу анҳо)дан ҳадис: «Мен Расууллоҳдан (с.а.в.) уч ҳолатдан ташқари, яъни одамлар орасини ислоҳ қилиш учун ёлғон сўзлаш, эр ўз хотинининг кўнглини кўтариш учун унга ёлғондан ваъда қилиш ва хотин эрининг муҳаббатини ўзига жалб қилиш учун баъзан ёлғон гапларни сўзлашидан бошқа вақтда кишилар орасида бўладиган ёлғон гаплардан ҳеч бирига рухсат берганларини эшифтадим». Ўтмиш донишманлари бу ҳақда фикр юритганларида ёлғон ишлатишни уч ҳолатда жоиз эканини айтганлар: кофиirlар билан тўқнашганда, икки кишини яраштираётганида ва эрхотин муносабатига доир айrim ҳолатларда.

Шу ҳикматларга биноан ҳазрат Навоий ёзадилар:

«Ақдли одам ёлғон гапирмас. Аммо барча рост гапни айтавериш ҳам түғри эмас. Бирорнинг кўзи ғилай – ногирондир, бироқ у бунга айбдор эмасдир. Бирорни ноҳақ хижолатга солмоқ – ўз нодонлигини изҳор қилмоқ ва бир кўнгилни оғримоқдир. Бу каби кишини хафа қиласидиган чин сўздан кўра зарурат юзасидан ўрни билан гапирилган ёлғон яхшироқдир».

Байт:

*Ёлғон ўлса мулояматомиз  
Ваҳшатангиз чиндан англа азиз.*

Дейилмоқчики: ёлғон агар тасалли, таскин берса, даҳшатли чиндан азизроқ бил.

Тўғрилик ва хиёнат, ёлғончилик ва диёнат бир-бири билан сира чиқиша олмайди.

**Ривоят.** Шоҳ Акбар замонида, Ҳиндистоннинг Деҳли шаҳрида бир кампир яшарди. Эри вафот этган, қариндошлари эса тури шаҳарларга тарқаб кетган эдилар. Кампир ҳаж ибодатини ният қилиб, уйжойини сотди. Мулкини иккига бўлиб, бир қисмини сафар харажатларига атади. Минг тилла тангани эса яхшилаб туғиб, устидан тўрхалта тўқиб ўради-да, қозига элтди:

– Мен Каъбани зиёрат этишни ният қилиб йўлга отландим. Мана бу тўрхалтада тўплаган пулим бор. Сизни диёнатли одам, деб эшитганман. Бу пулни сизга омонатга қолдирмоқчиман, – деди. – Агар беш йил ичida эсон-омон қайтсан, ўзимга берасиз. Қайтмасам, хоҳишингизга кўра ишлатиб юбораверасиз.

Унинг илтимосини эшитган қози деди:

– Мен бир бечора одамман. Омонатга доир ишлардан қўрқаман. Лекин менга ишонган экансиз, начора, пулингизни олиб қоламан. Сизни Аллоҳ Таоло паноҳида асрасин.

Кампир ибодатни адо этгач, Деҳлига соғ-омон қайтиб, қозидан омонатини талаб қилди.

— Ўзим билан олиб кетган пулларимни ишлатиб та-  
момладим, сизга қолдирған тангаларимдан бўлак маб-  
лагим йўқ, — деди.

Қози кампирнинг омонатини қайтарди. Кампир унга миннатдорчилик билдириб, ўзи тўқиган тўрхал-  
тани қайчида кесиб қарасаки, тилла тангалар ўрнида  
ранги ўчган мис чақалар турибди. Кампир оҳу воҳ билан қозининг ҳузурига қайтиб, пулларини қайтаришни илтижоларни эшитиб, раҳм қилиш ўрнига қозининг ғазаби қўзиди.

— Ҳаж ибодатини қилиб қайтган сендақ кампир учун диёнат соҳибига түхмат тошлари отиш гуноҳи кабира ҳисобланади. Сен дарров эсингни йиггин-у яхшиликча изингга қайт. Бўлмаса ҳузуримдан қувиб чиқараман.

Иложсиз қолган кампир йифлай-йифлай шоҳ саройига бориб, дардини Акбарга баён қилди. Подшоҳ айбдорни чақиритириб, суриштирганда тўғрилилка хиёнат қилган қози ёлғон гапиришдан уялмади:

— Бу кампир түхмат қиляпти, олампаноҳ! У пулларининг устидан тўрхалта тўқиган экан, битта ипига ҳам хиёнат қилмадим. Виждони бўлса, ўзи айтсин, тўрхалтанинг титилган жойи бор эканми?

— Тўрхалта ўзим тўқиганим ҳолида бус-бутун эди, — деди кампир, — лекин, ичидаги тилла тангаларнинг мис чақаларга айланиб қолишига ақдим етмаяпти.

Қози тониб туравергач, Акбар шоҳ уларнинг иккавига ҳам ижозат бериб юборди. Подшоҳ эрталаб ўрнидан тургач, устига ёпадиган тўрчойшабнинг ўртасидан бир парчасини кесиб олди. Хизматкорларига ҳеч нима демай ўз иши билан машғул бўлди. Ҳобгоҳ ходими чойшабнинг кесилганини кўриб, дарров хизматкорларни йигиб, айбдорни қидирди. Айбдор топилмагач, шаҳардаги энг яхши тўқувчини топтириб келди. Тўқувчи тўрчойшабни аслига келтириб, тўқиб, ямаб берди. Акбар шоҳ ётар олдидан чойшабни кўрди-да, ходимини чақириб, бу ишни ким бажарганини сўра-

ди. Ходим қўрқа-қўрқа воқеани баён қилди. Шундан сўнг подшоҳ тўқувчини олиб келишни буюрди.

– Сен қўрқиб титрама, қўли гул тўқувчи экансан. Чойшабимнинг ямалганини бирор тикилиб қараса ҳам билолмайди. Кичкина халтачаларни ҳам шундай усталик билан ямай оласанми?

Подшоҳнинг мақтovидан ҳузурланган тўқувчи деди:

– Бунақа ишлар мен учун қийин эмас. Яқинда қози ҳазратнинг халтачалари титилиб қолган экан, ўзидан афзал қилиб тўқиб бердим. Маҳоратимга қойил қолиб, бешта тилла танга инъом этдилар.

– Бешта тилла танга бердими? – деб ишонмагандай сўради подшоҳ.

– Ҳа, беш тилла танга бердилар. Биттасини ишлатдим, тўрттаси уйда турибди.

– Ўша тўртга тилла тангани эрталаб саройга олиб кел, – деб буюрди Акбар шоҳ.

Подшоҳнинг амрига мувофиқ кампир ҳам эрталаб саройга етиб келди.

– Сиз тилла тангаларингизни бошқа тангалардан ажратса оласизми? – деб сўради подшоҳ.

– Ҳа, – деди кампир, – мен ҳар бир тангага билин-нар-билинмас чизик-белги тортиб қўйганман.

Тўқувчи олиб келган тўрт тангани бошқа ўн тангага аралаштириб қўйишган эди, кампир белгиларига қараб, ўзиникини ажратиб берди. Шундан сўнг қозини олиб келдилар. Қози саройга кириб, тўқувчини кўрди-ю, саросимадан ўзини йўқотди...

Қадим адабиётимизда кўплаб учрайдиган бу каби ҳикматлар китоблар саҳифасидан кўчиб, хонадонларга кирса, уларга, аввало, катталар риоя қилсалар, сўнг фарзандларини шу руҳда тарбия этсалар, икки дунё саодатига элтувчи йўлдан адашмаган бўладилар.

Алломаларидан бири Ризоуддин ибн Фахриддин «Жавомеъ ул калим» деб номланган асарларида тўғрилик ҳақида ибратли фикрларни баён қилганларки,

ўрни келганды улардан баҳраманд бўлиш айни муддаодир.

«Тўғрилик эзгуликка, эзгулик эса жаннатга олиб боради. Одам боласи сўз ва амалда тўғриликни биринчи даражада тутиши сабабли Аллоҳ қошида сиддиқлар (тўғрилар) сирасига киради. Ёлғон ёмонликка, ёмонлик эса дўзахга олиб келади. Одам боласи ёлғон гапира-гапира Аллоҳ қошида кazzоблардан бўлиб қолади».

Мазкур шарафли ҳадисни Ризо ҳазрат бундай шарҳ-лайдилар:

Инсонларда яхши ва ёмон хулқлар жуда кўп бўлса ҳам, ахлоқ олимлари уларнинг ҳаммасини икки хилга – тўғрилик ва ёлғончиликка тақсимлашган. Қанча яхшилик (фазилат) бўлса, шуларнинг ҳар бири тўғрилик (сиддиқлик) остига ва қанча бузуқлик (разолат) бўлса, ҳаммаси ёлғончилик (кazzоблик) остига киради.

Тўғриликни фикрда, сўзда, муомалада, ваъдада тўғри бўлиш каби турларга айриш мумкин.

**1. Фикрда тўғри бўлиш** ўзини ўзи алдамасликдан ҳамда йўқ нарсалар билан ҳақиқатни ўзидан пардаламасликдан иборатdir. Инсон бир нарсанни фикрлайди ва шу нарсага эътиқод қиласи-да, кейин тама ва баҳиллик ёки газаб ва адovat сабабли ўзининг шу эътиқодига шубҳалана бошлади. Ҳақиқатни ўзидан яширишга чоралар излайди ва топади ҳам. Агар баҳиллик ва тамани, газаб ва адovatни бир четга ташласа, у вақтда аввалги эътиқоди очиқ суратда майдонга чиқади ҳамда шу эътиқоднинг дурустлигига ва ҳақиқат эканига унда ҳеч бир шубҳа қолмайди.

Баъзи кишилар бир нарсанинг (фикр, иш, эътиқод) бузуқлик эканини билишади ва шунга кўнгиллари мойиллиги сабабли ўзларига уни тузук кўрсатишга тиришишади ва йўл излашади. Бу ишлари тўғрилик эмас, балки ёлғон ҳамда ўзини ўзи алдашdir.

**2-3. Сўзда тўғри бўлиш ва муомалада тўғри бўлиш** бутун ҳаёт ва маишатнинг тиргагидир. Яхши мол сотиш, қарзларни вақтида бериш, омонатни сақ-

лаш, бироннинг ҳақини емаслик ва олиб қолмаслик муомалада тўғри бўлишга киради.

**4. Ваъдада тўғри бўлиш.** Ваъда ҳам муомала ҳукми остига киради.

Аблаҳ кишиларда дўстлик, ёлғончиларда садоқат бўлмаслиги сир эмас. Шундай экан, нима учун айрим одамлар тўғриликни одат этмайди, ёлғондан ва ваъдага вафо қиласликтан сақланмайди?

Сабаби маълум: болалик ва ёшлик вақтида яхши тарбия олмаганидан, рост сўзлашга ва ёлғон гапиришдан сақланишга одатланмаганидандир. Бу одат болалигига ота-она тарафидан ҳосил қилиниши зарур. Болалик вақтида тўғриликка ўрганмаган киши учун китобларда ёзилган, минбарларда айтилган ва мўттабар кишилар сўзлаган сўзларнинг самараси оз бўлади. «Қайсики она ёки ота боласига бир нима бераман, деса-ю бермаса, ёлғончи бўлиши учун шунинг ўзи кифоя» эканини Расууллоҳ (с.а.в.) таъкидлаганлар. Чиндан ҳам катталар болани овутиш учун қанча кўп ёлғон гапиришларини ўйлаб ҳам кўрмайдилар. Болага ёлғончиликни бирор атайнинг ўргатмаса ҳам, бу иллатни ўз ота-онасидан ўрганади. Ҳатто, ҳали тили чиқмай туриб ҳам отаси ва онасининг ёлғонларига тақлид қила бошлайди. Агар бу гапларни ота-оналар малол олишиша, хотиржам пайтларида фарзандлари ёки жиянларини кузатсинлар.

Имом Бухорий ҳазратларининг фаолиятлари ҳақидаги ҳикояларда баён этиладики, ул зот бир ҳадисни ишончли манбадан ёзив олиш учун узоқ кунлар давом этувчи сафар машаққатидан ҳам қайтмаганлар. Саҳро барҳанларини ошиб бир қишлоққа борганида ишончли ҳадис сўзлаб бериши лозим бўлган киши тушови бўшаб кетган отни ушлаш учун бўш этагини очганича, гўё арпа бермоқчидай, жоноворни алдаб чорлаётган экан. Ҳазрат Бухорий бу ҳолатни кўриб «Бу киши ёлғончи экан, айтадиган ҳадиси ишончли эмас», деб изларига қайтган эканлар.

Кема ва поезд машинистлари бир дақиқа ҳам бе-парволик қилмай, машиналарига қараб боришга қай даражада мажбур бўлишса, ота-оналар ҳам, устозлар ҳам ёш болаларига шу даражада қараб туришлари, тўғриликка ўргатиб, ёлғондан сақланишга кўникма ҳосил қилдиришлари лозим. Болаларга яхши тарбия шу равишда берилади. Тўғриликка малака ҳосил қилган болаларнинг бошқа бузуқликлардан сақланишига умид боғлаш мумкин, чунки дунёдаги бузуқликларнинг ҳеч бири тўғрилик билан бир ерда жам бўлмайди.

**Ривоят.** Бир киши амир Алининг олдига келиб:

– Ё амир, исломда ман қилингтан нарсалар кўп. Мен ёлғон сўзлайман, ўғрилик қиласман, шароб ичаман, бошқа гуноҳларим ҳам бор. Лекин мен ана шу гуноҳ ишларнинг ҳаммасидан бирданига халос бўлолмаяпман. Бинобарин, яхши фазилатлардан бирини ўргатинг, токи гуноҳ қилмоқдан халос бўлай, – деди.

– Ёлғон сўзлашдан ўзингни сақлагин, – деб насиҳат қилди амир Али.

У киши Алининг ҳузуридан чиқиб, ўз йўлига кетди. Йўл устида майхона бор эди. Унинг дилида шароб ичишга майл туғилди ва шу ниятда майхона сари юрди. Юра туриб ўйлади: «Агар амир мендан «Шароб ичдингми?» деб сўраса, мен «ҳа», деб тўғрисини айтсам, у ҳолда жазога рўпара бўламан. Агар «йўқ» деб жавоб берсам, алҳол «ёлғон гапирмайман», деб аҳду паймон қилганман». У киши ўйлай-ўйлай нафсини енгди-ю, шароб ичмоқ фикридан қайтди.

Шунингдек, йўлда бир хотинни учратиб, шаҳвоний ҳирси қўзғаб, зино қилмоқ ҳаракатига тушди. Бироқ, аввалгидек қилган аҳду паймони ёдига келиб, бу бузуқликдан ҳам воз кечди. Натижада, қайси бир гуноҳ ишнинг устидан чиқса, эсига ёлғон гапирмаслик ҳақидаги қилган аҳду паймони тушиб, ўзини тўхтата-верди. Шундан сўнг у амир Алининг ҳузурига келиб деди:

– Ё амир! Бир гуноҳдан тўхташим туфайли қаршимда очиладиган барча тўғри йўлларни кўрсатдинг. Барча ёмонликларнинг бошланиши ёлғон гапиришдан вужудга келишини энди тушундим.

**Умидимиз юлдузлари**, эндиги баёнимни отонангиз ёки устозингиз билан бирга ўқиб, фикрлашсангиз, фойдалироқ бўларди: тўғриликка малака ҳосил қиёдириш қасди билан болаларга буйруқ бериш, уришиш ва сўкиш фойдали эмас, балки заарлидир. Бола нима учун ёлғон гапиради? Бирон жазодан қутулиб қолиш учун, шундай эмасми? Эндинга тўрт ёшга тўлган бола косани синдириб қўйди ёки мураббони тўкиб юборди. У онаси ёки отасининг бақиришидан ёки уришидан қўрқади. «Бу ишни мен қилмадим», деган ёлғон унинг учун нажот бўлиб кўринади. Таҳдид оҳангি билан «ким қилди?» деб сўралса, оддий ёлғон тухматни чорлайди: айбиз одамнинг номи айтилади. Бу одат оиласдан боғчага, ундан мактабга кўчади. Уйга берилган вазифани бажармаганини яшириш учун айтиладиган «дафтарим уйда қолибди», деган баҳона неча ўн йиллардан бери авлоддан-авлодга ўтиб, то ҳозиргача ишлатилади. Болага тарбия беришнинг йўли ота-она ўзлари болалар олдида рост сўзлашлари, ёлғон гапирмасликлари, болаларга ўрнак бўлишилари ва фарзандларининг муҳаббатларини қозонишга эришишлари орқали бўлади. Одам болаларини эзгуликка ва жаннатга олиб борадиган тўғрилик ана шундай бўлиб, сиддиқлар худди шундай кишилар орасидан етишиб чиқдилар. Оталар ва оналар ўзлари қилмайдиган иш ҳақида болаларига, «ундай қиламиш, бундай қиламиш» дейишлари ёки юпатиш учун ваъда беришлиари бола тарбияси учун жуда заарлидир.

Ёлғончи одам таҳқир ва койишгагина сазовор эмас, у жуда ҳам мушкул, ноаниқ, мужмал ҳаёт кечиришга мажбурдир. Чунки биринчи сўзлаган ёлғонини хаспўшлаб беркитиш учун иккинчи ёлғонга, буни ҳам беркитишга ҳаракат қилиб, учинчи ёлғонга эҳтиёж сезади.

Шундай қилиб катта ва қўрқинчли хатоларга дучор бўлади. Ўзининг иззат ва обрўсими халқ орасида йўқотгани соясида доимо қайғу-алам билан умр ўтказади. Демак, ёлғончилик ва иккиюзламачилик жуда ҳам нафрат этиладиган иллатлардан саналади, ёлғон сўзлаш – ўзини камситиш ва таҳқир қилишдир. Бу ёмон иллатни тарқ этиш лозимлигини билишнинг ўзи кифоя эмас. Афсусларки, орамизда буни яхши билгандари ҳолда ундан қутулишга бепарво одамлар ҳам топилади. Шундайлар борки, ёлғон топа олмаган ҳоллардагина рост сўзлашга мажбур бўладилар. Ёлғончи одамлар ўз ёлғонларига бошқаларни ишонтириш учунгина рост сўзлайдилар. Бу ёлғончиларнинг юзлари кулиб тургани билан қалблари қорадир. Кўринишлари одам шаклида бўлгани билан, ёлғон гапирганлари учун инсонийликдан узоқлашганлар.

Ибн Масъуд дедиларки: «Энг яхши озуқа тақводир энг ёмон кўрлик қалб кўрлигидир. Хатоларнинг энг каттаси ёлғондир». Бу ҳикматдан келиб чиқадиган маъно: қалби кўр одам ёлғони оқибатида келувчи хасратни кўра олмайди. Ёлғончиларнинг бу иллатдан қутулишлари учун Арасту ҳакимнинг: «Тўғриликда ўлиш – ёлғончи бўлиб узоқ умр кўришдан кўра хайрлидир», деган ҳикматлари асқотармикин? Эҳтимол, ҳазрат Навоийнинг: «Бирорким, эрур ростликдан йироқ, анингдек киши бўлмоғон яхшироқ», деган доно сўзлари таъсир қиласар?

Бу гаплар-чи?

«Ҳар кимнингки сўзи ёлғон, ёлғонлиги билингач, уятга қолғон. Ёлғонни чиндек гапиравучи сўз устамони – кумушга олтин қоплаб сотувчи заргар... Ёлғон гапиравучи фафлатдадир. Сўзнинг бир-биридан фарқи кўпдир, аммо ёлғондан ёмонроқ тури йўқдир... Ёлғон гапириш билан ўз вақтини ўтказувчи одам, бу қилифи ёмон туюлиши ўрнига, кишиларни алдаганидан фахрланади ҳам. Ёлғончи ўз гапига гўллик билан қулоқ соловчини топса, уларга ёлғонини чин ўрнига ўтказса,

муродига етган бўлади. Ёлғончи – Ҳақ қошида гуноҳкор. Ҳалқ олдида эса шарманда. Бундай наҳснинг беор юзи ёмонликка ўтирилган бўлади. Бундай наҳсга ботган одам кутлуғ уйдан нари бўлғай («кутлуғ эв» – кутлуғ уй, яъни биз яшаётган дунё демак).

*Ул кишини құтлуг эвдин ташқари сурмак керак,  
Құтлуг эв дүнёдүрүр, яъники, ўлтурмак керак.*

...Озгина ёлғон ҳам улуғ гуноҳдир, озгина заҳар ҳам ҳалок қилувчидир.

*Захрнинг оз эса миқдори даги мұхлиқдур,  
Игнанинг нұғи заиф эрса даги күр қылур.*

Ёлғончи одам – уннутувчи. У андиша ва эҳтиётдан четда турувчи. Ҳар кимнинг сўзи чин бўлмаса, ростгўйлар кўнглига у сўз қабул бўлмас. Ёлғончи ўзининг ёлғон сўзига бир-икки марта ишонтиради. Кейин нима қиласи? Ёлғончилиги маълум бўлгач, у расво бўлади. Унинг сўзига ҳалқ ишончи йўқолади. Кўнгил хазинасининг қулфи – тил. У хазинанинг калити – сўз бил.

Чин сўзни ёлғонга чулғама, чин гапира оладиган тилни ёлғонга булғама. Ёлғончи – киши эмас, ёлғон айтмоқ – яхшилар иши эмас. Ёлғон сўз – айтувчини беътибор қиласи. Чунки у гавҳарни оддий тошдек хор қиласи. Кимки чин сўзни ёлғонга қотади, бебаҳо дурни нажосатга отади.

*Гавҳареким, шоҳларга зеби тожу таҳт эрур,  
Ташлагон они нажосатга ажаб бадбахт эрур.*

Шоҳларнинг тож ва таҳтига безак бўлган гавҳарни нажосатга ташлаган ажаб бадбахт кишидир...

Ёлғончиликдан ҳазар қиласи яшаётганлар агар «Бу гапларни ўзимизга ўхшаган бир одам айтган-да», деб ўжарлик қилсалар, уларга Аллоҳ таборак ва таолонинг

бу огоҳлантиришлари эслатмадир: «Албатта, Аллоҳ (ий-монда) содиқ кишиларни билур ва, шунингдек, ёлғончиларни ҳам аниқ билур» («Анкабут»). «Қасамларингизни ўзаро алдов воситаси қилиб олмангиз» («Наҳд»).

Ҳазрат Сўфи Оллоҳёрдан байт:

Қилич бошинга келса, айма ёлғон,  
Ўлумдиндур батар чунки у ёлғон.

Дейилмоқчики: бирор бошинг узра қилич кўтариб чопмоққа шай турса-да, ёлғон гапирма. Чунки ёлғон, эртами-кечми, барибир очилади. Шунда сен халқ орасида уятга қоларсан. Шунинг учун уят – ўлимдан ёмон, деб бекор айтмаганлар.

Нажас мурдор эмас ёлғончиликдин,  
Мусулмонега шарм эт бу қилиқдин.

Дейилмоқчики: кўриб турибсан, нажасларнинг најаслироги ёлғончилик экан. Шунинг учун зинҳор-базинҳор бундайин ёлғончи кимсалардан, уларнинг қилиқларидан уялгин, ёлғон сўзни сўзламагил, дея мусулмонларга ўгит қиласавер.

**Ривоят.** Бир фирибгар бегона шаҳарга келиб «Ҳаждан келаётибман», деб мақтанди сўнг бир китобдан қасида кўчириб, «Буни подшоҳга аatab ўзим ёздим», деб тортиқ қилди. Подшоҳ бундан қувониб унга кўп неъмат бериб, иззат ва икром қилди. Подшоҳ мажлисининг яқинларидан бири шу куни сафардан қайтиб, фирибгарни кўрди-ю «Мен бу кишини Курбон ийдида Басра вилоятида кўрдим, бу нечук ҳожи бўлур?» деди. Яна бир киши айтдики: «Мен буни танирман, отаси насроний эди, ватани Малатиядир». Бундан сўнг билдиларки, бу одам ҳожи ҳам, саййид ҳам эмас экан. Подшоҳ шаънига ёздим дегани қасида Анварий девонидан кўчирилганлиги ҳам аён бўлди. Унинг ёлғони занжир ва таёқ билан тақдирланди.

**Ҳикмат.** Ёлғон сўз айтмоқ қилич зарбиға ўхшар, агарчи яраси бутса ҳам нишони қолур. Андоғким, Юсуф алайҳиссаломнинг биродарлари ёлғон сўз била машҳур бўлдилар ва аларнинг рост сўзлариға ҳам эътилимод қолмади.

**Ҳадис.** Ҳазрати имом Абу Ҳанифаи Куфий (қ.с.) кечалари уч юз ракаат намоз ўқир эдилар. Бир куни кўчадан ўтиб борар эканлар, бир хотиннинг бошқа хотинга: «Бу киши беш юз ракаат намоз ўқийдилар», деганини эшитдилар. «Шу хотин ёлғончи бўлиб қолмасин», деб энди беш юз ракаатдан ўқий бошладилар. Бошқа бир кун шогирд боланинг «Бу киши кечалари минг ракаатдан намоз ўқийдилар», деганини эшитиб, «Бола ёлғончи бўлиб қолмасин», деб энди минг ракаатдан ўқидилар. Шогирдларидан бири айтди: «Халқ сизни кечалари ухламай намоз ўқиб чиқадир», дейди. Ҳазрати имом бу гапни эшитиб, «Энди кечалари ухламасман», дедилар. «Нечун?» деб ажабланди шогирд. «Халқ ёлғончи бўлмасин», дедилар. Шундан сўнг ўттиз йил ухламадилар. Бомдод намозини хуфтон таҳорати билан ўқир эдилар. Икки тиззалари гўё туя тиззасига айланган эди.

Ёлғон ва алданиш турларини ҳаётда ҳар куни кўплаб учратамиз. Оилада заарсиз туюлган кичик ёлғонни тимсоҳ тухумига ўхшатиш мумкин. Тимсоҳ боласи тухумни ёриб чиқиб ваҳший махлуққа айланади. Хотинини ёлғон гап билан алдаётган эр (ёки эрини алдаётган хотин) бу иллатни қачон ва қаерда ўрганганини бир мулоҳаза қилиб кўрса ёмон бўлмас эди. Корхоналарда, идораларда ёлғон либосига ўралган баҳоналарнинг саноғи йўқ. Бозордаги ёлғон дўллари-чи?

- Олма неча пул?
  - Минг сўм.
  - Саккиз юздан беринг...
  - Нима деяпсиз, ўзим саккиз юз элликдан олганман...
- Аслида олти юз эллик сўмдан олган. Ёлғон ишлатмаса ҳам фойдасига сотади. Ким ҳаромга аралашти-

риб топилган фойдани нақадар афзал билса, унинг келажаги шунчалар аянчли! Набий муҳтарам (с.а.в.)-дан: «Қандай даромад хайрлироқ ва яхширок, ё Расулуллоҳ?» деб сўрашди. Ул зот дедилар: «Меҳнат қилиб топилган ва алдовсиз тижорат орқали келган даромад».

Ёлғончилар орасида қўрс, тўнг феълли одамлар кам учрайди. Аксинча улар ширин муомалалари билан кишининг жонини суғуриб олишга қодир бўладилар.

**Масал.** Бир қарға пишлоқ парчасини олиб, дараҳт шохига қўниб турарди. Оч тулки қарғанинг оғзидағи пишлоқни кўриб, шошилганича дараҳт остига келди:

– Кунингиз хайрли бўлсин, қарға ҳазратлари! Бунчалар чиройлисиз-а! Гўзал ипак каби патларингиз кўзларимни қамаштиряпти. Майин патларингиз каби овозингиз ҳам фоят ёқимли. Шубҳасиз, барча қушлар сизни булбулдан ҳам афзал деб биладилар, – деди.

Қарға бу сўзларни эшитиб, севинди. Севинганидан шоҳдан-шохга сакради. Сўнгра булбулдан афзал эканини намоён қилиш учун бутун қуввати билан «Қар! Қар!» деб қағиллаганида оғзидағи пишлоқ тушиб кетди. Тулкига худди шу керак эди. У пишлоқни илиб олиб, пақъос туширди-да, қарғага қайрилиб ҳам қарамай кетворди. Қарға эса бу воқеадан лол қолди. Ҳайратланиб ўйга толди. «Бундай тотли сўзларга энди алданмайман», деб қасам ичди.

Бу дунёда худди шу тулки каби айёр кимсалар бордирки, улар ширин сўз ва мадҳлари билан кишини алдаб, қўлидагини олиб қўйишга уринадилар. Кейин эса хайр-маъзурсиз қочиб қоладилар. Бундай одамларни «төвламачи», деб ҳам атайдилар ва жамият қонунига қўра, уларга жиноий жазо ҳам белгиланади. Эсли одам учун бу дунёда энг зарур вазифалардан бири тулки феълли төвламачиларнинг ёлғон сўз ва сохта хушомадларига алданмасликдир. Тулкифеъл айёр кимсалар қанча подшоҳлар ва бойларни гўзал сўз ва мадҳлари билан ҳалокатга етаклаганлар. Ҳар бир хушомадгўй мазкур масалдаги тулкига ўхшайди. Яқин-

лашган инсонни ҳалокатга етаклайди. Ёлғончининг ширин сўзи софдил кишиларга бир тузоқ эканини унутмаслик зарур.

Ер юзини ёлғои баҳоналар уммони босганга ўхшайди. Гўдакликда одат тусига кирган бу иллатдан айримлар қарилик ёшига етганларида ҳам айрилгилари келмайди. Баъзи қарияларнинг юзларига қарасангиз, «нуроний» деб иззатлашга арзигулик нур йўқ. «Ёлғон сўзламоқдан парҳез қилмагани сабабли шундаймикин?» деб ўйлаймиз.

**Воқеа.** Йигирма беш йил муқаддам бир воқеа содир бўлган эди. Мен мудирлик қилаётган бўлимда ишловчи ёш дўстимиз «Онам оғир касаллар», деб барвақт кетишга ижозат сўради. Бундай ҳолда ким рухсат бермайди? Орадан тўрут соат ўтиб, иш вақти тугагач, кўчада кетаётib уни бир қиз билан қўлтиқлашиб кетаётганини кўрдим. У эртасига ҳам ишга келмади. Индинига хафаҳол кўринишда пайдо бўлди. Қизни кузатгач, қишлоғига бориб келгандир, деб ўйлаб, «Онангиз тузумилар?» деб ҳол сўрадим. «Мазалари йўқ», деди. Бир соатдан сўнг унинг опаси қишлоқдан қўнгироқ қилиб, «Укамга насиҳат қилиб қўйинг, икки ойдан бери уйга келмайди», деди. Қисқаси, мен у йигитга танбеҳ бердим-у ариза ёзиб, бўшаб кетишини талаб қилдим. Мен унинг ёлғон гапиришини кечирсам бўларди. Лекин соғлом онасини «оғир касал» дейишини кечириш мумкин эмасди...

Ёлғон сўзлаш ироданинг заифлигидан далолат беради. Одам истаса-истамаса, сергаплик уни ёлғон кўчасига бошлаб кетади. Таомланиш лозим бўлса, қозонга бошимизни тиқмаймиз, керагини сузив еймиз. Гап ҳам шундай бўлиши керак. Унни ёки қумни элаб ишлатганимиз каби тилимиздан учайтган сўзларга илашган ёлғонни ушлаб қолиш учун ақл ва тафаккур элагида элаб олишимиз шарт.

**Ривоят.** Бир лофчи ёлғон сўзларни кўп сўзлар эди. Бир куни мажлисда денгизларнинг аҳволидан ва ден-

гиз саёҳатида кўрган томошаларидан ҳикоя қилди. Мажлисдаги кишиларнинг бири сўрадики: «Эй биродар, сиз денгизда кўп саёҳат қиласганга ўхшайсиз. Денгизларнинг балиқлари дарё балиқларидан ўзгачадир? Улар қандай бўлар экан?»

Саволдаги пичинг оҳангини англамаган лофчи у кишига боқиб деди:

– Ҳалигача сиз денгиз балиқларини кўрганингиз йўқми? Денгиз балиқлари туяга ўхшаш икки узун шоҳли бўулурлар...

Мажлис аҳди билдиларки, ул бечора на туяни кўрган экан ва на денгиз балиғини. Барчалари кулиб юбордилар. Лофчи эса уялиб, мажлисни тарқ этди.

Фитрат – яратилиш жиҳатидан олиб қарасак, одам боласи ахлоқнинг барча турлари, жумладан, ҳар хил ёмон хулқларга ҳам эга бўлиши мумкин. Аммо унинг табиатида ёлғон билан хиёнат бўлиши сира ҳам мумкин эмас. Бу икки иллат ҳар бир инсон учун катта қусур ва қабоҳатдир. Ҳар қандай киши учун бу икки ахлоқ қабоҳат экан, демак, комил инсон йўлини танлаган кишига асло ярашмайди. Чунки виждан эгалик қиласган қалбга ёлғон ва хиёнат сифмайди. Шунинг учун ҳам яхши одам тўғрилик ва вафодорликни севади, бошқаларни ҳам шунга чақиради.

### **«Қариндош» иллатлар**

Иғвогар мисоли кўмир, куйдирмаса ҳам кишини қора қиласди. Иғвогарни бошқалардан ажратиш қийин эмас – у бировларнинг кулфатидан шодланади. Иғвони касб қиласган одам киши танасида юриб, фақат яра бор жойда тўхтайдиган пашшага ўхшайди.

Ёлғон иллатининг «фарзандлари» борасида батафсил суҳбатлашиш фурсати етди. Кишининг сақланиши зарур бўлган – чақимчилик, тұхмат, фийбат, ҳасад, иғво, фитна, ҳийла – бир оиласа мансуб «қариндош» иллатлардан ҳисобланади. Агар ёмонликлар орасида

кўрик-танлов ўтказилса, барчалари бир погонада турган бўларди. Бу иллатларни бир онадан бир пайтда бирга туғилган эгизаклар, десак ҳам бўлади. Чунки бирининг иккинчисидан кам ери йўқ. Ҳаммаси оила баҳт саройининг кушандаларидир ва уларни бир сўз билан «фисқу фужур» (ёмонлик, бузуқлик – ахлоқсизлик) деб, бу иллатлар эгасини эса «фосик» деб аташ мумкин. Яна тилимизда «фисқу муфрит» деган атама борки, унинг маъноси – ўтакетган бузуқликдир.

Фийбатни руслар «сплетня», «злословие» дейдилар. Фийбатнинг отаси – бекорчилик. Шунинг учун «Болалик уйда фийбат йўқ», дейдилар. Болаларнинг ширинширин гаплари, қувноқ ўйинларига маҳлиё бўлганларнинг хаёлига бирорни фийбат қилиш келармиди?

«Туҳмат» ва «бўҳтон»ни «клевета», «иғво»ни «provocation», «фитна»ни «интрига», «заговор» дейдилар. Иллатларнинг русча маъносини беришдан мақсадим, ёшлар орасида бу иллатларни биргина «провокация» атамаси билан тилга олиш одати кўп учрайди.

Баъзилар бу тушунчаларни бир деб, маънодош сўзлар сифатида ишлатадилар. Масалан: «Фалончи тинмай фийбат қиласди. Унинг иғвоси натижасида ҳалокат юз берди». Тўғри, фийбат – иғво ва фитнанинг бошланиши. Фийбат кишига заарсиз, ўткинчи бир гапдай бўлиши мумкин. Лекин иғво давомли бўлади. Ёмон ният амалга ошмагунча тинчилмайди. «Иғво» ва «фитна»нинг нима эканини тасаввур қилиш учун яна Одам Ато ва Момо Ҳаввонинг тақдирларини эслайлик. Шайтон алайҳилаъна ёлғонни ишлатиб иғво ва фитна қилмадими?! Шунинг учун ҳам дуога қўл очилганида Аллоҳ Таолодан шайтоннинг ҳийласидан, иғвосидан, фитнасидан сақдаш илтижо қилинади.

Куръони Каримнинг «Шуаро» сурасида шайтон алайҳилаъна иғвосига учеб, йўлдан озганларга дўзахнинг кўндаланг қилиб қўйилгани ҳақида огоҳлантириш бор. Одам Ато яралганидан бери шайтон иғво ва фитна билан банд. Унинг мақсади аниқ – бандани

ҳидоятдан четлатиш, бу дунё ҳаётида беобрў, бадном қилиш ва Қиёматда дўзах сари етаклаш. Ифво ва фитна шайтоннинг касби экан, одам боласининг бу касбга меҳр қўйиши, аввало, ўзи учун, қолаверса жамият учун фожиадир. Мени бу борада бир нарса кўп ўйлантиради: шайтон кибри учун Аллоҳ Таолонинг ғазабига учради. Шу туфайли Одам Ато ва унинг авлодига душман бўлди. Душманлиги боисидан ифво-фитнани бас қилмайди. Хўш, бизларнинг орамизда яшаб, биз билан бир ҳаводан нафас олиб, бир булоқдан сув ичувчи кимса нима учун ифво ва фитнадан ўзини тиймайди. Бу иллатларнинг гуноҳ эканини, кимгадир қилган ифвоси ёки фитнаси учун дўзах азобига дучор бўлишини билмайдими? Билади! Хўп, ифвоси ёки фитнаси орқали нимага эришади? Ҳеч нимага! Ёмон кўрган одами унинг ифвоси туфайли ишдан ҳайдалар, оиласи бузилар ёки бошига бошқа бир мусибат тушар. Хўш, ифвогарга бундан нима наф? Фақат кўнгли бир оз «роҳатланади». Шугинами? Ҳа, шугина! Ифвоси туфайли эришган «кўнгил роҳати»ни тарозининг бир палласига, дўзахдаги азобини иккинчи палласига хаёлан қўйиб кўрайлик-чи?

**Масад.** Бир арслон бетоб бўлиб қолди. Барча ҳайвонлар зиёратга келишди, фақат тулки келмади. Бўри бу қулай фурсатни қўлдан бермаслик учун ифво қилди:

– Тулкининг ярамаслигини энди билдингизми? У сизни менсимайди, жасталанганингизни эшишиб, қувониб юрибди. Агар бу қилифи учун жазоламасангиз, бошқа ҳайвонлар ҳам ундан ибрат олиб, сизни назарписанд қилмай қўйишади.

Бўрининг ифвосини қўён эшишиб турган эди, ўша заҳоти тулкига етказди. Тулки вақтни бой бермай, бир хўрозни тутди-да, арслон ҳузурига таъзим билан келди. Арслон ғазаб билан наъра тортди. Тулки эса таъзимдан бош кўтармай, узрини баён қилди:

– Улуғим, сизнинг бетоблигингизни эшифтганимдан бери ҳузур-ҳаловатимни йўқотганман. Сизнинг сало-

матлигингиз учун мен жонимни беришга ҳам тайёрман. Бошка ҳайвонлар сизни күргани келишганда мен дардингизга даво излаб юрган эдим. Бағоят тажрибали, құли енгил табиб борлигини эшитиб, уни қидириб топдим. Ҳузурингизга даъват қылған эдим, боласи вафот қылғани учун кела олмай, узрини айтди. Аммо сизни шифолаш йўлини менга тушунтириди. Сиз хўрозда гўштини еб, ўтини почаси билан аралаштириб оғриган ерингизга сурасиз, кейин бўрининг оёғини узиб олиб, қони қотмай туриб боғлайсиз.

Арслон тулкининг сўзига ишонди. Хўрозда гўштидан еган эди, ўзини бир оз енгил ҳис этди. Тулки кетгач, бўри унинг жазосиз чиққанидан ажабланиб, арслон ҳузурига кирди-ю, оёғидан ажралди...

Эътибор қылдингизми, бир иллат иккинчисини уйғотяпти: бўри ифвонинг уясини кавлади; қуён бўрини ёмон күргани учун чақимчилик қылди. Тулки эса бўрининг ифвосини даф этиш учун ифвони ҳийла либосига ўраб қасдини олди. Агар бўри қуённинг чақимчилигини билса, бу ёғи нима бўлишини билаверинг. Ўтмишнинг машхур адиларидан Анатоль Франснинг «Адоватчиликка қарши адоват уйғотинг» деган чақириги бор. Агар бу чақириқни тўғридан-тўғри қабул қиласак, «ифвогарга қарши ифво уйғотинг», деб тушунамиз ва тулкининг ишини маъқуллаймиз. Ифвога ифво билан жавоб бериш инсонийликдан эмас. Адилнинг чақирифида бу маъно йўқ. Балки адоватни инкор этишга даъват мавжуд. Ифвогардан нафратланишимиз керак. Лекин нафрат чегарасидан чиқиб, ўч олишга киришсак, ўша ифвогардан ҳам баттарроқ тубанлашган бўламиз. «Аччиқни аччиқ кесади» деган мақолни «ифвони ифво кесади ёки тўхтатади» деб тушуниш ақд ожизлигидан далалатдир. Ифвога ифво билан жавоб бериш янада баттарроқ ифволарнинг туғилишига сабаб бўлади.

«Ифво – ожиз қалбнинг ёвуз мероси, мағрурлар қалбидан ҳайдалган бир ҳис», деб ёзган шоир ғоят тўғри фикрлаган экан. Ифвогар ҳамиша ўзининг асл баша-

расини ниқоблаб юради. Кўпинча у ўзини куюнчак меҳрибон дўст қиёфасида кўрсатади. Агар шундай ниқоб остида иғво қилинмаганида эди, дунёда кўп ёвузиклар бўлмасди.

Иғвогарнинг ҳаётда уялиб қолишини кўп кузатгани миз. Дунёвий қонунларда Қиёмат жазоси кутиб ўтирилмайди. Иғвогарлиги исботланса, қамоқ жазоси бор. Лекин унга қадар иғвогар бир эмас, баъзан бир неча одамнинг шўрини қуритади. Худди қўйидаги ҳикоятдаги каби.

**Ҳикоят.** Қадим замонда бир одам қул сотиб олиш мақсадида бозорга борди. Бир қул кўнглига маъқул келган эди, савдогар унинг айбини ҳам баён қилди:

– Бу қул жуда уста, ҳунарманд, аммо иғвогарлик ва фитнада ҳам тенгсиз. Агар айбига эътибор қилмай, ҳунарига қизиқсангиз, олаверинг.

У одам айбига эътибор бермай қулни сотиб олди. Орадан ойлар ўтиб, бир куни қул хожасининг хотини ёнига бориб деди:

– Сизнинг менга меҳру шафқатингиз ва ёрдамингиз жуда кўп бўлгани учун маҳфий бир сирни айтишга мажбурман. Агар у сирни сизга айтсаму эрингиз билиб қолса, мени аёвсиз жазолайди. Айтмасам, сизга хиёнат қилган бўламан. Шунинг учун сўзларимни ҳеч кимга айтмасликка ваъда беринг, – хотин ваъда бергач, қул иғвосини давом этди: – Эрингиз сизни қўйиб юбориб, бошқа хотин олмоқчи. Бунинг чорасини кўришга шошилмасангиз, кейин «аттанг!» деб сочингизни юлишингиздан фойда йўқ.

Бу ноxуш хабардан хотин шошиб қолди. Қандай чора кўришни билмай, қулдан маслаҳат сўради.

– Шу шаҳарда зўр азайимхон бор, деб эшитганман, ҳозир унга бориб, эрингизни сизга «иситиб» келаман.

Кул шундай деди-да, кўчага чиқиб, бир оз айлангач, изига қайтди.

– «Иситиш» учун эрингизнинг энгаги тагидан бир неча дона бўлса ҳам мўй олиб берар экансиз. Кечаси

Эрингиз ухлаган пайтда устара билан аста қириб олсанғиз ҳам бўлади, – деб йўл-йўриқ ўргатди.

Хотин кеч киришини кутаётган маҳалда қул хожасига рўпара келиб, ийғламсираб деди:

– Эй хожам, сиз муруватда тенги йўқ улуғ одамсиз. Менга қилган шафқатингизни билмасам, кўр бўламан. Сизнинг муборак ҳаётингизга хавф солувчи бир сирни сездим, айтмасам, жонингизга қасд қилгандай бўлиб қоламан.

Бу гапдан ажабланган хожа қулидан сирни ошкор қилишни талаб этди. Қул баттар ийғламсираб, гапини давом қилди:

– Хотинингиз бошқа бир одамга кўнгил қўйган экан. Сизни бу кеч ўлдириб, унга тегиб олмоқчи. Эҳтиёт бўлинг, сиздек шафқатли хожамдан айрилиш мен учун ҳам улуғ бир мусибат.

У киши малъуннинг гапига ишонди. Кечаси ўзини ухлаганга солиб, сергак ётди. Қаттиқ хуррак овозини эшитган хотин эса қўлига устара олиб унга яқинлашди. Устарани энгаги тагига олиб келганда эри унинг қўлидан маҳкам ушлади. Хотинининг оҳ-войига парво қилмай шу устара билан уни ўлдиридди. Эртасига хотиннинг қариндошлари бу воқеадан хабар топиб, ғазабландилар ва келиб эрни ўлдиридилар. Шундан сўнг эрнинг қариндошлари ҳам ғазаб билан оёққа қалқидилар. Хун олиш учун куролландилар. Оқибатда ҳар иккала томондан кўп одамлар қурбон бўлди...

Бугунги кунимизда бунақа воқеа учрамайдигандай туюлади бизга. Ҳа, учрамайди, лекин ифвогарлар-чи? Улар йўқ бўлиб кетишмаган-ку? Уларнинг «иш услублари» ўзгарди, холос. Шу боис донишмандлар бу каби ҳикоятларни мерос қолдириб, ифвогарлардан ҳамиша эҳтиёт бўлишга, уларнинг сўзлари билан пок кўнгилларни хира қилмасликка даъват этишган. Шарафли ҳадисда: «Ким мусулмон биродарини ифво қилса, Аллоҳ Қиёмат куни унинг юзини орқасига ўтириб қўяди», дейилиши ҳар бир киши учун ибратdir.

Ифво ва фитнани касб қилган шайтонга жаннат ҳаром, саодат ҳаром бўлганидек, ифвогар одам ҳам сира баҳти бўла олмайди. Бир марта ифво қилиб тўхтаса, ўзига яхши. Албатта, тавба яхши, лекин ирводан ўзини тўхтатиш янада яхшироқ. Лекин кимса тавба қилмаса ёки тавба қилиб бўлганидан кейин яна ифво устига ифвони қалаштириб ташлайверса, ҳаётдаги қўрқуви ҳам ошаверади. Аввалги баёнларда таъкид этилганидай, тавба бир марта қилинади ва бу гуноҳлардан тўхталади. Ахир киши заҳарни икки марта ичмайди-ку? Ифво ва фитна уруғини эккан кимса пушаймон мевасидан бошқа яна нима ундириб олиши мумкин?

Ҳиндларда «Фитнанинг олдини олмоқчи бўлсанг, фитна эшигувчи қулоқни кесиб ташла», деган мақол бор. Ҳузайфа (р.а.) бундай насиҳат қиласидилар:

«Фитна қалбларда бош кўтаргай. Фитнадан озроқ озуқа олган қалбда бир доғ пайдо бўлади. Шундан сўнг унда фитнага нисбатан нафрат уйғонса, доғ кетади. Кимки қалби фитнага дучор бўлган-бўлмаганини билмоқчи экан, қалбини тафтиш қиласин. Агар аввал ҳаром деб билган нарсани ҳалол деса ёки асли ҳалол нарсани ҳаром дер экан, демак, қалби фитнага макон бўлибди.

Фитналардан эҳтиёт бўлинг. Ҳеч ким фитнага берилемасин. Ким фитнага юзланса, тошқин сел йўлдаги ифлос нарсаларни суриб кетганидек, фитна ҳам у кимсани ана шундай судраб олиб кетгай. Фитна дастлаб ҳақ-рост қиёфасига ўраниб бошланади. Шу даражадаки, баъзилар уни ҳақ деб биладилар. Фақат ўртадан кўтарилганидан кейингина унинг фитналигини тушишиб етади.

Ҳатто сув қўшилмаган шароб ҳам фитна каби инсонлар қалбини аллаб, чалғита олмайди.

Шундай бир замон келадики, сувга чўкаётган одам каби астойдил дуо-ниёз қилган кишигина фитнадан омон қолади. Бошқа ҳеч ким кутула олмайди.

Дунё учун охиратни унутган, охират учун дунёни ташлаган кимсалар сизларнинг яхшиларингиз эмас. Яхшиларингиз ҳар иккаласидан ҳам тўғри фойдалана олганларингиздир».

Фитнани инсонларни ўлдирувчи маънавий қуролга қиёсласак ҳам бўлади. Бизда «Ким бировга чоҳ қазиса ўзи йиқилади», деган мақол бор. Мазкур мақолдаги ҳикматни қадим ҳинд афсонасидаги бу воқеа исбот этади.

**Ривоят.** Подшоҳнинг бош вазири ғоят доно эди. Бошқа вазирларга унинг мавқеи тинчлик бермасди. Охири барчалари тил бириткириб, фитна атрофида бирлашдилар. Вазирлардан бири подшоҳга таъзим қилиб, бу кеч тушида олампаноҳнинг марҳум оталини кўрганини айтди. «Жаннатмакон дадангиз у дунёда ҳам подшоҳ эканлар. Лекин сиздан ранжидилар. Доно бош вазирга муҳтожликлари бор экан, ҳузурларига жўнатмасангиз сиздан рози бўлмасмишлар», деди. Подшоҳ бу гапни эшитиб ажабланди. Орадан ярим соат ўтмай, иккинчи вазир ҳам келиб бир туш кўрганини айтди. Кейин бошқалари ҳам тушларини баён қилдилар. Подшоҳ биринчи тушга ишонмагандай бўлган эди, қаторасига барча вазирларининг бир хилда туш кўриши унинг ақдини олди. Охири доно бош вазирини чақиртириб, ўзини оғир аҳволга солган муаммони баён қилди. Бош вазир фитнадан мақсадни дарров англади-да, «Ҳамонки жаннатмакон дадангиз мени чақиртираётган эканлар, дарҳол жўнатиш чораларини кўришингиз керак. Мен у дунёга бориб хизматларини адо этишга тайёрман. Фақат менга қирқ кун муҳлат беринг. Бу кунлар мобайнида ибодат билан банд бўлиб, руҳимни поклаб олай. Дадангиз ҳузурларига пок ҳолда бормоғим шарт», деди. Подшоҳ ижозат берди.

Бош вазир вақтни ғанимат билиб, уйидан то мурдани ёқиши майдонига қадар ер остидан йўл – лаҳм кавлатди. Қирқ кун ўтгач, оппоқ либосда подшоҳ ҳузу-

рига келди-да, гулхан ўтини ҳам ўзи ёқажагини билдирди. Подшоҳ у билан йифлаб хайрлашди. Фитначи вазирлар эса қувондилар. Бош вазир қалаб қўйилган ўтиналар устига чиқиб оловни ёқди. Тутун кўтарилиши билан ўтиналар орасидан ер ости йўлига ўтди-да, уйига қайтиб келиб, беркинди. Уч йилгача кўчага чиқмади, бирорвга кўринмади. Уч йилдан сўнг яна оппоқ либосини кийиб подшоҳ саройига келди. Подшоҳ бу доно маслаҳаттўйини соғииниб, сиқилиб ўтирган эди, уни кўрди-ю чеҳраси ёришди. Фитначи вазирлар эса талвасага тушдилар.

– Жаннатмакон дадангиз сизга саломлар йўлладилар. У дунёдаги салтанатлари роят гуллаб-яшнаяпти. Мен у зотга уч йил хизмат қилдим. Бугун менга ижозат бердилар ва сизга амр этдиларки, токи бу вазирларингизни ҳам ҳузурларига юборгайсиз. Уларни бугун шомгача кутажакларини хоҳиш қилдилар.

Бу гапни эшитиб подшоҳ ўйланди:

«Бу вазирлар дадамни тушларида кўрган эдилар. Тушга инониб юбориб эдим, мана, хизматини қилиб қайтиб келди. Бу дадамнинг ўзларини кўрган, амрларини ҳам ўз қулоғи билан эшитган экан, нима учун ишонмайин?»

Фитначи вазирлар ўша соатдаёқ гулханда ёқилдилар...

**Сергак зеҳнли умидимиз юлдуздари**, бу иллатларни сиз болалик пайтингизданоқ уйда ёки мактабингизда кузатгансиз. Иккита ўқитувчи бошқасини фийбат қилиб ёмонлаётганини эшитиб, ажаблангансиз. Уйда эса... фийбатсиз кун йўқ. Қўшнилар, қариндошлар, ҳатто сизнинг устозларингиз фийбат қилинади. Бу гапларнинг ёмонлик белгиси – иллат эканига тушунмай, сиз ҳам шу томон оға бошлаган бўлсангиз, дарров тўхтанг. Акангиз уйланиб, уйга келин келгач, «ёлғоннинг фарзандлари» хонадонингиз ҳаловатини бузишга интилаверади. Сиз буни сезиб ё кўриб турасиз-у, лекин олдини олишга имконингиз бўлмай,

күнглингиз оғрийди. Айрим тенгдошларингиз эса (айниңса, қызлар – қайнинсингиллар), янгаларининг камчилигини күрганда қувониб, дарров акаларига ёки оналарига етказадилар, яъни чақимчилик қиладилар. Ҳатто ошириб-тошириб етказадилар. Яъни янгалари эҳтиётсизлик қилиб, иккита косани синдириб қўйган бўлса, уч-ёки тўртта, деб етказилади. Чакимчиликка тухмат кўшилиб, гуноҳ янада ортади. Оила ҳаловатини бузувчи иллатлар ҳақидаги бу гапларни ёлғиз ўзингиз эмас, ота-оналарингиз, акалар-янгаларингиз билан бирга ўқиб маъно олишларингизни истардим.

Оилада келиннинг чақимчилик, фийбат қилиши ҳолларини тез-тез учратамиз. Лекин тухмат, ифво, фитна бобида «улоқ қайноналарда кетган». Бу сатрларни ўқиган муҳтарама қайноналар мени айблашмасин. Келинларнинг ёнини олиб, уларни атайин айблаш фикридан узоқман. Келин чақимчилик ёки фийбат қилиб бўлса-да ҳасратини тўкиб, кўнглини бўшатиб олади. Тухмат, ифво, фитна замбараклари билан қуролланиб нимага эришади? Бу қуролларни ишга солувчи қайнонанинг мақсади аниқ – кўзига балонинг ўқидай кўриниб қолган келиндан қутулиш. Ўғлини бошқага уйлантириш. Хўш, келинда қайнонасини қўйдирашиб, қайнотасини бошқага уйлантириш истаги бўладими? Қайнона «янги галстуингни хотининг хушторига совфа қилиб юборган», деган тухматга ўғлини ишонтириб, фитна қўзғаши мумкин. Келин қайнонасига қарши қандай фитна қўзғаркин, мен бунақасини эшифтмаганман. Тўғри, келин қайнотасига арз қилиши мумкин, лекин фитнага қасд қилмайди.

Муҳтарама қайнонажонларнинг барчаларини бу иллатда айбламоқчи эмасман. «Қайноналар» деганда мен ёппасига эмас, **айримларини**, ўзларини ифводан тўхтата олишга куч тополмаётганларни назарда тутяпман. Лекин дунё бўйича биттагина қайнонада шундай иллат бўлса фақат оила эмас, жамият ҳам озор чекади. Бир ифво ва фитна туфайли бир қанча оила-

ларнинг барбод этилиши мумкинлигига ҳаётда гувоҳ бўлганмиз. Эҳтимол, бугунги қайнона келинлик чофида тужмат, иғво ва фитна балоларидан азият чеккандир. Бу иллатларнинг қалбни қандай яралашини яхши билар. Шу боис ҳаёт тажрибаларини унутмай, ўзларини бу иллатлардан асрарлари керак. Лекин қўшни ёки бошقا қариндошида бу иллатлар мавжуддир ва у бундан хабардордир. Унда яқинларини бу гуноҳлардан қайтаришга уриниши лозим, томошабин бўлиб қолмаслиги керак. Балки бу ҳикоят айтиб берилса таъсир этар?

**Ҳикоят.** Қадим замонда подшоҳнинг Маҳбуд исмли доно вазири бор эди. Подшоҳ саройда фақат шу вазирига ишонарди. Ҳатто унинг таоми ҳам вазирнинг уйида пишириларди. Аммо доно вазир билан жасур лашкарбоши адоватда эдилар. Лашкарбоши қандай қилиб бўлса-да, вазирни саройдан четлатиш чорасини изларди. Кунлардан бир куни йўлда эски ошналадидан бири бадният сеҳргарни учратиб қолди. Уни уйига олиб келиб, зиёфат қилди. Зиёфат охирида вазирни йўқотиши чорасини сўради. Сўнг икковлашиб фитна режасини туздилар:

– Шоҳнинг олдига овқат олиб боришдан олдин менга хабар қил. Мен таомга афсун ўқиб сеҳр солай. Токи овқат заҳри қотилга айлангай. Сенинг мақсадинг шу йўл билан рўёбга чиққай, – деди.

Эртаси куни вазирнинг уйида шоҳ учун гуруч пиширилди ва таомни Маҳбуднинг ўғли кўтариб, саройга жўнади. Йўлда уни лашкарбоши билан сеҳргар пойлаб турардилар. Лашкарбоши вазир ўғлининг саломига алиқ олгач: «Қани, дастурхонни оч, кўрайин-чи, бугун шаҳаншоҳга бир ажиб таом тайёрлаганга ўжшайсизлар», деди. Бола ёшлигига бориб, товоқ юзини очди. Сеҳргар тезлик билан бир нарсаларни ўқиди-да, таомга куф-суф дейиш баробарида заҳар кукунини ҳам сочиб юборди. Шу даражада тез ҳаракат қилдики, заҳар сочганини ҳатто лашкарбоши ҳам сезмай қолди.

Подшоҳ таомга қўл узатган дамда лашкарбоши шошилиб келди-да, уни тўхтатди:

– Жонимни сўрасангиз бераман, аммо таомдан тановул қилишингизга йўл қўймайман! – деди-да, гумонини баён қилди. Подшоҳ Маҳбуд билан ўғлига таомни ейишни буюрди. Амр бажо этилиши билан ота-бала йиқилиб, жон бердилар.

Орадан йиллар ўтди. Бир куни сарой аъёнлари орасида сеҳр ва афсун ҳақида баҳс чиқди. Бирлари сеҳрнинг кучи ҳақида ўзларича муболагалар айтдилар. Бошқалари эса «Сеҳр бекорчи гап, аслида бўлмаган нарса, яхшиликнинг ҳам, ёмонликнинг ҳам пайдо бўлиши сеҳрдан эмас», деб уларнинг фикрини рад этдилар. Шунда лашкарбоши баҳсга беихтиёр аралашиб деди:

– Сеҳр ва афсун бағоят кучли нарса, буни ҳеч ким инкор эта олмайди. Мен ўз кўзим билан кўрганман: бир киши таомга афсун ўқиди, таом ўша заҳоти заҳарга айланди. Ким бу таомдан еди, ўша заҳоти ўлди.

Подшоҳ бу гапни эшитгач, ақл тарозуси билан ўлчаб билдики, Маҳбуднинг ўлеми сеҳрга ҳасаднинг қўшилишидан экан. Дарҳол лашкарбошини қийноққа солдирди. У айбини бўйнига олгач, жазога тортилди.

Ҳар бир инсоннинг фақат ўзига хос сири бўлганидек, ҳар бир оиласнинг ўз сири бўлади. Хотин эрининг хонадони шарафини сақлаши лозим бўлгани каби сирини ҳам сақлаши керак. Баъзан кузатаман, кўчани супуришга чиққан келин қўшни қизларни кўриб, суҳбатини бошлайди. Суҳбат узоқ давом этади. Мен уларнинг нима ҳақда гаплашаётганларини билмайман (буни, эҳтимол, сиз биларсиз), лекин киши кўп гаплашганда, албатта, бирон сирини ошкор қилиб қўйиши аниқ. Қўшни қиз келиннинг гапларини қизиқиш билан эшитади ва онасига айтади. Сўнг бу гап қайнонинг қулогига қайтади. Тўғрими? Қўшни қизга ёки яқин дугонага айтилган оила сири қумга сингган томчи сув каби йўқ бўлиб кетмайди. Ёлғон, фийбат, туҳ-

мат каби тиканаклар илдизига жон берувчи сув бўлиб сингади.

Келин айрим гапларни оила сири эканини фаҳмла- маслиги мумкин. Лекин бу баҳона уни айбловдан қут- қара олмайди. Дейлик, қайнингилга келаётган совчи- лар келмай қўйишди. Келин бунинг сабабини билмайди. Буни оддий хабар сифатида қўшни қизга гап ора- сида айтган. Оқибатда гап айланиб-айланиб, совчи- ларнинг айниб кетишларига келин сабабчи бўлиб қола- ди. Келин оиласидаги сирни ҳатто ўз онасига ҳам айт- иши мумкин эмаслигини шу хонадонга келинсалом билан кириб келишидаёқ аниқ билиши керак.

Халқимиизда «Хотинга сир айтма», деган мақол бор. Бу мақолга амал қидувчи эрлар ҳам бор. Улар хотинга умуман сир айтмайдилар. Лекин бу мақолни айнан, хотиннинг оғзи бўш, унга мутлақо ишонма, деган маъ- нода тушунмаслик керак. Мақолда яширин маъно ҳам бор: эр ҳар қандай сирни айтавериб, хотиннинг таш- вишига ташвиш қўшмаслиги керак. Айниқса, эр бо- шига тушган нохуш ташвишни хотинга айтмаслиги маъқул. Агар бу ташвишни кўтаришда хотиннинг иштироки зарур бўлса, айтиш мумкин. Бўлмаса, уни ташвишга шерик қилишнинг ҳожати йўқ.

Лут (алайҳиссалом)нинг хотини уйига келган меҳ- монлар ва ўртадаги гап-сўзлар тўғрисида қавмига ха- бар етказиб турарди. Оиласидаги сирни кўчага ташир- ди. Оқибатда у Аллоҳ Таоло томонидан ўлимга ва дўзах азобига ҳукм қилинди. Аллоҳ Таоло Лут қавмига офат юбориш арафасида огоҳлантириб, иймон эгалари би- лан шаҳарни тарқ этишни, аммо хотинини қолдириш- ни амр этди. Уйдаги сирни ташқарига ёйгани учун ҳатто пайғамбарнинг хотини ҳам кечирилмаган экан, ардоқли фарзандларимиз тилларидан учувчи ҳар бир сўзга эҳтиёт бўлганлари яхши.

Айрим кишилар ўз сирларини ўзлари асрой олмай- диларки, оқибатда фийбат ўқларига ўзларини ўзлари нишон қиласидилар. Худди ривоятдаги подшоҳ каби.

**Ривоят.** Подшоҳ вазирига сирини айтди ва бирор га ошкор қилмасликни тайинлади. Вазир қасам ичди. Аммо кўп ўтмай подшоҳнинг сири оммага ёйилди. Подшоҳ бундан разабланди. Жаллодни чақириб, вазирнинг бошини кесишни буюрди. Шунда иккинчи вазир таъзим билан деди:

- Шафқат қилинг, подшоҳим! Бу қулни ўлдирманг, бир қошиқ қонидан кечинг. Олампаноҳим, аслида айб ўзингиздадир. Чунки сир сизда турган пайтида, бир булоқ кўзи каби эди. Олампаноҳимиз бу булоқ кўзини очгач, сув пишириб сел бўлди, оламга ёйилди. Энди буни қайтариб бўлмайди.

Феъли тор одам ўз сирини ҳам сақлай олмайди. Шунинг учун ҳаётда кенг феълли бўлишга интилиш керак. Кишининг сиқилган пайти кўп бўлади, шунаقا дамда сирни бировга айтиб юборишдан тийилишга куч топа олсин. Сирини очса, кейин надомат чекади. Сир ўзида экан, баҳтлидир. Ёйилгач, баҳти учади-кетади: фийбатлардан ўзини қутқара олмай қолади. Сир ўзида экан, унга ҳукмрон. Ёйилгач эса фийбат кишини мағлуб қиласди ва роҳатини бузади.

Ҳазрат Али (р.а.) дедиларки: «Сизлар бузук ишларни қилган кишини уялтириш учун унинг айбини ошкор қилувчи ва сирни очувчи бўлманг. Чунки орқаларингизда сизни мashaққатга солувчи, ранжитувчи болалар ва узоқ вақт давом этадиган турли фитна ва қийинчиликлар бор». Яна дедиларки: «Ёмон сўзни айтувчи билан уни бошқаларга етказувчи – иккиси гуноҳкорликда баробардир».

Англагандирсиз, бировга, ҳатто синалган дугонасига ҳам оила сирини айтувчининг ўзига яраша жазоси бўлади.

Азиз ёшларимизнинг қулоқларига яна бир гапни айтиб қўяй: ҳар бир маҳалла, ҳар бир қишлоқда «сир олиб», «сир ташиш»га иштиёқмандлар бўлишади. Аслида уларнинг ёмон ниятлари йўқ. Гап ташишдан мақсадлари бировни бирор билан уриштириб қўйиш эмас.

Бирорнинг сирини эшитиб, бошқаларга етказишнинг гуноҳ эканини балки билишмас. Уларнинг қилмишлари беозор кўринса-да, бальзан қўшнилар орасига соvuқчилик солади. «Фалончининг келини нега тумаяпти», «Фалончининг Америкада ишлаётган ўғли уйланниб олибди», «Фалончиникига келаётган совчилар айниб кетишибди»... Бунаقا хабарлар оқимини сел оқимига ўхшатиш мумкин. Бундай хотинлар сизни ҳам галга солишади. «Холам мени ўзларига яқин олиб суҳбатлаштилар», деб лаққа тушманг. Бундай хотинларнинг муомалалари жуда ширин бўлади. «Айланай болам», «ўзим дардингизни олай, келинпошша», деб гап бошлаб, қўшнилар ҳақидаги янгиликларни айта бошлаганида сиз бу янгиликлар кўлмагига ўз оилангизга доир сирни сочманг. Зийрак бўлинг.

Баён қилган иллатларни бир-бирига «қариндош» дедим. Шу қариндошлар орасида «товламачи» дегани ҳам бўлади. Товламачи бирон нима ундириш мақсадида «қариндош»ларининг барчасидан фойдаланади. Ишни ёлғон балчифидан бошлайди, кейин ҳийла ҳам ишлатади. Туҳматдан қайтмайди, найранглари иш бермаса ифво ва фитнага ёпишади. Бир оила доирасида товламачилик учрамайди. Лекин шу оила аъзоларидан ким бўлса бўлсин, бошқаларга нисбатан товламачилик қилишлари мумкин. Шу боис бу иллатнинг ҳам дунёвий қонулларга кўра, ҳам шариат ҳукмига кўра жазоланишини эслатиб қўйишимиз керак. Оиласида бир киши товламачилик қилиб қўлга тушса, унинг ўзигина расвои жаҳон бўлиб қолмайди, балки оиласида барча аъзоларига, гарчи улар айбдор бўлмасалар-да, лаънат тамфаси ёпишади.

«Товламачининг хотини», «Товламачининг ўғли» (ёки «Иғвогарнинг келини»...) деган шармандали номни кўтариб юриш жуда қийин. Ҳамонки, лаънат тамфаси оиласида барча аъзоси пешонасига ёпиширилар экан, демак, оиласида барча аъзоси оиласи пок номини асрашга масъул бўлади. Дейлик, оила бошли-

Фининг товламачилик йўлига ўтганини ўғил-қиз ёки келин сезиб қолди. Биламан, тўғридан-тўғри у кишини инсофга чақиришолмайди. Шундай ҳолда, эҳтимол, қариндошлар орасидаги бирон баобрў кишига маълум қилиш мақсадга мувофиқ бўлар? Масалан, унинг акаси ёки опасига айтилса, улар эса укаларига ётифи билан тушунтиришса... Бу борада фарзандларга аниқ бир йўналиш беришим қийин. Чунки ҳар бир оиласнинг шароити, муаммоси ўзига яраша бўлади. Шунинг учун вазиятга қараб иш кўрилади. Энг муҳими бу иллатларга лоқайд қарамаслик керак. Шунда оиласдаги бахти ҳаёт чирой очиб бораверади!

«Ёлғон»нинг «фарзанд»лари орасида «ҳийла» алоҳида ўрин тутади. Бундай дейишимизнинг боиси, уни аниқлашда киши адашиб қолиши эҳтимоли ҳам бор. «Ҳийла» – макр ва алдов дегани. Лекин унинг «тадбир»ни англатадиган маъноси ҳам борки, «ҳийлаи тадбир» деймиз ва бу иллат эмас, ақл қувватини кўрсатадиган фазилат ҳисобланади. Баъзан «ҳийлаи шаръи» деган иборани ҳам эшитиб қоламиз. Буни зинҳор «шариатнинг алдови» маъносида тушунмаслик керак. Чунки шариатда алдов бўлмайди. «Шариат қоидаларига кўра қўлланилган тадбир» демоқчи бўлсангиз, майли, айтинг. Бироқ, халқ тилида бу ибора салбий, киноя оҳангига бўлгани сабабли тилга олинмагани маъқул. Ҳалокатга, бахтсизликка олиб келувчи ҳийлани «ҳийлаи шум» дейдилар. Алдоқчи, маккорни «ҳийлагар» (ҳийлакор) ҳам деб атайдилар. Учала атамани маънодош сўз сифатида ишлатиш мумкин. Лекин алдов билан ҳийла орасида озгина фарқ сезилади. Ҳийла – ақл билан алдаш. Бошқачароқ айтсак, ўйлаб, режа тузиб алдаш. Ёлғонга доир суҳбатимиздаги фикрлар ҳийла ва ҳийлагарларга ҳам тааллукди.

Агар ҳийла ёмон мақсадни кўзласа, уни иллат қаторида кўрамиз. Агар яхшиликни кўзласа, тадбир сифатида фазилат санаймиз. Қай бир халқ орасида иллат кўринишидаги, ёвузликка хизмат қилувчи ҳийла-

ни ақддан деб билса, у миллат ҳалок бўлади. Чунки ҳийлагар кимса инсон қиёфасидаги шайтон ҳисобланади. Ҳийла билан иш тутган кимса инсонлик туйғусидан маҳрум бўлади. Шу боис ҳам донолар: «Ҳийла қилган киши шайтонга эргашибди, унга яқин йўлама. Ҳийла билан иш кўрма, ҳалол ризқ топиш чорасини кўр», деб огоҳлантирганлар.

**Масад.** Бир қушнинг уясига илон ўрмалаб чиқиб, доимий равища полапонларини ютарди. Қуш илондан қасос олиб, қутулмоқ чорасини излади. Шу атрофда изғиб юрган шоғолга маслаҳат солди. «Илондан қандай қилиб қутулмоқчисан?», деб сўради шоғол. «Илон ухлаган пайтида кўзларини чўқиб оламан», деди қуш. Шоғол деди:

– Бу тўғри тадбир эмас. Душманга қарши шундай тадбир кўрки, ўзингга зарар келмасин. Сен ҳавога парвоз қилиб, уй ва кўчаларга назар сол. Агар кўзинг бирон қимматбаҳо нарсага тушса, тумшуғингга илгину парвоз қил. Шундай учгинки, одамлар сени кўриб турсинлар ва ўша қимматбаҳо нарсани қайтариб олиш учун изингдан югурсинлар. Сен эса учиб келиб, шу нарсани илон уяси устига ташла. Шунда одамлар илонни ўлдириб, нарсаларини олиб кетадилар. Сенинг жонинг эса омон қолади.

Ҳийланинг қамров миқёси торроқ бўлади, зарари ҳам шунга яраша. Тадбирнинг қамрови кенгроқ. Урушлардаги ҳийлаи тадбир шулар жумласига киради. Бу ҳийлада подшоҳ ва лашкарбошининг ақли, фикрлаш, таҳдил қилиш қобилияти намоён бўлади.

Амир Темур Боязидни енггандан кейин: «Шунча қудратинг бўла туриб нега шу вақтга қадар Кустантанияни олмадинг?» деб сўрайди. Боязид Константинополь (ҳозирги Истанбул) қирғоқларига яқинлашганда денгиз ёниб кетаётганини айтади. Амир Темур юнонларнинг сувга нафт (нефть) тўкиб, ёқиб юбораётгандарини фаҳмлайди-да: «Эндиғи сафар ҳужум қилганингда кеманнга кум ол. Денгиз ёна бошлаганда сеп-

санг, ўчади», дейди. Юнонийлар шоҳи Искандар Хиндистонга юриш қилиб, филларга қарши чорани кўп ўйлаб, охир топади. У мисдан ичи бўш от ва суворийларнинг ҳайкалларини ясатади. Ҳайкалчалар ичини нафт ва гутурт билан тўлдиради. Жанг бошланганда кўшин бу мис ҳайкалчаларга ўт қўяди. Бу ҳайкалларга ҳужум қилган филларнинг хартуми қуйиб, қутуради ва ўз аскарларини топтай бошлиайди. Бунга ўхшаган ҳолатларни «ҳарбий ҳийла» деб атайдилар.

Расууллоҳ (с.а.в.) дедилар: «Мўмин киши содда, карамли-марҳаматли бўлади. Фожир киши эса ҳийлакор, паст, хасис ва нокас бўлади». Ҳадиснинг давомида «бир илонга икки марта чақтирмайди», деган ҳикмат ҳам мавжуд.

Яхши одамнинг сифатларидан бири – содда эканлиги ва соддалиги туфайли, алданганини билса ҳам билмагандек кўринмоғидир. Яхши киши фаросатсиз эмас, аслида у алданмайди, лекин зоҳиран шундай кўринади. Чунки ёмонлик қилишини билмайди, маккор ва айёр эмас. Чунки покиза, соғлом қалби, имони уни бундай қабоҳатга қўл уришга йўл қўймайди.

Ўтган замондаги бир шоҳ шунчалик ёвуз эканки, одамларни мол-дунёдан айириб завқланса, шаҳару қишлоқларнинг кулини кўкка совуриб, гўдаклар қонини оқизиб лаззатланар экан. У қўшни мамлакатни эгаллаш мақсадида кўп жанглар қилибди, охири макрҳийлани ишга солиб, хоинлар хизматидан фойдаланиб, подшоҳни ўлдиртирибди-да, унинг гўзал хотинига совчи қўйибди.

Малика ориятли аёл экан. Номусини, юртини ширин жонидан афзал билиб, элга бош бўлиб, душмандан ўч олишга аҳд қилибди. Эрининг жанговор либосларини эгнига илиб, майдонга чиқибди-да, бир хат ёзиб, қонхўр шоҳга жўнатибди. Мактубда бу сўзлар битилган экан: «Эй шоҳ, шунча мағрурлигинг, салоҳиятинг билан жангда енгилсанг, аҳли олам ўла ўлгунингча «бир хотиндан енгилган шоҳ», деб сендан кулиб

юради. Агар омад сенга бокиб, ғолиб келсанг, «Аёл билан тенглашган шоҳ» деб элнинг маломати ва лаънатига қоласан».

Бу мактубни ўқиган шоҳ изига қайтган экан...

Мана шуни тадбир дейдилар. «Хотин кишининг макри қирқ туяга юк бўлади» деган гапни (мақол эмас!) кўп эшитамиз. Бу гапнинг замирида салбий ҳолат бор. Ҳолбуки, аёллар ҳаракатида макрга нисбатан тадбирни кўп учратамиз. Ишонмайсизми? Унда қуидаги ривоятга дикъат қилинг.

**Ривоят.** Подшоҳ аҳли аёли билан гап талашиб қолиб, аччиқ устида: «Тур, йўқол, отангникига жўна!» дебди. Малика эрини разабдан тушириш учун дарров узр сўрабди. Аммо шоҳ жаҳл отидан тушмабди. Малика йиглай-йиглай хос хонасига чиқиб, ўйлай-ўйлай чора излабди. Охири эри ҳузурига чиқиб:

– Майли, сиз айтганча бўлсин. Отамникига кетсам кета қолай. Фақат иккита илтимосим бор, йўқ деманг. Охирги марта илтимос қилаётганим учун марҳаматингизни аяманг.

«Охирги марта» дегани учун подшоҳ унинг кетишига ишониб, «айт», деди.

– Мен хайрлашар олдидан кўнглингизга ёқадиган шарбатни сиз учун атай тайёрлаб эдим, шундан татиб кўрсангиз. Авваллари тайёрлаганимда доим мақтардингиз. Бу сафар мақтамасангиз ҳам майли. Иккичи илтимосим, саройингиздан эсдалик учун ўзимга ёқсан нарсани олиб кетсам майлими?

Подшоҳнинг тантилиги тутиб:

– Ўзинг ёқтирган энг қадрли, энг қимматбаҳо нарсани олиб кета қол, – деди-да, малика тутган шарбатни ичди. Малика шарбатга уйқу дориси қўшган эди, подшоҳ ўша заҳоти ухлаб қолди. Малика жизматчилирини чақиртириб, подшоҳни гиламга ўради-да, йўлга тушди. У отасиникига етиб келганда подшоҳ уйгониб, ажабланди.

– Мен қаердаман? – деди атрофга аланглаб.

- Менинг отамникідасиз, – деди малика кулимсираб.
- Отанғникига қанақасыға келиб қолдим?
- Ахир ёдінгизда йүқми, мени «отанғникига жұна!» деб ҳайдадингиз. Мен саройдан әсдалик учун бир нарса олишни илтімос қылдым. Сиз «Үзінг ёқтирган әнг қадрли, әнг қимматбақо нарсаны олиб кета қол», деб марҳамат қылдингиз. Саройда мен учун сиздан бұлак қадрлироқ, қимматлироқ ким бор?

Бу доно табдірдан қувонган шоҳ хотинини олиб, саройига қайтған экан. «Хийла» эмас, «доно» дегани мизга әнді құшиларсиз?

Яна мавзуга қайтсак, иллатлардан қочиш ҳақидағи гаплар күпайыб кетаётгандай тууляптыми? Асло күп эмас, ишонинг. Фазилатларнинг ҳар бири умр саройини безаб турувчи бир инжү кабидир. Ахир үйингизни турли гиламу билур қандиллар билан безашни истайсиз-ку? Гилам ҳам, қандил ҳам эскиради, оқибатда ташлаб юборасиз. Аммо эгалланған фазилатлар эскирмайди. Уларни ташлаб юбориш ҳам мүмкін эмас. Үйингизни ҳар куни чангютгіч билан тозалаб, жавонларни артиб турмасанғыз губор құнади. Киши үзини иллатлардан ҳар күн, ҳар соат, ҳар дақиқа тозалаб туриши керак. Покиза уй киши күнглини қанчалик яйратса, губорлардан пок хулқ, барчанинг дилини шунчалик равшан қылади. «Элнінг назари тароздыр» деган ҳикмат бор. Эл назари кишининг хулқи, хатти-харакатига нисбатан зийрак ва ўта талабчан бұлишини унутмасанғыз, үзингизга яхши. Агар бу фикримга құшилсанғыз, суҳбатимизни давом эттирамиз. Толиққан бұлсанғыз, майли, бир оз дам олинг. Үтінчим шуки, суҳбатдан бутунлай юз үгірманг.

### **Тұхмат тош ёради**

Донишманддан сүралди:

- Осмонлардан каттароқ ва оғирроқ нарса борми, бұлса нима у?

Жавоб берилди:

– Ор-номусли кишига туҳмат қылмоқ осмондан ҳам катта ва оғирроқ.

«ЁЛГОН» деб аталувчи иллатнинг фарзандлари орасида «туҳмат» деб номлангани мавжудки, «ёлгои» шайтоннинг ардоқли ўғли бўлса, «туҳмат» суюмли набираси ҳисобланади. «Туҳмат» бобоси бўлмиш «ёлғон»сиз яшай олмайди. Туғилиши ҳам, қувватга кириши ҳам, ғалабаларга эришиши ҳам айнан ёлғон туфайлидир.

*Бир сўз билан бузилар шоҳ қалъаси,  
Инграниб чиқади гўдак ноласи.  
Ўт балоси, сув балоси ёмондир,  
Ундан ёмон, билгин, туҳмат балоси.*

**УМИДИМИЗ ЮЛДУЗЛАРИ**, сиз «Сув балоси, ўт балоси, қуруқ туҳмат балосидан асра!» деган дуони кўп эшигтансиз. «Туҳмат балоси барча балолардан ҳам баттар», деган гап ҳам сизга танишдир. Сув ва ўт балоси бехос келса-да, тўхтатиш чорасини қилиш мумкин. Туҳмат балоси бошланганида инсон кўпинча чорасиз қолади. Туҳмат сели ёпирилган Сталин замонида қанча қонлар тўқилди, етимлар ва тулларнинг кўздан оқкан ёшлар дарё бўлди... Туҳмат туфайли одам ишдан ҳайдалади, қамалади, оиласи бузилади, ҳақиқат қарор топгуннига қадар ёмон отлиқ бўлади... Бир номарднинг туҳмати бир одамга қаратилган бўлса-да, бундан жамият жабр кўради. Абдулла Қодирий, Чўлпон, Фитрат каби улувларни «Сталин репрессияси қурбонлари» деган гапларни адабиёт дарсларида эшигтандирсиз? Аслида улар туҳмат қурбонларидир. Сталин туҳмат уругидан зулм дарахти кўкариб чиқиши учун шароит яратиб берди. Туҳмат уругини ўша қурбонлар билан бир дастурхонда нон еб, чой ичганлар экдилар. Зулм дарахти униб чиққанда кувондилар. Жамият ўзининг оқил фарзандларидан жудо бўлди. Бу тараққиётта салбий таъсир этди. Туҳ-

мат уруғларининг кўкариб чиқишига шароит яратиб берган тузумнинг келажаги бўлмаслигини яқин тарихимиз исбот этиб берди.

**Ҳикмат.** «Ким инсонлар орасида ўз дўстига қарши гап тарқатса билингки, унинг ичида илонлари ва чаёнлари бор. У тарқатган гаплар кечаси босган сел каби, қаердан келиб, қаерга кетганини билиб бўлмайди. У сўзида ҳам турмайди. Аҳдини ҳам қайта-қайта бузаверади. Дўстлигига ҳам ишониб бўлмайди. Уни истаган чоги бузади».

Ҳазрат Навоийдан ҳикмат:

*Кўрмайин улким иши бўйтон эрур,  
Билки бу хислат била шайтон эрур.*

Доно ҳалқимизнинг «Туҳмат тош ёради, тош ёрма-са бош ёради», деган мақоли бор. Тоғ ва тошларни шамол ва ёмғир вайрон қиласди, одамни эса туҳмат. Дўстингга қилинган туҳмат сенга қилинган туҳматдир, дейдилар. Қадим файласуфларидан Лукиан таъбири билан айтганда: «Туҳмат билан аллақачон кўп авлодлар қириб ташланган, шаҳарлар ер билан яксон этилган, ота ўғлига, aka жонажон укага, болалар ота-оналарга ва ошиқ-маъшуқлар бир-бирларига қарши девонавор қўзғалганлар. Туҳматга ишониш билан кўпгина дўстлик алоқалари узилган, кўп уйлар харобага айланган». Бу ҳикмат айтилгандан кейин орадан яна неча минг йил ўтди. Минг йиллар давомида бу иллат йўқолмади, аксинча харобазорларни кўпайтирди. Бугунги кунда яна ўз ҳукмини ўтказяпти.

Оғзаки туҳматни қуролдан отилган ўққа қиёслайдилар. Туҳмат ўқи кишини ҳалок қиласди. Аммо шовқинсиз қилинган жиноятнинг айбдори жазодан яшириниб қолади. Шундайми? Зоҳиран шундай. Бундайларга қонун йўли билан жазо бериш қийин. Тўғри, «Жиноят» кодексида бу иллатга тегишли жазо белгиланган. Лекин, биринчидан, туҳматчининг туҳматини

исботлаш оғир масала. Иккинчидан, туҳмат натижасида юрак хуружидан ўлган одамнинг яқинлари туҳматчига жазо берилишини талаб қилмайдилар.

Мисол учун Сталин замонидан туҳмат туфайли қамалганларни яна бир тилга оламиз. Сталин ўлимидан кейин уларнинг айбсиз экани тан олинди. Суд уларни оқлади. Лекин туҳматчилар жазосиз қолавердилар. Ҳа, ҳаётда шундай бўлди. Улар охиратда дўзахнинг қандай оташига дуч келишларини фақат Аллоҳ Таоло билади. Бу дунёда туҳматчилар эл назаридан қолишининг ўзиёқ уларга жазо эмасмикин? Хотира ва виждон ҳеч қачон бўхтонни кечирмаган ва кечирмайди ҳам.

Ўз даврида бўхтончилар қилмишидан азият чеккан улуғ адид Ойбек «Бўхтончилар чиндан ҳам баҳтсиз маҳлуқларки, ўз ғалабалари натижасида юзлари баттарроқ қорайганини, ичлари яна баттарроқ чиркинлашганини сезмайдилар», деганларида мутлақо ҳақиқатни баён қилган эдилар. Ажаб, ажабки, туҳмат баёни бир неча сатрга жо бўлади. Бироқ, уни йўқ қилиш учун ўнлаб, юзлаб саҳифалар талаб этилади. Бошқачароқ айтганда, бир неча сўз билан ҳамла қилган туҳматдан ҳимояланиш учун неча-неча юз минг сўз керак.

Донишманндан сўрадилар:

– Етимдан ҳам хорроқ зот борми, бўлса ким у?

Жавоб бердилар:

– Туҳматчи, чақимчилар фош бўлганда етимдан ҳам хорроқ бўладилар.

Абу Бакр (р.а.) айтдилар:

«Расулulloҳ (с.а.в.): «Мен сизларга гуноҳларнинг энг каттасини айтиб берайинми?» деб уч марта сўрадилар. Саҳобалар: «Ё Расулulloҳ, айтиб беринг», дейишиди. «Аллоҳ Таолога ширк келтириш ва ота-онага оқ бўлиш», дедилар. Расулulloҳ шу вақтда ёнбошлаб ўтирган эдилар. Бу гапни айтганларидан сўнг ўнгланниб ўтириб олдилар-да: «Огоҳ бўлинглар! Катта гуноҳ-

лардан яна бири – ёлғон гапирмоқ, тұхмат қылмоқдир», дедилар. Бу сұзларини шу қадар күп такрорлардиларки, мен ичимда «Расулуллоқ чарчадилар, энди гапларини тұхтатсалар бўларди», дедим».

*Тұхматдан дилларга бергувчи озор,  
Ёвуз қылмишини қўймаса зинҳор.  
Саждага қанчалик бошин қўйса ҳам,  
Яратган Эгамнинг қаҳрига дучор.*

**Ривоят.** Ҳазрати шайх Саммуни Ошиқ (қ.с.)нинг Бағдодда шұхратлари баланд эди. Аҳли риёдан Фулом Халил дегани ул зотни күп ранжитар ва бўхтон қиласр эди. Ҳазрати Саммун кўринишдан ғоят кўркам эдилар. Бир аёл ул зотга ошиқ бўлди. Шайх унга йўл бермадилар. Ўша аёл ҳазрати шайх Жунайднинг (қ.с.) ҳузурларига бориб: «Бизни турмушга беринг», деди. Жунайд ҳазратлари ҳам у аёлга йўл бермадилар. Сўнг у аёл «Саммун мен билан зино қилди», деган тұхмат билан Фулом Халининг ҳузурига борди. У эса бу тұхматни халифага билдириди. «Халифа уни ўлимга ҳукм этсин», деб тұхмат устига яна тұхмат қўшди. Халифа униң сұзларини тинглади-ю, аммо сўз айтмоққа тили тутилди. Ўша кеча у туш кўрди. Тушида унга айтдиларки: «Сенинг давлатинг заволи Саммуннинг жони ичидадир. Уни ўлдиртирган вақтингда мулкинг қўлингдан кетгай...»

Халифа уйғонди. Воқеанинг Саммунга алоқадор эканини англади, уни зиёрат қилиб, улуғлади. Фулом Халил эса мохов касалига йўлиқиб, халқ орасидан чиқди.

Тұхматчи жисман бундай хасталикка чалинса-чалинмаса, аслида у руҳий-маънавий томондан моховдан баттардир. Тұхматчи муддаосига етиш учун баъзан ёлғиз ўзи ҳаракат қиласи ва униң ҳаракатини ғараз бошқаради. Бир ўзининг кучи етмаса, шерик излай бошлайди. Ажабки, икки ақлли одамнинг ўзаро

тил топишиши қийин, туҳматчиларнинг бирлашиб олишлари эса ғоят осон. Туҳматчилар инсон зотига иснод келтирувчи ҳар қандай иллатдан ҳеч бир уятсиз фойдаланаверадилар. Ганимни йўлдан олиб ташлашганидан кейин эса бир-бирларига туҳмат тошлирини отишдан ҳам тоймайдилар. Кўпинча уларни шу ҳаракатлари фош қилиб қўяди.

Туҳматчи муродига қисман етиши мумкин, ҳеч қачон мутлақ голиб бўла олмайди. Туҳматчилиги фош бўлиб, шармандалик ёки хорлик жандасини кияди. Аммо унгача кўп одамларни сарсон қиласди, жабр майини ичишга мажбур этади... Ҳатто ўлимга ҳам олиб боради. Қасд қилган одамининг ўлими – туҳматчининг галабаси эмас, балки мағлубиятининг бошланишидир. Бир одам туҳмат туфайли бирон жабрга йўлиқса – бу туҳматчининг баҳтиёрлиги эмас. Бир неча кун ёки соат давом этадиган баҳтиёрлик изидан азоб-уқубатдан иборат жазо келиши аниқ. Нуҳ (алайҳиссалом)нинг хотини, қавмига «Нуҳ жинни!» деб гап тарқатарди. Шу боис унга жаннат йўли тўсилиди.

**Ривоят.** Қадимда машҳур ва маъруф ҳокимнинг Баҳория исмли ой юзли, гул ёнокди, номусли ва иффатли хотини бор эди. Шу ҳокимнинг қушчиси эса ҳаёсиз ва нопок одам эди. Бир куни у беҳаёнинг кўзи Баҳорияга тушиб қолди-ю унга ошиқ бўлиб қолди. Қушчи ҳар қанча висол ҳалқасини қоқса ҳам, мулоқот эшиги очилмади, унинг афсун ва афсоналари иффат ва номус эгасига таъсир қилмади. Ҳаракатлари зое кетиб, умиди узилай деганда пок, соф хотинни туҳмат тузогига илинтирмақчи бўлди. Бозорга бордиди, тўти сотиб олиб, унга «Мен ҳокимнинг хотинини тўшакда қоровул билан бирга ётганини кўрдим», деган гапни балх тилида ўргатди-да, сўнг уни ҳокимга тортиқ қилди.

Тўти гапни хуш овозда такрор қиласди. Ҳоким балх тилидан бехабар бўлгани учун унинг нима деётганини англамади. Шунга қарамай, қушнинг чирой-

ига, ёқимли овозига маҳлиё бўлди. Қуш Баҳорияга ҳам маъқул келиб, уни меҳр билан парвариш қила-верди.

Бир куни ҳокимниги балхлик биродарлари меҳмон бўлиб келишди. Тўти ўргатилган гапни такрор қиласкергач, улар бир-бирларига саволомуз қарашиб, бош эгсанларича жимиб қолдилар. Ҳоким уларнинг маъюсланиб қолганларини сезиб, бунинг сабабини сўради. Меҳмонлардан бири минг истиҳола билан бўлса-да, тўтининг гапини таржима қилиб берди. Ҳоким шу заҳоти таомдан қўл тортди-да:

– Бизнинг одатимизга қўра, ёмон хотин тайёрлаган таомдан ейилмайди, – деди.

Эшик яқинида уларнинг суҳбатига қулоқ тутиб ўтирган хизматкор күшчи «Хотинингизнинг қоровул билан бир тўшакда ётганини мен ҳам бир неча марта кўрганман», деб ёлғон гувоҳлик берди. Шундан сўнг ҳоким хотинини ўлдиришга буюрди. Бу ҳукмни эшитган иффатли хотин эрига бир ишончли киши орқали: «Эй муҳтарам ҳожам, мени ўлдиришга ошиқманг. Мени истаган вақтингизда ўлдиришингиз мумкин. Ақл ва тажриба эгалари ҳукм чиқаришга, айниқса, қон тўкишга шошилмасликлари, сабрли бўлишлари зарур. Аввал яхшилаб ўйланг, агар текшириш натижасида гуноҳим исбот этилса, ўлдирсангиз розиман. Далилсиз, исботсиз ҳолда ўлдиртирсангиз заволимга қоласиз», деб хабар юборди.

Ҳоким хотинини чақиритириб деди:

– Тўти одам жинсидан эмас, у фараз билан сўзламайди. Бунинг устига қүшчи хизматкоримиз ҳам гувоҳлик берди.

– Балхлик меҳмонлардан сўранг-чи, тўти бу гапдан бошқа сўзларни ҳам билармикин ё йўқми? – деди Баҳория, сўнг хизматкорнинг кирдикорини фош этди: – Бу нобакор хизматчи ифлос муроди ҳосил бўлмагани учун тўтига ярамас сўзларни ўргатиш орқали мендан ўч олмоқчи бўлса керак, деб ўйлайман. Агар тўти бош-

қа сўзларни ҳам сўзлай олса, мени ўлдиришингизга розиман.

Баҳориянинг сўзлари барчага маъқул бўлди. Ҳоким ҳам, меҳмонлар ҳам икки кун пойладилар, тўтидан бошқа гап эшитмадилар. Оқибатда Баҳориянинг поклиги аниқ бўлди. Ҳокимнинг амри билан тухматчини ҳозир қилдилар. Баҳория у нобакорга хитоб қилиб:

– Эй ярамас ситамкор, бу гуноҳ ишни қилганимни кўрдингми? – деб сўради. Хизматчи «кўрдим» деб яна ёлғон гувоҳлик бермоқчи эди, қўлига қўндириб кирган лочин тумшуғини унинг кўзларига уриб, чўқилаб-чўқилаб кавлаб ташлади. Кўрмаган нарсани «кўрдим» дейишнинг жазоси шундай бўлди.

Ким тухматчини қораламаса, уни қўллаган бўлади. «Бошқаларга тухмат қилиб шивирлайдиган одамини уйингдан ҳайдаб чиқар», деганлар. Ўтмиш донишмандлари орасида «Бўхтонга энг яхши жавоб сукут билан унга жирканиб қарашдир» дегувчилар ҳам бўлишган.

Ҳа, тухматчилиги билан барчага маълум одам билан олишиб ўтирумаса ҳам бўлади. Ўн саккизинчи асрда яшаган америкалик публицист Томас Пейн фикрича, ғалати хусусиятли иллат ҳисобланган бўхтонни йўқ қилишга ҳаётингизни бағишилаб хато қилас эканлиз. «Уни ўз ҳолига қўйинг – ўзидан ўзи ўлиб кетади», дейди у. Бошқа бир донишманд эса: «Бўхтон ғинфиллаб жонга тегадиган арига ўхшайди: уни жойида ўлдира олишингизга ишонмасангиз, яхшиси уни ҳайдашга ҳам уринманг, қайтага у сизга баттар ёпишади», деб маслаҳат беради. Бу фикрларни бир ёқламали, деб қабул қилиш керак.

Тўғри, ҳаётни бўхтонлар билан олишишга сарф қилишда маъно йўқ. Ҳатто, кўп олишаверсангиз, айбисиз эканингизни исботлашга уринаверсангиз, атрофдагиларда «туҳматчига қарши кўп ҳаракат қилиши бежиз эмас, туҳматлар замира иде ҳақиқат борга ўхшайди», деган гумон уйғониши ҳам мумкин.

Тұхматчилар фақат одамлар камчиликларини күрадилар-у фазилатларига зәтибор бермайдилар. Улар баданнинг нуқул газак олган аъзосига құнмоқчы бўлаётган пашшага ўшайдилар.

Бўҳтон – ҳасадчиларнинг ўзига хос ички қонунидир. Бу дунёдаги таниқли зотлар орасида ёлғон ва бўҳтон балчиги чапланмаган биронта одам топилармикин? Одатда меванинг сарасини қурт еганидек, бўҳтон ҳам яхшиларга ёпишади. Тирноқ остидан кир қидириш азалдан ўргамиёна ё салгина ошган ёки ошмаган одамларнинг хусусиятидир. Иқтидорли ақд эгалари эса яхлит ва жиддий ҳодисаларга қарши зәтиroz билдирадилар ёки индамай қўя қоладилар. Буюк алломалар эса ҳеч кимни айбламай, ўzlари кашфиёт билан машғул бўладилар. Калтафаҳмлар эса ақлларига сифмаган нарсаларнинг ҳаммасини қоралайверадилар.

Улуғ сиймоларни қўя турайлик, оиласа қайтайлик: ёмон келинга бўҳтон тошлари отиш шарт эмас. Тилидан учайтган беҳаё ва бемаъни гаплар, хунук қилиқлар унинг кимлигини кўрсатиб туради. Тұхматчининг нишони яхши келинга қаратилган бўлади. Оиласа овсинлар орасида бу касаллик кенг тарқалганига гувоҳмиз. Тўрт-беш оила яшаши мумкин бўлган ҳовлига юраклари тор икки овсин сифишмай қолса, бўҳтон милтиқдарини ишга сола бошлайдилар. Эшитар қулоқ учун тұхмат тилга чиққан чипқондек гап. Дастрлабки ўқлар отилгандан айрим нодон эрлар хотинлари қўлидаги бу қуролни олиб, синдириб ташлаш ўрнига ё мириқиб томоша қиладилар ёки «ўқ» етказиб берадилар. Оқибатда ака-укалар ҳам душманга айланадилар. Бундайлар яхшилаб англаб олсинларки, тұхмат – қиличдан ҳам баттардир. Қилич яраси тузалар, тұхмат ярасининг тузалиши эса ғоят қийин. Қилич тегса, баданнинг устки қисми чандик бўлиб қолади. Тұхмат тиги текканда эса юракда чандик пайдо бўлади.

Ҳар қандай жиноят икки хил йўл билан: қасддан қилинади ва эҳтиётсизлик туфайли юз беради. Тұх-

мат ва бўхтон тасодифан юз бермайди. Айрим ҳолларда киши нодонлиги туфайли түхмат кўчасига кириб қолиши мумкин. Бир қария йигиб юрган пулларини йўқотиб қўйиб, фолбинга борибди. Аввало, фолбинга боришнинг ўзи гуноҳ. Фолбин «пулингизни келинингиз ўғирлабди» деган. Фолбинга ишониш яна бир гуноҳ. Шу икки гуноҳ бирлашиб, янада каттароқ гуноҳни туддирди – оила бузилди. Орадан кўп ўтмай отахон пулларини топибдилар – беркитган жойларини унуглан эканлар. Пул топилди, лекин түхмат замбараги ўқидан вайрон қилинган оила саройи тикланмади...

Кимdir «Иллатлар орасида гумоннинг бирорга зарари йўқ», деб қолди. Зоҳиран шундай. Аммо ботинан қаралса, кўп ёмонликлар гумон булоғидан сув ичиб, қувватланади. Киши гумонга бориб, бирорни фийбат қиласи. Шубҳага бориб, йўқ оғатнинг олдини олиш учун фитна ясади... Аллоҳ Таолонинг расули (с.а.в.) дедилар: «Гумонсирашдан ўзингизни сақланг. Чунки гумон билан айтилган гап энг ёлғон гап бўлади.» «Эй иймон келтирганлар, кўп гумонлардан четланинглар, чунки баъзи гумонлар гуноҳдир. Жосуслик қилманглар...» («Хужурот» сурасидан). Гуноҳга олиб борувчи иллатлардан бири – бадгумонликдир. Бадгумонлик (ёмон гумон) кишилар ҳақида шубҳа қилиш, улардан ҳадик қилиш маъносидадир. Одатда бундай гумонларнинг кўпи асоссиз, беҳуда бўлади. Шу боисдан ҳам «кўп гумонлардан» четда бўлиш буюриляпти.

Ўйлаб кўрилса, ўзаро низолар ва келишмовчиликлар кўпроқ бир-биридан ёмон гумонда бўлишдан ҳам келиб чиқади. Ёмон гумондан четда бўлиш учун доимо кишилар ҳақида яхши фикрда бўлиш, улар ҳақида етган хабарларни яхшиликка йўйиш керак. Бу ҳақда ҳазрат Умар (р.а.) «Агар яхшиликка буришнинг бирорта йўли бўлса ҳам, мўмин биродарингдан чиқсан сўз ҳақида фақат яхши ўй қил», деганлар. Набий мұхтарам (с.а.в.) дедилар: «Агар одамларнинг айбини ахтага

радиган бўлсанг, уларни бузасан». Айниқса ишбоши раҳбарнинг бу нарсадан эҳтиёт бўлиши лозимлиги яна бир шарафли ҳадисда таъкидланади: «Агар амир айб ахтараверса, уларни бузади». Маълумки, кимнинг кўнглига бадгумонлик ўрнашса, у одам гумонини тасдиқлаш учун ҳужжат ва далил қидира бошлайди. Натижада гумон остидаги одамнинг ўзига билдирамасдан, айбини ахтаришга тушади. Буни «жосуслик» дейдилар.

Гумон, иккиланиш инсонни чекинтиради, замга ботиради. Иймон инсонни олға юришга ундейди, қувонч келтиради. Ёмон шубҳадан қочган киши ундан узоқлашгани қадар манфаат топади. Бир киши «Фалончи ишга таклиф қиляпти-ю, аммо ҳузурига боргим йўқ, фисқ аҳлидан бўлса керак», деди. Унга жавобан биродари: «Фосиқларданмасдир, мен уни намозхон, деб эшитганман», деди. Қаранг, бирида ёмон шубҳа, иккинчисида яхши гумон бор.

Мұхтарам опа-сингилларимиз ранжимасинлар-у, шубҳа масаласида, тахминим бўйича, улоқ уларда кетган бўлса керак. Овсинлар бир-бирларидан шубҳаланадилар, хотин «эримнинг ўйнаши бормикин?» деб ҳамиша гумонсирайди... Қайнона қаттиқроқ гапириб юборса, келин «овсиним гап чаққанга ўштайди», деб ола қарайди. Бетобланиб қолса, «овсиним иссиқ-совуқ, илму амал қилгандир», деб фолбинга югуради. Қаранг-а, «арзимас» гумон қандай катта гуноҳларни туғдиряпти.

Гумондан сақланиш керак, айни замонда барчага бирдай ишонавериш ҳам тўғри эмас. Дониш аҳлидан ҳикмат: «Ақлли одам тўрт тоифага ишонмайди: думи босилган илонга, оч қолган йиртқич ҳайвонга, раҳмсиз шоҳга, инсофсиз ҳукмдорга». Ўтган уламолардан Зажжож (раҳматуллоҳи алайҳи): «Бадгумонлик яхши кишилар ҳақида ёмон гумон қилишликдир. Аммо аҳли фисқ бўлса, ундан нима фосиқлик зоҳир бўлган эса, шуни гумон қилишга ҳаққимиз бор», деганлар.

**Хикоят.** Бир бўри сурув ортидан эргашиб келарди. Гўё қўйларга зарар етказиши ўйламасди ҳам. Чўпон аввалига сергакланиб, уни кузатди. Бўрининг ҳаракатида ёвузлик сезилмагач, хотиржам бўлди. Ҳатто бўрига нисбатан унда ишонч уйғонди-да, қўйларни қолдириб, қишлоғига қараб кетди. Чўпон кетиши билан бўридаги мулоҳимлик либоси йиртилиб, аслига – ваҳшийлигига қайтди. Сурувни қонга белади...

Қиссадан ҳисса шуки, дунёда беозор кўринган, фурсат келиши билан бўрига айланадиган бўри сийратли кимсалар ҳам бор. Уларга бирон нарсани ишониб, омонат топширсанг, бўрининг сурувга қилган ишини қиласидилар. Ишонувчан одам эса чўпон ҳолига тушади. Шунинг учун ҳам донолар синалмаган отга яқинлашмасликни тавсия этадилар. Албатта, кишиларга ишонч билдириш керак, аммо бу борада сезгирликни унутмаслик ҳам зарурлигини таъкид этган ҳолда «тұхмат»нинг акаси «ғийбат» билан ҳам танишишни бошлайлик.

### **Ғийбатининг қасофати**

**Умидимиз юлдуздари,** азиз фарзандларимиз, сизлар фазилатлар ва иллатлар ҳақида маълум тушунчага эга бўлсангиз-да, ҳаёт тажрибангиз камлигиданми, баъзан иллатларга етарли баҳо бера олмай қоласизлар. Шу сабабли айрим иллатларни (масалан, ғийбат, ҳасад) юқорида тилга олган бўлсам-да, гап умумий тарзда бўлгани учун энди атрофлича мулоҳаза юритишни маъқул топдим.

Яқинда бир телекўрсатувда мухбир кўчадаги ёшларни тўхтатиб: «Мишиш-миш ёмонми ё ғийбатми?» деб сўради. Аввало, савол сал беўхшов бўлди. Чунки бу иккала иллат бир-бирига яқин ва бири-биридан баттар. Саъдий Шерозий таъбирлари билан айтганда:

*Дедики: сенингча ҳасад-ку хунук,  
Дегил: сенга ким айтди – гийбат тузук?*

Мухбирнинг саволига жавоб берган ёшларнинг бири: «Фийбатнинг гуноҳи камроқ, чунки фийбат икки кишининг орасида бўлади», деди. Бу укамизнинг мазкур масалага доир тушунчалари саёзроқ экан. Фийбат фақат икки кишининг орасида бўлганида ҳаёт чиройига камроқ, доф тушарди. Даврада йўқ одамнинг орқасидан гапириш – фийбат саналади. Демак, даврада фақат икки-уч эмас, йигирма-ўттиз одам ҳам бўлиши мумкин. Шундай экан, гарчи бир одам ҳақида гап кетса-да, фийбат ўша йигирма ёки ўттиз одам орасида бўляпти. Фийбат тўрт-беш одам оғзидан учяпти. Қолганлар жим тинглашяпти. Лекин ўша жим ўтирганлар ҳам гуноҳга шерикдирлар. «Сукут – ризолик аломати», деган ҳикмат бор. «Мен фийбатга аралашмадим», деб ўзларини овутмасинлар. Фийбатдан сақланишни истовчи одам фийбатчиларни тўхтатиши ёки даврани тарк этиши лозим. Бироқ, тарк этувчи фийбат қилинувчи кишига бориб «Сизни фалончилар фийбат қилишаётган эди. Мен чиқиб кетдим», деса, биринчидан, чақимчилик қилган, иккинчидан, энди ўзи даврадагиларни фийбат қилган бўлади.

Бир киши «даврада фийбат бошланганда тўхтатмоқчи эдим, тўхтатолмадим. Тарк этишим лозимлигини билардим, лекин чиқиб кетсам давра бузилиши мумкинлигини билиб, индамай ўтиравердим. Менда айб йўқ», деб ўзини оқлади. Аввало, фийбат қизиб турганда бир киши чиқиб кетгани билан давра бузилмайди. Аксинча, энди фийбат нишони чиқиб кетган одамга қаратилади. Агар бир киши чиқиб кетиши билан давра бузилса, янада яхши. Фийбатчилар даврасининг бузилгани роят яхши! Расулуллоҳ (с.а.в.) дедиларки: «Кимки бир мўминни фийбатчи мунофиқдан ҳимоя қилса, Қиёмат куни Аллоҳ Таоло унинг гўштини дўзах ўтидан ҳимоя қилувчи фаришта юборади. Ким, бир

мүминни сўкмоқчи бўлиб уни фийбат қилса, Аллоҳ Таоло уни гапидан қайтмагунича жаҳаннам кўприги уст�다 ушлаб туради».

«Миш-миш» фийбатга нисбатан бўхтонга яқин туради. Фийбат – даврада йўқ одамнинг мавжуд иллатларини ёки баъзи ҳаракатларини гапириш. Бўхтон ёки туҳмат эса йўқ нарсани гапириш. Масалан, бир киши аслида саковатли. Лекин мен ёрдам сўраганимда беролмади. Мен буни хасисликка йўйиб, бир даврада уни айбладим. Шу ишим бўхтонга киради. Миш-миш орасида баъзан тўғри гап учраб қолса, у фийбатга киради.

Куръони Каримда одамзот сақланиши лозим бўлган иллатларга батафсил таъриф берилган. Фийбат иллатига берилган таъриф ҳар қандай кишининг қалбини зириллатиб, уйқудаги мудроқ онгини уйғотиб юборади, деб ўйлайман. «Ҳужурот» сурасида ўқиймиз: «Баъзиларингиз баъзиларингизни фийбат қилманглар. Сизлардан биронталарингиз ўзининг ўлган биродарининг гўштини ейишни яхши кўрадими? Ёмон кўрасизлар! Аллоҳдан кўрқинглар! Албатта, Аллоҳ тавбани қабул қилувчи ва раҳмлидир». Мазкур ояти каримада бирорни фийбат қилишдаги гуноҳ уни ўлдириб гўштини ейиш гуноҳи билан баробар қўйиляпти. Банда биродарининг гўштини ейишни ёмон кўрдими, демак, гуноҳи бундан-да ортиқ бўлган фийбатни ҳам ёмон кўришга буюриляпти. Мазкур оят нозил бўлгач, Расуллулоҳ (с.а.в.) дедилар: «Ким дунёда мусулмон биродарининг гўштини еса (яъни фийбат қилса), Қиёмат куни у кишининг эти унга тақдим этилади ва: «Е буни ўлик ҳолида, чунки сен уни дунёда тириклигида еган эдинг!», дейилади».

Пайғамбаримиз алайҳиссалом умматларини фийбатдан қайтариш борасида кўп даъватлар қилганлар. Шулардан бири: «Фийбатдан сақданинг! Фийбат зинодан ҳам ёмондир. Зеро, киши зино қилиб, охири тавба қилса, Аллоҳ Таоло афв этади. Фийбат қилганни эса

фақат фийбат қилинган киши кечиргандан кейингина афв этади». Фийбат қилған одам, фийбати туфайли, фийбат қилинган одамга қарамдир. Авваламбор, Аллоҳ Таолонинг ҳақидан қутулиш учун тавба қилиши, кейин яна фийбат қилинган кишининг ҳақидан қутулиш учун ундан ҳам розилик тилаши керак.

Тавба қилиш – ўтган ишга қаттиқ афсус билан дилдан надомат чекиш, иккинчи бор бу ишни қилмасликка аҳд этиш ва аҳдига вафо эканини билиб олгансиз, бу ҳақда кўп гапирилса-да, эслатма бўлсин учун яна такрорлай: демак, тавба – ўзини бу гуноҳдан тўхта-тишга сўз бериш. Агар бутун тавба қилиб, эртага фийбатини давом эттирса, бу тавба эмас, алдамчилик бўлади. Фийбатчи астойдил тавба қилған тақдирда ҳам гуноҳининг кечирилиши учун бу афсус, бу аҳднинг ўзи кифоя қилмайди. Уламолар унинг тавбаси тўлиқ бўлиши учун яна бир муҳим шарт қўйишган. У ҳам бўлса, ўша ерда, ўша мажлисда фийбат қилинган киши ҳақида яхши гапларни гапириши керак. Уламоларнинг таъкидлашларича, фийбат қилған кишининг зиммасига тушган юқ шундан иборатки, у фийбат қилған даврасидан туриб кетмасидан бурун ва қилинган фийбати мазлумнинг қулогига етмасидан оддин тавба-тазарру қилсин, шунда истиффори қабул бўлади. Лекин фийбат мазлумнинг қулогига етиб боргандан кейинги тавба қабул қилинмайди, фийбат қилинган киши билан розилашгандан кейингина гуноҳ кечирилади.

Шайхул машойих Жунайд Бағдодий (қоддасаллоҳу сирраҳу) кўрдиларки, бир киши жоме масжидига келиб, тиланди. Шайх ҳазратларининг **кўнгилларидан кечдики**: «Бу йигит соғлом бўла туриб, нечун меҳнат қилиб топмай, ўзини бундоқ хор тутар?» У зот ухлаган пайтларида туш кўрдиларки, бир киши қопқоғи ёпиқ бир товоқ келтириб, Жунайд ҳазратларининг одига қўйди. Шайх ҳазратлари қопқоқни кўтардилар. Қарасалар, масжидда тиланган дарвишни пиширибдилар. «Буни егил!» деган амр бўлди. Жунайд ҳазратлари:

«Ўликни емайман», дедилар. «Кеча масжидда қандай еган эдинг, энди емайсанми?!» дейилди.

Жунайд ҳазратлари дедилар: «Билдимки, фийбат қилган эканман. Ўша ҳайбатдан уйғондим. Таҳорат олиб, намоз ўқидим. Ўша дарвишни кўрмоқ фикрида ташқарига чиқдим. Кўрдимки, Дажла қирғоғида ўтириб, увоқларни териб ер эди. Ёнига бордим. Болшини кўтариб: «Эй Жунайд, масжидда эканингда кўнглингдан ўтган фикрингга тавба қилдингми?», деб сўради. «Тавба қилдим», дедим. У: «Бор, ортиқ бу фикрни қилмагил», дегач, «Шўро» сурасидан бир ояти каримани ўқиди-да ғойиб бўлди». (Дарвиш ўқиган ояти кариманинг маъноси: «У (яъни Аллоҳ) бандалиридан тавба-тазарру қабул қилгувчи, ёмонликларни афв этувчи ва қиласиган ишларингизни билувчи Зотдир».)

Кишининг кишига қилган фийбат ёки бўхтони мазлумга етган ёки етмаган бўлади. Агар фийбат қулогига етган бўлса, у кишидан, албатта, розилик олиши шарт. Агар у киши ўзи ҳақидаги фийбатни эшитмаган бўлса, етиб бориши янги бир озор-азиятни, кин-адоватни пайдо қилиши ва меҳр-муҳаббатнинг йўқолишига сабаб бўлиши эҳтимоли бор бўлгани учун унга фийбат гапларни билдирамай қўя қолган маъқул. Лекин бу «ўрага сичқон тушди – гулдир гуп!», «ёпиқлик қозон ёпиқлигича қолди», дегани эмас. Гуноҳдан холи бўлишнинг йўли – фийбат ёки бўхтон мазлумга етиб бормаган тақдирда фийбатчи ёки бўхтончига истигфорни кўпайтиришини тавсия қиласилар. Шайх Абул Мавоҳибиш Шозалий (раҳматуллоҳи алайҳ): «Муриднинг камолотига тўсиқ бўлган нарсалардан бири – мусулмонни фийбат қилишдир. Ким фийбат қилиш балосига йўлиқкан бўлса, «Фотиҳа», «Ихлос» ва муаввазатайн («Фалак», «Нос») сураларини ўқисин, савобини фийбат қилган биродарининг амал дафтарига ёзилишини Аллоҳ Таолодан сўрасин. Буни менга тушимда Расуллороҳ (с.а.в.) ўргатдилар», деганлар.

Агар фийбатчи бу дунёда жазосиз юрганини кўрсангиз, «Ана, юрибди-ку!» деб ажабланманг. Уни Қиёмат азоби кутиб турибди. Дўзах азобининг бу дунёдаги жазодан неча ҳисса даҳшатлироқ эканини сизга таъкидлаш ортиқча. Ўхшатиш учун бир мисол келтирай: кишининг бир бармоғига иссиқ чой тўклилиб, куйдирди. Албатта, бунинг ҳам азоби бор. Лекин аланг аланга ўтида қовжираши-чи?

*Одамдан одамга келар ҳавф-хатар,  
Сут билан кирган сўз жон билан кетар.  
Фийбатчи инсонни қўйшма инсонга,  
У мурдор заҳарли илондан баттар.*

Фийбат қилган киши майдонга бир тўп қўйиб, ўнгу сўлни замбарак ўқидан совурган кимсага ўхшайди. Фийбат қилаётганда фийбатчининг гўзал амаллари ўнгга-сўлга совурилган бўлади. Мавзуга доир сухбатимизни Абу Ҳомид Фаззолий ҳазратларининг фикрларига суюнган ҳолда давом эттирасм:

«Набий муҳтарам «Фийбат – биродарингнинг ортидан ўзи эшитиб қолса хафа бўладиган айб-нуқсонларини айтишингдир», дедилар. Бу ҳадис кўп қамровлидир. Кишининг жисмоний камчилигини, зоти, хатти-ҳаракатлари, сўзи, диний ва дунёвий жиҳатлари, ҳатто либоси ва уловининг қусурини айтмоқ, уни кавлаштирумок демакдир. Даастлаб соф мусулмонларнинг батъзи бирлари бирор тўғрисида «Кийими калта» ёки «Кўйлаги узун» тарзида айтилган сўзни ҳам фийбат деб ҳисоблашган. Шундай бўлгач, нега энди кишини хафа қиладиган сўз айтганда, бу фийбат бўлмасин?!»

**Умидимиз юлдузлари**, тенгдошларингиз орасида ҳам фийбатга берилиш ҳолати учрашиб туриши сизга сир эмас. Кичикликда фийбатга ўрганган тил ёш улгайганда инсоғга кела олармикин? Энди катталар ҳаётига биргаликда разм солиб, турли зиёфатлар, тўйлар ёки бошқа йифинлардаги гап-сўзларга диққат

билин қулоқ тутайлик-чи? Сүхбатларнинг ярмидан кўпи фийбат эмасми? Кечаги тўйда еб-ичиб, ўйнаб-кулиб роҳатланган одам бутунги тўйда бошқа даврага қўшилиб, кеча оғиз-бурун ўпишган ҳамшишасини фийбат қилмайдими? Бегоналарни қўя турайлик, акалар укаларни, опалар сингилларини, укалар тоғаларни кўпчилик орасида фийбат қилишларига нима деймиз? Ҳидоятдан бегоналарни ҳам қўя турайлик, мана бу воқеага нима деймиз.

**Воқеа.** Ҳаж ибодатидан қайтганларидан сўнг дўстимизнинг аҳли аёллари сафар чоғида танишиб, қадрдонлашиб қолган «ҳожи оналар» билан давра қуришни ихтиёр этибдилар. Бир куни «ҳожи оналар» йифилишибди. Биринчи таомдан кейин диний китоб ўқиб, маърифат олибдилар. Кейин эса бозорбоп фийбат гаплар бошланибди. Ҳатто ҳаж ибодати даврида бўлиб ўтган гаплар ҳам кавлаштирилибди. Кимнинг қайси дўкондан нима олганига қадар эсланибди. Хуллас, давра сұхбати уч соат давом этган бўлса, шунинг ўттиз дақиқасигина маърифатга ажратилибди. Бунга гувоҳ бўлган дўстимиз аҳли аёлларини бу даврага қўшилишини таъкилабдилар. Менимча, тўғри қилганлар. Ўшандай давралар барҳам топса, қилинган яхши амаллар сочиб юборилмай, гуноҳлардан сақланилган бўларди. Бу мисолни келтиришимдан мақсад, ҳар қандай ҳожилар ёки ҳожи оналар сизларга ибрат бўла олишмайди.

Ҳикоя қилишларича, Абуллайс Бухорий ҳажга кетаётганларида чўнтакларига икки пулни солдилар-да, ўзларига ўзлари шундай шарт қўйдилар:

– Агар Маккага кетаётганимда ёки у ердан келаётганимда биронни фийбат қилсан, шу икки пулни садақа қиласман.

Маккай мукаррамага бориб келдилар, лекин ўша икки пул чўнтакларида қолаверди. Сўраганларга бу жавобни бердилар:

– Юз марта зино қилгандан кўра бир марта фийбат қилганинг гуноҳи ёмонроқдир...

Фийбатдан тийилмаганларга шу ҳикояни эслатсак, фойдадан холи бўлмас, деб ўйлайман.

«Мусулмон мусулмоннинг кўзгуси», дейилади. Тенгдошлар бир-бирларини, ёши катталар кичикларни фийбатдан қайтариш учун бир гап айтса ҳеч ким ажабланмайди. Лекин афсуски, фарзанднинг ота, уканинг ака айбини кўрсатиши малол олинади. «Бир каттанинг, бир кичикнинг гапига кир», деган мақолга амал қилиш foят оғир кўринади. Ҳолбуки, холис равишда айтилган танқид тўғри қабул қилинса кишининг ўзига фойда. Шунга кўра, катталарни бу гуноҳлардан тортиб олиш мақсадида, танбеҳ беришга кичиклар ҳақди. Шу боис оила одатларига, шароитига қараб туриб, бари бир бу талабларни етказиб қўйиш чорасини кўриш керак бўлади.

Шарафли ҳадисда бу ибратли воқеа баён қилинади:

Бир куни пакана бир хотин баъзи бир масалаларни сўрамоқчи бўлиб, Пайғамбаримизни йўқлаб келди. Билолмай қийналиб юрган нарсаларини билиб олди. Чиқиб кетганидан кейин, ҳазрати Ойиша (р.а.):

– Мунча ҳам пакана хотин экан! – дедилар.

Шунда Пайғамбаримиз (с.а.в.):

– Фийбат қилдинг, эй Ойиша! – деб танбеҳ бердилар.

Фийбатчининг боши узра уч оғат булути бор: фийбатчининг дуоси қабул қилинмайди; қилган хайрли ишлари ҳам қабул қилинмайди; фийбатчининг устида гуноҳлар бирлашади.

Энди бу сатрларга диққат билан эътибор беринг:

Жобир ибн Абдуллоҳ Пайғамбаримиз замонларида қилинган ҳар қандай фийбат ҳидидан сезилганини айтганлар.

«Бу ўша замонларда фийбат оз бўлгани учундир. Ҳолбуки, замонимизда фийбат кўпайган, бурунлар фийбат билан тўлган ва ҳидини фарқлаб бўлмайди. Бу кўнчилар бозорига кирган одамнинг ҳолига ўхшайди:

ифлос ҳиднинг ўткирлигидан у ерда бир дақиқа ҳам туриб бўлмайди. Ҳолбуки, кўнчилар у ерда бемалол овқатланишади, еб-ичишади, лекин асло жирканишмайди. Бу жирканч ҳид уларнинг димогини безовта қилмайди. Чунки ёмон ҳид бурунларига яхшигина ўрнашиб бўлган. Мана, бизнинг кунларимизда фийбат масаласи шундайдир».

Дикқат қилдингизми? «Тўппа-тўғри топиб айтилган гап», демоқчимисиз? Тўғриликка тўғри! Лекин бу гапларни нима учун қўштириноқ ичида баён қилганимга эътибор бердингизми? Гап шундаки, бу ҳақиқат бундан салкам минг йил илгари Фаззолий ҳазратлари томонидан баён қилинган. Ана энди фийбат тўрларининг қанчалик тарқаганини тасаввур қилиб олаверинг.

Ҳар нарсанинг кири бўлганидек, тилнинг кири фийбатдир. Фийбат сўзлари бирорвга нисбатан бўлган ҳасад ўтидан пайдо бўлади. Бу эса мунофиқ кишилар одатидир.

**Ҳикоят.** Шогирд донишманд устодига бир кишини фийбат қилиб сўзлади. Донишманд унинг сўзларини эшитгач, афсус билан бош чайқади-да, деди:

– Менинг ҳузуримда ҳеч кимни фийбат қилиб сўзлама, ёмонлама. Бирорвнинг устидан фийбат қиласанг, фийбатчи эканингни билиб, сендан бадгумон бўламан, нафраланаман. Бирорвнинг обрўсини маҳаллангда ва менинг ёнимда тўкишни истасанг, обрўйинг бутун шаҳар халқи ёнида тўкилади. Сен фийбат қилган одам чиндан ёмон бўлса, уни ўзингга душман қиласан, агар у мақбул ва марғуб киши бўлса, уни фийбат қилишинг билан ўз номингни булайсан, «фийбатчи» деган ном орттирасан. Сенинг сўзинг, фийбатинг билан у киши ёмон ҳолга тушмайди, лекин ярамас, фийбатчи эканинг ҳаммага маълум бўлади. Фараз қиқи, фийбатинг туфайли унинг қадрига, мансабига нуқсон етди, лекин сен бундан нима фойда кўрасан? Бари бир унинг мансаби, мартабасига эга бўлмайсан. Фийбатчимисан, шу ном билан қолаверасан!

Фийбатлардан узоқ киши гуноҳлардан узоқ бўла-ди. Фийбат гирдоби одамларни дарё гирдоби каби ўз домига тортиб, маҳв этади.

*Фийбат кўп ёмондир – юракни додглар,  
Тўғрилик яхшидир – дилларни боғлар.*

Расулуллоҳ (с.а.в.) барчага бир кун рўза тутишни буюрдилар-да, «Ҳеч ким рухсатимсиз рўзасини очмасин», деб таъкидладилар. Тайин қилинган куни ҳамма рўза тутди. Шом бўлганда бир киши келиб: «Эй Аллоҳ-нинг расули, куним рўза билан ўтди, ижозат беринг энди ифтор қиласай», деб сўради. Набий муҳтарам рухсат этдилар. Кетма-кет келавердилар, Пайғабаримиз алайҳиссалом изн беравердилар. Шу аснода бир киши келиб деди:

– Эй Расулуллоҳ! Уйимда оила аъзоларимдан яна икки йигит бор. Улар ҳам кунни рўза билан кеч қилдилар. Аммо мажбуриятингиздан ижозат олгани ҳозир ҳузурингизга келолмадилар. Изн берсангиз улар рўзалини очсалар.

Набий муҳтарам рухсат бермадилар. У киши илтимосини яна такрорлади. Расулуллоҳнинг изн беришга яна хушлари бўлмади. У киши учинчи марта сўрагач, дедиларки:

– Сен айтаётган икки йигит рўза тутгани йўқ. Кундузи инсонларнинг гўштини ейиш билан (*яъни гийбат қилиши билан*) вақт ўтказган кимса рўза тутган ҳисобланмайди. Бор, уларнинг олдиларига. Агар рўзадор бўлсалар, «Энди қусинглар!», деб айт.

У одам уйига бориб Аллоҳ элчисининг амрини уларга етказди. Қусдилар. Ҳар иккаласининг ичидан қуюлиб, лахта-лахта бўлиб қолган қон тушди. У одам Пайғамбар алайҳиссаломнинг ҳузурларига қайтиб бориб бўлган воқеани айтди. Шунда Расулуллоҳ (с.а.в.) дедилар:

– Аллоқга қасам ичиб айтаманки, агар ичларида яна шундай қон қолган бўлса, уларни жаҳаннам олови еяжак.

Азизлар, Рамазон ойида уйларимизда ифторлик бўлади. Барака топгур қариндошларимиз, айниқса, аёллар, ёшлар рўзадор ҳолларида хизмат қиласидилар. Эътибор берганмисиз: ўзаро гап-сўзлар орасида фийбат бўлганми ё йўқми?

Ха, бўлган! Кўллари ишда-ю, тиллари гап билан банд хотинлар билиб-бilmай фийбат эшикларини ланг очиб юборадилар. Агар яна шундай ҳол такрорланса, шу шарафли ҳадисни сўзлаб беринг, зора қариндошларингизнинг гуноҳдан сакланишларига сабабчи бўлиб қолсангиз.

Ҳазрат Навоий фийбат ҳақида фикр юритиб: «Фийбатчига яқин турма. Фийбатчининг тилида ўт бор. Бу ўт доимо ёниб, ловуллаб туради. Унга яқинлашсанг, куйишинг яқин. Фийбатдан фасод ёйилади. Фийбатчининг тили кесилишга маҳкум», деб ёзганлар. Бу ўринда «яқин турма» дейилганда «фийбатчининг фийбатларига қўшилма», деган маъно бор. Тўғри, аввал айтилганидай, «фийбат бошланиши билан даврадан узоқлаш», деган маъно ҳам мавжуд. Лекин буниси шароитга ҳам боғлиқ. Масалан, ифторлик хизматида бўлган қариндош хотинлар фийбатни бошлаганларидан улардан безган келиннинг даврадан чиқиб кетиши қандай бўларкин? Бундай ҳолатларда ўрта йўл топишга тўғри келади.

«Кутадгу билиг»да бир ҳикмат бор: «Зоҳидликни, танҳоликни касб қилган, қаноат рамзи ҳисобланган йўзфурмишга заковат ва ақл рамзи йўгулмиш дейди: «Хеч кимнинг пайини қирқмадим ёки ўзгалар ҳақида фийбат сўзлар гапирмадим», дединг. Ахир атрофингда ҳеч ким бўлмаса, эл-юрт орасида яшамасанг, кимни сўзлайсан, ким ҳақида бир гап айтасан?» Чиндан ҳам эл-юрт орасида юрса-ю, тилини тия олса ўша одам чинакам мард бўла олади. Хотинлар орасида кўпроқ

хизматда бўладиган ардоқли келинларимизга, қизларимизга бу борада осон эмас. Буни «фийбатга беихтиёр қўшилиш», деб атасак, тенгдош дугоналари билан учрашишганда бошлаб юборадиган фийбатлар ўз ихтиёrlари билан бўладики, бундан ўзларини тийишни ўрганишлари зарур.

Қизлар кўча-кўйда дугоналари билан юришни яхши кўрганларидек, фийбат ҳам бошқа иллатлар билан апоқ-чапоқ равищда иш кўришни хушлайди. Фийбатнинг кишига ёлғиз ҳолида даф қилиши кам учрайди.

«Мен елиб-югуриб, фалончининг битмаётган ишини битириб берувдим, яхшилигимни билмади» – бу ўринда фийбатга миннат шерик бўлди.

«Эшитдингизми, фалончининг битмаётган ишини мен битириб бердим!» – фийбат риё билан дўст тутинди.

«Мен турганда нима учун фалончи ўтирап экан бу ўринга?» – фийбат билан ҳасад бир бири билан бирлашди.

«Фалончихонга эри гавҳар кўзли узук олиб берибди. Эрининг кўзини очиб кўйиш керак, иккинчи эркалатмасин уни» – фийбат ифво билан ошно бўлиб, фитнани меҳмонга чорлади.

«Шундай қилиш керакки, эри гапимизга ишониб, фалончихон билан ажрашсин!» – фийбат билан фитна тил бириктирганда қандай оқибат кутиш мумкин? Ҳа, фийбатга ўрганган тил вужудни ёмонликларга торта-веради.

Фийбатнинг улфат мажлисида туҳмат раис бўлсанчи?

Фийбат баҳиллик, хоинлик, меҳрсизлик, дангасалик... қўйинг-ки, барча иллатлар билан дўстлик ришталарини маҳкам боғлаган. Бу ёмонлик риштасини фақат яхши фазилатларни эгаллаш билангина узиш мумкин. Ўзингиз айтинг: вафода собит киши фийбатнинг хоинлик билан биргаликда ҳамла қилишига йўл қўядими? Сахий одам фийбатнинг баҳиллик билан

етаклашиб юришига бефарқ қарайдими? Ўзгаларга меҳр улашувчи покиза қалбli одамни гийбат билан фитна бир ҳамлада йиқита олмайди.

Ҳар қандай одам гийбатга нишон бўлган онларида сиқилади. Бу борада муҳтарама аёллар, айниқса, келинлар тўккан кўзёшлар бир ерга жамланса бир денгиз бўлар, а? Гийбат селига учраган киши ўзини идора қилишни ўрганиши керак. Ҳар бир гийбат учун сиқилавериш дуруст эмас. Қалбини, иймонини муҳофаза этишини истаганлар душманларнинг гийбатига аҳамият бермаганлар. Ҳуда-бехудага сиқилавермаганлар. Гийбатчининг сири ошкор бўлиб, шармандаси чиқишига ишониш лозим. Гийбатчининг гийбати ҳеч қачон пинҳон қолмайди. Бу гийбат эртами-кечми гийбат қилинган кишининг қулоғига етади ва сири очилган гийбатчининг обрўйи пастлайверади. Гийбатчи ҳеч қачон мақсадига етмайди, яхшилик боғидан умид гулени теролмайди.

### **Дўзак ўтиининг тутантириги**

*Уруш икки тан ўртасида олов,  
Чақимчи ўтин ташигувчи, мохов.*

«Гап ташиш»га қандай қарайсиз?» деб сўрасам ажаблансангиз керак. Ҳа, баракалла, бу иллатни деярли барча қоралайди. Айниқса, оналар тўйдан аввал қизларига бу ҳақда насиҳат ҳам қиласадилар. Чунки «гап ташиш» оқибатида оиланинг бузилиб кетиши мумкинлигини яхши биладилар. Биладилар-у, аммо... қизлари келинлик уйларидағи гапларни қизлик уйларига таший бошлаганларида уларни тўхтатмайдилар. «Орқалаб келган гап халтангни кўтаргин-у изингга қайт», демайдилар. Аксинча, қизларига қўшилиб, қуда хонадон аҳлини гийбат қила бошлайдилар. «Ташиб келтирилган гап» қиз ва она орасида қолса майли эди. Бундай гап «ҳомиладор» бўлади ва «болалаб»

тарқайверади. Күп ўтмай қуданинг қулоғига ҳам етиб боради. Қарабсизки, уйига «гап ташиб борган» келин боши узра қора булутлар түпланади. «Йўл қувлаган – хазинага йўлиқар, гап қувлаган – балога йўлиқар», деб бежиз айтилмаган. «Гап қувлаш» – «гап ташиш»нинг айни ўзидир ва уни «чақимчилик» деб атасак тўғрироқ бўлади.

Тўғри, «гап ташиш»да ёмонликни қасд қилиш йўқдек туюлади. Гўё келин онасига кўрган, эшитган, билганларини маълум қилиш билан чеклангандай. Шу гапларни айтмаса ҳам бўлаверади. Айтилмай қолган гап учун кўнгли азият чекмайди. Чақимчиликда эса ёмон ниятни қасд қилиш бор. Чақимчи бир гапни етказмаса ичи қайнаб адо бўлади. Бироннинг бошига ташвиш ёғилишини истагани учун чақимчиликка аҳд қилади. «Гап ташиш» ва «чақимчилик» орасида бундай тафовут бўлгани билан аслида иккала иллатнинг илдизи бир. Таъбир жоиз бўлса, бу боғбоннинг олча ниҳолига гилос пайванд қилганига ўхшайди. Афсус шундаки, бу иллат дарахти ҳар бир оиласда мавжуд. Фақат баъзилар унинг шох отиб, мўл мева беришига йўл қўймаслик чораларини кўрадилар, баъзилар эса ҳар куни сугориб, озуқ бериб қувватлантирадилар. Ана шундай адашганлар учун айрим эслатмалар бор:

Пайғамбаримиз алайҳиссалом: «Энг ёмонларингизни айтсан, улар чақимчилик билан юриб дўстлар орасини бузувчи, бегуноқ одамларнинг бузуқлик, ҳалокат ва мashaққатга мубтало бўлишларини изловчи кишилардир» деганлар. Яна «Яширин равишда кишилар гапига қулоқ солиб, уни ёмон ниятда бошқаларга нақл қилувчи одам жаннатга кирмайди», деб таъкидлаганлар.

**Хикмат.** Бир донишманд шогирдларига насиҳат қилди: «Чақимчилик қилиб одамларни бир-бирларига душман этган одамлар энг ярамас, энг ёмон кишилардир. Бирингиз иккинчингиз сўзини менга етказманг. Мен саломат ва роҳатда бўлган қалб билан сизларга

йүлиқиши истайман». Фикрига ойдиналик киритиб яна дедики: «фалон киши сенинг ҳақынгда бундай сўзлади», «фalonчи сени ёмонлади», деб сўз юритишга «чақимчилик» дейилади. Чақимчиликни инсофли, одамгарчилиги бор киши қабул қилмайди. Чақимчилар ҳар хил бўлмағур сўзларни адоват ва ҳасадлари туфайли сўзлайдилар.

Оила муаммолари ҳақида сўз кетганда қайноналарни танқид қилмайин, дейман-у, аммо айрим қайноналарга хос камчиликдан кўз юмиб ўтолмайман. Шундайлар борки, келиннинг ҳар бир ҳаракати, ҳар бир босган қадамини зийраклик билан кузатади. Озгина камчилик кўрса, тузатишга уринмай, ўглининг келишини орзиқиб кутади. Чақимчилик қилиш унга роҳат бағишлийди. Чақимчилиги оқибатида икки ёшнинг муҳаббат ришталарини бир-бир узаётганини, баҳт саройи устунларига болта ураётганини фаҳм этмайди. Худди шунга ўхшаб, қайнона устидан шикоят қилиш учун эрининг ишдан қайтишини орзиқиб кутувчи хотинлар ҳам бор. Чақимчиликдан роҳатланувчи бу хотин ўғил ва она орасидаги меҳр занжири ҳалқаларини узишга ҳаракат қилаётганини англармикин? Ҳалқимиз «Қизил оёқ келиб, қизил юздан жудо қилди», деганда ана шундай хотинларни назарда тутган. Ота ва ўғил, она ва ўғил орасидаги меҳр занжирини узишга уриниш хайрли оқибат бермаслигини ҳаётдаги кўп мисоллар тасдиқлайди.

Тўғри, тинимсиз чақимчилик ва ҳатто туҳматлар натижасида ўғил хотинига қўшилиб, ота уйини тарк этиши ҳоллари учрайди. Лекин ажralиб чиқиб кетишгандан кейин қай даражада баҳтга эришар эканлар? Ота уйини тарк этиш барча масалаларни ҳал этиб бера олармикин?

Чақимчилик борасида яна бир муаммо мавжуд. Танишларимдан бири менга ҳасрат қилиб қолди. «Келинимни ёмонламайман-у, аммо ўғлимнинг айбини яширганини кечиролмайман. Ўғлимнинг чакки йўлга

кираётганини гумон қиласдим. Лекин у кеч келганда мен ухлаб қолган бўлардим. Ичган-ичмаганини назорат қила олмасдим. Ўғлимнинг ҳолати – ичганми-ичмаганми, чекканми-чекмаганми, биринчи галда келинимга маълум бўларди. Шу боис гумонимни унга бир неча марта айтдим. Лекин келиним бирон марта бўлсин: «Ўғлингиз ичиб келяпти, димоғларидан наша ҳиди ҳам келяпти», демади. Буни аниқлаганимда чора кўриш вақти бой берилганди. Ўғлим майхўрлик жарига ағанаб, гиёҳвандлик балчигига ботиб бўлган эди. Келинимга даъво қилсан, «Мен чақимчилик қилишни истамовдим», дейди. Айтса чақимчилик бўлармиди?»

Савол ўринли. Зимдан қаралса, эрнинг айбини айтиш чақимчилик бўлиб туюлади. Лекин эрни гуноҳ жаридан асраб қолиш учун ота ва онасига маълум қилиб қўйиш чақимчилик эмас, балки савоб. Албатта, эр «Нега чақдинг?!» деб ғазабланади. Лекин хотин эрни ёмонликдан сақлаб қола олмаса, яна нима қилиши керак? «Эримга инсоф бер», деб йифлаб ўтиравериши керакми? Дуо қилиш, у ижобат бўлиши учун ҳаракат ҳам қилиш лозим. Бу ҳаракатга ота ва она қўшилмаса ижобий натижага кутиш қийин. Демак, келиннинг эрга таалмуқли гапи чақимчилик эмас, чунки унда ёмонлик қасди йўқ, аксинча, яхшилик нияти мавжуд.

Набий муҳтарам «Тұхмат ва чақимчилик одамларнинг орасини бузиш учун гапни бир-бирларига нақл қилиб юришдир», дедилар. Масалага шу шарафли ҳадис нуқтаси назари билан боқсак, эрининг айбини қайнотага маълум қилувчи келин ҳаракатида бузунчилик мақсади йўқ. Балки тузатишга бўлган интилиш бор. Агар эр «Отам мен ишлаб топган пулни еб юборяпти», деса-ю, келин бу гапни қайнотасига етказса, чақимчилик қилган бўлади. Чунки бу гап ота ва бола муносабатига путур етказади.

Виждонида ҳассослик бўлмаган одам ҳар қандай ёмон сўзни осонгина ошкора қиласди. Атрофга ёяди. Ёмон сўзнинг тарқалиши кишиларни ва жамиятлар-

ни разолат ботқоғига ботиравчи ҳолдир. Ёмон гап-сўзларнинг тарқалиши кишилар ўртасидаги ўзаро ишончни йўқотади. Жамиятда ёмонлик ғолиб бўлгандек қилиб кўрсатади. Одамлар қалбида ишончсизлик ва умидсизлик руҳини тарқатади. Ёмон гапни ошкор қилиш икки одамнинг бир-бирини сўкишидан, ёмонлашидан ва гийбат-бўхтон қилишидан бошланади. Сўнгра, аста-секин катталашиб жамиятни ҳалокат жари сари олиб келади. Ёмон сўзни ошкор қилишга мазлум, жабр чеккан одамгагина рухсат бор. Мақсад – золимнинг зулмидан жамиятни хабардор этиш.

Ҳазрат Навоийдан ҳикмат: «У ердан бу ерга гап ташувчилар элнинг гуноҳини ўз бўйнига олувчилардир. Чақимчилик ҳатто чин гап бўлса ҳам кўнгилсизdir. Ёлғон бўлса янада нафратлиdir. Сўз етказувчининг хоҳ каттаси, хоҳ кичигини – дўзах ўтининг тутантириги деб бил.

*Ким сўзни териб айтгувчи оғзига бергай,  
Молик ани дўзах ўтининг дудига тергай».*

Мусо алайҳиссалом замонларида жуда қаттиқ қурғоқчилик бўлди. Мусо алайҳиссалом бани Исройл билан биргаликда ёмғир талабида дуолар қилдилар. Лекин ёмғир ёғмади. Шунда Аллоҳ азза ва жалла Мусога (алайҳиссалом) ваҳий юборди: «Мен сенинг ва сен билан бирга чиққан кишиларнинг дуосини қабул қилмайман. Чунки орангизда чақимчи бор». Мусо алайҳиссалом: «Эй Раббим, ким экан у, айт, биз уни ўз орамиздан чиқариб юборайлик», дедилар. Аллоҳ азза ва жалла ваҳий қилиб деди: «Эй Мусо, мен сизларни чақимчиликдан қайтариб, энди Ўзим чақимчилик қилайнми?!» Бу танбеҳни эшитгач, Мусо алайҳиссалом бани Исройлга: «Барчангиз чақимчиликдан тавба қилинг!» деб буюрдилар. Улар тавба қилдилар ва Аллоҳ Таоло уларга ёмғир берди.

Ақд әгалари учун шу ҳикматларнинг ўзи кифоя қиласар, дейман. Агар бу баёнлар камлик қиласа, мавзуни бу ривоят билан давом эттирайлик.

**Ривоят.** Қадим замонда амир овга чиқди. Яланглийкка қўнган маҳалларида амир жиловдорини ёнига чақириди-да, деди:

– Сен билан пойгада от чоптиришни истайман. Кўрайлик-чи, кимнинг тулпори учқур экан?

Жиловдор амирнинг истагига итоат этди. Отларни елдириб, шикор майдонидан узоқлашдилар. Бир маҳал амир отининг жиловидан тортиб, тўхтатди-да, деди:

– Эй жиловдор, қўнглимга келган бир фикрни айтмоқчи бўлиб, сени атайин бу овлоққа бошлаб келдим. Ҳаммадан кўра кўпроқ сенга ишонганим учун сирими ни ўзингга айтаман, эҳтиёт бўл, бирор билмасин.

– Модомики, сиз менга ишонган экансиз, сирингизни ҳеч кимга ошкор қилмайман, ҳеч ким воқиғ бўлмайди, – деб жиловдор онт ичди.

Амир қувониб, қўнглида яшириб юрган сирни унга айтди:

– Укамнинг шу кунларда қилаётган ҳаракатларидан шубҳадаман. Назаримда мени ўлдириб тахтга ўлтиришга уриняпти, шекилли. Шунинг учун менга тажовуз қилишини кутиб ўтирмай, уни маҳв қилмоқчиман. Сен шикор чоғи ёнимдан бир қарич ҳам узоқлашма, укамнинг ҳар бир ҳаракатини кузат.

Овдан қайтишгач, жиловдор қасамини унуди, бевафолик қилиб хиёнат кўчасига кирди. Амирдан эшитганларини унинг шубҳаси остидаги укасига баён қилди. Амирнинг укаси бу чақимчиликдан қувониб, унга суюнчи берди.

Амир укасини йўқ қилишга улгурмай, ўзи вафот этди. Ука тахтга ўлтириши ҳамоноқ жиловдорни ўлимга ҳукм қилди. Жиловдор зору тазарру қилавергач, мақсадини аён қилди:

– Бирорнинг сирини фош қилишдан, чақимчиликдан ёмонроқ гуноқ йўқдир. Акам сенга ишониб сири-

ни айтди, сен хиёнат қилиб, сирини фош этдинг, менга келиб чақдинг. Акамга вафо қилмаган одам менга вафо қиласмиди? Ана энди чақимчилигингнинг мукофотини олавер...

Нима учун «чақимчилик» ёки «чақмачақарлик» деймиз, ўйлаб кўрганмисиз? Менимча, бу сўз «чақиши» феълидан олинганга ўхшайди. Яъни, чақимчилик илоннинг чақишига ўхшатилмаяптими? Ахир илон заҳар солиб, инсонни ўлдирса, чақимчи инсоннинг баҳтини ўлдиради. Айрим ҳолларда чақимчилик орқасидан қотиллик ҳам рўй бериши мумкинлигини тарих кўп кўрган. Шу боис Саъдий Шерозий ҳазратлари бу иллатга «уруш икки тан ўртасида олов, чақимчи ўтин ташибувчи мохов» деб таъриф бериб ёзганларки:

*Эрур ҳаммадан ҳам чақимчи ёмон,  
Унингдек разил кўрмадим ҳеч қачон.  
Бузук фикру нодонлиги бирла ул,  
Бузар икки дўст ўртасини бўлиб жону-дил,  
Уятга қолур ўртада ул разил.*

Яна ёзганларки:

*Чақимчи, яна эски кек қўзгатар,  
Ювошган кўнгилни газаблантирас.  
Сен унга яқинлашма мумкин қадар.  
Ки ўлган илон бошини қўзгатар.*

Чақимчидан ҳамма ёшдаги одамлар ҳазар қиласмади-лар. Ҳатто болалар ҳам бундай иллатли ўртоқдарига «қулоқ» деб лақаб қўйиб оладилар. Болалигимизда ўқитувчига яхши кўринишга уринган чақимчини «Чақмачақар – олов ёқар, томга чиқиб битини боқар», деб калака қиласмадик.

Энди чақимчиликнинг оилаларимизда тутган ўрнига диққат билан разм солайлик: аслида, чақимчилик кўп ҳолларда яширин равишда амалга оширилади.

Лекин мұхтарама оналар бу иллатта нечоғлик боғланғанларини ошкора намойиш этиб, фарзандларига салбай томондан ўрнак бўладилар.

Эсланг-чи, болалигингизда шўхлигинги авж олса онангиз сизни нима деб қўрқитардилар? «Ҳали қараб тур, аданг ишдан келсинлар, бир чақиб берайин, бир адабингни берсинглар...» Бундай пўписалар фақат сизникида эмас, деярли ҳар бир оиласда янграб туради. Афсус шуки, пўписалигича қолмайди, чақма-чақарлик амалга оширилади. Бу чақимчиликнинг икки айби бор: аввало, ота ва бола орасидаги меҳр ўрнида қўрқув кўз очади. Олдинги сужбатлардан бирида айтганимиздек, бола отасининг ишдан қайтишини соғиииб эмас, қўрқув билан кута бошлайди. Иккинчидан: чақмачақарлик туфайли жазо олган бола онгида қандай ҳис уйғонади, ўйлаб кўрмаганмисиз? Эҳтимол, ёмон кўрган одамидан чақмачақарлик ёрдамида қасос олиши мумкинлигини шу жазодан кейин кашф этар? Бола икки ёки уч ёшлигига опаси ёки акасини ота-онасига чақади. Чақимчилиги учун жазо оладими ё мукофотми? Кўп ҳолларда мукофотланади. Болалар мана шундай тарбия билан улғаяр экан, вояга етганиларида уларни чақимчиликдан қайтариш мумкин бўлармикин? Ватан хоинлари қаердан пайдо бўладилар? Балки хоиннинг бу йўлдаги биринчи қадами айнан чақимчилик бўлгандир? Бу иллатнинг оила доирасидан чиқиб, илдиз отиб, жамият оғатига айланишига мутлақо йўл қўймаслигимиз зарур.

Чақимчиликнинг яна бир мудҳиш тури бор: уни «иккиюзламачилик» дейдилар. Пайғамбаримиз алайхиссалом бу тоифа одамларга таъриф бериб дедилар: «Қиёмат куни инсонларнинг энг ярамаси иккиюзламачилардир. Иккиюзламачилар унга келиб бошқача сўзлайди, унга бориб бошқача гапиради. Ким дунёда шундай иккиюзламачи бўлса, Қиёмат куни унинг оловдан икки тили бўлади». «Унга бориб бир турли, бунга

келиб бошқа турли гапириб, бузғунчилік қылғанлар жаннатта кирмайды».

**Ривоят.** Қадим замонда мұътабар бир кишининг миниб юрадиган гүзәл оти нобуд бўлди. Хушомадгўйлар келиб, у одамга таъзия билдирилар. Шоирлар марсиялар битдиар. Отнинг қисматидан ғоят қайфуда эканини билдирилар. Кўп вақт ўтмай ўша мұътабар одамнинг ўзи ҳам вафот этди. Отнинг ўлимидан қайғурғанлар унинг таъзиясида кўринмадилар, марсиялар ҳам ёзилмади.

Ана шунаقا! Риёкор ва мунофиқ одамлар ўз мақсадларига эришгуналарича, бетларига иккюзламачилик пардасини ёпиб, сўнгра олиб ташлайдилар... Риёкор, мунофиқлар арига ўхшайдилар. Уларнинг оғизларида асал ҳам, ниши ҳам бор.

«Мунофиқ эр кишилар ва мунофиқ аёллар ҳаммалари бирдирлар, ёмонликка буюрадилар, яхшиликдан қайтарадилар ва қўлларини (садақадан) маҳкам юмадилар (яъни бахиллар). Аллоҳни унугдилар, бас, У ҳам уларни унугтади. Албатта, мунофиқлар ҳақиқий фосиқдирлар» («Тавба» сурасидан).

«Мунофиқ», «риёкор»ни халқда оддийгина қилиб «иккюзламачи», деб атайдилар. Яна «тили бошқа, дили бошқа» ҳам дейдиларки, бу иллат виждонга мутлақо ётдир. Ортиқча тавозелик ва ҳалим бўлиш одамини риёкорликка ва тилёғламаликка ўргатади ва оқибатда хорлик сари етаклайди.

Риёкорлар кўрсин, деб қилинадиган амалдир. Яъни бу холис ният билан қилинмаяпти. Расулуллоҳ риёни «кичик ширк» деб атаганлар. Ҳаётимиизда риёга кўп дуч келамиз-у, кўрсак ҳам кўрмагандек юраверамиз. Диний либосдаги, аммо динга алоқаси йўқ турли маросимлар замирида риё ётади.

Ўзини зоҳид фаҳмловчи бир киши подшоҳнинг зиёфатига борди. Зиёфатда таомни одатда ейдиган миқдордан оз еди ва намозни доим ўқийдиган тарзидан чўзиб ўқиди. Мақсади подшоҳ уни яхши киши гумон

этиб, эътимоди зиёда бўлиши эди. Зоҳид уйига қайтгач, қорни очлигини айтиб, таом талаб қилди. Унинг бир фаросатли ўғли бор эди. У: «Отажон, подшоҳнинг зиёфатига бориб, ҳеч нима емадингизми?», деб сўради. «Тўйиб емадим», деди зоҳид. «Ундай бўлса, намозингизни ҳам қазо қилибсиз, чунки, қабул бўлгудек намоз ҳам ўқимабсиз», деди ўғил.

Бошқа бир зоҳидни подшоҳ йўқлатибди. Зоҳид ўзига ўзи: «Бир дори еб, ўзимни заиф ва ожиз қилиб борай, токим, подшоҳнинг менга эътимоди зиёда бўлгай», деб ўша дорини ичди. Айтурларки, ичган дориси заҳри қотил экан, билмайин ичиб қўйиб, подшоҳнинг марҳаматига етмай, ўликлар қаторига кирди.

*На қилдинг жаҳонда эртаю кеч,  
Риё бирла ул ишни айладинг ҳеч.*

Ҳазрати Сўфи Оллоҳёр демоқчиларки, ёруғ дунёда кеча-кундуз нимаики тоат-ибодат қилган бўлсанг, барини риё билан йўқ қилиб, савобидан маҳрум бўлдинг.

*Тилингда халқ аро тасбеҳу таҳлил,  
Ва лекин ботининг тазвир ила ҳийл.*

Дейилмоқчики, сен риё билан амал қилувчисан. Чунки халқ орасида «Алҳамд» билан «Лоҳавл»ни жуда кўп ўқийсан. Аммо шу ўқиб турганингда ичинг тўла ҳийлалар билан халқни алдаш пайдасан (тазвир – алдаш).

*Тилингда халқ ичинда ваъз ила дарс,  
Ва лекин ботинингда онга йўқ тарс.*

Дейилмоқчики, халқ ичида юрганингда тилинг ваъзу дарс билан банд. Аммо ботинингда ваъзу насиҳатларингда айтганинг эзгу ишлар йўқолиб, такаббурлик билан, ўзинг ўгит қилган яхши амаллардан номус қилиб юрасан.

*Кийибсан халқ аро факрона лабус,  
Ва лекин ботинингда нангу номус.*

Халқ орасида бошингга саллаю дастор ўраб, фақирина тўнлар кийиб юрасан. Аммо буларнинг барчаси ҳақиқий тақвадорлик ва сўфиийликдан эмас. Балки ўша такаббурлик ва «сўфиий аҳли тақводор ва салоҳдир» деган ном чиқариш учундир. Ичинг ана шундайдир.

*Кўрап кўзга ажаб сўфийнамосан,  
Ниҳонда нафси итга мубталосан.*

Кўзга сўфийнамо, яъни дасторли бошингни тубан солиб, одоб билан туарсан. Аммо ичингда бир ит нафсига мубтало бўлгансан.

**Ҳикоят.** Бир тегирмончининг эшаги йўлда ётган арслон терисини кўрди. Ўзига-ўзи: «Буни кийсам, ҳар кимни кул қилиб оламан» деб, дарҳол арслон терисини кийиб олди. Бу найрангни билмаган ҳайвонлар унга ҳурмат ва таъзимни канда қилмадилар. Тегирмончи буни билиб қолди. Эшакнинг қулоғи катта бўлганидан арслон терисидан чиқиб туарди. Тегирмончи қўлига бир таёқ олиб, эшакни дарҳол олдига солиб, уриб, бир кул каби айлантира бошлади...

Тушуниб турибсиз, бу найрангбоз ва риёкор кимсалар ҳақидаги ҳикоят. Эшак табиатли кимсалар ўзларини арслон кўрсатиб, кишиларни алдайдилар. Ҳолбуки, уларнинг бу ишлари риёкорликдан ўзга нарса эмас. Риёкорлар шу ҳикоятда баён этилган арслон терисидаги эшакка ўхшайдилар.

Ярамас, фосиқ, риёкор одамлар билан суҳбатдош бўлиш – илонни асрашга ўхшайди. Илон ҳар қанча асралса ҳам, заҳари ва зиёни камаймайди, балки кўпаяди. Донолар билан суҳбатдошлик эса аттор дўконини эслатади. Аттор дўкони доимо димогни хушбўй қилиди. Олимларимиз билан ё бевосита, ё билвосита қилинган суҳбат сиз билан биз учун шундай роҳатлидир. Хузурбахш дақиқаларимиз кўпаяверсин, деб дуо қилгач, навбатдаги суҳбатга ўтамиз.

## **МУНДАРИЖА**

<b>БИРИНЧИ БЎЛИМ. ИШҚ-МУҲАББАТ</b>	
Кўнгил саломатлиги .....	4
Икки йўлнинг бири .....	18
Ҳаёт тожи эрур оёғин гарди .....	41
Бемеҳр қариндошдан меҳр билган ёт яхши .....	64
Дўстлик чамани .....	84
Ватан туйгуси .....	117
<b>ИККИНЧИ БЎЛИМ. САОДАТ САРОЙИННИГ КАЛИТИ</b>	
Бахтиёрлик ичра сен .....	134
Инсонийлик тожи .....	153
Не эрур бу жаҳолат? .....	185
Ақд ва оқил .....	196
Донолик амал эрур .....	222
Нодонлигин тан олмас нодон .....	247
Ялқовлик меваси .....	261
<b>УЧИНЧИ БЎЛИМ. ТИЛИНГНИ АВАЙЛА – ОМОНДИР БОШИНГ</b>	
Инсонийлик гавҳари .....	293
Саломнинг хосияти .....	320
Ҳазилнинг таги зил .....	336
Тўғрилик ҳақида .....	347
«Қариндош» иллатлар .....	366
Тухмат тош ёради .....	385
Фийбатнинг касофати .....	396
Дўзах ўтининг тутантериғи .....	408

*Адабий-бадиий нашр*

**ТОҲИР МАЛИК**

**САОДАТ САРОЙИННИНГ КАЛИТИ**

Муҳаррир  
Феруза ҚУВОНОВА

Мусаҳҳиҳ  
Мадина МАҲМУДОВА

Бадиий муҳаррир  
Уйғун СОЛИҲОВ

Техник муҳаррир  
Сурайё АҲМЕДОВА

Компьютерда саҳифаловчи  
Дилдора ЖҮРАБЕКОВА

Лицензия рақами: AI № 252, 2014 йил 02.10 да берилган.

Босишига 25.11.2015 й.да рухсат этилди.

Бичими 84x108 1\32. Босма тобори 13,125.

Шартли босма тобори 22.05.

Гарнитура «Bookman Cyt+Uzb». Офсет қозози.

Адади 5000 нусха. Буюртма № --.

Баҳоси келишилган нархда.

«Янги аср авлоди» НММда тайёрланди.  
100113. Тошкент, Чилонзор-8, Қатортол кўчаси, 60.

***Мурожаат учун телефонлар:***

Нашр бўлими – 278-30-52;

Маркетинг бўлими – 128-78-43. факс – 273-00-14;

e-mail: [yangiasravlod@mail.ru](mailto:yangiasravlod@mail.ru)